


ತುಳುನಾಡ್ಡ ಹಬಿಡಾಸೆರ್

ಬೊಕ್ಕ

ತುಳು ಕೀರ್ತನೆಲು



ಬಿ. ಕೆ. ಶ್ರೀಮತಿ ರಾವ್



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ, ಮಂಗಲೂರು
ಲಾಲ್‌ಬಾಗ್, ಮಂಗಲೂರು, ದ.ಕ.

ತುಳುನಾಡ್ಡ ಹರಿದಾಸೆರ್

ಬೊಕ್ಕ

ತುಳು ಕೀರ್ತನೆಲು

ಸಂಪಾದಕೆರ್

ಬಿ.ಕೆ. ಶ್ರೀಮುಶಿ ರಾವ್

(ಶ್ರೀಗುರುಪ್ರಿಯಾವಿಠಲದಾಸ)



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ, ಮಂಗಳೂರು

ಲಾಲ್‌ಬಾಗ್, ಮಂಗಳೂರು, ದ. ಕ.

Thulunaduda Haridaser Bokka Thulu Keerthanelu:

Brief life history and mission of eminent Haridasas of Thulu Nadu & their works.

Edited by : B.K. Shrimathi Rao (Sri Gurupriya Vittaladasi),

C/o. K. Balakrishna Bhat, Karavali Traders, Near Capitanio High School, Kankanady, Mangalore - 575 002. Ph. 9880992370

Cheif Editor : Dr. Palthady Ramakrishna Achar,

President, Karnataka Tulu Sahithya Academy, Mangalore.

First impression : 2009

Pages : 156 + (viii)

Price : Rs.80/-

Copy Right : Tulu Sahithya Academy

Published by : **B. Chandrasa Rai**

Registrar

Karnataka Tulu Sahithya Academy

Lalbagh, Mangalore - 575 003

Tele-Fax : 0824-2459389

email : tutlu.academy@yahoo.co.in

Prepared Under the Academy

Research Project Work

Cover Page Design,

DTP & Printed at : **Manorama Printers**

Karveel Complex,

Bejai Church Cross Raod,

Bejai, Mangalore - 575 004

Ph. : (0824) - 2222683

ಗುರ್ಕಾರ್ತನ ಮದಿಪು

ಶ್ರೀ ಗುರುಪ್ರಿಯವಿಠಲದಾಸಿ ಅಂಕಿತದ ಬಿ. ಕೆ. ಶ್ರೀಮತಿ ರಾವ್ ಬರೆತಿನ ತುಳುನಾಡ್ ಹರಿದಾಸೆರ್ ಬೊಕ್ಕ ತುಳು ಕೀರ್ತನೆಲು ನಿಕುಲೆ ಕೈಟುಂಡು. ಕರ್ನಾಟಕೊದ ದಾಸ ಪರಂಪರೆ ಬಾರಿ ಪುದರ್ ಪಡೆಯಿನವು. ಉಡುಪಿದ ಪಾಜಕ ಕ್ಷೇತ್ರೊಡ್ ಪುಟ್ಟಿನ ಶ್ರೀ ಮಧ್ವಾಚಾರ್ಯರೇ ದಾಸ ಪರಂಪರೆದ ಮೂಲ ಪ್ರವರ್ತಕರ್. ಕನ್ನಡೊದ ಮಾತ ದಾಸವರೇಣ್ಯೆರೆನಲಾ ಓದು ಬರವು ಕಲ್ತಿ ಜನೊಕುಲೆಗ್ ಗೊತ್ತುಂಡು. ಬರವುದಾಂತಿನಕುಲೆಗ್ಲಾ ಪುರಂದರದಾಸೆರ್, ಕನಕದಾಸೆರ್, ಜಗನ್ನಾಥದಾಸೆರೆನ ಕೀರ್ತನೆಲೆನ್ ಪನ್ನೆರೆ ಗೊತ್ತುಂಡು. ದಾಸ ಪರಂಪರೆ ತುಳುನಾಡ್‌ಡೇ ಉಂಡಾತಿನಾಂಡಲಾ ತುಳುವೆರ್ ದಾಯೆ ಆ ಬಗೆಟ್ ಈಶ್ವೇಟಗ್ ಅಕುಲೆನ್ ನಾಡಿಯರೆ ಪೋತುಚೆರ್. ಉಂದು ನಿಜವಾದ್ ನಮ ಮಲ್ತಿನ ಮಲ್ಲ ತಪ್ಪು. ಆಂಡ ಇತ್ತೆ ಶ್ರೀಮತಿ ರಾವ್ ಆ ಸಂಶೋಧನೆದ ಕೆಲಸೊಗು ಕೈ ಪಾಡ್ ಈಶ್ವೇಟ ಆಯಿನ ತಪ್ಪುನು ಒಪ್ಪು ಮಲ್ತ್ ಕೊರೆರ್.

ಅಕಾಡೆಮಿದ ದುಂಬುದ ಅಧ್ಯಕ್ಷೆರಾಯಿನ ಶ್ರೀ ಯಂ. ಕೆ. ಸೀತಾರಾಮ ಕುಲಾಲೆರ್ ಈ ಸೋದನೆದ ಕೆಲಸೊನು ಶ್ರೀಮತಿರಾಯೆರೆಗ್ ಕೊರ್ಲಿತ್ತೆರ್. ಆರ್ ಕರಿನ ಒಂಜಿ ವರ್ಸೊಡು ತುಳುನಾಡ್ ಬೇತೆ ಬೇತೆ ಕೋಡಿಗ್ ಪೋದು ದುಂಬಿತ್ತಿ ಹರಿದಾಸೆರ್‌ಕುಲೆನ ಪತ್ತೆ ಮಲ್ತೆರ್; ಆತೇ ಅತ್, ಅಕುಲ್ ಬರೆತಿನ ತುಳುಕೀರ್ತನೆಲೆನ್ ನಾಡ್‌ಪತ್ತೆರ್. ಉಂದು ಮಲ್ಲ ಸಾಧನೆದ ಕೆಲಸ. ವಾದಿರಾಜ ಸ್ವಾಮಿಲು ಬರೆತಿನ ದಶಾವತಾರೊ ಪನ್ನಿ ಒಂಜಿ ಕೀರ್ತನೆ ಮಾತೆರ್‌ಗ್ಲಾ ಗೊತ್ತು ಇತ್ತಿನವು. ಅವ್ವೇ ಸಾಲ್‌ಡ್ ಈ ಸಂಶೋಧಕಿ ಶ್ರೀಮತಿ ರಾವ್ 86 ಕೀರ್ತನೆಲೆನ್ ನಾಡ್ ಪತ್ತೆದರ್. 51 ಜನ ತುಳುನಾಡ್ ಹರಿದಾಸೆರ್‌ಕುಲೆನ ಪೊಲಬು ಮಲ್ತ್ ಕೊರೆರ್. ಉಂದು ಎಲ್ಯ ಕೆಲಸೊ ಅತ್. ವಿಶ್ವವಿದ್ಯಾಲಯೊದ ಮೆಟ್ರೊಡ್ ಆರ್ ಈ ಕೆಲಸೊ ಮಲ್ತ್‌ದ್ವಿರಾಂಡ ಒಂಜಿ ಡಾಕ್ಟರೇಟ್ ಪಡೆಯೆರೆಗ್ ಬೋಡಿತ್ತಿನೆಡ್‌ಲಾ ಮಲ್ಲ ಕೆಲಸ.

ದಾಸ ಪರಂಪರೆಡ್ ಕೆಲಸ ಮಲ್ತಿನಕುಲ್ ಪೂರಾ ಓದು ಬರವು ದಿಂಜ ಕಲ್ತಿನ ಬ್ರಾಹ್ಮಣ ವರ್ಗೊದಕುಲುಂದು ಸಾಮಾನ್ಯ ಅಭಿಪ್ರಾಯ. ಆಂಡ ತುಳುನಾಡ್‌ಡ್ ಮಾತ್ರ ಬಜೀ ಬ್ರಾಣೆರ್ ಮಾತ್ರ ಅತ್ ಬ್ರಾಹ್ಮಣೇತೆರೊ ಇತ್ತೆರ್. ಒಡಿಪುದ ದೇವಿದಾಸೆ (ಮಧ್ವದಾಸೆ), ಪಾಣಮಂಗಳೂರ್ (ಇರಾ) ಐತಪ್ಪ ದಾಸೆ ಮೊಕ್ಕ ಬ್ರಾಹ್ಮಣೇತರ ಹರಿದಾಸೆರಾದ್ ಹರಿ ಸೇವೆ ಮಲ್ತಿನಕ್ಕು. ಬೇಂಗ್ರೆದ ಹರಿದಾಸ ನಾರಾಯಣ ಕರ್ಕೇರ (ಅಂಧ ಹರಿದಾಸ), ಬೋಳೂರ್ ಹರಿದಾಸ ದೇವಣ್ಣನಕ್ಕು, ಮೊಗವೀರ ಜಾತಿಗ್ ಸೇರ್ದಿನಕುಲು.

ಕೊಂಕಣಿ ಅಪ್ಪೆ ಬಾಸೆದ ಗೌಡ ಸಾರಸ್ವತ ಬ್ರಾಹ್ಮಣರನ್ನಾ ಇತ್ತರ್. ಆತೇ ಅತ್, ಪುದರ್ ಪಡೆಯಿನ ಉಡುಪಿದ ಯಶೋದಮ್ಮ, ಗಿರಿಬಾಲೆ ಕಾವ್ಯನಾಮೊದ ಸರಸ್ವತಿ ರಾಜವಾಡೆ, ಮುಳಿಯ ಮುಕಾಂಬಿಕಮ್ಮ ಇಂಚೆ - ಪೊಂಜೆನಕ್ಕಲಾ ದಾಸಿಯೆರಾದ್ ಹರಿಸೇವೆ ಮಲ್ತೆದರ್. ಉಡುಪಿ, ಕಾಸರಗೋಡು, ಪುತ್ತೂರು, ಸುಳ್ಯ ಇಂಚೆ ಬೇತೆ ಬೇತೆ ಊರುಲೆಗ್ ಪೋದು ಒರ್ತಿ ಪೊಂಜೊವಾದ್ ಶ್ರೀಮತಿ ರಾವ್ ಮಲ್ತಿ ಕೆಲಸೊ ಮಲ್ತವು. ಶಿಕ್ಷಣ ಕ್ಷೇತ್ರೊಡು ದಿಂಜ ವರ್ಸೊಕಾಲ ಗುಮಾಸ್ತ ಗಿರಿ ಮಲ್ತೊಂದಿತ್ತಿನ ಶ್ರೀಮತಿ ರಾವ್ ತನ್ನ ನಿವೃತ್ತಿದ ಪೂರ್ತುಗು ಸಾಹಿತ್ಯೊದ ಕಳಕ್ ಜತ್ತರ್. ಕನ್ನಡೊಡು ಬರೆವೊಂದಿತ್ತಿನ ಆರೆನ ಆಸಕ್ತಿನ ತೂದು ಯಾನ್ ಆರೆನ್ ತುಳುತ ಕಂಡೊಗ್ ಜಪ್ಪಯೆ. ಶ್ರೀ ಕೃಷ್ಣ ದೇವರೆನ ಚಿಟ್ಕೊದ ಕತೆ, ಅಪರೂಪದ ಅಪರಂಜಿಲು, ತುಳು ಕಬಿತೆದ ಗೊಂಚಲು ಇಂಚೆ ಕೆಲವು ಬೂಕುಲೆನ್ ಬರೆದ್ ತುಳು ಬಾಸೆ, ಸಾಹಿತ್ಯೊನು ತನ್ನ ಹಿಡಿತೊಗು ಕಣತೊಂಡರ್. ಆರ್ ಕನ್ನಡೊಡು ಬರೆಯಿನ ಶ್ರೀ ಹರಿದಾಸವಿಜಯ, ತೌಳವದಾಸ ದರ್ಶನ ಪುದರ್ ಪಡೆಯಿನ ಬೂಕುಲು. ಶ್ರೀ ಹರಿದಾಸ ವಿಜಯೊಡು ಕರ್ನಾಟಕೊದ 63 ಹರಿದಾಸೆರ್ನುಕುಲೆನ್ ಪೊಲಬು ಮಲ್ತ್ ಕೊರ್ತರ್. ಅಂಚೆನೇ ತೌಳವದಾಸ ದರ್ಶನ ಪಣ್ಣಿ ಬೂಕುಡು ತುಳುನಾಡ್ 55 ಹರಿದಾಸೆರೆನ ಪರಿಚಯದೊಟ್ಟುಗು ಆಕುಲೆನ ಅಪ್ರಕಟಿತ ಕನ್ನಡ ಕೀರ್ತನೆಲ್ಲಾ ಬೊಲ್ಪುಗು ಕೊಣದಿನಾರ್. ಅವ್ವೇ ನಮೂನೆದ ಬೂಕುನು ಇತ್ತೆ ತುಳುಟು ಕನತರ್. ವ್ಯಾಸೂರುದ ಶ್ರೀ ಗುರುಗೋವಿಂದವಿಠಲದಾಸೆರೆನ ಶಿಷ್ಯ ಶ್ರೀ ವರಾಹಹರಿವಿಠಲದಾಸೆರೆಡ್ ದೀಕ್ಷೆ ಪಡೆಯಿನ ಈ ಹರಿದಾಸಿ, ದಾಸ ವೃತ್ತಿಗಾದ್ ತನ್ನ ಬದ್ಯಾನ್ ಮುಡಿಪಾದ್ ದೀದ್ ಕೆಲಸ ಮಲ್ತೊಂದುಲ್ಲರ್. ಈತ್ ಎಡ್ಡೆ ಬೂಕುನು ಬರೆದ್ ತುಳುನಾಡ್ಡಾ ಹರಿದಾಸ ಪರಂಪರೆ ಬುಳಿದಿತ್ತಂಡ್ ತೋಜದ್ ಕೊರ್ದು, ತುಳುವಪ್ಪೆನ ಮಟ್ಟೆಲ್ಗ್ ಮಲ್ಲ ಕಾಣಿಕೆ ಕೊರ್ನ ಶ್ರೀಮತಿ ರಾವ್ ಬಿ.ಕೆ. ಮೇರೆಗ್ ಸೋಲೊತ್ದ್ ಸೊಲ್ಮೆ ಸಂದಾಯ ಮಲ್ತೊಂದುಲ್ಲೆ. ನನಲಾತ್ ಬೂಕುಲೆನ್ ಆರ್ ಬರೆಪಿಲೆಕ ಆವಡ್, ಆರೆನ ಕೀರ್ತಿ ನಾಲ್ ದಿಕ್ಕ್ಯಾಗ್ ಪಸರುಲೆಕ ಆವಡ್ ಆರೆಗ್ ಎಡ್ಡೆಪುದ ಮದಿಪು ಪಂಡೊಂದುಲ್ಲೆ.

ಈ ಬೂಕುನು ಪೊರ್ಲು ಪೊಲಿಗಡ್ ಅಚ್ಚಿ ಮಲ್ತ್ ಕೊರ್ಡ್ ಕುಡ್ಡದ ಮನೋರಮಾ ಪ್ರಿಂಟರ್ಸ್- ಮೊಕ್ಲೆಗ್ಲಾ ಎನ್ನ ಉಡಲ್ದಿಂಜಿನ ಸೊಲ್ಮೆಲು.

ಕುಡಲ

ಡಾ| ಪಾಲ್ತಾಡಿ ರಾಮಕೃಷ್ಣ ಆಚಾರ್

2-12-2009

ಗುರ್ಕಾರ್,

ದಾಸೆರೆ ಜೋಳಿಗಡ್ಡೆ...

ತುಳುನಾಡ್ಡ ಕುಡ್ಡದ ನಿವಾಸಿ, ಬಿ. ಕೆ. ಶ್ರೀಮತಿರಾವ್ (ಶ್ರೀಗುರುಪ್ರಿಯವಿಠಲದಾಸಿ) ಸ್ವತಃ ಹರಿದಾಸಿಯಾದಿತ್ತ್ದ್, ನಮ್ಮ ತುಳುನಾಡ್ಡ ಹರಿದಾಸೆರೆನ ಜೀವನ, ಸಾಧನೆ, ಕೀರ್ತನೆಳೆನ್ ಸಂಗ್ರಹ ಮಲ್ಪರೆ ಪಿದಾಡ್ಡಿನ ಒರ್ತಿ ಹೆಚ್ಚಿ ಅನುಭವ ದಾಂತಿನ ಸಂಶೋಧಕಿ. ತುಳು ಬೊಕ್ಕ ಕನ್ನಡ ಭಾಷೆಳೆಡ್ ಕೆಲವು ಕೃತಿಳೆನ್ ಬರೆದ್ ಪ್ರಕಟ ಮಲ್ತಿನಾಳ್. ಹರಿದಾಸೆ ಶ್ರೀ ವಿಜಯದಾಸೆರೆನ ಪರಂಪರೆಡ್ಡ ಬೈದಿನ ಮೈಸೂರ್ಡ್ಡ ಶ್ರೀ ಗುರುಗೋವಿಂದ ವಿಠಲದಾಸೆರೆನ ಶಿಷ್ಯ - ಮಂಡ್ಯದ ಶ್ರೀ ವರಾಹಹರಿವಿಠಲ ದಾಸೆರೆಡ್ಡ 'ಶ್ರೀ ಗುರುಪ್ರಿಯವಿಠಲ' ಅಂಕಿತ ಪಡೆದ್, ಮೈಸೂರ್ಡ್ಡ ಶ್ರೀ ಮುಕುಂದವಿಠಲ ದಾಸೆರೆಡ್ಡ (ಶ್ರೀ ಗುರುಗೋವಿಂದ ವಿಠಲ ದಾಸೆರೆ ಮಗ) ಉಪದೇಶ ಪಡೆದಿನಾಳ್ ಈ ಹರಿದಾಸಿ (ಈ ಲೇಖನದ ಸಂಶೋಧಕಿ). ಎನ್ನ ಈ ಗುರುದ್ವಯೆರೆನ ಚರಣೊನು ತುಳುನಾಡ್ಡ ತೋಂದು, ಕನ್ನಡ ಭಾಷೆಡ್ ಹರಿದಾಸೆ ಸಾಹಿತ್ಯೊಡು ಅಧ್ಯಯನ ಮಲ್ತ್ದ್, ಕರ್ನಾಟಕದ ಒಟ್ಟು 63 ಹರಿದಾಸೆರೆನ ಜೀವನ, ಸಾಧನೆ, ಪರಿಚಯೊದ ಸಂಕ್ಷಿಪ್ತ ಸಂಗ್ರಹ 'ಶ್ರೀ ಹರಿದಾಸೆ ವಿಜಯ' - ಪಣಿ ದಾಸೆ ಸಾಹಿತ್ಯ ಗ್ರಂಥೊನು ಬೊಳ್ಳುಗು ಕೊಣತಿನಾಳೆಗ್, ಇತ್ತೆ ನಮ್ಮ ದಕ್ಷಿಣ ಕನ್ನಡ ಜಿಲ್ಲೆದ (ಅವಿಭಜಿತ) ಹರಿದಾಸೆರೆನ ಪರಿಚಯದೊಟ್ಟುಗು ಅಕ್ಲೆನ ಕೀರ್ತನೆಳೆನ ಸಂಗ್ರಹ ಮಲ್ಪರೆ ಪಿದಾಡಿನಾಳೆಗ್, ನಮ್ಮ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ - ಈ ಕಚ್ಚೊಗ್ ಕೈ ಜೋಡಾದ್ ಪ್ರೋತ್ಸಾಹ ಕೊರ್ಪು ಸಂಶೋಧನಾ ಯೋಜನೆದ ("ತುಳುನಾಡ್ಡ ಹರಿದಾಸೆರೆ ಬೊಕ್ಕ ತುಳು ಕೀರ್ತನೆಲು" ಕ.ತು.ಸಾ. ಅಕಾಡೆಮಿಗ್ ಸಂದಾಯ್ ಸಂಶೋಧನಾ ಯೋಜನೆದ ವರದಿ -2007) ಮೂಲಕ, ಅಚ್ಚಾತೆರಾದ್, ಇರೆತ ಮದೆಟ್ಟುಪ್ಪಿನಂಚಿ ಕೆಲವು ಹರಿದಾಸೆರೆನ್ ಬೊಳ್ಳುಗು ಕೊಣತ್ತ್ದ್, ಅಕ್ಲೆನ್ ಗೌರವಾದರ ಪೂರ್ವಕವಾದ್ ಇಡೀ ಕರ್ನಾಟಕದ ಜನತೆಗೇ ಪರಿಚಯ ಮಲ್ಪರೆಗಂದ್, ಈ ಹರಿದಾಸಿಗ್ ಒಂಜಿ ಸದವಕಾಶ ಕಲ್ಪಿಸೊದು ಕೊರ್ಪೆರ್. ಅಯ್ಯಾತ್ರ ಯಾನ್ ಮನಃಪೂರ್ವಕವಾದ್ ನಮ್ಮ ತುಳು ಸಾಹಿತ್ಯ ಅಕಾಡೆಮಿದ ಮಾಜಿ ಅಧ್ಯಕ್ಷೆರಾಯ್ ಶ್ರೀಯುತ ಎಂ. ಕೆ.ಸೀತಾರಾಮ ಕುಲಾಲ್ ಬೊಕ್ಕ ಮಾಜಿ ರಿಜಿಸ್ಟ್ರಾರ್ - ಎಸ್.ಎಚ್. ಶಿವರುದ್ರಪ್ಪ ಬೊಕ್ಕ ಅಕಾಡೆಮಿದ ಸರ್ವ ಸದಸ್ಯೆರೆಗ್ಲ ಎನ್ನ ಅನಂತ ಕೃತಜ್ಞತೆಲೆನ್ ಸಂದಾವೆ.

ನೇಲ್ಯ ಹರಿದಾಸೆರೆ / ಹರಿದಾಸಿಯೆರೆನ ಕೀರ್ತನೆ ಸಂಗ್ರಹದೊಟ್ಟುಗು, ಈ ಅಲ್ಲೆದಿ ಹರಿದಾಸಿ ಬರೆತಿನೊ ಕೆಲವು ಕೀರ್ತನೆಳೆನ್ನಾ ಕಡೇಕ್ ತೋಚಾದೆ. ಮಾಪು ಮಲ್ಪುಲೆ. ಸೂರ್ಯ ಪ್ರಕಾಶೊದ ಬೊಲ್ಪುಗು - 'ಮೇಘುರಿ'ತೊ (ಮೀಣಕುಹುಳ) ಬೊಲ್ಪು ಸಮನಾ ಪಣ್ಣೆ! ಅಂಡಲಾ ನಮ್ಮ ತುಳುವಪ್ಪೆನ ಮಗಳಾದ್ ಯಾನ್ನಾ ಸಂಪ್ರದಾಯೊಡು ಬತ್ತಿನೊ ಹರಿದಾಸಿಯಾದ್, ತುಳುವಪ್ಪೆನ ಬೊಕ್ಕ ಹರಿದಾಸೆರೆನ ಋಣನ್ ಸಂದಾವೊಡು ಪಣ್ಣೆ.

ಎನ್ನ ಆಸೆ ಮಾತ್ರ ತಪ್ಪಾವಾ? ಅಯ್ಯಾತ್ರ ಮಾತೆರೆಡ್ಲಾ ಕ್ಷಮೆ ಕೇಣೋಂದ್, ಈ ಒಂಜಿ ಬದಗ್‌ದ್ ಬತ್ತಿ ಸುಸಂದರ್ಭೋನು, 'ಸ್ವಾಮಿ ಕಾರ್ಯದೊಟ್ಟುಗು ಸ್ವಕಾರ್ಯ' ಪಣ್ಣಿಲೆಕ, 'ಪತ್ತೆತೊಟ್ಟುಗು ಪತ್ತೊಂಜಿ' ಯಾದ್ ಎನ್ನ ಕೃತಿ ರಚನೆಳೆನ್ನಾ ಈ ಕೃತಿಯೊ ಅಂತೊಡು (ಅನುಬಂಧ-1) ಸೇರಾದ್. 'ಹರಿದಾಸೆರೆ ಸೇವೆ ದೊಟ್ಟುಗು ಎನ್ನೊಲಾ ಉಂದು ಹರಿಸೇವೆ' - ಪಂಡ್ ಆದರ್ತ್‌ದ್ ಮನ್ನಿಪೊಡುಂದು ಅಕಾಡೆಮಿದ ಸರ್ವ ಸದಸ್ಯೆರೆಡ್ಲಾ ಬೊಕ್ಕ ಮಾತಾ ಓದುಗೆರೆಡ್ಲಾ ಯಾನ್ ತರೆಬಾಗ್‌ದ್ ನಟ್ಟೋಣ್ಣೆ.

ಈ ಕೃತಿರಚನೆದ ಕಾರ್ಯೋಗು ಎಂಕ್ ಅನೇಕ ವ್ಯಕ್ತಿಲು ಬೆರೆಸಹಾಯೊ ಕೊರೆರ್. ಅಕ್ಲೆನ್ ಮಾತೆರೆನ್ನಾ ಯಾನ್ ಆಯಾಯ ಹರಿದಾಸೆರೆನ ಪರಿಚಯೊದ ಪುಟೊಕ್ಕೆಡೇ ಉಪಕಾರ ಸ್ಮರಣೆ ಮಲ್ತೊಂದ್. ಆಂಡಲಾ ನನ್ನೊರ ಆ ಮಾತಾ ಹಿರಿಯೆರೆಗ್ಲಾ ಎನ್ನ ದಿಂಜಿದುಡಲ್ ಸೊಲ್ಮೆಲೆನ್ ಸಂದಾವೆ.

'ತುಳುನಾಡ್ಡ ಹರಿದಾಸೆರ್ ಬೊಕ್ಕ ತುಳು ಕೀರ್ತನೆಲು' - ಈ ಕೃತಿಯ್ ಇತ್ತೆ ತುಳುಭಾಷೆಡ್ ಹರಿದಾಸ ಸಾಹಿತ್ಯ ಗ್ರಂಥೊದ ರೂಪೊಡು ಪ್ರಕಟಣೆ ಮಲ್ತುನಂಜಿ ಉದಾರ ಮನಸ್ಸೆನ್ ತೋಜ್ಚಾನ ನಮ್ಮ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಇತ್ತೆದ ಪೊಸ ಅಧ್ಯಕ್ಷೆರ್ಲಾ, ಎನ್ನ ಸಾಹಿತ್ಯ ಕ್ಷೇತ್ರೊದ ಮಾರ್ಗದರ್ಶಕೆರ್ಲಾ ಆದಿಂಜಿ, ಮಾಮಲ್ಲ ಜಾನಪದ ಸಾಹಿತ್ಯ ಸಂಶೋಧಕೆರ್ ಶ್ರೀಯುತ ಡಾ| ಪಾಲ್ವಾಡಿ ರಾಮಕೃಷ್ಣ ಆಚಾರ್ಯರೆಗ್ಲಾ, ಅಕಾಡೆಮಿದ ಇತ್ತೆದ ರಿಜಿಸ್ಟ್ರಾರ್ ಶ್ರೀಯುತ ಬಿ. ಚಂದ್ರಹಾಸ ರೈ ಮೇರೆಗ್ಲಾ;

ಎನ್ನ ಕೋರಿಕೆನ್ ಮನ್ನಿತ್‌ದ್, ಈ ಬೂಕುದ ಬೆರ್ಪಡಿಡ್, ಹಿತವಾಯ್ಚೊ ಪಾತೆರೊಡು ಓದುಗೆರೆಗ್ ಎನ್ನ ಪೊಲಬು ಮಲ್ತ್ ಕೊರಿನ ಶ್ರೀಯುತ ಭಾಸ್ಕರ ರೈ ಕುಕ್ಕುವಳ್ಳಿ, ಪ್ರಾಧ್ಯಾಪಕೆರ್, ಸರಕಾರಿ ಪ. ಪೂ. ಕಾಲೇಜ್, ಚೇಳ್ಚಾರ್; (ಕ.ತು.ಸಾ.ಅ.ಸದಸ್ಯೆರ್) ಮೇರೆಗ್ಲಾ;

ಅಂಚನೇ ಬೂಕುಗು ಪೊರ್ಲುದ ರಕ್ಷಾಪುಟದೊಟ್ಟುಗು ಅಚ್ಚುಕಟ್ಟಾದ್ ಮುದ್ರಣ ಮಲ್ತ್ ಕೊರಿನ ಮಂಗಳೂರ್, ಮನೋರಮಾ ಪ್ರಿಂಟರ್ಸ್ ದ ಮ್ಹಾಲೀಕೆರ್ ಬೊಕ್ಕ ಸಿಬ್ಬಂಧಿ ವರ್ಗೋಗ್ಲಾ;

ಅಂತೂ ತುಳುನಾಡ್ಡ ಈ ಹರಿದಾಸೆರೆ ಕೀರ್ತಿಪತಾಕೆನ್ ಬಾನೆತ್ತರಗೇರ್ಪೆರೆ ಪುಣ್ಯೆನ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಸರ್ವ ಸದಸ್ಯೆರೆಗ್ಲಾ ಎನ್ನ ಉಡಲ್ದಿಂಜಿ ಸೊಲ್ಮೆಲೆನ್ ಸಂದಾವೆ. ಮಂಗಳೂರು

2-12-2009

ಬಿ.ಕೆ. ಶ್ರೀಮತಿ ರಾವ್
(ಶ್ರೀಗುರುಪ್ರಿಯವಿಠಲದಾಸಿ)

ಅರ್ಪಣೆ



ಪರಮ ಗುರುಕ್ಷೇನ ಕರುಣೆನ್ ನೆನೆತೊಂದು
ಗುರುದ್ವಯೈರ್ ಚರಣಗೇರಗೊಂದು
ಹರಿಗುರು ಪ್ರೇರಣೆಡ್ಡ್ ಸಂಗ್ರಹ ಮಲ್ತ್ದ್
ಬರೆಯ್ತೆ "ತುಳುನಾಡ್ಡ ಹರಿದಾಸೆರ್
ಬೊಕ್ಕ ತುಳು ಕೀರ್ತನೆಲು" ಪಣಿ
ಅನರ್ಘ್ಯ ರತ್ನ ಮಾಲಿಕೆನ್ ಎನ್ನ
ಬಿಂಬರೂಪೀ ಪರಮಾತ್ಮೆ
ಶ್ರೀ ಗುರುಪ್ರಿಯ ವಿಠಲನ ಚರಣೊಗು
ಸಮರ್ಪಣೆ ಮಲ್ಪುವೆ.



“ಓಲೋಲು ಎನ್ನ ಮನಸ್ ತಿರ್ಗುಂಡಾ
ಅಪ್ಪಪ್ಪ ಈ ಎಂಕ್ ವಿಷಯವಾಲಾ ಶ್ರೀ ಗುರುಪ್ರಿಯವಿಠಲ”

ಬಿ.ಕೆ. ಶ್ರೀಮತಿ ರಾವ್
(ಶ್ರೀ ಗುರುಪ್ರಿಯವಿಠಲದಾಸಿ)

ಪರಿವಿಡಿ

ಪ್ರಸ್ತಾವನೆ	1
1. ತುಳುನಾಡ್ಡ ಹರಿದಾಸೆರ್ (ತುಳು / ಕನ್ನಡ ಕೃತಿಕಾರರ್): ಹರಿದಾಸೆರ್ ಪ್ರದರ್, ಕಾಲ, ಜನ್ಮಸ್ಥಳ, ಅಂಕಿತನಾಮ ಸೂಚಿ - ಪಟ್ಟಿ ೧ ಹರಿದಾಸೆರ್ ಕಿರು ಪರಿಚಯ	4 9
2. ತುಳುನಾಡ್ಡ ತುಳು ಕೀರ್ತನೆ ಬರೆತಿ ಹರಿದಾಸೆರ್ನ ವಿವರ: ಹರಿದಾಸೆರ್ ಪ್ರದರ್, ಕಾಲ, ಅಂಕಿತನಾಮ, ತುಳು ಕೀರ್ತನೆನ್ನ ಸಂಖ್ಯೆ ಸೂಚಿ - ಪಟ್ಟಿ - ೨,	3477
3. ತುಳು ಕೀರ್ತನೆಕಾರರಾಯಿಂಚಿ ಹರಿದಾಸೆರ್ ಜೀವನ/ ಸಾಧನೆದ ಪರಿಚಯ	36
4. (ಅ) ತುಳು ಕೀರ್ತನೆಲು:	
1. ಶ್ರೀ ವಾದಿರಾಜ ಸ್ವಾಮಿಯೆರ್	65
2. ಶ್ರೀ ವಿಶ್ವೇಂದ್ರ ತೀರ್ಥರ್	66
3. ಪಾವಂಜಿ ಲಕ್ಷ್ಮೀನಾರಣಪ್ಪಯ್ಯೆರ್	66
4. ಪಣಂಬೂರು ಗುರು ಸದಾನಂದೆರ್	71
5. ಸಂತ ಭದ್ರಗಿರಿ ಅಚ್ಯುತ ದಾಸೆರ್	85
6. ಹರಿದಾಸಿ ಉಡುಪಿ ಯಶೋದಮ್ಮ	94
7. ಸಂತ ಭದ್ರಗಿರಿ ಕೇಶವದಾಸೆರ್	112
(ಆ) ಅಲಕ್ಷಿತ ಹರಿದಾಸೆರೆನ ತುಳು ಕೀರ್ತನೆಲು :	
1. ಹೆಬ್ರಿ - ಕಂಡಿಗ ಪದ್ಮನಾಭ ಜೆನ್ನಿಯೆರ್	114
2. ಪಣಂಬೂರು ಲಕ್ಷ್ಮೀನಾರಣಪ್ಪಯ್ಯೆರ್	116
3. ಪುಂಡೂರು ದಾಮೋದರ ಪ್ರಣೆಚಿತ್ತಾಯೆರ್	117
4. ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯೆರ್	120
5. ಪುಂಡೂರು ವೆಂಕಟರಾಜ ಪ್ರಣೆಚಿತ್ತಾಯೆರ್	122
6. ಕಳುವಾರು ವೆಂಕಟರಾಯೆರ್	127
7. ಜತ್ತಿ ಈಶ್ವರ ಭಾಗವತೆರ್	128
8. ಉಡುಪಿ ಶ್ರೀಶದಾಸೆರ್	129
5. ಅನುಬಂಧೊಲು :	
1. ಹರಿದಾಸಿ ಶ್ರೀಗುರುಪ್ರಿಯವಿಠಲದಾಸಿನ ತುಳು ಕೀರ್ತನೆಲು	142
2. ಅವಲೋಕನ	147
3. ಕಡೇತ ರಡ್ಡ್ ಪಾತೆರ	149
4. ಆಕರ ಗ್ರಂಥೊಲು	150
5. ಕ್ಷೇತ್ರ ಕಾರ್ಯೊಡು ಬೆರಿಸಾಯೊ ಕೊರಿನಂಚಿ ಮಹಾನೀಯೆರ್/ ಮಹಿಳೆಯೆರ್	151 152

ಪ್ರಸ್ತಾವನೆ

ನಮ್ಮ ದಕ್ಷಿಣಕನ್ನಡ ಜಿಲ್ಲೆ (ಅವಿಭಜಿತ) ಅನೇಕ ಹರಿದಾಸರೆಗ್ ಜನ್ಮ ಕೊಡ್ತುಂಚಿ ಪುಣ್ಯಭೂಮಿ! ಕಡಲ್ ಬರಿಟ್ ಓಡೊಡು ಬತ್ತಿ ಸಿರಿಕೃಷ್ಣನ್ ಕಣತ್ತ್‌ದ್ ಒಡಿಪುಡು ಉಂತಾಯಿನ ದ್ವೈತಮತ ಸಂಸ್ಥಾಪಕರಾಯಿಂಚಿ ಶ್ರೀ ಮನ್ಮಥಾಚಾರ್ಯರ್ ಪುಟ್ಟುದು ಬುಳೆದ್, ನಡತಿನ ಪವಿತ್ರ ಕ್ಷೇತ್ರ ಉಂದು ನಮ್ಮ ತುಳುನಾಡ್! ದ್ವೈತ ಮತ ಪ್ರಚಾರಕೆರ್, ಪಾಖಂಡ ಮತ ಖಂಡನೆ ಮಲ್ತ್‌ದ್ ಮೆರೆಯಿಂಚಿ ಅಷ್ಟಮಠಕ್ಕೆಡೊಂಜಾಯಿನ ಸೋದೆ ಮಠಾಧೀಶರಾಯಿಂಚಿ ಶ್ರೀ ವಾದಿರಾಜೆರೆ ಪುಣ್ಯಜನ್ಮ ತಪೋಭೂಮಿ ಉಂದು ನಮ್ಮ ತುಳುನಾಡ್!

ಕುಡಾರಿ ರಾಮ ಕಡಲ್ ರಾಜತ್ತ್ ನಟ್ಪದ್ ದಾನೊಪಡೆಯ್ತುಂಚಿನೊ 'ಪರಶುರಾಮ ಕ್ಷೇತ್ರ' - ಈ ನಮ್ಮ ತುಳುನಾಡ್!

ಈ ನಮ್ಮ ತುಳುನಾಡ್ ಪರಿಸರೊಟು ಶ್ರೀ ವಾದಿರಾಜೆರೆಡ್ ಬೊಕ್ಕ ನೆಗತ್ತ್ ತೋಜುವೆರ್ ಹರಿದಾಸರಾಯಿಂಚಿ ಶ್ರೀ ನೆಕ್ಕಾರು ಕೃಷ್ಣ ದಾಸೆರ್ (ವರಾಹ ತಿಮ್ಮಪ್ಪದಾಸೆರ್), ಕುಡ್ಲದ ರಾಘವೇಂದ್ರ ಮಠೊದ ಮೂಲ ಪುರುಷರಾಯಿಂಚಿ ಶ್ರೀ ತುಪಾಕಿ ವೆಂಕಟರಮಣಾಚಾರ್ಯರ್, ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ, ಪಾವಂಜೆ ಶ್ರೀ ಲಕ್ಷ್ಮೀನಾರ್ಣಪ್ಪಯ್ಯೆರ್, ಕುತ್ತತ್ತೂರುದ ಭಕ್ತ ಗೋವಿಂದ ದಾಸೆರ್, ಪಣಂಬೂರುದ ಗುರು ಸದಾನಂದೆರ್, ಪೇಜಾವರ ಜ್ಞಾನದಾನಿ ಶ್ರೀ ಹರಿದಾಸ ಟಿ.ಯಲ್. ವಾಸುದೇವರಾಯೆರ್ - ಇಂಚ ಅನೇಕ ಹರಿದಾಸರೆಗ್ ಜನ್ಮ ಕೊರಿಯಿಂಚಿ ತೊಳವ ಮಾತೆನ ಪುಣ್ಯ ಗರ್ಭೊ ಈ ನಮ್ಮ ತುಳುನಾಡ್!

ಇಂಚೀ ಪುಣ್ಯಾತ್ಮೆದಿ ತುಳುವಪ್ಪೆನ ಪಾದೊಗು ಅಡ್ಡ ಬೂರೋಂದ್, ಆಲೆನ ಮೋಕೆದ ಬಾಲೆಲಾಯ್ ಹರಿದಾಸೆರೆ ಸಿರಿ ಚರಣೊನು ಸುಗಿತೊಂದು, ಎನ್ನೊ ಪೆದ್ದಿ ಅಪ್ಪೆನ ಅಶೀರ್ವಾದೊನು ನೆಟ್ಟೊಂದು 'ತುಳುನಾಡ್ ಹರಿದಾಸೆರ್ ಬೊಕ್ಕ ತುಳು ಕೀರ್ತನೆಲು' - ಪಣ್ಣಿ ಸಂಶೋಧನಾ ಕೃತಿ ರಚನೆಗ್ ಪಜ್ಜೆ ದೀಪುನೆಡ್ ದುಂಬು, ಈ ಲೇಖನ ಬರೆವರೆ ಮೂಲ ಪ್ರೇರಣೆಯಾಯಿಂಚಿ ಸಿರಿಹರಿ, ವಾಯು ದೇವರೆನ್ನಾ, ಅಂಕಿತೋಪದೇಶ ಮಲ್ತಿಂಚಿ ಗುರುಕ್ಷೆನ್ನಾ ಭಕ್ತಿಪೂರ್ವಕವಾದ್ ನೆನೆತೊಂದು, ನಮ್ಮ ತುಳುನಾಡ್ ಹರಿದಾಸೆರೆ ತುಳುಭಾಷೆದ ಕೀರ್ತನೆಲೆನ್ ಒಟ್ಟುಗು ಸೇರ್ಪಾದ್, ಅಕ್ಲೆನ ಜೀವನ ಸಾಧನೆದ ಪರಿಚಯದೊಟ್ಟುಗು ಕೃತಿ ಸಂಗ್ರಹೊನು ಬೊಲ್ಪುಗು ಕೊಣ್ಣಿಂಚಿ ಈ ಒಂಜಿ ಎಲ್ಯ ಕಾರ್ಯೊಗು ದುಂಬಾಯೆ.

ನೀರ್ಗ್ ಜತ್ತಿ ಬೊಕ್ಕನೇ ಅಯ್ ಆಳ ತೆರಿವುನಿ ತೂಲೆ!

ನಮ್ಮ ತುಳುನಾಡ್ ಹರಿದಾಸೆರೆ ಸಾಹಿತ್ಯೊ ಪಣ್ಣಿ ಕಡಲ್ಪೊಲಯಿಡ್

ತೋಜುಂಡು ಅವ್ವು - ಕೆಲವು ಮುತ್ತು, ರತ್ನ, ವಜ್ರೊಲು!

ಪೆಜ್ಜಿನಾತ್ ದುಂಬು ಪೋಯ್ಕೆಗ ಫಳಫಳ ನೆಗಪ್ಪುಂಡು

ಪಜ್ಜೆ ಪಜ್ಜೆಗ್ಲಾ ಸಿರಿ ಸಂಪದೊದ ಮಾಣಿಕ್ಯ ನವರತ್ನೊಲು!

ಒಂಜತ್, ರಡ್ಡತ್, ಕೊಡಿತ್ ದಿತ್ ಒಂಡವು ಸಾಗರೊದತಳೊಟು
ಹರಿದಾಸೆರೆ ಸಂತಾನೊದ ಬೀಜ ಬುಳೆದ್ ಬತ್ತಿಂಚಿ ತುಳುವಪ್ಪೆನ ಮಟ್ಟೆಲ್ದ್!
ಒಂಜೊಂಜೆನೇ ನಾಡ್ ಪೆಜ್ಜೆದ್ ಆಯ್ಕೆ ಮಲ್ತೆ ಯಾನ್!
ಅಧ್ಯಯನ ಮಲ್ಪರೆಗಾದ್ - ಸುರಿದ್ ನೈದ್ ಮಾಲೆ ಕಟ್ಪಾದ್!
ಜನ್ಮೊ ಸಾರ್ಥಕವಾಂಡ್ಂದೆಣ್ಣೆ ಬೊಕ್ಕ ಹರಿದಾಸ ಸಾಹಿತ್ಯೊ ತುಪ್ಪೆ ಉರ್ಕಾರ್ಗ!
ಅಪವಾದ ತತ್ತ್ಂಡ್ ನನ - ಈ ತುಳುನಾಡ್ಡ್ ಹರಿದಾಸೆರ್ ಭಾರೀ ಕಡಿಮೆ ಪಂಡ್ಡ್!
ಹರಿದಾಸೆರೆಗ್ ನಿಲೆಯಾಯಿಂಚಿ ಒಡಿಪುದ
ಸಿರಿಗುರುಪ್ರಿಯ ವಿಠಲಗ್ ಸೊಲ್ತೆ ಸಂದಾವೊಂದು
ಬರೆವರೆ ದುಂಬಾಯಿ ಎನ್ನೊ ಅಧ್ಯಯನೊದ ಕಜ್ಜೊಗು ಪಜ್ಜೆ ದೀಯೊಂದು!

ಸುಮಾರ್ ಐವತ್ತೊಂಜಿ (51) ಜನ ಹರಿದಾಸ/ದಾಸಿಯೆರ್ ನಮ್ಮ ತುಳುನಾಡ್ಡ್
ಮಣ್ಣಾಡ್ ಪುಟ್ಟುದು, ಬುಳೆದ್, ಹರಿದಾಸೆರಾದ್ ಬಾಳ್ದ್, ತುಳುವಪ್ಪೆಗ್ ತುಳು/ಕನ್ನಡ
ಭಾಷೆಡ್ ಕೃತಿ ರಚನೆದ ಮಾಲೆ ನೆಯ್ ಅರ್ಪಣೆ ಮಲ್ತೆರ್. ನನ ಕೆಲವೆರ್ ಕೀರ್ತನೆಕಾರೆರ್;
ಬೊಕ್ಕ ಕೆಲವೆರ್ ಹರಿದಾಸ ಪಂಥೊಡಿತ್ತ್ದ್ ಹರಿಸೇವೆ, ಹರಿಭಕ್ತಿ ಮಲ್ತಿಂಚಿ ಹರಿದಾಸೆರ್.
ಇಂಚಿ ವಿವಿಧ ರೀತಿಡ್ ನಮ್ಮ ತುಳುನಾಡ್ಡ್ ಹರಿದಾಸೆರ್ ಹರಿಭಕ್ತಿ ಪ್ರಚಾರ ಮಲ್ತೆರ್. ಉಂದೆನ್
ಯಾನ್ ಸಂಗ್ರಹ ಮಲ್ಪರೆಗಾದ್ ಅನೇಕ ಧಾರ್ಮಿಕ, ಆಧ್ಯಾತ್ಮಿಕ, ಹರಿದಾಸ ಸಾಹಿತ್ಯೊಳೆನ್
ಅಧ್ಯಯನ ಮಲ್ತಾದ್, ನಮ್ಮ ತುಳುನಾಡ್ಡ್ ಕೆಲವು ಕ್ಷೇತ್ರೊಳೆನ್; ಕೆಲವು ಹರಿದಾಸ/
ಹರಿದಾಸಿಯೆರೆನ್ ಭೇಟಿಯಾದ್ ವಿಷಯ ಸಂಗ್ರಹೊ ಮಲ್ತೊಂಡೆ.

(ಯಾನ್ ಒರ್ತಿ ಹರಿದಾಸಿಯಾದಿತ್ತಿ ನೆಡ್ಡಾವರೆ, ಎಂಕ್ ಈ ವಿಷಯೊದ ಮಿತ್ತ್ ಆಸಕ್ತಿ
ಪುಟ್ಪೊಂಡ್)

ಉದಾ: ಒಡಿಪು, ಕಳುವಾರು, ಕಟೀಲು, ಮೂಲ್ಕಿ, ಪಾವಂಜೆ, ಕಲ್ಲಮುಂಡೂರು, ಕಾರ್ಕಳ,
ಪಣಂಬೂರು, ಸುರತ್ಕಲ್, ಕುತ್ತತ್ತೂರು, ಪಾರಂಕಿ, ಕುಂಭಾಶಿ, ಹೂವಿನಕೆರೆ, ಕುಂಜಾರುಗಿರಿ,
ಸೋದೆ, ಅಗ್ಗಿದ ಕಳಿಯ(ಸಸಿಹಿತ್ತು), ಪಾಜಕ, ಬೆಂಗಳೂರು - ಇತ್ಯಾದಿ ಅನೇಕ ಕ್ಷೇತ್ರೊಳೆಗ್
ಸಂಚಾರ ಮಲ್ತೊಂದು, ಹರಿದಾಸೆರ್ ಬಗ್ಗೆ ವಿಷಯೊನು ತೆರಿಯೊಂದು 'ನನ ಕೆಲವೆರ್ ಹಿರಿಯೆರೆಡ
ದೂರವಾಣಿ ಮುಖಾಂತರ ಪಾತೆರ್ ವಿಷಯ ಸಂಗ್ರಹ ಮಲ್ತೊಂಡೆ. (ಉದಾ: ಕಾಸರಗೋಡು,
ಹೆಬ್ಬಿ, ಹಿರಿಯಡ್ಕ, ಬಂಟ್ವಾಳ, ಐಕಳ, ಒಳಲಂಕೆ, ಬೆಂಗಳೂರು - ಇತ್ಯಾದಿ ಸ್ಥಳೊಕ್ಕೆಗ್)

ಅಂತೂ ಕಡೇಕ್ಲಾ ನಮ್ಮ ದಕ್ಷಿಣ ಕನ್ನಡ (ಅವಿಭಜಿತ) ಜಿಲ್ಲೆಡ್ ಹರಿದಾಸೆರೆ ಸಂಖ್ಯೆ
ಭಾರೀ ಕಡಿಮೆ ಪಣ್ಣಿ ಅಪವಾದ ತತ್ತ್ಂಡ್! ದೇವರೆ ದಯೊಟು ಬೊಕ್ಕ ಗುರುಹಿರಿಯೆರ್
ಅಶೀರ್ವಾದೊಡು ನಮ್ಮ ತುಳುನಾಡ್ಡ್ ಒಟ್ಟುಗು 51 ಜನ ಹರಿದಾಸೆರ್ ಎನ್ನ ದಿಟ್ಟಿಗ್
ಗೋಚರವಾಯೆರ್. ವಿವಿಧ ಮೂಲೊದ ಬೂಕುಳೆಡ್ ಅಕ್ಷೆನ ಬಗ್ಗೆ ತೆರಿಯೊಂಡೆ.

ತುಳು ಭಾಷೆಡ್ ಕೀರ್ತನೆ, ಪದ್ಯೊಳೆನ್ ಬರೆತಿ ದಾಸೆರೆನ ಕೃತಿಕ್ಲೆನ್, ಬೊಕ್ಕ ಅಕ್ಷೆನ
ಜೀವನ ಸಾಧನೆದ ಪರಿಚಯೊಳೆನ್ ಒಟ್ಟು ಸೇರಾದ್ ಸಂಗ್ರಹ ಮಲ್ತೊಂಡೆ. ಕೆಲವೆರ್ ಅಲಕ್ಷಿತ

ಹರಿದಾಸೆರ್ ಪಂಡ್ ತೋಜಾದ್, ಅಕ್ಲೆನ ಕೃತಿಕ್ಲೆನ್ನಾ (ಪದ್ಮೋಳೆನ್) ಬೊಳ್ಳುಗು ಕೊಣರೈಗಾದ್ ಈ ಪಟ್ಟಿಡ್ ಸೇರ್ಪಾಯೆ. ತುಳು ಭಾಷೆಡ್ ಕೀರ್ತನೆ ಬರೆಯಿನ ಒಟ್ಟು 15 ಜನ ಹರಿದಾಸೆರೆನ 80ತುಳು ಕೀರ್ತನೆಳೆನ್ ಈ ಬೂಕುಡು ಸಂಗ್ರಹ ಮಾಲ್ತಾದ್ ಪ್ರತ್ಯೇಕವಾದ್ ತೋಜಾದಂಡ್. (ತೂಲೆ - ಪಟ್ಟಿ -2)

ಅಂತೂ ತುಳು ಭಾಷೆದ ಕೀರ್ತನೆಲೆನ್ (ಹರಿದಾಸ ಕೀರ್ತನೆಲೆನ್) ಮಾತಾ ಹರಿದಾಸೆರೆಡ್ಲಾ (ತುಳು ಕೃತಿಕಾರೆಡ್ಲಾ) ಸಂಗ್ರಹ ಮಲ್ತಾದ್, ಅವೆನ್ ಮಾತೆನ್ನಾ ಒಂಜೇ ಕಡೆಟ್ ಸೇರ್ಪಾದ್, ಸಂಗ್ರಹ ಮಲ್ಪುನಂಚಿ ಕೆಲಸ ಇತೊಮುಟ್ಟು ಏರ್ಪಾ ಮಲ್ತಿಚೆರ್! ಅಂತೂ ನಮ್ಮ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಇಂಚಿ ಒಂಜಿ ಪೊಸ ಕಚ್ಚೊಗು ಪ್ರೋತ್ಸಾಹ ಕೊರ್ಪು ಹರಿದಾಸೆರೆ ಸೇವೆದೊಟ್ಟುಗು ಹರಿಸೇವೆ ಮಲ್ಪರೆಗ್ ಈ ಸಂಶೋಧನಾ ಲೇಖನದ ಮೂಲಕ ಎನ್ನೊ ಕಾರ್ಯೋಗು ಕೈ ಜೋಡಾವರೆಗ್ ದುಂಬತ್ತಿನೆಕ್, ಯಾನ್ ಸಮಸ್ತ ತುಳುವೆರೆನ ಪರವಾದ್ ಸೊಲೆ ಸಂದಾವೆ.

|| ಶ್ರೀ ಕೃಷ್ಣಾರ್ಪಣಮಸ್ತು ||

"ದಾಸ ದಾಸ ದಾಸೆರ್ ದಾಸೊನ್ ಕೊರ್ಪಾ | ಎಂಕ್
ವಾಸುದೇವನಿನ್ನ ಚರಣೊದಾಶ್ರಯ ಕೊರ್ಪಾ ||"

ತುಳುನಾಡ್ಡ ಹರಿದಾಸೆರ್ (ತುಳು/ ಕನ್ನಡ ಕೃತಿಕಾರೆರ್)

ಪಟ್ಟಿ - ೧

ಸಂ. ದಾಸೆರೆ ಪುದರ್	ಕಾಲ (ಕ್ರಿ.ಶ.)	ಜನ್ಮಸ್ಥಳ	ಅಂಕಿತನಾಮ/ ಕಾವ್ಯನಾಮ
1. ಶ್ರೀ ವಾದಿರಾಜ ಸ್ವಾಮಿ*	1480-1600	ಹೂವಿನಕೆರೆ	ಹಯವದನ
2. ಶ್ರೀ ರಘುವರ್ಯ ತೀರ್ಥರು	1630-1712	-	ರಘುತಿಲಕ
3. ಶ್ರೀ ವಿಶ್ವೇಂದ್ರ ತೀರ್ಥರು*	1881-1943	ಉಡುಪಿ	ರಾಜೇಶ ಹಯಮುಖಿ
4. ನೆಕ್ಕಾರು ಕೃಷ್ಣದಾಸರು (ವರಾಹ ತಿಮ್ಮಪ್ಪ)	18ನೇ ಶತಮಾನದ ಉತ್ತರಾರ್ಧ	ನೆಕ್ಕಾರು	ವರಾಹತಿಮ್ಮಪ್ಪ
5. ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ	1750-1830	ಬಂಕಾಪುರ	ಗುರು ವೆಂಕಟೇಶ
6. ಪಾರ್ತಿಪುಟ್ಟ	1760-1820	ಕುಂಬಳೆ	ಕಣಿಪುರ - ಗೋಪಾಲಕೃಷ್ಣ
7. ಭಕ್ತ ದೇವಿದಾಸ (ಮಧ್ವದಾಸ)	18ನೇ ಶತಮಾನ	ಉಡುಪಿ	ಗುರು ಮಧ್ವಪತಿ ಕೃಷ್ಣ
8. ತುಪಾಕಿ - ವೆಂಕಟರಮಣಾಚಾರ್ಯ	19ನೇ ಶತಮಾನ	ಹಳೇ ಮೈಸೂರು	ವೆಂಕಟೇಶ, ವೆಂಕಟರಮಣ, ವೆಂಕಟಾದ್ರಿ,
9. ಪಾವಂಜಿ ಲಕ್ಷ್ಮೀನಾರಾಣಪ್ಪಯ್ಯ*	1854 - 1924	ಅತ್ತೂರು (ಮೂಲ್ಕಿ)	ಲಕ್ಷ್ಮೀನಾರಾಯಣ
10. ಕುತ್ತತ್ತೂರು ಭಕ್ತ ಗೋವಿಂದದಾಸ	1854-1939	ಕುತ್ತತ್ತೂರು	ಗೋವಿಂದದಾಸ
11. ಪಣಂಬೂರು ಗುರು ಸದಾನಂದ*	1876-1946	ಪಣಂಬೂರು	ಸದಾನಂದ, ಶ್ರೀನಿವಾಸ
12. ಬೆಳ್ಳೆ ದಾಸಪ್ಪಯ್ಯ	1877 - 1956	ಬೆಳ್ಳೆ	ಪಾವಂಜಿ ಪುರಾಧೀಶ, ಪಾವಂಜೇಶ ಇತ್ಯಾದಿ.
13. ಅಗ್ನಿದ ಕಳಿಯ ನಾರಾಣಪ್ಪಯ್ಯ	1870-1940	ಅಗ್ನಿದ ಕಳಿಯ (ಸಸಿಹಿತ್ತ)	ನಾರಾಯಣ
14. ಪೇಜಾವರ ಜ್ಞಾನದಾನಿ ಹರಿದಾಸ ಟಿ.ಯಲ್. ವಾಸುದೇವರಾಯರು	1918-2001	ಪೇಜಾವರ	ವಾಸುದೇವ
15. ಮೈರ್ಮಾಡಿ ಗೋವಿಂದ ಗೋಳಿ	1902-1959	ಮೈರ್ಮಾಡಿ (ಕೊಕ್ಕರ್ಣೆ)	ಗೋವಿಂದ
16. ಬೋಳಾರ ವಾಸುದೇವಯ್ಯ	1873-1934	ಬೋಳಾರ	ವಾಸುದೇವ ದಾಮೋದರ
17. ಹೆಬ್ಬಿ - ಕಂಡಿಗ ಪದ್ಮನಾಭ ಜೆನ್ನಿ*	1908-1988	ಹೆಬ್ಬಿ - ಕಂಡಿಗ	ಪದ್ಮನಾಭ

18.	ಕಳುವಾರು ವೆಂಕಟರಾವ್*	1905 - 1983	ಬೊಳ್ಳಾಜಿ	ವೆಂಕಟಪತಿ, ವೆಂಕಟರಮಣ
19.	ಮಟ್ಟಿ ವಾಸುದೇವ ಪ್ರಭು	1805-1865	ಮಟ್ಟಿ	ರಮಾಧವ, ರಮಾಪತಿ
20.	ಮಟ್ಟಿ ಶೇಷ ಪ್ರಭು	19ನೇ ಶತಮಾನ	ಮಟ್ಟಿ	ಮಂಗಲಾಂಗ, ರಮಾಕಾಂತ ರಮೇಶ
21.	ರಾಮಕೃಷ್ಣ ಕವಿ ಮೂಲ್ಕಿ	1832-1910	ಮೂಲ್ಕಿ	ಗುರು ನರಸಿಂಹ
22.	ಬಂಗ್ಲೆ ನಾರಾಯಣ ಕಾಮತ್	1872-1918	ಮೂಲ್ಕಿ	ನಾರಾಯಣ
23.	ತಲಚೇರಿ ವಾಸುದೇವ ಶ್ಯಾನುಭಾಗ	19ನೇ ಶತಮಾನ	ಮೂಲ್ಕಿ	ಶ್ರೀ ವಾಸುದೇವ
24.	ಮಟ್ಟಿ ಶ್ರೀನಿವಾಸ ಪ್ರಭು	19ನೇ ಶತಮಾನ	ಮಟ್ಟಿ	ಶ್ರೀನಿವಾಸ
25.	ಮೂಲ್ಕಿ ವಿಟ್ಟಪ್ಪ ಭಾಗವತ	20ನೇ ಶತಮಾನದ ಉತ್ತರಾರ್ಧ	ಮೂಲ್ಕಿ	ಮೂಲವಿಠಲ
26.	ಸಂತ ಭದ್ರಗಿರಿ ಅಚ್ಯುತದಾಸರು*	1932 -	ಭದ್ರಗಿರಿ	ಮೂಲನಾರಾಯಣ
27.	ಸಂತ ಭದ್ರಗಿರಿ ಕೇಶವದಾಸರು*	20ನೇ ಶತಮಾನ	ಭದ್ರಗಿರಿ	ದಾಸ ಕೇಶವನುತ
28.	ಹರಿದಾಸಿ ಮುಳಿಯ ಮೂಕಾಂಬಿಕಾ ಅಮ್ಮ	1870-1942	ಪೂಣೆ (ಬಂಟ್ವಾಳ)	ಮೂಕಾಂಬೆ, ಮೂಕಾಂಬಿಕೆ
29.	ಸರಸ್ವತಿ ರಾಜವಾಡೆ	1913-1994	ಬಳಂಜಾಲ (ಉಡುಪಿ)	ಗಿರಿಬಾಲೆ
30.	ಹರಿದಾಸಿ ಉಡುಪಿ ಯಶೋದಮ್ಮ*	1931-	ಉಡುಪಿ	ಯಶೋದೇಶ ಕೃಷ್ಣ
31.	ಪಾಂಬೂರು ಲಕ್ಷ್ಮೀನಾರಾಯಣಯ್ಯ*	19ನೇ ಶತಮಾನ	ಪಾಂಬೂರು	ನಾರಾಯಣ
32.	ಕೆರೆಮಠ ಗೋವಿಂದ ಉಪಾಧ್ಯಾಯ ಘನಪಾಠಿ	1909-1977	ಬಡನಿಡಿಯೂರು	ಗೋವಿಂದದಾಸ
33.	ಹೊಸಬೆಟ್ಟು ಶ್ರೀಧರಾಚಾರ್ಯ	1919-1989	ಸುರತ್ಕಲ್	
34.	ಪುಂಡೂರು ದಾಮೋದರ ಪ್ರಣೇಚಿತ್ತಾಯ*	1888-1971	ಪುಂಡೂರು	(1) ಆಯಾಯ ಕ್ಷೇತ್ರದ ದೇವರ್ಕಳ ಹೆಸರು (ತುಳು ಕೀರ್ತನೆಗಳಲ್ಲಿ) (2)ದಾಮೋದರ (ಕನ್ನಡ ಕೀರ್ತನೆಗಳಲ್ಲಿ)

35. ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯ*	19ನೇ ಶತಮಾನದ ಪೂರ್ವಾರ್ಧ	ದೇಲಂಪಾಡಿ	ದೇಲಂಪಾಡಿ ಮಹಾಲಿಂಗ
36. ಪುಂಡೂರು ವೆಂಕಟರಾಜ ಪುನೇಚಿತ್ತಾಯ*	1936-	ಪುಂಡೂರು	—
37. ಪಾವಂಜೆ ಗುರುರಾಯರು	1869-1948	ಪಾವಂಜೆ	—
38. ಕೆ. ವೆಂಕಟರಾಯಾಚಾರ್ಯ	1919-1996	ಸುರತ್ಕಲ್	ಜಯಂತ
39. ಹಂಡೆ ಶ್ರೀಪಾದದಾಸರು	1888-1976	ತೀರ್ಥಹಳ್ಳಿ (ಮಹಿಷಿ)	ಹನುಮನಯ್ಯ
40. ಉಡುಪಿ ಶ್ರೀಶ ದಾಸರು*	1935-	ಉಡುಪಿ	ಶ್ರೀಶ
41. ಹಂಡೆ ಗುರು ವೇದವ್ಯಾಸ ದಾಸರು	20ನೇ ಶತಮಾನ	ಉಡುಪಿ	ವೇದವ್ಯಾಸ
42. ಬಜಪೆ ವೆಂಕಟರಾವ್ ಉಪಾಧ್ಯಾಯ	1886-1970	ಬಜ್ಜೆ	—
43. ನಿಡಂಬೂರು ರಾಮದಾಸರು	1898-1988	ಅಂಬಲಪಾಡಿ	ಶ್ರೀಕೃಷ್ಣ
44. ಕಲ್ಲಮಂಡೂರು ಶ್ರೀನಿವಾಸ ದಾಸರು	19ನೇ ಶತಮಾನದ ಉತ್ತರಾರ್ಧ	ದೈಲಬೆಟ್ಟು	ಶ್ರೀನಿವಾಸ ದಾಸ
45. ಹರಿದಾಸ ಕುಕ್ಕಜೆ ಐತಪ್ಪ ಯಾನೆ ರಾಮಯ್ಯ ನ್ಯಾಕ	20ನೇ ಶತಮಾನ	ಇರಾ - ಕುಕ್ಕಜೆ (ಪಾಣಿ ಮಂಗಳೂರು)	ಐತಪ್ಪ ದಾಸ
46. ಜತ್ತಿ ಈಶ್ವರ ಭಾಗವತರು*	1872-1945	ಬಾಯಾರು	ವಿಶ್ವೇಶ್ವರ, ವಿಶ್ವನಾಥ
47. ಜತ್ತಿ ಕೃಷ್ಣ ದಾಸರು	20ನೇ ಶತಮಾನದ ಪೂರ್ವಾರ್ಧ	ಬಾಯಾರು	ಕೃಷ್ಣ
48. ಮಯ್ಯವಟಿ ವೆಂಕಟರಮಣಯ್ಯ	1874-1935	ಮಾಯಿಪ್ಪಾಡಿ (ಕುಂಬಳೆ)	ವೆಂಕಟರಮಣ, ವೆಂಕಟೇಶ
49. ಚಿತ್ರಾಪುರ ರಾಮ ಐಗಳ್	1914-1996	ಚಿತ್ರಾಪುರ	ರಾಮ, ರಾಮಚಂದ್ರ
50. ಹರಿದಾಸ ದೇವಣ್ಣತ್ತಿ	1854-1924	ಬೆಂಗೈ (ಉಳ್ಳಾಲ)	ದೇವಣ್ಣ ದಾಸ
51. ಬೆಂಗೈ ಹರಿದಾಸ ನಾರಾಯಣ ಕರ್ಕೇರ (ಅಂಧ ಹರಿದಾಸರು)	20ನೇ ಶತಮಾನದ ಪೂರ್ವಾರ್ಧ	ಬೆಂಗೈ	ನಾರಾಯಣದಾಸ

* ತುಳು ಕೀರ್ತನೆ ರಚನೆ ಮಲ್ತಿ ಹರಿದಾಸೆರ್. ಪರಿಶಿಷ್ಟೊಡು ಅಕ್ಲೆನ ಕೀರ್ತನೆ ಸಂಗ್ರಹೊನು ಕೊರ್ತುಂಡು.

ತುಳುನಾಡ್ಡ (ಅವಿಭಜಿತ ದಕ್ಷಿಣ ಕನ್ನಡ ಜಿಲ್ಲೆ ದ) ಹರಿದಾಸೆರ್

ತುಳುನಾಡ್ಡ ಚರಿತ್ರೆಡ್ ಬಂಗಾರ್ಡ್ ಪುಟೊಮೂಡಿನ್ ಕ್ರಿ.ಶ. ಪದಿಮೂಜನೇ ಶತಕೊಡು. ಶ್ರೀಮಧ್ವಾಚಾರ್ಯೆರ್ ತುಳುನಾಡ್ಡ್ ಅವತಾರಮಲ್ತಿಂಚಿ ಸ್ವರ್ಣಯುಗೊ! ಸಾಟಿ ಇಜ್ಜಂದಿನೊ ತತ್ವಜ್ಞಾನಿಲೆನ್ ಜಗತ್ತ್ ಗ್ ಕೊರಿನೊ ಸೌಭಾಗ್ಯ ನಮೊ ತುಳುನಾಡ್ಡಂದ್ ಪಣೊಲಿ!

ತುಳುನಾಡ್ಡ ಪೆರ್ಮೆದ ಮಗೆ ಶ್ರೀ ಮನ್ಮಾಧ್ವಾಚಾರ್ಯೆರ್! ಕನ್ಯಾಕುಮಾರಿಡ್ಡ - ಗೋಕರ್ಣ ಮುಟ್ಟಿಗ್ ಪರಶುರಾಮ ಕ್ಷೇತ್ರಂದ್ ಪಣ್ಣೆರ್. ಸಪ್ತಕ್ಷೇತ್ರೊಲೆಡ್ ಸುರುತಕ್ಷೇತ್ರೊನೆ ಒಡಿಪು¹(ಉಡುಪಿ). ದಕ್ಷ ಶಾಪಗ್ರಸ್ಥನಾಯಿಂಚಿ ಚಂದ್ರನೊ ತಪಸ್ಸಾಗ್ ಒಲಿದು ಬತ್ತಿ 'ಚಂದ್ರಮೌಳೀಶ್ವರೆ'ಮೂಲಿಪ್ಪನೆಡ್ಡಾವರ'ಉಡುಪಿ' (ಒಡಿಪು) ಪಣ್ಣಿಪುದರ್ ಬೈದೊಂಡೊಂಡ್, ವಿದ್ಯಾಂಸರೆ ಹೇಳಿಕೆ.

ರಾಮ ಭೋಜರಾಜೆ ಯಜ್ಞೋಗಾದ್ ಭೂಶೋಧನೆ ಮಲ್ಪಿಂಚಿ ಕಾಲೊಡು ಆಯೊಗ್ ಬತ್ತಿ ಸರ್ಪಹತ್ಯಾ ದೋಷಪರಿಹಾರಗಾದ್ ಬೊಳ್ಳಿದ ಪೀಠಮಲ್ತ್ ದ್, ಕನರ್ಪಾಡಿ, ಪುತ್ತೂರು, ಕಡಿಯಾಳಿ, ಬೈಲೂರು, ಪಣ್ಣಿ - ಈ 4 ಊರುಲೆಡ್ ದುರ್ಗಾಲಯೊಳೆನ್ನಾ; ಮುಚ್ಚಿಲಕೋಡು - ಮಾಂಗೋಡು - ತಾಂಗೋಡು - ಅರತೋಡು ಪಣ್ಣಿ ನಾಲೂರುಲೆಡ್ ನಾಗಾಲಯೊಲೆನ್ ಸುವರ್ಣ ನಾಗಪ್ರತಿಮೆನ್ ಪ್ರತಿಷ್ಠಾಪನೆ ಮಲ್ತ್ ದ್ ಪೂಜಿಸೊಯೆ! ರಾಜನ ಯಜ್ಞಾಂತೊಡ ಸಮಯೊಗು ಪರಶುರಾಮ ದೇವೆರ್ ಪ್ರತ್ಯಕ್ಷಿ ರಾದ್ ಆಶೀರ್ವಾದೊ ಮಲ್ತೆರ್!²

ರಾಜಾಶ್ರಯ ಪಡೆದ್ ಗೋದಾವರೀ ತೀರೊಡ್ಡು ಸುಮಾರು ಒಂಜರೆ ಸಾವಿರೊ ವರ್ಸೊಡ್ಡು ದುಂಬು ಪರಶುರಾಮ ಕ್ಷೇತ್ರೊಗು ವಲಸೆ ಬತ್ತ್ ದ್ ತುಳುನಾಡ್ಡೇ ವಾಸ ಮಲ್ತಿಂಚಿ ಬ್ರಾಣೆರ್ ಗ್ 'ತೌಳವ ಬ್ರಾಣೆರ್' ಪಂಡ್ ಪುದರಾಂಡ್!³

ಕೆಲವು ಕಾಲೊಡ್ಡು ಬೊಕ್ಕ ವೇದಾರಣ್ಯೊಡು ಪುತ್ರಕಾಮನೆಗಾದ್ ಭರದ್ವಾಜಗೋತ್ರದ ಬ್ರಾಹ್ಮಣಗ್ ಸ್ವಪ್ನೊಡು ದೇವೆರ್ ಅಪ್ಪಣೆ ಮಲ್ತಿ ಪ್ರಕಾರೊಡು, ರಾಮ ಭೋಜ ರಾಜೆ ಯಜ್ಞ ಮಲ್ತಿ ಕುಂಡೊಗು ಕ್ಷೀರಾಭಿಷೇಕ ಮಲ್ಪಿನಗ ಅಲ್ಪ ಅನಂತಾಸನ ಆಯಿಂಚಿ ಪದ್ಮನಾಭ ಸ್ವಾಮಿ ಉದ್ಭವವಾಯೆರ್!⁴ ಇತ್ತ ನಮ ತೂಪಿನ 'ಅನಂತೇಶ್ವರ', ಗುಡಿಯೇ ಈ 'ಅನಂತಪದ್ಮನಾಭ ಸ್ವಾಮಿ' ಪ್ರತ್ಯಕ್ಷವಾಯಿನೊ ಪುಣ್ಯಕ್ಷೇತ್ರ!

1, 2, 4 : ಶ್ರೀ ಹರಿದಾಸ ಕೀರ್ತನ ಮಂಜರಿ (ಹರಿದಾಸ ರತ್ನ ಹೆಚ್. ಶ್ರೀಧರಾಚಾರ್ಯ ವಿರಚಿತ ಹರಿಕಥಾ ಸಂಗ್ರಹ) ಸಂ. : ಬಿ.ಕೆ. ಶ್ರೀಮತಿರಾವ್ (ಶ್ರೀಗುರುಪ್ರಿಯವಿಠಲದಾಸಿ), ಪ್ರ: ಶ್ರೀ ಗುರುಪ್ರಿಯ ಪ್ರಕಾಶನ, ಮಂಗಳೂರು - 2007

3: ಶಿವಳ್ಳಿ ಬ್ರಾಹ್ಮಣ ವೈದಿಕ ಪರಂಪರೆ - ಲೇ: ಅಗ್ನಿಚಿತ್ ದೀಕ್ಷಿತ ಅನಂತಕೃಷ್ಣ ಸೋಮಯಾಜೀ 'ಶಿವಳ್ಳಿ ಬ್ರಾಹ್ಮಣರು' ಸಂ.: ಎಚ್. ಬಿ. ಎಲ್. ರಾವ್, ಮುಂಬೈ. ಪ್ರ: ಶಿವಳ್ಳಿ ಪ್ರತಿಷ್ಠಾನ, ಮುಂಬೈ, 2001.

೮

ಒಡಿಪುಡು 8 ಮೈಲು ದಕ್ಷಿಣೋಗು 'ಪಾಜಕ' ಕ್ಷೇತ್ರೋಡು ಕ್ರಿ.ಶ. 1238 (ವಿಳಂಬಿ ಸಂವತ್ಸರ ಆಶ್ವಯುಜ ಮಾಸ ಶುಕ್ಲಪಕ್ಷ ವಿಜಯದಶಮಿ) ನಡುಮನೆ ನಾರಾಯಣ ಭಟ್, (ನಡ್ಡಂತಿಲ್ಲಾಯ) ಬೊಕ್ಕ ವೇದಾವತಿ ದಂಪತಿಲೆಗ್ ಅನಂತಪದ್ಮನಾಭ ದೇವರೆ ಕೃಪೆಟ್ ಪುಟ್ಟಿ ಬಾಲೆಗ್ ವಾಸುದೇವ ಪಣ್ಡ ನಾಮಕರಣ ಆಂಡ್. ಸನ್ಯಾಸಾಶ್ರಮೊಡು - ಪೂರ್ಣಪ್ರಜ್ಞ; ವೇದಾಂತ ಸಾಮ್ರಾಜ್ಯ ಪಟ್ಟಾಭಿಷೇಕೊಡು - ಆನಂದ ತೀರ್ಥ ಪಣ್ಣಿ ಪುದರಾಂಡ್. ಬಾಲ್ಯೊದ ಗುರುಕುಳು - ತೋಟಂತಿಲ್ಲಾಯೆರು; ಆಶ್ರಮ ಗುರುಕುಳು - ಅಚ್ಯುತ ಪ್ರಜ್ಞೆರು.

ಗೋಪೀ ಚಂದನೊಡ್ಡು ಬತ್ತಿ ಗೋಪಾಲಕೃಷ್ಣನ್ ಒಡಿಪುಡು ನಿಲೆ ಮಲ್ತಾದ್ ದ್ವೈತ ಮತ ಸಂಸ್ಥಾಪಕೆರಾದ್, ಶ್ರೀ ಕೃಷ್ಣ ಪೂಜೆಗಾದ್ ಎಣ್ಣೊ ಜನ ಶಿಷ್ಯರೆಗ್ ಸನ್ಯಾಸ ದೀಕ್ಷೆ ಕೊರ್ಯೆರ್ ಆಚಾರ್ಯೆರ್. ದ್ವೈತ ಮತ ಪ್ರಚಾರ ಮಲ್ತಾದ್ ತುಳುನಾಡ್ ಹಳ್ಳಿಡ್ ಪೊತ್ತಾಯಿನ ತುಡರ್ಡ್ ಬೊಲ್ಪುನು ಇಡೀ ವಿಶ್ವೊಗು ಬೆಳಗೊಯಿನ ಮಹಾತ್ಮೆ ಶ್ರೀ ಮನ್ಮಥಾಚಾರ್ಯೆರ್ ಜಗದ್ಗುರುವಾದ್ ಮೆರೆಯೆರ್! ಹರಿದಾಸೆರೆಗ್ ಮೂಲ ಗುರುವಾಯೆರ್! ಪ್ರತಿವಾದಿಳೆನ್ ಆತ್ಮ ಬಲೊಡ್ಡಾವರ ಜೈತೆರ್. ಶ್ರೀ ವೇದವ್ಯಾಸೆರೆನ ದರ್ಶನ, ಬ್ರಹ್ಮಸೂತ್ರೊಗು ಉಪನಿಷತ್ತುಲೆಗ್ ಭಾಷ್ಯ ರಚನೆ, ಭಾಗವತ, ಭಾರತ, ರಾಮಾಯಣ ಗ್ರಂಥೊಲೆಗ್ ವ್ಯಾಖ್ಯಾನ ರಚನೆ, ಸರ್ವಮೂಲ ಗ್ರಂಥ ರಚನೆ, ಸಂಗೀತೊದ ವಿವಿಧ ರಾಗೊಲೆಡ್ ಪಣ್ಯೆರಾಪಿಂಚಿ ದ್ವಾದಶ ಸ್ತೋತ್ರ ರಚನೆ - ದಾಸಸಾಹಿತ್ಯೊಗು ಮಧ್ವಾಚಾರ್ಯೆರೆನ ಅಂಕುರಾರ್ಪಣೆ.

ಆಚಾರ್ಯೆರ್ ಮಠಸಂಸ್ಥಾನ ಕಟ್ಟಿನಾರತ್ತ್. ಆರ್ ತನ್ನೊ ಸನ್ಯಾಸಿ ಶಿಷ್ಯರೆಗಾದ್ ಕೊರಿನ ಆಸ್ತಿ ಪಂಡ ದೇವರೆ ಮೂರ್ತಿ ಮಾತ್ರ. ದುಂಬಗ್ ಅನುಯಾಯಿಲು ಬುಳೆಲೆಕ ಅಷ್ಟ ಮರೊಕ್ಕು ಮೂಡ್ಡು ಬತ್ತಂಡ್⁵.

ಪಿಂಗಳ ಸಂವತ್ಸರ (ಕ್ರಿ.ಶ. 1317) ಮಾಘ ಶುದ್ಧ ನವಮಿದಾನಿ ಆಚಾರ್ಯೆರ್ ಕಡೇತ ಸರ್ತಿ ಬದರಿಗ್ ಪೋಡು ಒಡಿಪುಡು ಮಾಯ್ಯ ಆಯೆರ್. ಆಂಡ ಇನಿಕ್ಲಾ ಅದೃಶ್ಯರಾದೇ ಒಡಿಪುಡುಲ್ಲೆರ್ ಪಂಡ್ ಹಿರಿಯೆರ್ಡ್ ಹೇಳಿಕೆ; ಸಾಧಕೆರ್ಡ್ ಅನುಭವ.⁶

5,6: ಮಧ್ವಾಚಾರ್ಯರು ಮತ್ತು ಮಠ ಪರಂಪರೆ, ಲೇ : ವಿದ್ವಾನ್ ಉಡುಪಿ ರಾಮನಾಥ ಆಚಾರ್ಯ, 'ಶಿವಳ್ಳಿ ಬ್ರಾಹ್ಮಣರು', ಸಂ.: ಎಚ್. ಬಿ. ಎಲ್. ರಾವ್, ಮುಂಬೈ, ಪ್ರ.: ಶಿವಳ್ಳಿ ಪ್ರತಿಷ್ಠಾನ, ಮುಂಬೈ - 2001

ತುಳು / ಕನ್ನಡ ಕೃತಿಕಾರರ - ಕಿರು ಪರಿಚಯ

ಪರಶುರಾಮ ಸೃಷ್ಟಿನ್ ತುಳುನಾಡ್‌ಂದ್ ಪಣ್ಣೆರ್. ಈ ಅವಿಭಜಿತ ದಕ್ಷಿಣ ಕನ್ನಡ ಜಿಲ್ಲೆ ಬೊಕ್ಕ ಕಾಸರಗೋಡು ಮುಟ್ಟಿದ ನಮ್ಮ ತುಳು ನೆಲೊತ ಮಣ್ಣಾಡ್ ಮೂಡ್ತು ಬತ್ತಿ ಹರಿದಾಸರೆನ್ ನಾಡ್ ಪೆಜ್ಜಿದ್ ದೆಪ್ಪುನ ಕಜ್ಜೊಗು ಜತ್ತಿನಾಲೆಗ್, ಏರೆನ್ ಪೆಜ್ಜುನಿ, ಏರೆನ್ ಬುಡ್ತುನಿ ಪಣ್ಣೆ ವಿಚಾರೊಡು ಯಾನ್ ಕೆಲವರೆನ ಸಲಹೆ ಗೆತ್ತೊಂಡೆ. ಆ ಮಾತಾ ಹಿರಿಯರೆಗ್ಲಾ ಎನ್ನ ಉಡಲ್ದಿಂಜಿನ ಸೊಲ್ತೆಲು.

ಹರಿದಾಸ ಪರಂಪರೆಗ್ ನಾಂದಿ ಪಾಡ್ಡಿಂಚಿ ಹರಿದಾಸರೆ ಮೂಲ ಗುರು ಶ್ರೀ ಮನ್ಮಥಾಚಾರ್ಯರೆನ್ ತುದಿತೊಂದು, ಆ ಪರಂಪರೆಟ್ ವೈಷ್ಣವ ಸಿದ್ಧಾಂತೊಗು ಕೈ ಜೋಡಾದ್ ದುಂಬೊತ್ತಿನ ಹರಿದಾಸ/ ದಾಸಿಯರೆಗ್ ಎನ್ನಸಾರ ಸಾರ ಸೊಲ್ತೆಲು. ಅಕ್ಲೆನ ಕಿರು ಪರಿಚಯೊನ್ ಕೊರ್ಯೆರೆ ಪ್ರಯತ್ನ ಮಲ್ಪುವೆ. ಕೆಲವರ್ ಕನ್ನಡ/ತುಳು ಕೃತಿ ರಚನೆಕಾರರ್; ಬೊಕ್ಕ ಕೆಲವರ್ ಕೀರ್ತನೆಕಾರರ್; ನನ ಕೆಲವರ್ ಹರಿದಾಸ ಪಂಥೊಡಿತ್ತ್ದ್ ಹರಿಸೇವೆ, ಹರಿಭಕ್ತಿ ಮಲ್ಪಿಂಚಿ ಹರಿದಾಸರ್. ಇಂಚ ವಿವಿಧ ರೀತಿಡ್ ನಮ್ಮ ತುಳುನಾಡ್ ಹರಿದಾಸರ್ ಹರಿಭಕ್ತಿ ಪ್ರಚಾರ ಮಲ್ತೆರ್.

1. ಶ್ರೀ ವಾದಿರಾಜ ಸ್ವಾಮಿಯೆರ್: ಸೋದೆ ಮಠಾಧೀಶರಾದ್, 'ಹಯವದನ' ಅಂಕಿತೊಡು ಸಂಸ್ಕೃತ, ಬೊಕ್ಕ ಕನ್ನಡ ಭಾಷೆಡ್ ಅನೇಕ ಕೃತಿ ರಚನೆ ಮಲ್ತಿನಾರ್, ದಶಾವತಾರೊನು ತುಳು ಭಾಷೆಡ್ಲಾ ಪದ್ಯ ರಚನೆ ಮಲ್ತೆರ್. ಅವೆನ್ ಪರಿಶಿಷ್ಟೊಡು ಪ್ರತ್ಯೇಕವಾದ್ ಕೊರ್ತುಂಡು. ಆರೆನ ಬಗ್ಗೆ ಮಾತೆರೆಗ್ಲಾ ತೆರಿದಿನ ವಿಷಯ. ಆಯ್ತೆಡ್ಲಾವರ ಹೆಚ್ಚಿನ ಮಾಹಿತಿ ಮೂಲು ಕೊರ್ತೆಜಿ.

2. ಶ್ರೀ ರಘುವರ್ಯ ತೀರ್ಥರ್: ಫಲಿಮಾರು ಮಠ ಪರಂಪರೆತ ಇರ್ವನೇ ಯತಿಲು. 16 ವರ್ಷೊದೊಲಾಯಿ ಅಪಾರ ಪಾಂಡಿತ್ಯ ಪಡೆಯ್ತಾರ್. 'ರಘುತಿಲಕ' - ಅಂಕಿತೊಡು ಕನ್ನಡ ಭಾಷೆಡ್ ಗದ್ಯ, ಪದ್ಯ, ಸುಳಾದಿಲೆನ ರಚನೆ; 'ರಘುನಾಥ ವಿಜಯ' ಪಣ್ಣೆ ಛಂದೋಗ್ರಂಥ; ರಘು ಪರಿಭಾಷಾ - ಪಣ್ಣೆ ತರ್ಕ ಪ್ರಕರಣ; ಪ್ರಮೇಯ ನವಮಾಲಿಕೆಗ್ 'ಸಾರಭ' - ಪಣ್ಣೆ ಟೀಕೆ; 'ಸುಭಾಷಿತ ಮಂಡಲ' - ಪಣ್ಣೆ ಸೂಕ್ತಿಲೆನ ಸಂಕಲನ; ಕೆಲವು ವೇದಾಂತ ಗ್ರಂಥೊಲೆಗ್ ಲಘು ಟಿಪ್ಪಣಿ - ಇತ್ಯಾದಿ ಸಂಸ್ಕೃತ ಕೃತಿಕ್ಲೆನ ರಚನೆ ಮಲ್ತಿನಾರ್. ವಾದಿಲೆಡ ಜೈತ್‌ದ್, ಸೋತ್‌ನಕ್ಲೆಡ್ ಪಡೆಯ್ನ ಜಯ ಪತ್ರಿಕೆಲೆನ್ ಶ್ರೀಕೃಷ್ಣ ಮಂದಿರೊದ ದ್ವಾರೊಡು ತೋರಣದಲ್ಕ ಕಟ್ಟಿದೆರ್! ಸುಮಾರು ನಲ್ಪತ್ತೆನ್ ವರ್ಷ ಕಾಲ ಪೀಠವಾಳ್ತಿನ ಕೀರ್ತಿಲಾ ಆರೆಗುಂಡು!

3. ಶ್ರೀ ವಿಶ್ವೇಂದ್ರ ತೀರ್ಥರ್: ಸೋದೆ ಮಠಾಧೀಶರಾದ, 'ರಾಜೇಶ ಹಯಮುಖಿ' ಪಣ್ಣಿ ಅಂಕಿತೊಡು ಕೆಲವು ಕನ್ನಡ ಕೀರ್ತನೆಲೆನ್ನಾ ಬೊಕ್ಕ ಒಂಜಿ ತುಳು ಭಾಷೆದ ಪದ್ಯೊನ್ನಾ ಬರೆತೆರ್. ತುಳು ಪದ್ಯೊನು ಪರಿಶಿಷ್ಟೊಡು ಕೊರ್ತುಂಡು.

4. ನೆಕ್ಕಾರು ಕೃಷ್ಣದಾಸ (ವರಾಹತಿಮ್ಮಪ್ಪ) : ಪೆರಂಪಳ್ಳಿ ಗ್ರಾಮೊದ ಕೃಷ್ಣದಾಸೆರ್ ಮಾಲಿಂಗೇಶ್ವರನ ಭಕ್ತೆರ್. ಆರೆನ ಪೂರ್ವಿಕೆರ್ ಭಾಗವತ ಸಂಪ್ರದಾಯೊದಕ್ಲ. ಕ್ರಮೇಣ ಮಾಧ್ವ ದೀಕ್ಷೆ ದೆತೊಂದಿನೆಡ್ಲಾವರ, ಕೃಷ್ಣದಾಸೆರ್ ಶಿವಭಕ್ತೆರಾದ್ ಶಿವಪರ ಸ್ತುತಿಲೆನ್ನಾ ಮಲ್ತಿನಾರ್. 'ವರಾಹ ತಿಮ್ಮಪ್ಪ' ಪಣ್ಣಿ ಅಂಕಿತೊಡು ಕನ್ನಡ ಭಾಷೆಡ್ ಅನೇಕ ಕೃತಿಲೆನ ರಚನೆ ಮಲ್ತಿನೆನ್ ಹಿರಿಯ ಸಂಶೋಧಕೆರಾಯ್ನ ಡಾ| ಶ್ರೀನಿವಾಸ ಹಾವನೂರೆರ್ ಸಂಪಾದಕತ್ವೊಡು ಈ ಕೃತಿಕುಲು ಇಂಚಪೊಗು ಬೊಳ್ಳುಗು ಬತ್ತಂಡ್ಂದ್ ಪಣ್ಣೊಲಿ. ಮುಖಪುಟ ಚಿತ್ರೊಡು ನೆಕ್ಕಾರು ಕೃಷ್ಣದಾಸೆರೆ (ವರಾಹ ತಿಮ್ಮಪ್ಪ) ಭಾವಚಿತ್ರೊನು ಸೇರ್ಪಾಯೆರೆ ಡಾ| ಶ್ರೀನಿವಾಸ ಹಾವನೂರೆರ್ ಅನುಮತಿ ಪಡೆದ್ಂದ್. ಶ್ರೀಯುತ ಹಾವನೂರೆರ್ಗ್ ಸೊಲ್ತೆ ಸಂದಾವೆ.

5. ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ: ಬಂಕಾಪುರೊತ ಬ್ರಾಹ್ಮಣೆ ವೈರಾಗ್ಯೊಡು ದೇಶಾಂತರೊಟು ಒಡಿಪು ಶ್ರೀಕೃಷ್ಣನ ಸನ್ನಿಧಿಡ್ ಸೇವೆ ಮಲ್ತೊಂದು, ಕೃಷ್ಣ ಸ್ತುತಿಟ್ ಭಕ್ತೆರೆನ ಅಭಿಮಾನಿಯಾದ್, ಕ್ರಮೇಣ ಅಲ್ಪಡ್ ಮೂಲ್ಕಿ ವೆಂಕಟರಮಣ ದೇವಸ್ಥಾನೊಗು ಬತ್ತದ್, ಮಂತ್ರಾಲಯ ಮೂಲದ ಶ್ರೀ ವಿಜಯೇಂದ್ರ ತೀರ್ಥರೆಡ್ ಪ್ರತಿಷ್ಠಾಪನೆ ಆದಿತ್ತಿ ಶ್ರೀ ಉಗ್ರನರಸಿಂಹ, ಗೌಡ ಸಾರಸ್ವತ ಅರ್ಚಕೆರೆ ದೇವರಾದಿತ್ತಿ ಶ್ರೀ ವಿಠಲ ದೇವರ್, ಕಾರ್ಕಳೊಡ್ ಮೂಲ್ಕಿಗ್ ಬತ್ತದ್ ನಿಲೆಯಾದ್ ನಿತ್ಯ ಪೂಜೆಡುಪ್ಪಿ ಶ್ರೀ ವೆಂಕಟರಮಣ ದೇವರ್ - ಈ ತ್ರಿತಯ ರೂಪಿ ಪರಮಾತ್ಮನ ಪರಮ ಭಕ್ತಿಯಾದ್, ವೆಂಕಣ್ಣ ಹರಿದಾಸೆರಾದ್ 'ಗುರುವೆಂಕಟೇಶ' ಅಂಕಿತೊಡು ಮಲ್ತಿನ ಸುಮಾರು ಕೃತಿಕುಲು ಇಂಚಪೊಗು 'ಶ್ರೀ ಗುರುಪ್ರಿಯ ವಿಠಲಾಂಕಿತ ಬಿ. ಕೆ. ಶ್ರೀಮತಿ ರಾವ್ - ಮೇರೆನ ಪ್ರಯತ್ನೊಡು ಬೊಕ್ಕ ಸಂಪಾದಕತ್ವೊಡು - "ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ" ಪಣ್ಣಿ ಬೂಕುದ ರೂಪೊಡು ಬೊಳ್ಳುಗು ಬತ್ತದ್, ಅಚ್ಚಾತೊಡಿತ್ತಿ ಆ ಹರಿದಾಸೆರ್ ಬೊಕ್ಕ ಆರೆನ ಕೀರ್ತನೆಲು (ಸುಮಾರು 34 ಕೀರ್ತನೆಲು) ಕರ್ನಾಟಕೊದ ಜನತೆಗ್ ಪರಿಚಯವಾದ್, ದಾಸ ಸಾಹಿತ್ಯೊದ ತುಪ್ಪೆಗ್ ನಮ್ಮ ತುಳುವೆರೆನ ಕೊಡುಗೆನ್ ಅರ್ಪಿಸೊಯೆರ್.

6. ಪಾರ್ತಿಪುಟ್ಟ : ಕಾಸರಗೋಡುದ ಕುಂಬಳೆ ಗ್ರಾಮದ ಕಣಿಪುರ ಗೋಪಾಲಕೃಷ್ಣ ದೇವಸ್ಥಾನದ ಪಾಟಳಿ ಕುಟುಂಬದ ವರ್ಗೊಗು ಸೇರಿನಾಯೆ ಸುಬ್ಬೆ. ಅಪ್ಪೆನ ಪುದರ್ ಪಾರ್ವತಿ. ಪಾರ್ವತಿನ ಮಗೆ ಸುಬ್ಬೆ - 'ಪಾರ್ತಿಪುಟ್ಟ' ಪಂಡ್ಲಾಂಡ್ಂದ್ ತೆರಿನಕ್ಲ ಪಣ್ಣೆರ್. ದಕ್ಷಿಣಕನ್ನಡದ ಪ್ರಾಚೀನ ಯಕ್ಷಗಾನ ಕೃತಿಕ್ಲೆಡ್ ಪಾರ್ತಿಪುಟ್ಟನ ಕೃತಿಕ್ಲೆ ಸುರೂತವು ಪಣ್ಣೆ ಹೇಳಿಕೆ ವಿದ್ವಾಂಸೆರ್. 'ಕಣಿಪುರ ಗೋಪಾಲಕೃಷ್ಣ' - ಅಂಕಿತೊ, ಆಯೊನ ಪ್ರತಿಯೊಂಜಿ ಕೃತಿಕ್ಲೆಡ್ ತೋಜುಂಡು. ಪಾರ್ತಿಪುಟ್ಟ, ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ, ದೇವಿದಾಸ - ಮೊಕ್ಕ ಮೂಜಿ ಜನೊಕ್ಲಾ

ಒಂಜೇ ಕಾಲೊಡ್ಡಿನಕುಲು. ಪಾರ್ತಿಪುಬ್ಬನ ಕೃತಿಗಳು ಸುಮಾರು 11 ಯಕ್ಷಗಾನ ಪ್ರಸಂಗ ರಚನೆಲು. 'ಯಕ್ಷಗಾನ ವಾಲ್ಮೀಕಿ' ಪಣ್ಣಿ ಪರ್ಮೆ ಪಾರ್ತಿಪುಬ್ಬಗುಂಡು!

7. ಭಕ್ತ ದೇವಿದಾಸ (ಮಧ್ವದಾಸ): ಒಡಿಪುದ ದೇಯಿ ಪಣ್ಣಿ ಪೊಂಜವುಗ್ಬ್ರಾಹ್ಮಣ ಪಂಡಿತರೊರ್ಯಡ್ ರಡ್ಡ್ ಜೋಕ್ ಪುಟ್ಟುಂಡು. ಸುರುತ ಪೊಣ್ಣು ಕಾವೇರಿ. ರಡ್ಡ್ ನೇತ ಆಣ್ 'ದಾಸೆ'. ದಾಸೆ ಪ್ರಾಯೊಗು ಬನ್ನಗ, ಅಪ್ಪೆನ್ನಾ ಬೊಕ್ಕ ಅಕ್ಕನ್ನಾ ಕಳೆಯೊಂದು ವಿರಾಗಿಯಾದ್, ಶ್ರೀಕೃಷ್ಣ ಮಲೊತ ಉಲಾಯಿ ಪೊಗ್ಗೆರೆ ಜಾತಿ ಅಡ್ಡ ಬತ್ತಂಡಲಾ, ಪಿದಾಯಿಡೇ ಕನಕನ ಕಿಂಡಿಲ್ಲನೇ ಕುಲ್ಲೊಂದುಪ್ಪಿನ ದಾಸಗ್, ಒಂಜಿ ದಿನ ಸ್ವಪ್ನೊಡು ಬ್ರಾಹ್ಮಣನ ವೇಷೊಡು ಶ್ರೀ ಮಧ್ವಾಚಾರ್ಯರ್ ದರ್ಶನ ಕೊರ್ಯೆರ್! "ದೇವರೆ ಮೈಮೆ ಬರೆಲಾ" ಪಂಡ್ಡ್ ಅಪ್ಪಣೆ ಮಲ್ತೆರ್. ಮನದಾನಿ ಪುಲ್ಕಾಂಡನೇ ದಾಸೆ ಬದಲಾದ್ ಪೋಯೆ! ಮಧ್ವದಾಸೆ ಆದ್, ಆಯನ ಮನಸ್ಸಾಗ್ ಬತ್ತಿನ ಮಧ್ವಶಾಸ್ತ್ರ ಸಾರ ರೂಪವಾದಿಂಚಿ 'ನೀತಿಸೂಕ್ತಿ ಚೌಪದಿ' ಲೆನ್ 67 ಚರಣೊಡು 'ಗುರುಮಧ್ವಪತಿ ಕೃಷ್ಣ' ಅಂಕಿತೊಡು ರಚಿಸೊಯೆ. ಕುಂಜಾರುಗಿರಿ (ವಿಮಾನಗಿರಿ) ದುರ್ಗಾದೇವಿ ಸ್ವಪ್ನೊಡು ದರ್ಶನ ಕೊರ್ದು, ದೇವಿನ ಅಭಯೊಡು 'ದೇವಿ ಮಹಾತ್ಮೆ' ಯಕ್ಷಗಾನ ಪ್ರಸಂಗ ರಚನೆ ಮಲ್ತೆ. ಕನ್ನಡೊಡು ಯಕ್ಷಗಾನ ರಂಗೊಡು ದೇವೀ ಮಹಾತ್ಮೆ ಬರೆಯಿನ ಸುರುತ ಕವಿಯೇ ದೇವೀದಾಸೆ! ಅಯ್ಯಾವರ ಒಡಿಪುದ ಮಧ್ವದಾಸಗ್ 'ದೇವೀದಾಸ'ಂದ್ ಪುದರ್ ಪ್ರಚಾರೊಗು ಬತ್ತಂಡ್. ಇಂಚ ಸುಮಾರು ಯಕ್ಷಗಾನ ಕೃತಿಲೆನ್ನಾ, 'ವೆಂಕಟೇಶ ಮಹಾತ್ಮೆ' ಪಣ್ಣಿ ಕಥಾ ಕೀರ್ತನೆನ್ನಾ ಬರೆದ್, ಪುಣ್ಯಕ್ಷೇತ್ರೊಲೆನ್ ಸಂಚಾರ ಮಲ್ತೊಂದು, ತುಳುನಾಡ್ ಜನೊಕ್ಲೆಗ್, 'ಪಾರ್ತಿಪುಬ್ಬಡ್ ಬೊಕ್ಕ ದೇವಿದಾಸನೇ' ಪಣ್ಣಿ ಸ್ಥಾನೊಡು ಮೆರೆಯೆ!

8. ತುಪಾಕಿ ವೆಂಕಟರಮಣಾಚಾರ್ಯ: ಮಂಗಳೂರ್ ನೆಲ್ಲಿಕಾಯಿ ಶ್ರೀ ರಾಘವೇಂದ್ರ ಮಠತೊ ಮೂಲ ಸಂಸ್ಥಾಪಕರಾಯೊ ತುಪಾಕಿ ವೆಂಕಟರಮಣಾಚಾರ್ಯರ್ ಅಪ್ಪೆನ ಆದೇಶದ ಪ್ರಕಾರ ಕುಲದೇವರಾಯೊ ತಿರುಪತಿ ವೆಂಕಟೇಶ ದೇವರೆನ ಪುದರ್ (ವೆಂಕಟೇಶ, ವೆಂಕಟರಮಣ, ವೆಂಕಟಾದ್ರಿ ಇತ್ಯಾದಿ) ಅಂಕಿತೊಡು ಸುಮಾರು 328 ಕೀರ್ತನೆ ರಚನೆ ಮಲ್ತೆರ್. ಕರ್ನಾಟಕ ಸರ್ಕಾರದ ಸಮಗ್ರ ದಾಸ ಸಾಹಿತ್ಯ ಸಂಪುಟೊಡು ಆರೆನ ಕೀರ್ತನೆಲು ಇಂಚಪೊಗು ಬೊಳ್ಳುಗು ಬೈದೊಂಡ್.

9. ಪಾವಂಜಿಲಕ್ಷ್ಮೀನಾರಣಪ್ಪಯ್ಯ: ಮೂಲ್ಕಿದ ಕೈತಲ್ ಅತ್ತೂರು ಗ್ರಾಮೊದ ಸ್ಥಾನಿಕ ಬ್ರಾಹ್ಮಣೆ. ಜೋಕ್ಲಿ ಜ್ಜಂದಿನೆಕ್ ನೇಲ್ಯಮ್ಮೆರೆಗ್ ದತ್ತು ಪುತ್ರೆಯಾದಿತ್ತಿ ಲಕ್ಷ್ಮೀನಾರಾಯಣೆ, ಜಡಭರತನಲ್ಕ ತಿರೊಂದಿತ್ತಿನಾಯೆ ಪತ್ತ್ ವರ್ಸ ಪ್ರಾಯೊಡೇ ಇಲ್ಲ ಬುಡ್ಡ್ ಅಲೆಯೊಂದಿತ್ತಿನಾಯನ್ ಕಾರ್ಕಳೊಡ್ಡಿ ಭುವನೇಂದ್ರ ತೀರ್ಥರ್ (ಗೌಡ ಸಾರಸ್ವತ ಸಮಾಜೊದ ಗುರುಕುಳು) ಆಶ್ರಯ ಕೊರ್ದು, ವಿದ್ಯೆ ಬುದ್ಧಿ ಕಲ್ಪಾದ್, ದುಂಬಗ್ ಆಶು ಕವಿಯಾಪಿನಲ್ಕ

ಲಕ್ಷಣವು ಲಕ್ಷ್ಮೀನಾರಾಯಣ್ ಹರಿ ಕಥೆಗೆ ಲೈನ್‌ಗೆ ಸೇರಿಯೆ. 'ಹರಿಕಥೆ ನಾಣ' ಪುರಾಡ್ ಮೆರೆಯು ಹರಿದಾಸೆ ಲಕ್ಷ್ಮೀನಾರಾಯಣ್ 'ಲಕ್ಷ್ಮೀನಾರಾಯಣ' ಅಂಕಿತೊಡು ಅನೇಕ ಕೃತಿರಚನೆ ಮಲ್ತಿನೆನ್ ' ಪಾವಂಜೆ ಹರಿದಾಸವಾಣಿ' ಪಣ್ಣಿ ಪುಸ್ತಕೊನು ಪಾವಂಜೆ ಸತ್ಸಂಗ ಸಮಿತಿದಕುಲು ಪ್ರಕಟ ಮಲ್ತೆರ್. ದಕ್ಷಿಣ ಕನ್ನಡ ಜಿಲ್ಲೆಡಿಡಿ ಪುಣ್ಯಕ್ಷೇತ್ರೋಲೆನ್ ಸಂಚಾರ ಮಲ್ತಾದ್, ಅಲ್ಲದ ದೇವರೆ ಸ್ತುತಿಲೆನ್ ಮಲ್ತಿನಾರ್ ಈ ಹರಿದಾಸೆರ್, ಸಮಾಜೊಡು ಮಾತೆರೆಗ್ಲಾ ಪರಿಚಿತೆರ್.

10. ಕುತ್ತತ್ತೂರು ಭಕ್ತ ಗೋವಿಂದ ದಾಸೆರ್: ಕೀರ್ತನೆ ರಚನೆ ಮಲ್ತಿದಲಾ, ಹಿರಿಯ ಹರಿದಾಸೆರೆನ ಸುಮಾರು 3,000 (ಮೂಜಿಸಾವಿರ) ಕೀರ್ತನೆಲೆನ್ ಒಟ್ಟು ಸೇರಾದ್, ತನ್ನೊ ಕೈಬರವೊಡು ಬರೆದ್ ಸಂಗ್ರಹ ಮಲ್ತಿನಾರ್ ನಮ್ಮ ಕುತ್ತತ್ತೂರುದ ಭಕ್ತ ಗೋವಿಂದ ದಾಸೆರ್. ಒಡಿಪುದ ಅಷ್ಟ ಮರೊತ ಸ್ವಾಮಿಯೆರೆನ ಕೈಡ್ಲ 'ದಾಸ' ಪಣ್ಣಿ ಪುದರ್ ಪಡೆದ್ ಗೋವಿಂದ ದಾಸೆರ್' ಪಂಡ್ಲೆ ಮಾತೆರೆಗ್ಲಾ ಗೊತ್ತಾಯ್ನಾರ್! ಒಡಿಪುದ ಜಾತ್ರೆಡ್ ರಥೊಡಿತ್ತಿ ಶ್ರೀ ಕೃಷ್ಣ ದೇವರೆ ಎದುರುಡ್, ಹರಿದಾಸ ದೀಕ್ಷೆ ಪಡೆದ್, ದಾಸ ವೇಷೊಡ್ ಗೆಜ್ಜೆ ಕಟ್ಟಾದ್ ನಲ್ಲೊಂದ್ " ಬೇಗ ಬಾರೋ ಬೇಗ ಬಾರೋ ನೀಲ ಮೇಘ ವರ್ಣ...." ಪಂಡ್ಲೆ ಶ್ರೀ ವಾದಿರಾಜೆರ್ ಬರೆತಿ ಪದ್ಯೊನು ಪಣೋಂದು, ತನ್ನೊ ಸಂಸಾರ ಬಂಧು, ಅಭಿಮಾನಿಲು, ಭಕ್ತೆರ್ ಸೇರುಪ್ಪಿನಗ, ನಲಿತೊಂದಿತ್ತಿ ಈ ದಾಸೆರೆನ ಮಿತ್ತ್ ಒಲಿದ್ ಬತ್ತಿನ ಶ್ರೀಕೃಷ್ಣ ದೇವರ್, ಉಂತಿದಿ ರಥೊಡ್ಲಿ ತಿರ್ತ್ ಲಾಗ್ಗಿದ್, ಪ್ರಾಣ ದೇವರೆನ್ ಪತೊಂದಿತ್ತಿ ಬ್ರಾಣನ ಜಕ್ಕೆಲ್ಲ ಮಿತ್ತ್ ಬೂರು ನಲ್ಲೊಂದುಪ್ಪಿನೆನ್ ತೂದ್, ಮಾತಾ ಸ್ವಾಮಿಲೆಗ್ಲಾ ಅಚ್ಚರಿಯಾಂಡ್ಗೆ! "ದಾಸೆ ಭಕ್ತಿಗ್ ಮೆಚ್ಚಿದ್ ಸಾಕ್ಷಾತ್ ಪರಮಾತ್ಮನೇ ಇಂಚೀ ಘಟನೆ ಮಲ್ತೆ!" ಪಂಡ್ಲೆ ಅವ್ಲಂತಿ ಪ್ರತ್ಯಕ್ಷ ದರ್ಶಿನೆ ಹೇಳಿಕೆಗೆ! ಇಂಚೀ ಪುಣ್ಯಾತ್ಮರೆ ಬಂಜಿಡ್ ಕೊಡಿತ್ತಿ ಆರೆನ ಜೋಕ್ಕುಲಾ ಹರಿದಾಸೆರೆ!

ಕುತ್ತತ್ತೂರು ಹಯಗ್ರೀವಾಚಾರ್ಯರ್, ಧರ್ಮಭೂಷಣ ಕೆ. ಸೀತಾರಾಮರಾಯೆರ್ - ಇಂಚ ಗೋವಿಂದ ದಾಸೆರೆನ ಪೀಳಿಗೆನೇ ಹರಿದಾಸೆರೆನ ದೀಕ್ಷೆಡ್ ಮುಂದರಿದ್ ಹರಿಸೇವೆ ನಿರಂತರ ಮಲ್ತೊಂದುಪ್ಪಿ 'ಕುತ್ತತ್ತೂರು ಗೋವಿಂದಭವನ' - ಇನಿಗ್ ನಮ್ಮ ಕಣ್ಣ ಎದುರುಡು ಸಾಕ್ಷಿಯಾದುಂಡು!

11. ಪಣಂಬೂರು ಗುರು ಸದಾನಂದ : ನಮ್ಮ ಪಣಂಬೂರು ನಂದನೇಶ್ವರ ದೇವಸ್ಥಾನೊದ ಬರಿತೇ ಶಿವಬ್ರಾಹ್ಮಣ ದಂಪತಿಲೆಗ್ ಪುಟ್ಟಿ ಶ್ರೀನಿವಾಸಯ್ಯ, ಸಂಸಾರೊಡಿತ್ತೊಂಡಲಾ ವಿರಾಗಿಯಾದ್, ಧಾರ್ಮಿಕ ಚಿಂತನೆ, ಸಾರ್ವಜನಿಕ ಸೇವೆಡ್ ಶ್ರದ್ಧಾಳುವಾದ್, ಸಮಾಜೊಡು ಆದರ್ಶ ಗುರುವಾದ್ 'ಗುರು ಸದಾನಂದ' ಪಂಡ್ಲೆ ಪ್ರಸಿದ್ಧಿ ಪಡೆಯೆರ್. ಹರಿದಾಸೆರೆ ಕೀರ್ತನೆದ ಶೈಲಿಡ್ ಕನ್ನಡ ಬೊಕ್ಕ ತುಳು ಕೀರ್ತನೆಲೆನ್ ರಚಿಸೊಯೆರ್. ಕೆಲವೆಟ್ 'ಶ್ರೀನಿವಾಸ' ಬೊಕ್ಕ

ಕೆಲವೆಟ್ 'ಸದಾನಂದ' ಪಣ್ಣಿ ಅಂಕಿತೊಡು ಬರೆಯಿನ ಕೀರ್ತನೆಲು ಮೂಜಿ ಸಂಪುಟೊಡು ಪ್ರಕಟವಾತ್ಂಡ್. ಜವ್ವನೊಡು ಯಕ್ಷಗಾನೊದ ಪಾತ್ರಧಾರಿಯಾದ್ ಪುದರ್ ಪಡೆಯಿನಾರ್. ಆರೆನ ಪದ್ಯೊದ ಮೂಜನೇ ಸಂಪುಟೊಡು 9 ತುಳು ಪದ್ಯೊಲುಂಡು. ಅವೆನ್ ಗುರು ಸದಾನಂದೆರೆ ಪುಳ್ಳಿ (ಮಗಳೆನ ಮಗೆ) ಸಂಗ್ರಹ ಮಲ್ತಾದ್, ಸುರತ್ಕಲ್ತಾದ ಕೆ. ವೆಂಕಟಾರಾಯಾಚಾರ್ಯರ್ ಪ್ರಕಟ ಮಲ್ದೆರ್. ಈ ಪದ್ಯೊಲೆನ್ ಈ ಬೂಕುದ ಪರಿಶಿಷ್ಟೊಡು ಕೊರ್ತುಂಡು.

12. ಬೆಳ್ಳಿ ದಾಸಪ್ಪಯ್ಯ: ಬೆಳ್ಳಿ ಗ್ರಾಮೊದ ಶಿವ ಬ್ರಾಹ್ಮಣೆರಾದಿತ್ತಿ ದಾಸಪ್ಪಯ್ಯರ್ ಪ್ರಾಥಮಿಕ ಶಾಲೆದ ಅಧ್ಯಾಪಕರ್. ಮೇರೆನ ಹಿರಿಯರ್ ಕೆಮ್ಮೂರು ಕುಟುಂಬೊಗು ಸೇರಿನಕ್ಕು. ವೃತ್ತಿಡ್ ಅಧ್ಯಾಪಕೆರಾದಿತ್ತಂಡಲಾ, ಪ್ರವೃತ್ತಿಡ್ ಹರಿಕಥೆ, ಯಕ್ಷಗಾನ, ತಾಳಮದ್ದಲೆ, ಪುರಾಣ ಪ್ರವಚನ, ಭಜನೆ - ಇಂಚ ಸಾರ್ವಜನಿಕ ಸಾಂಸ್ಕೃತಿಕ ಕಾರ್ಯಕ್ರಮೊಟು ಸಕ್ರಿಯವಾದ್ ಭಾಗವಹಿಸೊಂದಿತ್ತಿನಾರ್. ಪಾವಂಜೆದ ಜ್ಞಾನಶಕ್ತಿ ಸುಬ್ರಹ್ಮಣ್ಯನ ಆರಾಧಕೆರಾದ್ ದೇವಸ್ಥಾನೊದ ಸಭೆ ಸಮಾರಂಭೊಡು ಸೇವೆ ಮಲ್ಪಿಂಚಿ ಗಣ್ಯ ವ್ಯಕ್ತಿ ದಾಸಪ್ಪಯ್ಯರ್. ಸುಮಾರು 786 ಪದ್ಯ ಸಂಖ್ಯೆದ 'ಚಿತ್ತೂರು ಪದ್ಮಿನಿ' ಕತೆನ್ ಯಕ್ಷಗಾನ ಪ್ರಸಂಗೊಡು ರಚನೆ ಮಲ್ತಿನಾರ್ ದಾಸಪ್ಪಯ್ಯರ್. 'ಪಾವಂಜೇಶ', 'ಸುಬ್ರಹ್ಮಣ್ಯ' - ಇಂಚ ಸುಬ್ರಹ್ಮಣ್ಯ ದೇವೆರೆನ ಪುದರ್ ಅಂಕಿತೊಡು ಸುಮಾರು 57 ಕೀರ್ತನೆಲೆನ್ ರಚನೆ ಮಲ್ತಿನ 'ಭಜನೆ ಹಾಡುಗಳು' ಪಣ್ಣಿ ಬೂಕುನು ದಾಸಪ್ಪಯ್ಯೆರೆನ ಮಗೆ ಬಿ. ಭುಜಂಗ ರಾವ್ ಬೊಳ್ಳುಗು ಕೊಣ್ಣೆದರ್.

13. ಅಗ್ಗಿದ ಕಳಿಯ ನಾರ್ಣಪ್ಪಯ್ಯ: ಪಾವಂಜೆದ ನೆರೆಕರೆತ ಊರೇ ಅಗ್ಗಿದ ಕಳಿಯ. ಮುಕ್ಕೊಡ್ಡು - ಸಸಿಹಿತ್ಲೆಗ್ ಪೋಪಿ ಸಾದಿ. ಅಗ್ಗಿದ ಕಳಿಯ ಆನಂದ ಶ್ಯಾನುಭಾಗೆರೆ ಮಗೆ ನಾರ್ಣಪ್ಪಯ್ಯರ್ ವಂಶ ಪರಂಪರೆಯಾದ್ ಶ್ಯಾನುಭಾಗ ವೃತ್ತಿ ಮಲ್ತೊಂದಿತ್ತಿನಾರ್. ನಾಲ್ಕೂರು ಫಿರ್ಕಾ ಶ್ಯಾನುಭಾಗ ಅಗ್ಗಿದ ಕಳಿಯ ಶ್ರೀ ನಾರ್ಣಪ್ಪಯ್ಯರ್, ಬೆಳ್ತಂಗಡಿ ತಾಲೂಕುದ ಬಳ್ಳಂಜೆ (ಬಳ್ಳಮಂಜ)ಡ್ ಶ್ಯಾನುಭಾಗೆರಾದ್ ಸಂಸಾರೊಡಿತ್ತಂಡಲಾ ಕಂಸಾರಿನ್ ನೆನೆತೊಂದಿತ್ತಿನಾರ್. ಪ್ರಾಕ್ಡ್ ಬಸ್ ಸಂಚಾರೊ ಇಜ್ಜಂದಿನದಗ, ನಡತೊಂದೇ ತನ್ನೂರುಗು (ಅಗ್ಗಿದ ಕಳಿಯೊಗು) ಬರೊಂದಿತ್ತಿಲೆಕಾನೇ ಅಶು ಕವಿಯಾಯಿನ ಈ ದಾಸರ್ (ನಾರ್ಣಪ್ಪಯ್ಯರ್) 'ನಾರಾಯಣ' ಅಂಕಿತೊಡು ಕೆಲವು ಪದ್ಯ ರಚನೆ ಮಲ್ತಾದ್ (ಭಾಗ ೧ ಬೊಕ್ಕ ಭಾಗ ೨) 'ಕನ್ನಡ ಸ್ತ್ರೀ ಪದ್ಯಮಾಲಿಕೆ' ಪಂಡ್ ಬೂಕುದ ರೂಪೊಡು ಬೊಳ್ಳುಗು ಬತ್ತಾದ್, ಪ್ರಚಾರೊಡುಪ್ಪಿಂಚಿ ಕೃತಿನ್ ನಂಕ್ ಕೊಡುಗೆಯಾದ್ ಕೊರ್ತರ್. ಅಂಚಿನೇ ಅಪ್ರಕಟಿತ ವಾಯ್ವಂಚಿ 'ಬೋಜರಾಜ - ಕಾಳಿದಾಸ' (ನಾಟಕ) ಬೊಕ್ಕ ಕೆಲವು ಯಕ್ಷಗಾನ ಪ್ರಸಂಗ ಕೃತಿಕುಲು ಇನಿಗ್ ನಮ್ಮ ಕೈಕ್ ದಕ್ಕಂದೆನೇ ಪೋಂಡುಂದೇ ಪಣೊಲಿ. ಆರೆನ ಮಗಳೆನ್ (86 ವರ್ಷದ ಇಂದಿರಮ್ಮ) ಯಾನ್ ಭೇಟಿಯಾದ್ ಎಂಕ್ ಬೋಡಾಯಿನ ವಿಚಾರೊಲೆನ್ ತೆರಿಯೊಂದು, ಆರೆನ ನೆನಪುಡಿತ್ತಿ ಒಂಚೆರಡ್ ಪದ್ಯೊಲೆನ್ (ನಾರ್ಣಪ್ಪಯ್ಯೆರೆನ ಅಪ್ರಕಟಿತ ಕೃತಿಲು) ಪಣ್ಣಾದ್,

ಆವೆನ್ ಬರೆದ್ ದೆತೊಂಡೆ. ಮಿತ್ತ್‌ಗ್ ಯಾನ್ ಬರೆಪಿ- "ದಕ್ಷಿಣ ಕನ್ನಡ ಜಿಲ್ಲೆಯ ಹರಿದಾಸರು" ಈ ಬೂಕುಡು ಉಂದೆನ್ ವಿಸ್ತರಿಸುವೆ.

14. ಪೇಜಾವರ ಜ್ಞಾನದಾನಿ ಹರಿದಾಸ ಟಿ.ಯಲ್. ವಾಸುದೇವರಾಯೆರ್:

ಬಹುಮುಖ ಪ್ರತಿಭೆದ ಕಲಾವಿದರಾಯಿಂಚಿ ನಮ್ಮ ಪೇಜಾವರ ಗ್ರಾಮದ ತತ್ತಾಡಿ ಮನೆತನತ ವಾಸುದೇವರಾಯೆರ್ ಇರೆತ ಮದೆಟುಪ್ಪಿ ಕಾಯಿಯಾದ್, ಏರೆಗ್ಲಾ ಆರೆನ ವಿಷಯ ತೆರಿಯಂದೆ ಪೊಂಡತ್ತಾ ಪಣ್ಣಿ ಬೇಜಾರ್! ಹರಿಕಥಾ ಕೀರ್ತನೆಕಾರೆ, ನಾಟಕ ರಚನೆ, ಯಕ್ಷಗಾನ ನೃತ್ಯ, ಬೊಕ್ಕ ಭಾಗವತಿಕೆ, ತಮಿಳ್ಳಾಡ್‌ಡ್ ತಮಿಳು ಚಿತ್ರರಂಗೊದ ಪಾತ್ರಾಭಿನಯ, ನವರತ್ನ ಶೈಲಿಡ್ ವಿಭಿನ್ನ ರೀತಿಡ್ ಹರಿಕಥೆತ ನಡುಟು ನೃತ್ಯ ಅಳವಡಿಸೊಂದು, ಜನಮನ ಪೊಲಿಪಾಯ್ ಬಹುಮುಖ ಪ್ರತಿಭೆಗ್ ಬೆಂಗಳೂರ್ಡ್ ಹರಿದಾಸಾಶ್ರಮೊಡು ಸಂತ ಭದ್ರಗಿರಿ ಸಹೋದರೆರ್ ಶ್ರೀ ವಾಸುದೇವರಾಯೆರೆನ್ ಸನ್ಮಾನಿಸೊಂದು, 'ಬಹುಮುಖ ಪ್ರತಿಭಾ' ಪದವಿ ಕೊರ್ಯೆರ್. 25 ವರ್ಷ ಕಾಲ ತತ್ತ್ ಪ್ರಚಾರ ಮಲ್ತಿಂಚಿ ಈ ಮಹಾನುಭಾವೆರ್ 'ವಾಸುದೇವ' ಅಂಕಿತೊಡು ಕೆಲವು ಪದ್ಯೊಲೆನ್ನಾ ಬರೆದ್ ವಿಠಲ ದೇವೆರೆನ್ ಸ್ವಪ್ನೊಡು ದರ್ಶನ ಮಲ್ತಾದ್, ಪ್ರಸನ್ನ ವಿಠಲನ ಗುಡಿ ಕಟ್ಟಾಯಿನ ಪೇಜಾವರ ಜ್ಞಾನದಾನಿ ಹರಿದಾಸ ಟಿ.ಯಲ್. ವಾಸುದೇವರಾಯೆರೆನ್ ಎನ್ನ ಬೂಕುದ ಪ್ರಕಟಣೆ ಮೂಲಕ ಬೊಳ್ಳುಗು ಕೊಣಪಿಂಚಿ (ಬೂಕು ಪ್ರಕಟಣೆ - 2005) ಯೋಗ್ಯತೆನ್ ಕೊರಿನ ಆ ಶ್ರೀಗುರುಪ್ರಿಯವಿಠಲಗ್ ಸೊಲೈ ಸಂದಾವೊಂದು ಹರಿದಾಸೆರ್ಗ್ ನಮೋ ನಮಃ ಪಂಡ್ ಕಾರ್ಗ್ಡ್ ಬೂರೋಣ್ಣೆ.

15. ಮೈರ್ಮಾಡಿ ಗೋವಿಂದ ಗೋಳಿ: ಉಡುಪಿ ತಾಲೂಕು ಕೊಕ್ಕರ್ಣೆದ ಬರಿತ ಮೈರ್ಮಾಡಿ ನಿವಾಸಿ ವೆಂಕಟರಾಯ ಗೋಳಿಯೆರೆನ ಮಗೆ ಗೋವಿಂದ ಗೋಳಿ. ಯಕ್ಷಗಾನದ ಅರ್ಥ ಪಣ್ಣಿಂಚಿ ಕುಟುಂಬೊಡು ಪುಟ್ಟಿನ ಗೋವಿಂದ ದಾಸೆರ್ ಕೇವಲ 5ನೇ ಕ್ಲಾಸ್ ಓದೊಂಡಲಾ, ಹವ್ಯಾಸಿ ಅರ್ಥಧಾರಿ. ಪುರಾಣೊದ ಕತೆಕುಲು ಆರೆಗ್ ನೀರ್ ಪರಿಲೆಕ ಸುಲಭ. ತಾಳಮದ್ದಳೆಡ್ ಭಾಗವತೆರ್, ಅಂಚಿನೇ ಆ ಊರ್ಡ್ ಐಗಳ ಮರೊಡು ಅಧ್ಯಾಪಕೆರಾದ್ ಎಡ್ಡೆ ಪುದರ್ ಪಡೆತಿನಾರ್. ಸ್ಮಾರ್ತ ಬ್ರಾಣೇರಾದಿತ್ತೊಂಡಲಾ ಶ್ರೀಕೃಷ್ಣ ದೇವೆರೆ ಲೀಲೆನ್ ಎಡ್ಡೆ ಪುಗರ್ಡೆರ್ ತನ್ನೊ ಪದ್ಯೊಳೆಡ್. ಸುಮಾರ್ 138 ಕೀರ್ತನೆಲೆನ್ ಕನ್ನಡ ಭಾಷೆಡ್ ಬರೆತೆರ್. ಅಂಚಿನೇ ಆರ್ ತುಳುಟ್ಟಾ ಬರೆತೆರ್. ಆಂಡ ಇತ್ತೆ ಆ ತುಳು ಪದ್ಯೊಲು ಲಭ್ಯವಾದಿಜ್ಜಿ. ಆರೆನ ಸಂಬಂಧಿಕೆರಾಯ್ಚಿ ಜೆನ್ನಿ ಕುಟಂಬದಕ್ಕೆ ಡ ವಿಚಾರಿಪುನಗ ಆರೆನ ಪದೊಕ್ಲೆನ ಬಗ್ಗೆ ದಾಲಾ ಗೊತ್ತಿಜ್ಜಿ ಪಣ್ಣಿ ಉತ್ತರ ತಿಕ್ಕೊಂಡ್. 'ಗೋವಿಂದ ದಾಸರ ಕೀರ್ತನೆಗಳು' ಪಂಡ್ ಗೋವಿಂದದಾಸೆರೆ ತನ್ನ ಪದೊಕ್ಲೆನ್ ಮೂಜಿ ಭಾಗೊಡು ಬೊಳ್ಳುಗು ಕೊಣ್ಣೆದೆರ್ (ಕನ್ನಡ ಭಾಷೆಡ್).

16. ಬೋಳಾರ ವಾಸುದೇವಯ್ಯ: ವಿಟ್ಟದ ಸಬ್ ರಿಜಿಸ್ಟ್ರಾರೆನ ಕಛೇರಿಡ್ ಲೆಕ್ಕ ಬರೆವುನ

ಕೆಲಸೊಡ್ಡಿನಾರ್ ಪಂಡ್ ಆರೆನ ರಚನೆದ ಪದ್ಯೊಡು ತೆರಿವುಂಡು. ಅನೇಕ ಕೀರ್ತನೆಳೆನ್ (ಕನ್ನಡ ಭಾಷೆಡ್), 3 ಯಕ್ಷಗಾನ ಪ್ರಸಂಗ ರಚನೆ ಮಲ್ತಿನಾರೆನ ಪರಿಚಯ ಮಾತ್ರ ಇನಿಕ್ ನಮ್ಮೂರ್ಲೆಗೆ ಗೊತ್ತಿಜ್ಜಿ. ಆರೆನ ಪದ್ಯೊದ ಆಧಾರೊದ ಮಿತ್ತ್, ವಿಟ್ಲ ಸಬ್‌ರಿಜಿಸ್ವಾರ್ ಕಚೇರಿಗ್ ಯಾನ್ ಫೋನು ಮಲ್ತಾದ್ ಕೇಂಡ್‌ದ್, ವಾಸುದೇವಯ್ಯೆರ್ ಸಂಬಳದ ರಿಜಿಸ್ಟ್ರಾರ್‌ಡ್ (1921-22) ಪುದರ್ ತೊದು ನಿಘಂಟ್ ಪಂಡನೆಡ್ವಾವರ ಎಂಕ್ ನಿಘಂಟ್ ಗೊತ್ತಾಂಡ್. ಆ ಕಛೇರಿದ ಅಧಿಕಾರಿ ಬೊಕ್ಕ ಗುಮಾಸ್ತೆರೆಗ್ ಅಂಚೆನೇ ಬೋಡಾಯಿನ ಕೆಲವು ಮುಖ್ಯ ಮಾಹಿತಿಳೆನ್ ಒದಗಾದ್ ಕೊರಿನ ಶ್ರೀಯುತ ಪು. ಶ್ರೀನಿವಾಸ ಭಟ್ ಕಟೀಲು ಮೆರೆಗ್ಲಾ ಎನ್ನ ಉಡಲ್ದಿಂಜಿ ಸೊಲ್ಮೆಲು. 'ವಾಸುದೇವ ದಾಮೋದರ' ಆರೆನ ಅಂಕಿತ ನಾಮ. 'ಕರ್ನಾಟಕ ಕವಿಕರಿತ್ರೆ - ತೃತೀಯ ಸಂಪುಟೊಡು - ಬೋಳಾರ ವಾಸುದೇವಯ್ಯೆರೆನ ಪುದರ್ ಮಿಂಚುಂಡ್!

'ವಾಸುದೇವ ದಾಮೋದರ' ಅಂಕಿತೊಡು ಈ ಹರಿದಾಸೆರ್ ಕನ್ನಡ ಭಾಷೆಡ್ - ಅನೇಕ ಕೀರ್ತನೆಲನ್ ಬರೆತೆರ್. ಆಂಡ ಅಯ್ಯ್ ಕೇವಲ ನಾಲ್ಕೆನ್ ಪದೊಕ್ಲಿ ಮಾತ್ರ ಜನೊಕ್ಲೆನ ಬಾಯಿಡ್ಲಿ ಬಾಯಿಗ್ ಬತ್ತಾದ್ ಬೊಳ್ಳುಗು ಬೈದ್‌ಂಡ್. ಆರೆನ ಅಪ್ರಕಟಿತ ಕೀರ್ತನೆದ ಹಸ್ತಪ್ರತಿ ಇಂಚಪೊಗು ಎನ್ನ ಈ ಸಂಶೋಧನೆದ ಕಾರ್ಯೊದ ಸಂದರ್ಭೊಡು ಎಂಕ್ ಬಾರೀ ಬಂಗೊಡೇ ಎನ್ನ ಕೈಕ್ ಬತ್ತ ಸೇರ್‌ಂಡ್! ಆ ಅಪ್ರಕಟಿತ ಹಸ್ತಪ್ರತಿಟ್, ಸುಮಾರ್ 81 ಕೀರ್ತನೆಲು 'ವಾಸುದೇವ ದಾಮೋದರ' (ದಾಮೋದರ ವಾಸುದೇವ) ಅಂಕಿತೊಡು ಬರೆದ್‌ಂಡ್.

ಇತೊಮ್ಮುಟ್ಟಿಗ್ ಈ ಪದ್ಯೊಲೆನ್ ಏರ್ಲ್ ಮುದ್ರಣ ಮಲ್ತರೆಗ್ ಪೋಯ್ಲೆರತ್ತಾ ಪಣ್ಣಿ ವೇದನೆ ಮನಸ್ಸಾಗಾಂಡ್. ಅಯ್ಯಾವರ ಆರೆನ ಪುದರ್ಲಾ ಅಜ್ಞಾತವಾದೇ ಇತ್ತೆಂಡ್‌ಂದೇ ಪಣೊಲಿ. ಖಂಡಿತಾ ದುಂಬಗ್ ಯಾನ್ ಮಲ್ಪಿ ಕನ್ನಡ ಭಾಷೆದ ಬೂಕುಡು - ('ದಕ್ಷಿಣಕನ್ನಡ ಜಿಲ್ಲೆಯ ಹರಿದಾಸರು') ಈ ಪದೊಕ್ಲೆನ್ ಸೇರ್ಪಾವೊಡುಂದು ಎಂಕಾಸೆ ಉಂಡು. ಸುರತ್ಕಲ್‌ದ ಆನಂದ ಶೆಟ್ಟಿಗಾರೆರೊಟ್ಟುಗು ಯಾನ್ ಉದ್ಯಾವರ (ಪಾಂದೆ) ಗ್ರಾಮೊಡುಪ್ಪಿ ವಿಷ್ಣು ಶೆಟ್ಟಿಗಾರೆನ ಇಲ್ಲಗ್ ಪೋದು, ಆರೆನ ಬೆರಿಸಾಯೊಡ್ಲಿ ದಿ| ಪೂವಪ್ಪ ಗುರಿಕಾರೆನ ಮಗಳೆನ ಇಲ್ಲಡ್ (ಶ್ರೀಮತಿ ಇಂದಿರಾ ನಾಗೇಶ್, ಉದ್ಯಾವರ) ಎಡ್ಲೆ ರಕ್ಷಣೆಡ್ಡಿತ್ಲಿ ಈ ಹಸ್ತಪ್ರತಿತ ಬೂಕುನು ಎನ್ನ ಒತ್ತಾಸೆಗ್ ಮಣಿದ್ (ನನಾಂಡಲಾ ಆ ಹರಿದಾಸೆರೆ ಕೀರ್ತನೆಲು ಬೊಲ್ಪುಗು ಬರುವತ್ತಾ ಪಂಡ್ಲೆ) ಎನ್ನ ಕೈಕ್ ಪಾಡ್ಯೆರ್. ಅವೆನ್ ಯಾನ್ ಚೆರೋಕ್ಸ್ ಪ್ರತಿ ಮಲ್ತೊಂದು, ಬೊಕ್ಕ ಆ ಬೂಕುನು ವಾಪಸ್ ಪಿರ ಮುಟ್ಟಾಯೆ. ಅಂತೂ ಮೂಜಿ-ನಾಲ್ ತಿಂಗೊಳ್ಲಿಂಚಿ ನಾಡೊಂದಿತ್ತಿ ವಸ್ತು ಎನ್ನ ಕೈ ಸೇರ್‌ಂಡ್ ಪಣ್ಣಿ ಸಂತೋಷ ಎಂಕಾಂಡ್!

ದಿ| ಶ್ರೀ ಪೂವಪ್ಪ ಗುರಿಕಾರ್ - ಮೇರ್, ಸುರತ್ಕಲ್‌ದ "ಶ್ರೀ ವೀರಭದ್ರ ದುರ್ಗಾಪರಮೇಶ್ವರೀ ದೇವಸ್ಥಾನೊದ ಬೊಕ್ಕ ಪುರಾತನ ಮಾರಿಯಮ್ಮ ದೇವಸ್ಥಾನೊದ " -

ಮಾಜೀ ಆಡಳಿತಮೊಕ್ತೇಸರೆರಾದಿತ್ತಿನಾರ್. ಶ್ರೀ ಬೋಳಾರವಾಸುದೇವಯ್ಯೆರೆನ ಆಪ್ತ ಮಿತ್ರರಾ ಆದಿತ್ತೆರೆ. ಹರಿದಾಸೆರ್ ಎನನ್ ಅನುಗ್ರಹ ಮಲ್ಪೊಡುಂದೇ ಈತ್ ವರ್ಸೊ ಮುಟ್ಟಿ ದೆಂಗ್‌ದಿತ್ತೆರಂದೇ ಎನ್ನೆಣಿಕೆ! ಇತ್ತೆ ಆರ್ ಬೊಳ್ಳುಗು ಬರ್ಪಿ ಸುಯೋಗ ಬತ್ತೆದೊದಗ್‌ಂಡ್! ಹರಿಗುರುಕ್ತೆನ ಇಚ್ಛೆನ್ ಪಿನ್ನಿ ನಕ್ಕು ನರಮಾನ್ಯೆರೆರುಲ್ಲೆರ್ ಪಣ್ಣೇ!

ದಿ| ಶ್ರೀ ಪೂವಪ್ಪ ಗುರಿಕಾರ್ಯೆಗ್; ಆರೆನ ಮಗಳ್ - ಮರ್ಮಾಯೆರೆಗ್; ಶ್ರೀ ವಿಷ್ಣು ಶೆಟ್ಟಿಗಾರ್ ಬೊಕ್ಕ ಆರೆನ ಇಲ್ಲದಕ್ಕೆಗ್ (ಎನನ್ ಗೌರವಪೂರ್ವಕವಾದ್ ಎದುರ್ಕೊನ್‌ನಕ್ಕು) ಬೊಕ್ಕ ಶ್ರೀಯುತ ಆನಂದ ಶೆಟ್ಟಿಗಾರ್ಯೆಗ್ (ಎನನ್ ಉದ್ಯಾವರೊಗುಲೆತ್ತೆ ಕೊಣೊಯಿನಾರ್ - ಕರ್ನಾಟಕ ಬ್ಯಾಂಕ್, ಐಕಳ ಬ್ರಾಂಚ್‌ದ ಸಿಬಂದಿಯಾದುಪ್ಪಿನಾರ್) - ಮೊಕ್ಕೆಗ್ ಮಾತೆರೆಗ್ಗಾ ಎನ್ನ ಉಡಲಿಂಜಿಸೊಲೆಲು.

ಒಂಜಿ ಅನಿಸಿಕೆ : ಪಣಂಬೂರು ಗುರು ಸದಾನಂದೆರ್, ಆರೆನ ಅಣ್ಣೆ ಲಕ್ಷ್ಮೀನಾರಣಪ್ಪಯ್ಯೆರ್, ಬೊಕ್ಕ ಬೋಳಾರ ವಾಸುದೇವಯ್ಯೆರ್ - ಮೊಕ್ಕ ಮೂವೆರಾ ಸಮಕಾಲೀನೆರ್ ಬೊಕ್ಕ ಒಂಜೇ ಗುರುಕ್ತೆನ ಶಿಷ್ಯರಾದುಪ್ಪೆರಂದ್ಲಾ ಪಣೊಲಿ. ವಾಸುದೇವಯ್ಯೆರ್ ಕೀರ್ತನೆದ ಸಂಗ್ರಹೊಡು (ಹಸ್ತಪ್ರತಿ ಬೂಕುಡು) 'ನಾರಾಯಣ' ಅಂಕಿತೊದ 2 ಪದ್ಯೊಲು ಉಂಡು. ಗುರು ಸದಾನಂದೆರ್ ಪದ್ಯೊಡು ಒಂಜಿ-ರಡ್ ಕಡೆಟ್ ಗುರು ದಾಮೋದರ ಶ್ರೀನಿವಾಸ ಸದಾನಂದ ಅಂಚೆನೇ ವಾಸುದೇವಯ್ಯೆರೆನ ಪದ್ಯೊದ ಅಂಕಿತೊಲಾ - ವಾಸುದೇವ ದಾಮೋದರ. ಗುರು ಸದಾನಂದೆರ್ ಅಂಕಿತ - ಶ್ರೀನಿವಾಸ, ಸದಾನಂದ (ಕೆಲವು ಕಡೆಟ್ ರಡ್ಡ್ ಪುದರಾ ಉಪ್ಪುಂಡು). ಇರ್ವೆರೆ ಪದ್ಯೊಡ್ಲಾ 'ದಾಮೋದರ' ಪಣ್ಣಿ ಪುದರ್ ಸಾಮಾನ್ಯವಾದುಂಡ್. ಅಂತೂ ಸರಿಯಾದ್ ತೂವೆರೆ ಪೋಂಡ, ಮೊಕ್ಕೆನ ಗುರು-ದಾಮೋದರ ಪಣ್ಣಿನಾರ್ ಆದುಪ್ಪೆರೆಲಾ ಸಾಧ್ಯ ಪಣ್ಣ್ ತೆರಿಯೊಣೊಲಿ. ಉಂದು ಕೇವಲ ಎನ್ನ ಅನಿಸಿಕೆ. ನನ ಮಿತ್ತೆದ ಸಂಶೋಧಕೆರ್ ಉಂದೆನ್ ವಿಸ್ತಾರವಾದ್ ತೂವೊಣೊಲಿ.

17. ಹೆಬ್ರಿ ಕಂಡಿಗ - ಪದ್ಮನಾಭ ಜೆನ್ನಿ : ಹೆಬ್ರಿ - ಕಂಡಿಗ ಗ್ರಾಮೊದ ಶಿವಳ್ಳಿ ಬ್ರಾಹ್ಮಣ ಮನೆತನ. ಬೆನ್ನಿ ಬೆನ್ನುನ ಜೆನ್ನಿಯೆರ್ ಯಕ್ಷಗಾನದ ಅರ್ಥಧಾರಿ; ಪುರಾಣ ಪ್ರವಚನಕಾರೆರ್ ಆದಿತ್ತಿನಾರ್, ಸುಮಾರ್ ನಾಲ್ ಯಕ್ಷಗಾನ ಪ್ರಸಂಗ (ಕನ್ನಡ ಭಾಷೆಡ್) ಬರೆತೆರ್. ಅವು ಬೂಕುದರೊಪೊಡ್ಲಾ ಪ್ರಕಟವಾತ್‌ಂಡ್. ಆಶುಕವಿತಾರಚನೆಗಾರೆಯೊ ಪದ್ಮನಾಭ ಜೆನ್ನಿಯೆರ್ ಕನ್ನಡ ಬೊಕ್ಕ ತುಳುಟು 'ಪದ್ಮನಾಭ' ಅಂಕಿತೊಡು ಅನೇಕ ಪದ್ಯೊಲೆನ್ ಬರೆತೆರ್. ಆಂಡ ದುರದೃಷ್ಟವಶಾತ್, ಇನಿಕ್ ಆರೆನ ವಂಶೊದಕ್ಕೆಡ, ಆರೆನ ಕೃತಿಕುಲು ಕೈಟಿಜ್ಜಂದಿನಡ್ಲಾ ವರ, ಯಂಕ್ ತಿಕ್ಕಿ ಕೇವಲ ಒಂಜೇ ಒಂಜಿ ತುಳು ಪದ್ಯೊನು ಈ ಲೇಖನದ ಪರಿಶಿಷ್ಟೊಡು ಕೊರ್ಪುಂಡು. ಇನಿಕ್ ಜೆನ್ನಿಲು ಒರಿ ಅಲಕ್ಷಿತ ಹರಿದಾಸೆರಾದ್ ತುಳುವೆರೆನ ಕಣ್ಣ ಮದೆಟ್ ದೆಂಗ್‌ದೇ ಪೋಯೆರ್!

18. ಕಳುವಾರು ವೆಂಕಟರಾವ್: ಸುರತ್ಕಲ್ ಕೈತಲ್ಲ ಕೃಷ್ಣಾ ಪುರತನೆರೆಟುಪ್ಪಿ ಕಳುವಾರ್ ಗ್ರಾಮ ಜನ್ಮಸ್ಥಳ (ಕ್ರಿ.ಶ. 1905). ಸರಕಾರಿ ಹಿರಿಯ ಪ್ರಾಥಮಿಕ ಶಾಲೆದ ಅಧ್ಯಾಪಕರಾದ ನಮ್ಮ ಜಿಲ್ಲೆದ ಕೆಲವು ಕಡೆಟ್ ಶಿಕ್ಷಕರಾದ ಸೇವೆ ಮಲ್ತಿನಾರ್. ಅಶು ಕವಿತ್ವ ಇತ್ತಿ ರಾಯೆರ್ ಕೆಲಸೊಡುನೆಲೆಯಾಯ್ ಪುಣ್ಯಕ್ಷೇತ್ರದ ದೇವೆರೆನ ಮಿತ್ ಅನೇಕ ಪದ್ಯೊಲೆನ್ 'ವೆಂಕಟಪತಿ', 'ವೆಂಕಟರಮಣ' ಅಂಕಿತೊಡು ಕನ್ನಡ ಬೊಕ್ಕ ತುಳು ಭಾಷೆಡ್ ರಚನೆ ಮಲ್ತೆರ್. ಇತ್ತೆ ಎನ್ನ ಕೈಕ್ ತಿಕ್ಕಿನ ಒಂಜೇ ಒಂಜಿ ತುಳು ಭಾಷೆದ ಪದ್ಯೊನು ಈ ಲೇಖನದ ಪರಿಶಿಷ್ಟೊಡು ಕೊರ್ತುಂಡು. ಕಳುವಾರು ಕ್ಷೇತ್ರೊಡು ಭಜನಾಮಂಡಳಿ ಕಟ್ಟಾದ್, ಭಜನೆ ಕಲ್ಪಾದ್, ಹರಿದಾಸೆರಾದ್ ಪುದರ್ ಪಡೆಯೆರ್. ಕಳುವಾರು ಬೆಂಕಿನಾಥೇಶ್ವರ ದೇವೆರ್ ಆರೆನ ಗ್ರಾಮದೇವೆರ್. ಆರೆನ ಸಂತತಿದಕ್ಲು ಊರ್ದಕ್ಕೆ ಒಟ್ಟುಗು ಇನಿಗ್ಲಾ ಒಟ್ಟು ಸೇರ್ ಪುತಿ ವಾರೊಲಾ ಈ ಪುಣ್ಯಕ್ಷೇತ್ರೊದ ದೇವೆರೆ ಸನ್ನಿಧಿಡ್ ಭಜನೆ ಮಲ್ತೊಂದುಲ್ಲೆರ್ ಪಂಡ್ ಕಳುವಾರ್ ವೆಂಕಟರಾಯೆರ್ ಮಗೆ ಕಳುವಾರು ರಾಮಚಂದ್ರರಾಯೆರ್ ಬೋಡಾಯ್ ಮಾಹಿತಿಳೆನ್ ಎಂಕ್ ಒದಗದ್ ಕೊರ್ಯೆರ್. ಇತ್ತೆ ಕಳುವಾರ್ ಜಾಗೆ ಪೂರಾಸರ್ಕಾರೊಗು (ಎಂ. ಆರ್. ಪಿ. ಯಲ್.) ಪೋಂಡು. ವೆಂಕಟರಾಯೆರೆ ಮಗೆ ರಾಮಚಂದ್ರರಾಯೆರ್ ಬ್ಯಾಂಕ್ ಉದ್ಯೋಗದ ನಿವೃತ್ತೆರ್. ಅಮ್ಮೆರೆನ ಸಾದಿನೇ ಪತ್ತಾದ್ ಅಮ್ಮೆರೆನ ಕೃತಿ ರಚನೆಲೆನ್ ಭದ್ರವಾದ್ ರಕ್ಷಣೆ ಮಲ್ತಿನಾರ್. ಯಾನ್ ಕೇಂಡಿ ಕೂಡ್ಲೆ ಸಂತೋಸೊಡೇ ಬೋಡಾಯಿನ ಪೂರಾ ಕೃತಿ ಬೊಕ್ಕ ವಿಷಯೊಲೆನ್ ಕೊರ್ತು, ಇರೆತಮದೆಟುಪ್ಪಿ ಕಾಯಿಳೆನ್ ಪಿದಾಯಿ ತೋಜಾವುನ ಎನ್ನ ಕಜ್ಜೊಗು ಕೈಜೋಡಾಯೆರ್. ಮೇರೆಗ್ ಎನ್ನ ಉಡಲ್ದಿಂಜಿನೆನಿಸೊಲ್ಲೆಲು.

19. ಮಟ್ಟಿ ವಾಸುದೇವ ಪ್ರಭು: ಮೂಲ್ಕಿದ ನೆರೆಕರೆಟುಪ್ಪಿ ಮಟ್ಟಿ ಗ್ರಾಮೊದ 'ಮಟ್ಟಿ ಪ್ರಭು'ಲೆನ ವಂಶಸ್ಥೆರ್. ಹರಿದಾಸೆ ವೆಂಕಣ್ಣ ಕವಿ ಮೂಲ್ಕಿಯೆರೆನ ಅಚ್ಚು ಮೆಚ್ಚು ದ ಶಿಷ್ಯೆ ಬೊಕ್ಕ ಗೌಡಸಾರಸ್ವತ ಸಮಾಜೊದ ಪ್ರಥಮ ಕವಿ ಬೊಕ್ಕ ಹರಿದಾಸೆಂದ್ ಪಣೊಲಿ. 'ಗುರುವಿನಂತೆ ಶಿಷ್ಯ' ಪಂಡಿಲೆಕ್ಕ ವೆಂಕಣ್ಣ ದಾಸೆರೆಲೆಕಾನೇ ಅನೇಕ ಯಕ್ಷ ಗಾನ ಕೃತಿ (ಕನ್ನಡ ಭಾಷೆಡ್) ಬೊಕ್ಕ ಅನೇಕ ಕೀರ್ತನೆಲೆನ್ ರಚಿಸದಿನಾರ್. ಪುರಾಣದ ಭಾಗವತ, ರಾಮಾಯಣ ಕಥೆಕ್ಲೆನ್, ಮೂಲ್ಕಿ, ಬಂಟ್ವಾಳದ ವೆಂಕಟರಮಣ ದೇವೆರೆನ್ ಕೀರ್ತನೆಲೆಡ್ ತುದಿತಿನಾರ್. ಶ್ರೀ ಮಧ್ವ ಪ್ರತಿಷ್ಠಿತ ಒಡಿಪುದ ಹೃಷಿಕೇಶ ತೀರ್ಥೆರೆ ಪರಂಪರೆಟ್ ಬತ್ತಿ ಶ್ರೀ ರಘುವರ ಭೂಷಣ ತೀರ್ಥೆರ್ ಆರಾಧನೆ ಮಲ್ಪಿಂಚಿ ಶ್ರೀರಾಮ ಮೂರ್ತಿನ್ ಬೊಕ್ಕ ಇತರ ಆರಾಧ್ಯ ಪರಿವಾರ ದೇವೆರೆನ್ ತನ್ನ ಅಪರೋಕ್ಷ ಜ್ಞಾನೊಡ್ಲೇ ಕೀರ್ತನೆ ರೂಪೊಡೇ (ಕನ್ನಡ ಭಾಷೆಡ್) ವಿವರಿಸೊದು ಆ ಮಠತೊ ಯತಿಳೆಡ್ಲ ಸನ್ಮಾನ ಪಡೆಯಿನ ಕೀರ್ತಿ ಇನಿಕ್ಲಾ ಜನಜನಿತವಾದುಂಡು! ಮುರನಿ ಯಾನ್ ಸಂತ ಭದ್ರಗಿರಿ ಅಚ್ಯುತದಾಸೆರ್ನ್ ಭೇಟಿಯಾಯ್ತು, ಆರೆನ ಬಾಯಿಡ್ಲೇ ಈ ವಿಷಯ ಕೇಂಡಿನಗ, ಮಟ್ಟಿ ವಾಸುದೇವ ಪ್ರಭುಲೆನ ಕೀರ್ತಿ ಏತ್ ಏರ್ಂಡ್ ಪಣ್ಣಿ ಗೇನ ಎಂಕುಂಡಾಂಡ್! ಮಟ್ಟಿ ಪ್ರಭುಕ್ಲು 'ರಮಾಧವ',

'ರಮಾಪತಿ', ಅಂಕಿತೊಡು ಬರೆತಿ ಅನೇಕ ಕೃತಿಕುಳು ಎನ್ನ ಸಂಗ್ರಹೊಡು ಉಂಡು. ಶ್ರೇಷ್ಠ ಹರಿದಾಸರಾದಿತ್ತಿ ಮಟ್ಟಿಯೆರೆನ ಪೀಳಿಗಡ್ ಕೆಲವೆರ್ ಹರಿದಾಸರಾದ್ ಬೆಳಗ್ಗೆರ್! ಮಟ್ಟಿ ವಾಸುದೇವ ಪ್ರಭು, ಮಟ್ಟಿ ಶೇಷ ಪ್ರಭು, ಮಟ್ಟಿ ಶ್ರೀನಿವಾಸ ಪ್ರಭು - ಮೊಕ್ಕು ತ್ರಿಮೂರ್ತಿಯೆರ್ ಮಟ್ಟಿ ವಂಶೊದ ಗಟ್ಟಿ ಹರಿದಾಸೆರ್!

20. ಮಟ್ಟಿ ಶೇಷ ಪ್ರಭು: ಮಟ್ಟಿ ವಾಸುದೇವ ಪ್ರಭುಳೆನ ಮಗೆ. 'ರಮಾಕಾಂತ', 'ರಮೇಶ', 'ಮಂಗಲಾಂಗ' - ಅಂಕಿತೊಲೆಡ್ ಕೆಲವು ಕೀರ್ತನೆ, ಯಕ್ಷಗಾನ ಪ್ರಸಂಗ ರಚನೆ ಮಲ್ತಿನಾರ್. ಕಾಶೀ ಮರತ ಶ್ರೀ ಭುವನೇಂದ್ರ ತೀರ್ಥರೆನ ಪರಮ ಭಕ್ತಿ. ಕನ್ನಡ, ಸಂಸ್ಕೃತ, ಕೊಂಕಣಿ ಭಾಷೆಲೆಡ್ ಅನೇಕ ಕೀರ್ತನೆ ಬರೆತಿನಾರ್. ಮಟ್ಟಿ ವಾಸುದೇವ ಪ್ರಭುಲೆನ ಮನೆತನನ್ ದಾಸ ಪಂಥೊಡು ಬೆಳಗೊಯಿನಾರ್.

21. ರಾಮಕೃಷ್ಣ ಕವಿ ಮೂಲ್ಕಿ : ಗೌಡ ಸಾರಸ್ವತ ಸಮಾಜೊದ ಒರಿ ಶ್ರೇಷ್ಠ ಕವಿ ಬೊಕ್ಕ ಹರಿದಾಸೆರ್‌ಂದ್ ಪಣೊಲಿ. ರಾಮಕೃಷ್ಣಯ್ಯೆರೆನ ದೀರ್ಘ ಕಾವ್ಯ ಸಂಸ್ಕೃತ ಭವಿಷ್ಯೋತ್ತರ ಪುರಾಣೊಡುಪ್ಪಿ 'ವೇಂಕಟ ಗಿರಿ ಮಹಾತ್ಮೆ'ನ್ ಕನ್ನಡೊಗು 15 ಅಧ್ಯಾಯೊಡು 959 ಭಾಮಿನೀ ಷಟ್ಪದಿಟ್ - 'ಪದ್ಮಾವತೀ ಕಲ್ಯಾಣ' - ಪಂಡ್ ಕನ್ನಡಿೀಕರಣ ಮಲ್ತಿನ ಕೀರ್ತಿ (ಕವಿ) ಹರಿದಾಸೆ ರಾಮಕೃಷ್ಣಯ್ಯೆರೆಗ್. 'ಗುರು ನರಹರಿ' ಅಂಕಿತೊಡು ಬರೆತಿನ, ಆರೆನ 22 ದೇವೆರೆ ಕೀರ್ತನೆಲು (ಕನ್ನಡ ಭಾಷೆಡ್) ಎನ್ನ ಸಂಗ್ರಹೊಡು ಉಂಡು. ಮುಲ್ಕಿ ವೆಂಕಟರಮಣ ದೇವಸ್ಥಾನೊದ ದೇವರೆನ ಸ್ತುತಿಯೇ ಪ್ರಧಾನ. ಅಂಚೆನೇ ಯಕ್ಷಗಾನ ಭಾಗವತೆರಾದ್ 'ಕೃಷ್ಣಾರ್ಜುನ ಕಾಳಗ' ಯಕ್ಷಗಾನ ಪ್ರಸಂಗ ರಚನೆಲಾ ಮಲ್ತಿನಾರ್ ರಾಮಕೃಷ್ಣಯ್ಯೆರ್. ಜಗನ್ನಿವಾಸ ಅಪ್ಪಾಜಿರಾವ್ ಕವಿ - ಮೇರ್ ರಾಮಕೃಷ್ಣಯ್ಯೆರೆನ ಮಗೆ.

22. ಬಂಗ್ಲೆ ನಾರಾಯಣ ಕಾಮತ್: ಗೌಡ ಸಾರಸ್ವತ ಸಮಾಜೊದ ಪ್ರಸಿದ್ಧ ಉದ್ಯಮಿಯಾದಿತ್ತಿ ಮೂಲ್ಕಿ ರಾಮಪ್ಪ ಕಾಮತೆರ್ ಮಗೆ ಬಂಗ್ಲೆ ನಾರಾಯಣ ಕಾಮತ್. ಎಲ್ಲೆಡೇ ಅಮ್ಮೆರೆನ್ ಕಳೆವೊಂದಿ ಕಾಮತೆರ್ಗ್ ಕುಟುಂಬದ ವ್ಯವಹಾರ ತನ್ನ ಮಿತ್ತೇ ಬೂರುಂಡ್. ಆಯ್ತೆಡ್ಲಾವರ ಬಜೀ ಮೂಜನೇ ಕ್ಲಾಸ್ ಕಲ್ತ್‌ದ್, ಸಮಯ ತಿಕ್ಕಿನಗ ಆರ್, ಕನ್ನಡ, ಮರಾಠಿ ಭಕ್ತಿ ಸಾಹಿತ್ಯೊಡು ವಿಶೇಷವಾದ್ ಅಧ್ಯಯನ ಮಲ್ತಿನೆಡ್ಲಾವರ, ಕ್ರಮೇಣ ರಾಷ್ಟ್ರಕವಿ ಗೋವಿಂದ ಪೈ ಯೆರ್ ತಂಗಡೆನ್ ಮದ್ಮೆ ಆಯಿಬೊಕ್ಕ, ಸಾಹಿತ್ಯ ಕ್ಷೇತ್ರೊಡು ಬಂಗ್ಲೆ ನಾರಾಯಣ ಕಾಮತ್‌ರ್ ಮಿಂಚಿಯೆರ್‌ಂದೇ ಪಣೊಲಿ. ಆರ್ ಬರೆಯ್ ಕೆಲವು ಕೀರ್ತನೆಲು ಎನ್ನ ಸಂಗ್ರಹೊಡು ಉಂಡು. ಕೊಂಕಣಿ ಭಾಷೆಡ್ ಹರಿಕಥೆ ಮಲ್ಪಿ ಮೂಲಕ ಭಾರೀ ಜನಪ್ರಿಯತೆ ಪಡೆಯ್ ವ್ಯಕ್ತಿ ಕಾಮತೆರ್, ಮರಾಠಿ ಭಾಷೆಡ್ 'ಸಾಕಿ' ಛಂದಸ್ಸೊಡ್, ಇಡೀ ಭಗವದ್ಗೀತೆನ್ ಕೊಂಕಣಿ ಭಾಷೆಡ್ 'ಗೀತಾಮೃತ ಸಾಕೀ' ಪಣ್ಣಿ ಕಾವ್ಯ ರಚಿಸೊಯೆರ್. ಮಂಚೇಶ್ವರದ ಶ್ರೀಮದನಂತೇಶ್ವರನ ಬಗ್ಗೆ ಬರೆಯ್

ಪದ್ಮೋ ಇನಿಗ್ನಾ ಅವ್ವು ಬಳಕೆಡುಂಡು. 'ನಾರಾಯಣ' ಅಂಕಿತೊಡು ಆರ್ ಅನೇಕ ಪದ್ಮೋ, ನಾಟಕೊಲೆನ್ ರಚಿಸೊದು, ಕವಿಯಾದ್, ನಾಟಕೊಡು ಪಾತ್ರ ಮಲ್ತಿನ ನಟ ಆದ್, ನಾಟಕಕಾರೆರಾದ್ ಹರಿದಾಸೆರಾದ್, ಉದ್ಯಮಿಯಾದ್, ಸಮಾಜ ಸೇವಕೆರಾದ್ ಚ್ಯೋತಿ ಶಾಸ್ತ್ರ ಪಂಡಿತೆರಾದ್, ಬಹುಮುಖ ವ್ಯಕ್ತಿತ್ವೊನು ರೂಪಿಸೊಂದು, ಕುಟುಂಬೊಡು ಎಲ್ಯಾಯೆ ಆದಿತ್ತ್ಂಡಲಾ, ಸಮಾಜೊಡು ಹಿರಿಯ ವ್ಯಕ್ತಿಯಾದ್, ಕೇವಲ ತನ್ನ ನಲ್ಲತ್ತೇಳನೇ ಪ್ರಾಯೊಡೇ ಕಣ್ಮರೆಯಾದ್, ಆರೆನ ಜೀವನ, ಸಾಧನೆದ ಕೊಡುಗೆಲೆನ್ ನಮ್ಮ ಸಮಾಜೊಗು ಬುಡ್ಡು ಪೋದ್, ಪ್ರಾತಃ ಸ್ಮರಣೀಯೆರಾದ್ ಜನಮಾನಸೊಡು ನಿಲೆಯಾಯೆರ್!

23. ತಲಚೇರಿವಾಸುದೇವಶ್ಯಾನುಭಾಗ: ಕಾಶಿ ಮಠಾಧೀಶ ಶ್ರೀ ಭುವನೇಂದ್ರ ತೀರ್ಥರೆನ ಪ್ರಿಯ ಶಿಷ್ಯೆರಾದ್ 'ಶ್ರೀ ವಾಸುದೇವ' ಅಂಕಿತೊಡು ಅನೇಕ ಪದ್ಮೋಲೆನ್ ಬರೆತೆರ್. 'ಶ್ರೀ ಭುವನೇಂದ್ರ ದಯಾ ವನಧಿ' - ಈ ಪದ್ಮೊಡು ಶ್ರೀ ಭುವನೇಂದ್ರ ತೀರ್ಥರೆನ ಸಮಗ್ರ ಚರಿತ್ರೆ, ಆ ಕಾಲದ ಸಾಮಾಜಿಕ ಸಮಸ್ಯೆಲು ಒಡಮೂಡ್ತುಂಡು. ಅಂಚೆನೇ ಆರ್ ಬರೆತಿ 'ಏಕಾದಶಿ ಮಹಾತ್ಮೆ' ನಿತ್ಯ ಪಠನೆಗ್ ಯೋಗ್ಯವಾದುಂಡು. 'ಶ್ರೀ ವೊಳಲಂಕೇಶಾಯ ನಮಃ' - ಈ ಪದ್ಮೊಡು ಮೂಲ್ಕಿ ಶ್ರೀ ವೆಂಕಟರಮಣ ದೇವಸ್ಥಾನದ ಇಡೀ ಚರಿತ್ರನೇ ಪಣ್ಡೊಂಡ್. ಅಂಚೆನೇ ಕೆಲವು ನಿಂದಾಸ್ತುತಿನ್ಲಾ ಬರೆತೆರ್. 'ಮಂದರಧರನ ನೋಡಿ' ಪಣ್ಣಿ ಕೀರ್ತನೆಡ್ ಒಡಿಪುದ ಶ್ರೀಕೃಷ್ಣನ ವೈಭವೊನು ವರ್ಣಿಸದೆರ್. ಶ್ಯಾನುಭಾಗೆರ್ ಬರೆತಿ ಕೆಲವು ಪದ್ಮೊಲು ಎನ್ನ ಕೀರ್ತನ ಸಂಗ್ರಹೊಡು ಉಂಡು. ಇಂಚೇ ಹರಿದಾಸೆರೆನ್ ನಿತ್ಯ ನಮ ನೆನಪೊಡು ಪಂಡ್ ಹಿರಿಯ ಈ ದಾಸೆರೆನ ಚರಣೊಗು ನಮೋ ನಮಃ ಪಂಡ್ ಅಡ್ಡ ಬೂರೋಣ್ಣೆ.

24. ಮುಟ್ಟಿ ಶ್ರೀನಿವಾಸ ಪ್ರಭು : ಹರಿದಾಸ ಮುಟ್ಟಿ ವಾಸುದೇವ ಪ್ರಭುಳೆನೊ ಮಗ್. ಅಮ್ಮೆರ್ನಲ್ಲನೇ ಹರಿದಾಸ ಪಂಥೊಡಿತ್ತ್ದ್, ಅನೇಕ ಕೀರ್ತನೆಲೆನ್ ರಚನೆ ಮಲ್ತೆರ್. ಮೂಲ್ಕಿ ಶ್ರೀ ವೆಂಕಟರಮಣ ದೇವಸ್ಥಾನೊದ ಶ್ರೀ ನರಸಿಂಹ ದೇವರೆ ಸ್ತುತಿ, ಮುಖ್ಯಪ್ರಾಣ (ಹನುಮಂತ) ಸ್ತುತಿ, ಶ್ರೀ ಕಾಲಭೈರವ ಸ್ತುತಿ - ಇಂಚ ಸುಮಾರು ದೇವರೆ ಕೀರ್ತನೆಲೆನ್ 'ಶ್ರೀನಿವಾಸ' ಅಂಕಿತೊಡು ಬರೆತೆರ್. ಅಂಚೆನೇ ಗೌಡ ಸಾರಸ್ವತ ಬ್ರಾಹ್ಮಣ ಸಮಾಜೊದ ಯತಿಕುಲು - ಶ್ರೀ ಸುಕೃತೀಂದ್ರ ತೀರ್ಥೆರ್, ಶ್ರೀ ಸುಧೀಂದ್ರ ತೀರ್ಥೆರೆನ್ ಬೇತೆ ಬೇತೆ ಕೀರ್ತನೆಲೆಡ್ ಬರೆದ್ ಸುಗಿತೆರ್. ಶ್ರೀನಿವಾಸ ಪ್ರಭುಳೆನ ಕೆಲವು ಪದ್ಮೊಲು ಎನ್ನ ಸಂಗ್ರಹೊಡು ಉಂಡು.

25. ಮೂಲ್ಕಿ ವಿಟ್ಟಪ್ಪ ಮಾಧವ ಭಾಗವತ್: 'ಭಾಗ್ಯತ್ ಮಾಮು' ಪಂಡ್ಲೇ ಬಾರೀ ಪೊಲಬುದ ಪುದರ್ ಮೂಲ್ಕಿದ ವಿಟ್ಟಪ್ಪ ಮಾಧವ ಭಾಗವತೆರೆಗ್. ಭಜನೆನೇ ಆರೆನ ಜೀವೊದ ಉಸಿರ್. 'ಭಾಗ್ಯತ್ ಮಾಮು' ಇಜ್ಜಂದೆ ಭಜನೆನೇ ಇಜ್ಜಿ ಶ್ರೀ ಮೂಲ್ಕಿ ವೆಂಕಟರಮಣ ದೇವಸ್ಥಾನೊಡು. ದೇವಸ್ಥಾನೊದ ವಠಾರೊಡೇ ಎಲ್ಯ ಗುಡ್ಡಿಲ್. ಉತ್ಸವೊದ ಸಮಯೊಡಂತೂ

ಭಾಗ್ಯತರೆಗ್ ಪುರುಸೋತ್ತೇ ಇಚ್ಛೆ. ದೇವೆರ್ ರಥೊದೊಟ್ಟುಗು, ಭಜನೆದಕ್ಕೊಟ್ಟುಗು ಭಜನೆ ಮಲ್ತೊಂದು, ನಲ್ತೊಂದು ಪದ್ಯ ಪಣ್ಣಿನ ಪೊರ್ಲುಗು, ವಾ ನರಮಾನ್ಯಗ್ಲಾ ಭಕ್ತಿ ಪುಟ್ಟಿಂದ ಉಪ್ಪಂದ್. ಇಂಚಪೊ ಮುಟ್ಟಲಾ ಭಾಗ್ಯತ್ ಮಾಮು ಇತ್ತೆರೆಂದ್, ಕಳಿ ವರ್ಸೊ 'ಹರಿದಾಸ ವೆಂಕಣ್ಣ ಕವಿ ಮೂಲ್ಕಿ' ಪಣ್ಣಿ ಎನ್ನ ಬೂಕುದ ಪ್ರಕಟಣೆಗ್ ವಿಷಯ ಸಂಗ್ರಹೊಗು ಯಾನ್ ಮೂಲ್ಕಿ ದೇವಸ್ಥಾನೊದ ದರ್ಶನ ಪಾತ್ರಿ - ಶ್ರೀಯುತ ವಸಂತ ನಾಯಕ್, ಪಲಿಮಾರ್ಕರ್ - ಮೇರೆನ್ ಭೇಟಿಯಾಯ್ತು ಆರ್ ವಿಟ್ಟಪ್ಪ ಭಾಗವತೆರೆನ - ನಲ್ತಿದ ಭಜನೆನ್ ಎನಡ ಪಂಡೆರ್. ವೆಂಕಣ್ಣ ಕವಿನ ಸುಮಾರ್ 19 ಪದ್ಯೊಲು, ಉತ್ಸವದ ಕಾಲೊಡು ಪಣ್ಣೆರುಂಡು. ವಿಟ್ಟಪ್ಪ ಭಾಗವತೆರೆಗ್ ಆ ದೀರ್ಘ ಪದೊಕುಲು ನೀರ್ ಪರಿಲೆಕ ಬಾಯ್ಪಾಟ ಬರ್ಪುಂಡುಗ್! ಈತತ್ತಂದೆ ಸತಃ ಕವಿಯಾದ್, ಅನೇಕ ಕೀರ್ತನೆಲೆನ್ ಬರೆತೆರ್. ಅವು ಪೂರಾ ಮೂಲ್ಕಿ ಕ್ಷೇತ್ರದ ಭಜನೆ ಪುಸ್ತಕೊಡು ಅಚ್ಚಾದ್. ಕೊಂಕಣಿ ಬೊಕ್ಕ ಕನ್ನಡ ಭಾಷೆಡ್ 'ಮೂಲ ವಿಲ' ಪಣ್ಣಿ ಅಂಕಿತೊಡು ಬರೆತಿ ಆರೆನ ಕೀರ್ತನೆಲು ಎನ್ನ ಸಂಗ್ರಹೊಡು ಉಂಡು. ಇಂಚೇ ಹರಿದಾಸೆರೆ ಆದರ್ಶೊಡು ಪ್ರತಿಯೊಯ್ ಭಕ್ತೆರ್ಲಾ ನಡತಂಡ, ಅವು ನಮ ಹರಿದಾಸೆರೆಗ್ ಸಂದವುನ ಮದಿಪು!

26. ಸಂತ ಭದ್ರಗಿರಿ ಅಚ್ಯುತದಾಸೆರ್: ಸಂತ ಭದ್ರಗಿರಿ ಅಚ್ಯುತ ದಾಸೆರ್ ಪರಿಚಯ ಇಚ್ಚಾಂದಿ ನರಮಾನಿ ಈ ತುಳುನಾಡ್‌ಡೇ ಇಚ್ಛೆಂದೆಣ್ಣೆ. ಹರಿದಾಸ ಪಂಥೊಡುಪ್ಪಿ ಹರಿದಾಸೆರ್; ಹಿರಿಯ ಸಾಹಿತಿ, ಹರಿಕಥಾ ಕೀರ್ತನೆ ಮಲ್ಪುನಿ ಮಾತ್ರವತ್ತಾಂದೆ ಕಲ್ಪವನ ಶಿಕ್ಷಕೆರ್, ತುಳು-ಕನ್ನಡ - ಮರಾಠಿ ಕೊಂಕಣಿ ಭಾಷೆಡ್ ಲೇಖಕೆರ್; ಭಕ್ತಾಭಿಮಾನಿಲೆನ ಮೋಕೆದ ಈ ಸಂತ ಭದ್ರಗಿರಿ ಅಚ್ಯುತ ದಾಸೆರ್! ಆರೆನ ತುಳು ಕೀರ್ತನೆಲು - ಸುಮಾರು 21 ಕೀರ್ತನೆಲು ಈ ಲೇಖನದ ಪರಿಶಿಷ್ಟೊಡು ಕೊರುಂಡು. ಆರೆನ ರಚನೆದ ಹರಿಕಥೆಲು ಇಂಚಪೊಗು ಸಿ.ಡಿ. ರೂಪೊಡು ಲಭ್ಯವಾದುಂಡು. 'ಮೂಲ ನಾರಾಯಣ' ಅಂಕಿತೊಡು ಬರೆತಿ ಕೆಲವು ಕೀರ್ತನೆಲು ಎನ್ನ ಸಂಗ್ರಹೊಡು ಉಂಡು. ಶ್ರೀ ಅಚ್ಯುತ ದಾಸೆರೆಗ್ ಅನೇಕ ಧಾರ್ಮಿಕ, ಸಾಂಸ್ಕೃತಿಕ ಸಂಸ್ಥೆಳೆಡ್ ಸನ್ಮಾನ; ರಾಜ್ಯ ಪ್ರಶಸ್ತಿ; ಸಂಗೀತ ನೃತ್ಯ ಅಕಾಡೆಮಿ ಪ್ರಶಸ್ತಿ; ಕರ್ನಾಟಕ ಸರಕಾರೊದ ಸರ್ವೋನ್ನತ ಕನಕ - ಪುರಂದರ ಪ್ರಶಸ್ತಿ; ಹಂಪೆ ಕನ್ನಡ ವಿಶ್ವವಿದ್ಯಾನಿಲಯೊದ ನಾಡೋಜ ಪ್ರಶಸ್ತಿ; ಇಂಚ ಅನೇಕ ಗೌರವಾದರೊಗು ಪಾತ್ರೆಯ್ 'ಹರಿಕಥಾ ಭೀಷ್ಮೆ'ರೆನ್ ನಂಕೊದಗ್ ಕೊರಿ ತುಳುವಪ್ಪೆಗ್ ಸೊಲ್ತೆ ಸಂದಾಗ! (ಈ ದಾಸೆರೆನ ಚರಿತ್ರೆದ ವಿವರ ಬೇತೆನೇ ಕೊರ್ತುಂಡು).

27. ಸಂತ ಭದ್ರಗಿರಿ ಕೇಶವದಾಸೆರ್: ಸಂತ ಭದ್ರಗಿರಿ ಅಚ್ಯುತ ದಾಸೆರೆ ಬೆರಿಟ್ ಪುಟ್ಟಿ ಮೆಗ್ಗೆ. ಪಳಯನಲ್ಕನೇ ಹರಿದಾಸ ಪಂಥೊಗು ಪಜ್ಜೆದೀದ್, ಹರಿಕೀರ್ತನೆ ಕಥಾ ಕಾರ್ಯಕ್ರಮೊಟು ಧಾರ್ಮಿಕ ಪ್ರಚಾರ ಮಲ್ತಿನಾರ್. ಕನ್ನಡ, ತುಳು, ಮರಾಠಿ ಭಜನೆ ರಚನೆ, ಪುರಾಣದ ಕಥೆಕ್ಲೆನ್ ಹರಿಕಥೆಟ್ ಕನ್ನಡ ಬೊಕ್ಕ ಇಂಗ್ಲಿಷ್ ಭಾಷೆಡ್ ರಚಿಸೊದು ಜನೊಕ್ಲೆಗ್ ಧರ್ಮಪ್ರಜ್ಞೆ, ಭಕ್ತಿ ಪ್ರಜ್ಞೆ ಪುಟ್ಟಾಯೆರ್. ಆರ್ ಬರೆತಿ ರಡ್ಡ್ ತುಳು ಕೀರ್ತನೆಳೆನ್ ಪರಿಶಿಷ್ಟೊಡು ಕೊರ್ತುಂಡು. ನಮ್ಮ

ದೇಶೋಡತ್ತಾವಂದೆ ವಿದೇಶದ ಜನೊಕ್ಕೆಗ್ಗಾ ಅಕ್ಲೆನ (ಇಂಗ್ಲಿಷ್) ಭಾಷೆಡ್, ನಮ್ಮ ಸಂಗೀತದ ರಾಗೋಡೇ ಇಂಪಾದ್ ಕೆಬಿ ನಿಮಿರ್ಡ್ ಕೇಣುನಲ್ಯ, ಐಸ್ರ ಅಪಿಲೆಕ್ ಹರಿಕೀರ್ತನೆದ ರುಚಿನ್ ಪುಟ್ಟಾಯ್ ಪುಣ್ಯಾತ್ಮೆರ್; ಮದ್ಮೆ ಆದಾಲಾ, ಯೋಗಿಲ್ಲೆಕ್ ಸಂಸಾರ ಜೀವನೊಡಿತ್ತಾದ್, 'ದಾಸ ಕೇಶವನುತ' - ಅಂಕಿತೊಡು ಕೆಲವು ಕೀರ್ತನೆ ಬರೆದ್, ಭಕ್ತಿ ಬೀಜೊನು ಸಮಾಜೊಡು ಬಿತ್ಯೆರ್. ಬೆಂಗಳೂರು ನಗರೊಡು 'ಹರಿದಾಸಾಶ್ರಮ ಟ್ರಸ್ಟ್' ಸಾಪನೆ ಮಲ್ತಾದ್ ಅನೇಕ ಪ್ರತಿಭಾವಂತರಾಯ್ನೊ ಹರಿದಾಸೆರೆಗ್ ಸನ್ಮಾನ ಮಲ್ತೆರ್. ಇಂಚೇ ಮಹಾನುಭಾವೆರ್ ಭಾರೀ ಬೇಗನೇ ದೇವರೆ ಪಾದೊ ಸೇರೈರ್. ಉಂದು ನಮ್ಮೊ ದೌರ್ಭಾಗ್ಯಂದೇ ಪಣೊಡು. ಆಂಡಲಾ ಆರ್ ನಂಕ್ ಬುಡ್ಡು ಪೋತಿ ಕೃತಿಕುಳೆನ್ ನಮ ನಿತ್ಯ ತುದಿತೊಂದು ಹರಿದಾಸೆರೆಗ್ ನಮ ಋಣನ್ ಸಂದಾಗ.

28. ಹರಿದಾಸಿ ಮುಳಿಯ ಮೂಕಾಂಬಿಕಾ ಅಮ್ಮ : ಬಂಟ್ವಾಳ ತಾಲೂಕುದ ಪುಣಚಿ ಗ್ರಾಮದ 'ಮಲೆತಡ್ಕ' ದ ಚಕ್ರಕೋಡಿ ಮನೆತನದ ಶಾಮಶಾಸ್ತ್ರಿ ಬೊಕ್ಕ ಗೌರಮ್ಮ ದಂಪತ್ಯೇರೆನ ಮಗಳ್ ಮೂಕಾಂಬಿಕೆ(ಜ.1870). 'ಪಿಲಿತ ಬಂಜಿಡ್ ಪುಟ್ಟುನಿ ಪಿಲಿತ ಕಿನ್ನಿಯೇ!' ಅಂಚಿನೇ ಪ್ರಖಾಂಡ ಪಂಡಿತೆರ್, ವಿದ್ವಾಂಸೆರ್ ಜನ್ಮತಾಳಿನ ಈ ಕುಟುಂಬೊಡು ಬುಳೆದ್ ಬತ್ತಿ ಮೂಕಾಂಬಿಕೆ ಶಾಲೆಗ್ ಪೋದು ಹೆಚ್ಚಿ ಓದಿಜಡಲಾ, ರಕ್ತಗತವಾದ್ ಬೈದಿ ಸುಪ್ತಪ್ರತಿಭೆ ಬೊಲ್ಪುಗು ಬರೈರೆ ಸಮಯ ಕಾತೊಂದಿತ್ತಂಡ್.

ಎಲ್ಯ ಪ್ರಾಯೊದ ಮೂಕಾಂಬಿಕೆಗ್ ಪ್ರಸಿದ್ಧ 'ಮುಳಿಯ' ಮನೆತನೊತ ಮುಳಿಯ ಕೃಷ್ಣ ಭಟ್ಟೆಡ ಮದ್ಮೆ ಆದ್, ಐನ್ ಜೋಕ್ಲಾಂಡ್. ಜೋಕ್ಲ ಎಲ್ಯಪ್ಪನಗನೇ ಮೂಕಾಂಬಿಕಾಮ್ ವಿಧವೆಯಾದ್, ಅಪಗದ ಸಂಪ್ರದಾಯೊದಲ್ಯ ತರೆ ಬೋಳಿಸೊದು, ಬೊಳ್ಳು ಕುಟು ತುತ್ತೊಂದು ಮಡಿ ಪೊಂಜಾವಾಯೆರ್. ಪತಿ ವಿಯೋಗ ಬೊಕ್ಕ ಬಡತನೊತ ಬದುಕು - ಉಂದೆನ್ ಮಾತೆನ್ನಾ ಮರೆಪರೆಗಾದ್, ತನ್ನೊಲಯಿಡ್ ದೆಂಗ್‌ದಿತ್ತಿ ಕಾವ್ಯ ಪ್ರತಿಭೆಲು ತಾನಾದ್ ಪಿದಾಯಿ ಬರ್ಪಿಲೆಕೆ ಸಂದರ್ಭ ವೊದಗಾದ್ ಬತ್ತಂಡ್! ಆಶು ಕವಿತಾ ಶಕ್ತಿ ಇತ್ತಿ ಮೂಕಾಂಬಿಕಾಮ್, ಸಂಸ್ಕೃತ ಬೊಕ್ಕ ಕನ್ನಡ ಭಾಷೆಡ್ ಅನೇಕ ಕೃತಿಳೆನ್ ರಚನೆ ಮಲ್ತೆರ್. 'ಮೂಕಾಂಬೆ, ಮೂಕಾಂಬಿಕೆ' ಅಂಕಿತ ನಾಮೊಡು ಆರೆನ ರಚನೆದ ಕೃತಿಕುಳು:

- | | |
|------------------------|---|
| 1. ದ್ರೌಪದಿ ವಸ್ತ್ರಾಪಹರಣ | 2. ಹರಿಲೀಲಾಮೃತ |
| 3. ಸೀತಾ ಕಲ್ಯಾಣ | 4. ಧ್ರುವಚರಿತ್ರೆ |
| 5. ಪುತ್ರಕಾಮೇಷ್ಟಿ | 6. ಗಜೇಂದ್ರ ಮೋಕ್ಷ |
| 7. ಬಾಲಲೀಲೆ ಬಿಲ್ಲ ಹಬ್ಬ | 8. ಶ್ರೀ ಮಹಿಷ ಮರ್ದಿನಿ ಸ್ತುತಿ
(ಸಂಸ್ಕೃತ ಭಾಷೆಡ್) |

ಇಂಚಿ. ಸ್ವತಃ ನಯ ವಿನಯ ಸಂಪನ್ನೆಯಾದ್, ದೈವಭಕ್ತಿಡ್ ನಂಬಿಕೆ ಇತ್ತಿ ಮೂಕಾಂಬಿಕಾಮ್ ಧೈರ್ಯ ಕುಂದಂದೆ ತನ್ನೊ ಕೃತಿಕ್ಲೆಡ್, 'ಸ್ತ್ರೀ ಅಬಲೆಯತ್ತ - ಸಬಲೆ' ಪಂಡ್

ನೆಗತ್ತ ತೋಜಾದೆರ್. ಕನ್ನಡದ ಖ್ಯಾತ ಕವಿ ದಿ| ಪಂಡಿತ ಮುಳಿಯ ತಿಮ್ಮಪ್ಪಯ್ಯರೆಗ್ಗ ಮೂಕಾಂಬಿಕಾಮ್ಮ ಸಂಬಂಧೊಡು ಚಿಕ್ಕಮ್ಮ ಬೂರ್ದೆರ್. ಅಂಚೆನೇ ಪುತ್ತೂರ್ಡ್ಡೆ ಲೇಖಕೆರಾಯ್ನೊ ದಿ| ಮುಳಿಯ ಕೃಷ್ಣಭಟ್, ಬೊಕ್ಕ ಪ್ರಸಿದ್ಧ ಲೇಖಕಿ ಶ್ರೀಮತಿ ಗಂಗಾ ಪಾದೇಕಲ್ - ಮೊಕ್ಲೇರ್ವೇರ್ಡ್ಡೆ ಮೂಕಾಂಬಿಕಾಮ್ಮನ ಪುಳ್ಳಿಯಡಿಕ್ಕು ಆಪೆರ್. ಸುಮಾರ್ ಎಣ್ಣಿ (80) ವರ್ಷೊದ ಬದ್ಡ್, ಅಂತೊಕಾಲೊಡು ಮೂಜನೇ ಮಗ ಕೇಶವ ಭಟ್ಟನ ಒಟ್ಟುಗಿತ್ತೆರ್. 1942ಟ್, ಮೂಕಾಂಬಿಕಾಮ್ಮ ಹರಿಪಾದ ಸೇರ್ದೆರ್.

ಶ್ರೀಮತಿ ಗಂಗಾ ಪಾದೇಕಲ್ ಬರೆತಿ ಲೇಖನ - 'ಕವಯಿತ್ರಿ ಮುಳಿಯ ಮೂಕಾಂಬಿಕಾ ಅಮ್ಮ' ಉಂದೆನ್ 'ದಕ್ಷಿಣ ಕನ್ನಡ ಜಿಲ್ಲೆಯ ಮೊದಲ ಲೇಖಕಿಯರು' (ಸಂ: ಮನೋರಮಾ ಭಟ್, ಪ್ರ: ಕರಾವಳಿ ಲೇಖಕಿಯರ ವಾಚಕಿಯರ ಸಂಘ, ದ.ಕ. ಮತ್ತು ಕಾಸರಗೋಡು - 1996) ಈ ಬೂಕುನು ಓದುದ್, ಕವಯಿತ್ರಿ ಮೂಕಾಂಬಿಕಾ ಅಮ್ಮನ್ - ಹರಿದಾಸೆರೆ ಸಾಲ್ಗ್ ಸೇರ್ಪಾವೊಡುಂದು, ಆರೆನ ಮಿತ್ತದ ಗೌರವಾದರೊಡು ಯಾನ್ ಈ ಲೇಖನ ಬರೆಪಿನ್ಡೆ ದುಂಬು ಶ್ರೀಮತಿ ಗಂಗಾ ಪಾದೇಕಲ್ ಮೇರೆಡ ಅನುಮತಿ ಕೇಂಡೆ. ಆರ್ ಸಂತೋಷೊಡೇ 'ಸೈ' ಪಂಡೆರ್. ಆರೆಗ್ ಎನ್ನ ಅನಂತ ಕೃತಜ್ಞತೆಲು. ಉಂದು ಮಾತಾ ಹರಿಚಿತ್ತ! ಅಂತೂ ನಮ್ಮ ತುಳುನಾಡ್ಡೆ ಹರಿದಾಸಿಯೆರ್ಡ್ಡೆ ಸಾಲ್ಗ್ ಮುಳಿಯ ಮೂಕಾಂಬಿಕಾ ಅಮ್ಮನ್ ಕೊಣತ್ ಉಂತ್ಯೆನ ಈ ಸಂದರ್ಭೊಡು, ಹಿರಿಯ ಮಾತೆ ಮೂಕಾಂಬಿಕಾಮ್ಮನ ಚರಣೊಗು ಅಡ್ಡ ಬೂರೊಂದು, ಆಶೀರ್ವಾದ ನಟ್ಟೋಣ್ಣೆ.

29. ಸರಸ್ವತಿ ರಾಜವಾಡೆ: ಶ್ರೀ ವಾದಿರಾಜೆರೆ ಪರಮ ಭಕ್ತಿದಿ: ಒಡಿಪು (ಬಳಂಜಾಲ) ನಾರಾಯಣ ದಾಸೆರ್ಡ್ಡೆ (ಹರಿದಾಸೆರ್) ಮಗಳಾದ್, ಹಿರಿಯ ಲೇಖಕಿ, ಪರವೂರ್ಡ್ಡೆ ಅಂಬಿಕಾಪತಿರಾಯ್ ಶಾಸ್ತ್ರಿ ರಾಜವಾಡೆ - ಪಣ್ಣಿನಾರನ ಕೈಪತ್ತ್ದ್ (ರಡ್ಡನೇ ಬುಡೆದಿ), ಎಲ್ಲಿ ಪ್ರಾಯೊಡೇ ಪತಿ ವಿಯೋಗೊಡು; ಸಂತಾನ ದಾಂತೆ ಸಾಹಿತ್ಯೊಗು ಶರಣಾದ್, ಗುರುವಾದಿರಾಜೆರ್ಡ್ಡೆ ಭಕ್ತಿಡ್, ಅನೇಕ ಕೀರ್ತನೆಲೆನ್ ಬರೆದ್ ಬೂಕುದ ರೂಪೊಡು ಬೊಳ್ಳುಗು ಕೊಣ್ಣೆರೆರ್. 'ಗಿರಿಬಾಲೆ' ಆರೆನ ಅಂಕಿತ ನಾಮ. ಕ್ರಮೇಣ ಮಾತೆರೆಗ್ಲಾ 'ಗಿರಿಬಾಲೆ'ಂದೇ ಪರಿಚಯವಾದಿನ ಈ ಮಹಿಳೆ, ಒಡಿಪುದ 'ಚಿಟ್ಟಾಡಿ'ಡ್ ಶ್ರೀ ಶಾರದಾಂಬಾ ದೇವಸ್ಥಾನ ಆರೆನ ಕೈಟ್ ಸಾಪನೆಯಾಂಡ್. ಗಿರಿಬಾಲೆನ ಕಂಡನಿನ ವಂಶ ಪರಂಪರೆಟ್ ಬೈದಿ 'ಶ್ರೀ ಶಾರದಾಂಬಾ' ಮೂರ್ತಿನ್ ಸರಿಯಾಯ್ ಜಾಗೊಡು ನಿಲೆ ಮಲ್ಲಿ ಕೀರ್ತಿ ಗಿರಿಬಾಲೆಗ್ ಸೇರಾಂಡ್! ಇನಿಕ್ಲಾ ಸರಸ್ವತಿ ರಾಜವಾಡೆನ (ಸ್ಥಾಪಕಿ) ನೇಲ್ಯ ಫೋಟೊ ಗೋಡೆಗ್ ನೇಲ್ಪದ್ ದೀದ್, ಶ್ರೀ ಶಾರದಾಂಬೆ ಭಕ್ತೆರೆಗ್ ಆಸೆ, ಆಕಾಂಕ್ಷೆನ್ ದರ್ಶನೊದ ಮೂಲಕ ನೆರವೇರದ್ ಕೊರ್ಪಿನ ವಿಷಯೊನು, ಪ್ರತ್ಯಕ್ಷದರ್ಶಿಯಾದ್ ಆ ಕ್ಷೇತ್ರೊಗು ಪೋದು ಯಾನ್ ತೂಯೆ! ಗಿರಿಬಾಲೆ ಬರೆತಿನೊ ಕೆಲವು ಬೂಕುಲೆನ್ ಯಾನ್ ಸಂಗ್ರಹ ಮಲ್ತೊಂಡೆ. ('ಶ್ರೀಮದ್ಭಾವೀಸಮೀರ ಶ್ರೀ ವಾದಿರಾಜ ಗುರುವರ ಸ್ತವನಾಂಜಲಿ'; 'ಉಡುಪಿ ಶ್ರೀ

ಶಾರದಾಮ್ಮನವರ ಸ್ತುತಿ; 'ಆಹುತಿ ಇತ್ಯಾದಿ ಕಥೆಗಳು' - 'ಶ್ರೀ ಮದ್ಭಾವೀಸಮೀರ ಶ್ರೀ ವಾದಿರಾಜ ಗುರುವರ ಕೃಪಾತರಂಗ' (ಭಾಗ ೧ ಬೊಕ್ಕ ಭಾಗ ೨); 'ಉಡುಪಿ ಶ್ರೀ ಶಾರದಾಂಬಾ ದೇವಸ್ಥಾನದ ಪೂರ್ವೇತಿಹಾಸ'; 'ಉಡುಪಿ ಶ್ರೀ ಶಾರದಾಮ್ಮನವರು ಭಕ್ತರಿಗೆ ಪ್ರಕಟಿಸಿದ ಮಹಿಮೆಗಳು' ಇಂಚ ನಮ್ಮ ತುಳುನಾಡ್ಡ ಆದರ್ಶ ಮಹಿಳೆ ಬೊಕ್ಕ ಹರಿದಾಸಿಯಾದಿಂಚಿ 'ಗಿರಿಬಾಲೆ'ನ ಪ್ರದರ್ ತುಳುವೆರೆನ ಮನಸ್ಸೊಡ್ ಸ್ಥಿರವಾದ್ ನಿಲೆಯಾವೊಡೊಂದು ಪಣ್ಣಿ ಈ ಕಜೊಡು, ಯಾನ್ ಈ ಲೇಖನೊಗು ಆರೆನ ಪ್ರದರ್ ಆಯ್ಕೆ ಮಲ್ತೊಂಡೆ. ಆರ್ ತುಳು ಬೊಕ್ಕ ಕನ್ನಡ ಭಾಷೆಡ್ ಬರೆದಿತ್ತೊಂಡಲಾ ನಮ್ಮ ಜನೊಕ್ಲೆಗ್ ಅವು ನನ್ನಲಾ ಮುಟ್ಟಿಜಿ. 'ಶ್ರೀ ವಾದಿರಾಜ ಗುರು ಸಾರ್ವಭೌಮರ ಚರಿತ್ರೆ'ನ್ ತುಳು ಲಾವಣಿ ಶೈಲಿಡ್ ಬರೆದ್, ಶ್ರೀ ವಾದಿರಾಜೆರೆ ಪುಣ್ಯ ದಿನೊತ ಸಂದರ್ಭೊಡು - ಉಡುಪಿ ಶ್ರೀಕೃಷ್ಣ ಗುಡಿಟ್ಟಾ; ಬೊಕ್ಕ ಕಟೀಲು ಶ್ರೀ ದುರ್ಗಾ ಪರಮೇಶ್ವರೀ ದೇವಸ್ಥಾನೊದ ಉತ್ಸವದ ಸಾಂಸ್ಕೃತಿಕ ಕಾರ್ಯಕ್ರಮೊಡ್ಲಾ ಪಣ್ಣೊಂಡಲಾ ಕೃತಿ ಇತ್ತೆ ಲಭ್ಯ ಇಜ್ಜಿ. ಅಯ್ಯಾತ್ರ ದುಂಬಗ್ ಎನ್ನ ಕನ್ನಡ ಭಾಷೆದ ಕೃತಿಗ್ ಬೋಡಾವೊಂದು ಈ ಸಂಗ್ರಹ. (ಮುಂದಿನ ಪ್ರಕಟಣೆ - ದಕ್ಷಿಣ ಕನ್ನಡ ಜಿಲ್ಲೆಯ ಹರಿದಾಸರು) ಶ್ರೀ ಶಾರದಾಂಬೆಗ್ಲಾ, ಹರಿದಾಸಿ 'ಗಿರಿಬಾಲೆ'ಗ್ಲಾ ಎನ್ನ ಉದ್ದಂಡ ನಮಸ್ಕಾರೊಲು.

30. ಹರಿದಾಸಿ ಉಡುಪಿ ಯಶೋದಮ್ಮ : 'ಯಶೋದೇಶ ಕೃಷ್ಣ' - ಅಂಕಿತೊಡು ಅನೇಕ ಕನ್ನಡ ಬೊಕ್ಕ ತುಳು ಕೀರ್ತನೆ ರಚನೆ; ಕನ್ನಡ ಬೊಕ್ಕ ತುಳು ಭಾಷೆಡ್ ಹರಿಕೀರ್ತನೆ ರಚನೆ, ಹರಿಕಥಾ ಕಾರ್ಯಕ್ರಮ ಮಲ್ಪುನ; ಸಮಾಜೊಡು ಭಕ್ತಿರಸ ಪುಟ್ಟಾವರೆ ಪೊಣ್ಣು ಜೋಕುಳೆಗ್ ಭಜನೆ, ಶಾಸ್ತ್ರೀಯ ಸಂಗೀತ ಕಲ್ಪವನ ಕಜೊಡು ಸುಮಾರು 40 ವರ್ಷೊಡ್ಲಿಂಚಿ ಉಡುಪಿ ಶ್ರೀಕೃಷ್ಣ ಮರೊಟು ಬಯ್ಯದ ಪೊರ್ತುಗು ಮಹಿಳೆಯೆರೆನೊಟ್ಟುಗು ಸೇರ್ದಾದ್ ಶ್ರೀಕೃಷ್ಣ ಮುಖ್ಯಪ್ರಾಣ ಭಗಿನೀ ಭಜನಾ ಮಂಡಳಿ ಕಟ್ವೊದ್, ತಾರತಮ್ಮ ಭಜನೆ ಮಲ್ಪುನ ಭಜನೆಯಶೋದಮ್ಮ ಪಣ್ಣಿ ಖ್ಯಾತಿ; 35 ವರ್ಷೊಡ್ಲಿಂಚಿ ಹರಿಕಥಾ ಕಾರ್ಯಕ್ರಮ ಕೊರೊಂದು, 'ಹರಿಕಥಾ ಪ್ರವೀಣೆ', 'ಹರಿಕಥಾ ರಂಜಿನಿ' - ಬಿರುದ ಪಡೆಯಿನ ನಮ್ಮ ಕಥಾ ನಾಯಕಿ ಹರಿದಾಸಿ ಒಡಿಪುದ ಯಶೋದಮ್ಮ ಇನಿಗ್ ಮಂಡೆ ಬೋಳ್ತಿನ ಮಡಿ ಪೊಂಜವು - ವಿಧವೆಯಾಂಡಲಾ ಪೊಣ್ಣು - 'ಅಬಲೆ ಅತ್ತ ಸಬಲೆ' ಪಂಡ್ ಸಮಾಜೊಗು ಮಾರ್ಗದರ್ಶಕೆರಾಯ್ಲೊ ಅಂಗೈಡುಪ್ಪಿ ಕನ್ನಡಿ. ತುಳು ಕೀರ್ತನೆ ಸಂಗ್ರಹೊದೊಟ್ಟುಗು ಆರೆನ ಜೀವನ - ಸಾಧನೆಲೆನ್ ವಿವರವಾದ್ ಉಂದುವೇ ಲೇಖನೊಡು ಪ್ರತ್ಯೇಕವಾದ್ ಕೊರುಂಡು. ಹಿರಿಯೆರೆನ ಆದರ್ಶೊನು ನಮ್ಮ ಜೀವನೊಡು ಅಳವಡಿಸೊಂದು ಸಾರ್ಥಕ ಮಲ್ತೊನೊಡು. ಹಿರಿಯೆರೆಗ್ ಎನ್ನ ಭಕ್ತಿಪೂರ್ವಕವಾಯ್ಲೆ ಸೊಲೈಲು.

31. ಪಣಂಬೂರು ಲಕ್ಷ್ಮೀನಾರಣಪ್ಪಯ್ಯ : ಪಣಂಬೂರು ಗುರು ಸದಾನಂದೆರೆ ನೇಲ್ಯ ಪಳಯೆ ಆದಿತ್ತೊದ್, ಹರಿದಾಸ ಪಂಥೊಡಿತ್ತೊದ್, ಕೆಲವು ಕೃತಿರಚನೆ ಮಲ್ದೆರ್. ಆಂಡಲಾ ಏರೆ ಕಣ್ಣೊಗ್ಲಾ ಬೂರಂದೆ ಅಲಕ್ಷಿತ ಹರಿದಾಸೆರಾದೇ ಒರಿದ್ ಪೋಯೆರ್. ಇತ್ತೆ ಕೇವಲ 'ನಾರಾಯಣ'

ಅಂಕಿತೊಡು ಬರೆತಿ ಒಂಚೇ ಒಂಜಿ ತುಳು ಪದ್ಯ ತಿಕ್ಕಾದಿನೆನ್ ಈ ಲೇಖನೊಡು ಸೇರ್ಪಾದಾಂಡ್.

32. ಕೆರೆ ಮಠ ಗೋವಿಂದ ಉಪಾಧ್ಯಾಯೆರ್(ಘನಪಾಠಿ): ಕೊಡವೂರು(ಮೂಡುಬೆಟ್ಟು) ಗ್ರಾಮೊದ ಘನಪಾಠಿ ದಾಸ ಉಪಾಧ್ಯಾಯೆರ್ ಬೊಕ್ಕ ಸತ್ಯಭಾಮಾ ದಂಪತ್ಯೇರೆಗ್ ಪುಟ್ಟಿನೊ ಒರಿಯೇ ಮಗನೇ ಕೆರೆಮಠ ಗೋವಿಂದ ದಾಸೆರ್. ಒಡಿಪು ಬೊಕ್ಕ ಇಡೀ ದಕ್ಷಿಣ ಕನ್ನಡ (ಅವಿಭಜಿತ) ಜಿಲ್ಲೆಡ್ ತೆರಿಯಂದಿನಕ್ಕಿಚ್ಚಿ. ವೃತ್ತಿಜೀವನೊಡು 'ವಾಣಿ' ಪತ್ರಿಕೆ ನಡಪಾವೊಂದಿತ್ತೆರ್. ಹರಿಕಥೆಗಾದೇ ತನ್ನೊ ಜೀವನೊನು ಮುಡಿಪಾದಿತ್ತಿ ಈ ದಾಸೆರ್ ಕಡೆಕ್ ಪತ್ರಿಕೆ ಉದ್ಯೋಗ ಬುಡ್ಡು, ಬೊಕ್ಕ ಹರಿಭಕ್ತಿಗೇ ಗೇನ ದೀಯೆರ್. ಹರಿದಾಸೆರೆ ಬುಡೆದಿ ಭಾಗೀರಥಿ. ಅಕ್ಲೆಗ್ ಒರಿಯೇ ಮಗೆ - ಘನಪಾಠಿ ಹರಿದಾಸ ಉಪಾಧ್ಯಾಯ. ಉತ್ತರಭಾರತಾದ್ಯಂತ ಸುಮಾರು 40 ವರ್ಷ ಹರಿಕಥೆ ಮಲ್ತೊಂದು (ಕನ್ನಡ ಭಾಷೆಡ್) ಊರುಡೂರು ತಿರೊಂದಿತ್ತಂಡಲಾ, ವಾವೊಂಜಿ ಕಥೆನ್ನಾ ಬರೆದ್ ದೀವರೆ ಪೋಯಿಚೆರ್. ಶ್ರೀ ದಾಸೆರ್ ಸುಮಾರು 30 ವರ್ಷೊಡ್ಡು ಪಿರಪ ಹರಿಪಾದ ಸೇರೈರಾಂಡ್ ಗೊತ್ತಾಂಡ್. ಗೋವಿಂದದಾಸೆರೆ ಮಗೆ ಕೆರೆಮಠ ಹರಿದಾಸ ಉಪಾಧ್ಯಾಯೆರ್, ಶ್ರೀಕೃಷ್ಣ ಮಠತೊ ಎದುರ್ದ ಬೀದಿಡ್ ದೇವತಾರ್ಚನೆದ ಎಲ್ಯ ಅಂಗಡಿ ದೀತೆರ್. ಎಂಕ್ ಬೋಡಾಯ್ನ ಮಾಹಿತಿಲೆನ್ ಕೊರಿನ ಶ್ರೀ ಹರಿದಾಸ ಉಪಾಧ್ಯಾಯೆರೆಗ್ಲಾ, ಆರೆನ ಮಗೆ ರಂಗವಿಠಲೆರೆಗ್ಲಾ; ಬೊಕ್ಕ ಕೆರೆಮಠ ಗೋವಿಂದ ದಾಸೆರೆನ್ ಎನ್ನ ಸ್ಮರಣೆಗ್ ಕೊಣರಾಯಿನ ಶ್ರೀಯುತ ಪು. ಶ್ರೀನಿವಾಸ ಭಟ್, ಕಟೀಲು - ಮೊಕ್ಲೆಗ್ ಮಾತೆರೆಗ್ಲಾ ಎನ್ನ ಉಡಲ್ತೊಂಜಿನೊ ಸೊಲ್ತೆಲು.

33. ಹೊಸಬೆಟ್ಟು ಶ್ರೀಧರಾಚಾರ್ಯ : ಸುರತ್ಕಲ್ ಕ್ಷೇತ್ರದ ಹೊಸಬೆಟ್ಟು ಗ್ರಾಮೊದ ಕಾವಿನಕಲ್ಲು ಕುಟುಂಬದ ಶ್ರೀಧರಾಚಾರ್ಯೆರ್ ಹರಿಕಥೆ ಮಲ್ಪುನ ಹಿರಿಯ ಹರಿದಾಸೆರ್ ಬೊಕ್ಕ ಸಂಸ್ಕೃತ ವಿದ್ವಾಂಸೆರ್. ಸುಮಾರ್ ಮುಪ್ಪತ್ತೆನ್ ವರ್ಷ ಪ್ರಾಯೊಡೇ ಕುಳಾಯಿ ಚಿತ್ರಾಪುರ ಮರೊಟು ಕೀರ್ತಿಶೇಷರಾಯಿಂಚಿ ಶ್ರೀ ವಿದ್ಯಾಪೂರ್ಣ ತೀರ್ಥೆರೆನ ಆಶೀರ್ವಾದೊಡು ಸುರು ಮಲ್ತಿನ ಹರಿಕಥೆತ ವ್ಯವಸಾಯೊನು ತನ್ನ ಆಯುಷ್ಯೊದ ಅಖೇರಿ ಮುಟಲಾ ನಡಪೊಂದು ಬತ್ತಿನಾರ್. ಆಚಾರ್ಯೆರ್ ಕಡೀರ ಮಗೆ ಶ್ರೀ ವಾದೀಶ ಆಚಾರ್ಯೆರ್ಲಾ ಅಮ್ಮೆರ್ ಸಾದಿಡೇ ಪೋವೊಂದು ಪೌರೋಹಿತ್ಯ ಬೊಕ್ಕ ಕೀರ್ತನಾ ಸೇವೆ ಮುಂದರೊಂದು, ಇತ್ತೆ ಶ್ರೀ ಪುತ್ರಿಗೆ ಮರಾಧೀಶೆರೊಟ್ಟುಗು ವಿದೇಶೊಡ್ಲಾ ಹರಿಕಥೆತ ರುಚಿನ್ ಪತ್ತಾಯಿನಾರ್. ಶ್ರೀಧರ ಆಚಾರ್ಯೆರ್ ಮಡೀರ ಮಗೆ, ಮೈಸೂರುಡು - ಉಡುಪಿ ಶ್ರೀಕೃಷ್ಣ ಮಂದಿರೊದ ಅರ್ಚಕೆರಾದ್ ನಿರಂತರ ಹರಿಸೇವೆ ಬೊಕ್ಕ ಹರಿದಾಸೆರೆ ಸೇವೆನ್ ಮಲ್ತೊಂದುಲ್ಲೆರ್. ಶ್ರೀಧರಾಚಾರ್ಯೆರ್ ಮದ್ರಾಸ್, ಕೊಯಮುತ್ತುರು, ಹೈದರಾಬಾದ್ - ಇಂಚ ಅನೇಕ ಕಡೆಟ್ ಹರಿಕೀರ್ತನಾ ಸೇವೆ ಮಲ್ತೊಂದು, ಕಾಶಿದ ಪಂಡಿತೆರ್ ಸಭೆಟ್ ಹರಿಕಥೆ ಮಲ್ಪಿ ಮೂಲಕ ಹರಿದಾಸ ರತ್ನ ಬಿರುದು ಪಡೆಯೆರ್. ಜೊತೆಕ್, ಹುಟ್ಟೂರುಡು 'ಕೀರ್ತನಾ ಕೇಸರಿ' - ಪಣ್ಣಿ ಬಿರುದು ಪಡೆದ್, ಆಚಾರ್ಯೆರ್ ಕೀರ್ತಿಗ್ ಕಲಶ ದೀಮ್ಮೆಲ್ತಾಂಡ್! ಉಂದು

ನಮ್ಮ ಊರ್ದೇ ಒಂಜಿ ಪೆರ್ಮೆದ ಸಂಗತಿ! 70 ವರ್ಷೊದ ಪೂರ್ಣ ಬದ್ಯಾಡ್ ಸಾರ್ಥಕ ಸೇವೆಡ್ ಕೀರ್ತಿಶೇಷ (ಕ್ರಿ.ಶ. 1989) ರಾಯೆರ್. ಇಂಚೀ ಹರಿದಾಸ ಸಂಪ್ರದಾಯ ಕುಟುಂಬದ ಆದರ್ಶ ಸೇವೆಗ್ ನಮ ಮಾತೆರ್ಲಾ ಭಕ್ತಿಪೂರ್ವಕವಾದ್ ತರೆ ತಗ್ಗಾಗ!

34. ಪುಂಡೂರು ದಾಮೋದರ ಪುಣಿಚಿತ್ತಾಯ್: ಪುಂಡೂರು ಮನೆತನತ ಹಿರಿಯನಾರ್. ತುಳು ಬೊಕ್ಕ ಕನ್ನಡ ಭಾಷೆದ ಆಶು ಕವಿಯಾದ್ ಅನೇಕ ಕೃತಿಕುಳೆನ್ ಬರೆತಿನಾರ್. ಆರ್ ತುಳುಟು ಬರೆತಿ ಮೂಜಿ ಪದ್ಯೊಲೆನ್ ಈ ಸಂಕಲನೊಟು ಸೇರ್ಪಾದ್ಂಡ್. 'ದಾಮೋದರ' ಅಂಕಿತೊಡು ಬರೆಯ್ನೊ ಅಪ್ರಕಟಿತ ಕನ್ನಡ ಪದ್ಯೊಲು (ಕೀರ್ತನೆಲು) ನನ್ನಲಾ ಪ್ರಕಟವಾವಂದೆನೇ ಒರಿದೇ ಪೋಂಡುಂದು ಆರೆನ ಸುಪುತ್ರರಾದಿಂಚಿ ಶ್ರೀಯುತ ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರ್ ಹೇಳಿಕೆ ಬೊಕ್ಕ ಕೋರಿಕೆ. ಅಲಕ್ಷಿತ ಹರಿದಾಸೆರಾದ್ ಈ ಹರಿದಾಸ ಮಾಲೆಗ್ ಆರೆನ್ ಸೇರ್ಪಾದೆ. ನನಾಂಡಲಾ ಆರೆನ್ ಹರಿದಾಸೆರ್ಂಡ್ ಆದರಿಪುಗ.

35. ದೇಲಂಪಾಡಿ ನಾರಾಯಣ(ವಾಸು) ಅರಳಿತ್ತಾಯೆರ್: ಶಿವಳ್ಳಿ ತುಳುತ ಲಾವಣಿ ಪದ್ಯ ಬರೆಯಿನ ನಾರಾಯಣ ಅರಳಿತ್ತಾಯೆರ್ ಮಾತೆರ್ಗ್ಲಾ 'ವಾಸು' ಅರಳಿತ್ತಾಯೆರ್ಂದೇ ಸಲಿಗಿದ ಪುದರ್. ಆರೆನ ತುಳು ಲಾವಣಿನ್ ಈ ಸಂಕಲನೊಟು 'ಅಲಕ್ಷಿತ ಹರಿದಾಸೆರೆ' ರಚನೆ ಸಾಲಾಗ್ ಸೇರ್ಪಾದ್ಂಡ್. ಶ್ರೀ ವೆಂಕಟರಾಜ ಪುಣಿಚಿತ್ತಾಯೆರೆನ ಮೂಲಕ ಈ ಕೃತಿ ಎನ್ನ ಕೈ ಸೇರ್ಪಾದ್. ಪುಣಿಚಿತ್ತಾಯೆರೆಗ್ ಎನ್ನ ಸಾರ ಸೊಲ್ಮೆಲು.

36. ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರ್: ಸಂಸ್ಕೃತ ಶಿರೋಮಣಿ, ಕನ್ನಡ ವಿದ್ವಾಂಸೆ, ತುಳು ಲಿಪಿ ಸಂಶೋಧಕೆರಾದ್, ಸಂಸ್ಕೃತ, ಕನ್ನಡ ಬೊಕ್ಕ ತುಳು - ಇಂಚ ಮೂಜಿ ಭಾಷೆಡ್ಲಾ ಕೃತಿಳೆನ್ ಬರೆಯ್ನಾರ್. ಪುರಾಣೊದ ಗ್ರಂಥೊಲೆನ್ ಬೊಳ್ಳುಗು ಕೊನತ್ತಿನ ಶ್ರೀಯುತ ವೆಂಕಟರಾಜ ಪುಣಿಚಿತ್ತಾಯೆರೆನ ತುಳು ಕೀರ್ತನೆಲೆನ್ ಅಲಕ್ಷಿತ ಹರಿದಾಸೆರೆ ಕೃತಿಕುಳೆನ ಸಾಲಾಗ್ ಸೇರ್ಪಾದೆ. ಈ ವಿದ್ವಾಂಸೆರೆಗ್ ಎನ್ನ ಉಡಲ್ದಿಂಚಿ ಸೊಲ್ಮೆಲು. (ಆರೆನ ಜೀವನ ಚರಿತ್ರೆನ್ ಪ್ರತ್ಯೇಕವಾದ್ ಕೊರ್ತುಂಡು)

37. ಪಾವಂಜಿ ಗುರುರಾಯೆರ್: ಹರಿದಾಸ ಸಾಹಿತ್ಯ ಸೇವೆ ಸಂದಾಯ್ನಕ್ಕೆಡ್ ಒಡಿಪುದ ದಿ| ಪಾವಂಜಿ ಗುರುರಾಯೆರ್ಲಾ ಒರಿಯಾದುಲ್ಲೆರ್. ಗುರುರಾಯೆರ್ ಶಾಲೆದ ವಿದ್ಯೆದೊಟ್ಟುಗು ದೈವಭಕ್ತಿ, ವೈಷ್ಣವ ದೀಕ್ಷೆ, ಶಾಸ್ತ್ರ ಅಧ್ಯಯನ - ಇಂಚ ಮಾತಾ ವಿದ್ಯೆಲೆನ್ನಾ ಕಲ್ತೊಂಡರ್. ಆ ಕಾಲೊದ ವಿದ್ಯಾರ್ಥಿಲೆಗ್ ಸಂಧ್ಯಾವಂದನಾದಿ ಸಂಸ್ಕೃತ ಅಭ್ಯಾಸ ಮಲ್ಪರೆಗಾದ್ ಒಂಜಿ ಪಾರಶಾಲೆ ಪ್ರಾರಂಭ ಮಲ್ತೆರ್. ಅಯ್ಕ್ ಬೋಡಾಯ್ನ ಸಂಧ್ಯಾವಂದನೆ ಜಪ - ಮಂತ್ರ, ಸ್ತೋತ್ರಳೆನ ಎಲ್ಯೆಲ್ಯ ಬೂಕುಳೆನ್ ಕನ್ನಡ ಲಿಪಿಟ್ ಅಚ್ಚಾಕ್ದ್, ತನ್ಯ್ ನಷ್ಟಾಂಡಲಾ ಅತೀ ಕಡಿಮೆ ಬೆಲೆಕ್ ಮಾರಾಟ ಮಲ್ತೆರ್. ಕೆಲವು ಕಾಲ ಗೌರವ ಅಧ್ಯಾಪಕೆರಾದ್ ಒಡಿಪುದ ಮಧ್ವ ಸಿದ್ಧಾಂತ ಪ್ರಬೋಧಿನಿ

ಪಾಠಶಾಲೆಡ್ ಸೇವೆಡಿತ್ತರ್. ಕ್ರಮೇಣ 'ಮಧ್ವಸಿದ್ಧಾಂತ ಗ್ರಂಥಾಲಯ' ಪಣ್ಣಿ ಸಂಸ್ಥೆನ್ನಾ ಬೊಕ್ಕ ಶ್ರೀಕೃಷ್ಣ ಮುದ್ರಣಾಲಯನ್ನಾ ಸ್ಥಾಪನೆ ಮಲ್ತರ್. ಮಾಧ್ವರೆಗ್ ಅಲಭ್ಯವಾದಿಂಚಿ ಅನೇಕ ಗ್ರಂಥೋಲೆನ್ ಪಂಡಿತರೆಡ್ ಸಂಶೋಧನೆ ಮಲ್ಪದ್, ಅಚ್ಚಾಕಯೆರ್. ಆರ್ ಮಲ್ತಿ ಘನಕಾರ್ಯ ಪಂಡ, ಕುತ್ತತ್ತೂರು ಗೋವಿಂದದಾಸೆರ್ ಬೊಕ್ಕ ಹಂಡೆ ಶ್ರೀಪಾದ ದಾಸೆರ್ ಸಂಗ್ರಹ ಮಲ್ತಿತ್ತಿನ ಸಾವಿರಾರು ಹರಿದಾಸೆರೆ ಕೀರ್ತನೆಲೆನ್ (ಪುರಂದರದಾಸ, ಕನಕದಾಸ - ಇಂಚಿ ಅನೇಕ ಹರಿದಾಸೆರೆ ಕೀರ್ತನೆಲೆನ್) ಒಟ್ಟು ಸೇರ್ದಾದ್ ಶುದ್ಧ ಪಾಠದೊಟ್ಟುಗು ಮುದ್ರಿಸದ್ ಪ್ರಕಟ ಮಲ್ತರ್. ಸಾರ ಸಾರ ದಾಸೆರೆ ಪದೊಕ್ಲೆನ್ ಭಾಗ-ಭಾಗವಾದ್ ಪ್ರಕಟಿಸದ್ ದಾಸ ಸಾಹಿತ್ಯ ಪ್ರಚಾರಕೆರಾದ್ ಹರಿದಾಸೆರೆ ಸೇವೆ ಮಲ್ತಿ ಹರಿದಾಸೆ - ಗುರುರಾಯೆರೆ ಸುರುತಾರ್ಂದ್ ಪಣೊಲಿ. ಕ್ರಿ.ಶ. 1869 ಪುಟ್ಟುದು 1948 ಟ್ ಕಾಲವಾಯೆರ್ದಲಾ, ಇನಿಗ್ಲಾ ಆರ್ ಸ್ಥಾಪನೆ ಮಲ್ತಿಂಚಿ ಮಧ್ವ ಸಿದ್ಧಾಂತ ಗ್ರಂಥಾಲಯ ಬೊಕ್ಕ ಶ್ರೀಕೃಷ್ಣ ಮುದ್ರಣಾಲಯ - ರಾಯೆರ್ ಕಾರ್ಯಾನು ನಿರಂತರ ಮುಂದರಿತೊಂದುಂಡು ಪಣ್ಣಿನೆಕ್ ಸಾಕ್ಷಿಯಾದ್ ಒಡಿಪುಡು ತರೆದೆರ್ತುದುಂಡು! ಇಂಚಿ ಘನ ಕಾರ್ಯ ಮಲ್ತಿ ಮಹಾನುಭಾವೆರೆಗ್ ತುಳುನಾಡ್ ಜನೊಕ್ಲೆನ ಪರವಾದ್ ಯಾನ್ ಚಿರ ಋಣಿಯಾದುಲ್ಲೆ!

38. ಕೆ. ವೆಂಕಟರಾಯಾಚಾರ್ಯ: ಪಂಡಿತ ಪರಂಪರೆತ ಸಂಶೋಧಕೆರೆಡೊರ್ಯೆರಾದ್, ದಿ| ಕೆ. ವೆಂಕಟರಾಯಾಚಾರ್ಯೆರ್ (ಜನನ 1919) ಪ್ರಬಂಧೊಲು - 'ಸಂಶೋಧನಾತ್ಮಕ ಲೇಖನಗಳು', 'ಸಾಹಿತ್ಯ ಸಂಶೋಧನೆ', 'ಸಾಹಿತ್ಯ ನೋಟಗಳು' - 'ಜಯಂತ' ಪಣ್ಣಿ ಕಾವ್ಯಾನಾಮೊಡು ವಿವಿಧ ಗ್ರಂಥೋಲೆಡ್ ಪ್ರಕಟವಾತ್ಂಡ್. ಅನೇಕ ಹರಿದಾಸೆರೆ ಕೀರ್ತನೆಲೆನ್ ಪ್ರಕಟ ಮಲ್ತಿ ಹರಿದಾಸೆ ಸಾಹಿತ್ಯ ಪ್ರಕಾಶಕೆರ್ ಬೊಕ್ಕ ಪ್ರಚಾರಕೆರ್. ಸುರತ್ಕಲ್ ವಿದ್ಯಾದಾಯಿನಿ ಶಾಲೆದ ಅಧ್ಯಾಪಕೆರಾದ್, ಸಂಸಾರೊಡಿತ್ತಂಡಲಾ ಕಡೇಕ್ ಕಂಸಾರಿ ಧ್ಯಾನೊಡು ಏಕಾಂಗಿಯಾದೇ ಜೀವಿಸೊಂದು, ವೈರಾಗ್ಯೊಡು ಹರಿಪಾದ ಸೇರಿನ ವಿದ್ವಾಂಸೆ; ಹರಿದಾಸೆರೆ ಸೇವೆ ಮಲ್ತಿನ ಹರಿದಾಸೆ!

39. ಹಂಡೆ ಶ್ರೀಪಾದ ದಾಸೆರ್: ತೀರ್ಥಹಳ್ಳಿದ ಮಹಿಷಿ ಗ್ರಾಮ ಜನ್ಮಸ್ಥಳವಾಂಡಲಾ, ಕ್ರಮೇಣ ಹಂಡೆ ಶ್ರೀಪಾದ ದಾಸೆರ್ ಹಿರಿಯೆರೊಟ್ಟುಗು ಒಡಿಪುಗ್ ಬತ್ತದ್ ನಿಲೆಯಾಯೆರ್. ಶ್ರೀ ಜಗನ್ನಾಥ ದಾಸೆರೆ ಪರಂಪರೆತ ಪೀಳಿಗೆಡ್ ಬತ್ತಿನೊ ಈ ದಾಸೆರೆನ ಅಮ್ಮೆರ್ ಹಂಡೆ ವೇದವ್ಯಾಸದಾಸೆರ್ ಬೊಕ್ಕ ಅಪ್ಪೆ ಮಹಾಲಕ್ಷ್ಮಮ್ಮ. ಶ್ರೀಪಾದದಾಸೆರೆ ಬುಡೆದಿ ಸಾಬಾಜಿ ಮನೆತನೊಡ್ ಬತ್ತಿನಾರ್ ರುಕ್ಮಿಣಿಯಮ್ಮ. 'ಹರಿದಾಸರತ್ನಂ' ಹಂಡೆ ಗುರು ವೇದವ್ಯಾಸದಾಸೆರ್, ಹಂಡೆ ಶ್ರೀಪಾದ ದಾಸೆ ದಂಪತ್ಯೆರ್ ಮಗ. ಒಡಿಪುದ ನಿವಾಸಿಯಾದುಪ್ಪಿನ ಈ ಹರಿದಾಸೆರ್ ಶುದ್ಧ ಹರಿದಾಸೆ ಸಂಪ್ರದಾಯೊಡು ಬುಳೆದ್ ಬತ್ತಿ ಹರಿದಾಸೆರೆ ಪರಂಪರೆತ ಕುಟುಂಬ. ಹಂಡೆ ಶ್ರೀಪಾದ ದಾಸೆರ್ ನಮ್ಮ ಕುಡ್ಲದ ರಥಬೀದಿ ಶ್ರೀ ವೆಂಕಟರಮಣ ದೇವಸ್ಥಾನೊಡು ಹರಿಕಥಾ ಕಾರ್ಯಕ್ರಮ ಮಲ್ತೊಂದುಪ್ಪಿನದಗ, ನಮ್ಮ ನನೊಂಚಿ ಹರಿದಾಸೆರ್ - ಪೇಜಾವರ ಚ್ಚಾನದಾನಿ

ಟಿ. ಯಲ್. ವಾಸುದೇವ ರಾಯೆರ್, ಶ್ರೀ ಪಾದದಾಸೆರೆ ಹರಿಕಥೆ ತೂದು, ಸ್ವತಃ ತಾನ್ ಅವೆನ್ ಎಕಲವ್ಯನಲೆಕ ಅಭ್ಯಾಸ ಮಲ್ತೊಂದು, ಮಹಾಮಲ್ಲ 'ಹರಿಕಥಾ ಭೂಷಣ' - ಹರಿದಾಸೆ ವಾಸುದೇವರಾಯೆರಾದ್ ಮೆರೆಯೆರ್! ಇಂಚೀ ಪಾಂಡಿತ್ಯೊದ ವಿದ್ವಾಂಸೆರ್ ಹಂಡೆ ಶ್ರೀಪಾದ ದಾಸೆರ್! 'ಹನುಮನಯ್ಯ' ಅಂಕಿತೊಡು ಕನ್ನಡ ಭಾಷೆಡ್ ಕೀರ್ತನೆಲೆನ್ ಬೊಕ್ಕ ಮೂಜಿ ಯಕ್ಷಗಾನ ಪ್ರಸಂಗಲೆನ್ ಬರೆದಿತ್ತೆರಾಂಡಲಾ, ಅವು ನನ್ನಲಾ ಅಚ್ಚಾವರೆಗ್ ಪೋತಿಜಿ ಪಂಡ್ ಆರೆನ ಶಿಷ್ಯ ಶ್ರೀಶದಾಸೆರ್ ಪಂಡೆರ್. ಶ್ರೀಪಾದ ದಾಸೆರ್ ಕುತ್ತೆತ್ತೂರು ಗೋವಿಂದದಾಸೆರೆ ಮಿತ್ತ್ ಬರೆಯೊಂಜಿ ಪದ್ಯೊನು (ಗುರುಸ್ತುತಿ), ಹಂಡೆ ಗುರುವೇದವ್ಯಾಸದಾಸೆರೆ ಮುಖಾಂತರ ಅವು ಕುತ್ತೆತ್ತೂರ್ ಇಲ್ಲಗ್ (ಗೋವಿಂದ ಭವನ) ಬತ್ ಸೇರೊಂಡು. ಕುತ್ತೆತ್ತೂರು ಗೋವಿಂದ ದಾಸೆರೆ ಪುಳಿ ಡಾ. ನರಹರಿ ದಾಸೆರ್ ಮುತುವರ್ಜಿಡ್ ಮುರನಿ ಎನ್ನ ಸಂಪಾದಕತ್ವೊಡು ಪ್ರಕಟವಾಯ್ಲೊ ಬೂಕುದೊಲಾಯಿಡ್ ಆ ಪದ್ಯೊಗು ಜಾಗ ತಿಕ್ಕೊಂಡ್! (ತೂಲೆ: 'ಶ್ರೀ ಹರಿದಾಸ ಕೀರ್ತನ ಮಂಜರಿ, ಪುಟ 106-107) ಜೀವನ ಪರ್ಯಂತ ಹರಿದಾಸೆರಾದ್ ನಮ್ಮ ತುಳುನಾಡ್‌ಡಿಡೀ ಹರಿಕಥೆ ಮಲ್ತೊಂದು ಸಂಚಾರ ಮಲ್ತಿನಾರ್. ಇಂಚೀ ಮಹಾತ್ಮೆರೆನ್ ನಿತ್ಯ ನಮ ನೆನೆಪೊಡು ಪಂಡ್ ದೇವರೆಗ್ ಬೊಕ್ಕ ಹರಿದಾಸೆರೆ ಕಾರ್ಗ್ಡ ಬೂರೋಣ್ಣೆ.

40. ಉಡುಪಿ ಶ್ರೀಶದಾಸೆರ್: ಘನಪಾರಿ ವಂಶೊಡ್ ಬತ್ತಿ ಶ್ರೀಶದಾಸೆರ್ ಒಡಿಪುದ ನಿವಾಸಿ. ಹರಿಕಥಾ ರಂಗೊಗು ಹಂಡೆ ಶ್ರೀಪಾದ ದಾಸೆರೆನ ಶಿಷ್ಯರಾದ್ ಸುಮಾರು ಐವ್ವ ವರ್ಷೊದ ಅನುಭವಿ. ಕರ್ನಾಟಕ ಶಾಸ್ತ್ರೀಯ ಸಂಗೀತದೊಟ್ಟುಗು, ಸಂಗೀತ ವಾದನೊಳಿನ್ನಾ (ತಬ್ಲಾ, ಮೃದಂಗ, ಖಿಂಜೀರ, ಹಾರ್ಮೋನಿಯಂ - ಇತ್ಯಾದಿ) ಕಲ್ಯಾಣೊಂದುಪ್ಪಿನೊ ಮಹಾಮಲ್ಲ ಬರ್ಸೆರ್ ಉಡುಪಿ - ಶ್ರೀಶದಾಸೆರ್. ತುಳು, ಕನ್ನಡ ಭಾಷೆಳೆಡ್ ಹರಿಕಥೆ ಸಾಹಿತ್ಯೊಲು, ಕೀರ್ತನೆಲು, ಯಕ್ಷಗಾನ ಪ್ರಸಂಗ ಕಥೆಕ್ಲ, ನಾಟಕ, ಸ್ತೋತ್ರ - ಇತ್ಯಾದಿ ಅನೇಕ ಕೃತಿಕುಳೆನ್ ಬರೆತೆರ್. ಆಂಡ ಒವೆನ್ನಾ ಪ್ರಕಟನೆ ಮಲ್ಪರೆ ಪೋಯಿಜೆರ್. ಕಾರಣ ಸರಸ್ವತೀ - ಪುತ್ರೇರಾಂಡಲಾ ಲಕ್ಷ್ಮೀ ಕಟಾಕ್ಷಗ್ (ಧನಸಂಪತ್ತು) ನನಲಾ ಕಾಲಬೈದ್‌ಜಿಂದ್ ಪಣೊಲಿ. ಆಂಡಲಾ ತನ್ನೊ ಜೋಕ್ಲೆಗ್ ಮಾತೆರೆಗ್ಲಾ ವಿದ್ಯಾದಾನ ಮಲ್ತೆದ್, ಸಾರ್ಥಕ ಬದ್‌ಕಾದ ತಿರ್ಲೆನ್ ತೋಜಾದೆರ್. ಇಂಚೀ ಮಹಾತ್ಮೆರ್ ಜೀವನ, ಸಾಧನೆದ ಪರಿಚಯೊಳೆನ್ ಬೊಕ್ಕ ಆರ್ ಬರೆತಿ ಸುಮಾರು 16 ತುಳು ಕೀರ್ತನೆಲೆನ್ ಪ್ರತ್ಯೇಕವಾದ್ ಕೊರ್ತುಂಡು. ಪೂಜ್ಯೆರೆಗ್ ಎನ್ನ ಉಡಲ್ದಿಂಜಿ ಸೊಲೆಲು.

41. ಹಂಡೆ ಗುರು ವೇದವ್ಯಾಸದಾಸೆರ್: ಈ ದಾಸೆರ್ ಹಂಡೆ ಶ್ರೀ ಪಾದದಾಸೆರೆ ಸುಪುತ್ರ. ಮಹಾಕವಿ ಕೋಟಿ ಶಿವರಾಮ ಕಾರಂತೆರೆ ಸಮಕಾಲೀನೆರ್. ಅಮ್ಮೆರೆನಲ್ಯನೇ ಹರಿದಾಸ ಪಂಥೊದ ಜೀವನೊಡಿತ್ತೆದ್, ಹರಿಕಥಾ ಕೀರ್ತನೆ ಮಲ್ತೊಂದು ತುಳುನಾಡ್‌ಡ್ ಮಾತ್ರ ಅತ್ತಾವಂದೆ, ಘಟ್ಟದ ಮಿತ್ತ್‌ಲಾ ಪೋದು ಹರಿದಾಸೆರೆ ಬೀಜ ಪ್ರಸಾರ ಮಲ್ತಿನಾರ್. ವಾಙ್ಮಯ ಸೇವೆ ಮಾತ್ರವತ್ತಂದೆ ದಾಸಸಾಹಿತ್ಯ ಸೇವೆನ್ನಾ ಮಲ್ತಿನಾರ್. 'ಗುರುವೇದವ್ಯಾಸ' ಅಂಕಿತೊಡು ಅನೇಕ

ಕೀರ್ತನೆಲೆನ್, ಸ್ತೋತ್ರಲೆನ್ ರಚನೆ ಮಲ್ಲೆರ್. 'ರಾಮಾಯಣ ರಸಕಾರಂಜಿ' - ಪಣ್ಣೆ ನೇಲ್ಯ ಕನ್ನಡ ಪರಾಮರ್ಶನ, ವಿಮರ್ಶಾತ್ಮಕ ಗ್ರಂಥೊನು ಬರೆದ್, ಹರಿದಾಸ ಸಾಹಿತ್ಯೊದ ತುಪ್ಪೆಗ್ ಬಂಗಾರ್ಡ್ ಕಳಶನ್ ದೀಯೆರ್ ನಮ್ಮ ತುಳುನಾಡ್ ಈ ಹರಿದಾಸೆರ್!

ಹಂಡೆ ಗುರು ವೇದವ್ಯಾಸ ದಾಸೆರೆನ ಶಿಷ್ಯೆ - ಶ್ರೀಮತಿ ವಸುಮತಿ ಭಟ್ (ವಸುದೇಶ ವಿಠಲ - ಮೂಲತಃ ಸಿಸಿಫಿದ ನಿವಾಸಿ) ಗೃಹಿಣಿಯಾದ್, ಜೋಕ್ಲೆ ಅಪ್ಪೆಯಾದ್, ಯಂ. ಜಿ.ಯಂ. ಕಾಲೇಜಿಡ್ ಸಂಸ್ಕೃತ ಅಧ್ಯಾಪಿಕೆಯಾದ್ ಹರಿಕಥಾ ಕೀರ್ತನೆದ ರಂಗೊಗು ಜೈದಿನ ಅಪರೂಪೊದ ಮಹಿಳೆ. ಹರಿದಾಸ ದೀಕ್ಷೆನ್ ಹರಿದಾಸ ಹಂಡೆ ಗುರುವೇದವ್ಯಾಸ ದಾಸೆರೆಡ್ಲಾಲಾ - 'ವಸುದೇಶ ವಿಠಲ' ಅಂಕಿತೊನು ಶ್ರೀ ಸಂತ ಭದ್ರಗಿರಿ ಅಚ್ಯುತ ದಾಸೆರೆಡ್ಲಾಲಾ ಪಡೆತೆರ್. ರಡ್ಡ್ ವರ್ಷದ ಪಿರವೊಡು, ಕದ್ರಿ ಕೃಷ್ಣ ಕಲ್ಯಾಣ ಮಂಟಪೊಡು ಆರೆನ ಹರಿಕಥೆ ಕೇಣ್ಡ್, ಎಂಕ್ ಪರಿಚಯವಾಂಡ್. ಆರ್ದಪನೇ ಯಾನ್ ಆರೆನ ಗುರುವಾಯ್ ಹಂಡೆ ಗುರು ವೇದವ್ಯಾಸದಾಸೆರೆನ ಬಗ್ಗೆ ಹೆಚ್ಚಿದ ಮಾಹಿತಿ ಪಡೆಯೊಂಡೆಂದೇ ಪಣೊಲಿ. ಶ್ರೀಮತಿ ವಸುಮತಿ ಭಟ್ - ಮೇರೆಗ್ ಎನ್ನ ಅನಂತ ಕೃತಜ್ಞತೆಲು; ಅಂಚೆನೇ ಶ್ರೀ ದಾಸೆರೆಗ್ ದೀರ್ಘ ನಮಸ್ಕಾರೊಲು.

42. ಬಜಪೆ ವೆಂಕಟರಾವ್ ಉಪಾಧ್ಯಾಯೆರ್ : ಮಂಗಳೂರು ತಾಲೂಕುದ ಬಜ್ಜೆ ಗ್ರಾಮೊದ ಶಿವಳ್ಳಿ ಬ್ರಾಹ್ಮಣ ನಿವಾಸಿ ವೆಂಕಟ್ರಾವ್ ಉಪಾಧ್ಯಾಯೆರ್ (ಜ. 1886) ಕಟೀಲು ಶ್ರೀ ದುರ್ಗಾಪರಮೇಶ್ವರಿ ಎಲಿಮೆಂಟರಿ ಶಾಲೆಡ್ ಅಧ್ಯಾಪಕೆರಾದ್, ವಿದ್ಯಾರ್ಥಿಗಳೆಗ್ ಭಕ್ತಿ ಮಾರ್ಗದ ಸೂತ್ರೊನು ಕಲ್ಪಾಯೆರ್. ವೆಂಕಟ್ರಾಯ ಮಾಸ್ತ್ರಿಂದೇ ಮಾತೆರೆಗ್ಲಾ ಪೊಲಬಾಯಿನಾರ್. ಪ್ರತೀ ಶುಕ್ರವಾರ ಬಯ್ಯಡ್ ಮಾತಾ ವಿದ್ಯಾರ್ಥಿಲು ಒಟ್ಟು ಸೇರ್ಡ್, ದೀಪ ದೀದ್, ದೇವರೆ ಎದುರುಡ್ ತಾಳೆ ಬೊಟ್ಟುದು ನಲ್ಲೊಂದು ಭಜನೆ ಮಲ್ಪುನ ಒಂಜಿ ಸಂಪ್ರದಾಯೊನು ಈ ವೆಂಕಟ್ರಾಯ ಮಾಸ್ತ್ರಿ ಆಚರಣೆಗೆ ಕೊಣತ್ತೆರ್. ಎನ್ನಪ್ಪೆ (ಕೆ. ಶಾರದ) ಕಟೀಲು ಶಾಲೆಡ್ ಓದಿನದಗಲಾ ಈ ಮಾಸ್ತ್ರಿ ಕಲ್ಪಾವೊಂದಿತ್ತೆರ್. ಅಂಚೆನೇ ಬೊಕ್ಕ ಯಾನ್ ಅವ್ವೇ ಶಾಲೆಡ್ ಓದೊಂದುದುಪ್ಪಿನದಗಲಾ (ಸುಮಾರು 1952-1958) ಭಜನಾ ಕಾರ್ಯಕ್ರಮ ನಡತೊಂದಿತ್ತೆಂಡ್. ವೆಂಕಟ್ರಾಯೆರ್ ಸಂಸಾರೊಡಿತ್ತೆಂಡಲಾ ಕಂಸಾರಿನ ಧ್ಯಾನ ಮದಪಯೆರ್. ಆಶುಕವಿಯಾದ್ ಅನೇಕ ಭಜನೆ ಪದ್ಯೊಲೆನ್ (ಕನ್ನಡ ಭಾಷೆಡ್) ಬರೆತಿನಾರ್. ಹೆಚ್ಚಾದ್ ಕಟೀಲು ದೇವಿನ ಮಿತ್ತದ ಸುಮಾರು ಪದ್ಯೊಲೆನ್ ರಚಿಸೊದು, ಅವೆನ್ ಭಜನೆಡ್ ಚೋಕ್ಲೆಗ್ ಕಲ್ಪಾದೆರ್. ಎಂಕ್ಲಾಲಾ ಅವೆನ್ ಪಣೊಂದಿತ್ತೆ. ಇತ್ತೆಗ್ಲಾ ಎಂಕ್ ಕೆಲವು ಪದ್ಯೊಲು ನೆಂಪುಂಡು. ವೆಂಕಟ್ರಾಯೆರೆನ ಬುಡೆದಿ - ಕಮಲ. ಆ ದಂಪತಿಯೆರೆಗ್ ಮೂಜಿ ಆಣುಲು; ರಡ್ಡ್ ಪೊಣ್ಣುಲು.

ಆಣುಲು : ಮೋಹನ, ವಾಸುದೇವ ರಾವ್, ಪಾಂಡುರಂಗ

ಪೊಣ್ಣುಲು : ಲಲಿತ, ವರದ.

ಆಣುಲೆಡ್ ವಾಸುದೇವರಾವ್ - ಸಿನೇಮಾ ರಂಗೊಡು ನಟನೆ (ಚೋಮನ ದುಡಿ - ಚೋಮ) ಮಲ್ತೊಂದಿತ್ತೆಡ್ ಇಂಚಪೊಗು ಹರಿಪಾದ ಸೇರೈರ್.

ಪೊಣ್ಣುಲೆಡ್ - ವರದಮ್ಮನ ಮಗಳೇ - ಇತ್ತೆದ ಅಂತರಾಷ್ಟ್ರೀಯ ಖ್ಯಾತಿ ಪಡೆಯ್ತು ಭರತನಾಟ್ಯದ ವಿದುಷಿ - ಶ್ರೀಮತಿ ಡಾ| ವಸುಂಧರಾ ದೊರೆಸ್ವಾಮಿ.

ವರದಮ್ಮ ಬೊಕ್ಕ ಎನ್ನಮ್ಮ ಶಾರದ - ಈವೆರ್ನಾ ಒಟ್ಟಿಗೇ ಒಂಜೇ ಶಾಲೆಡ್ ಓದೊಂದಿತ್ತಿನಕ್ಲಾನೆಡ್ಡಾವರ ಅಮ್ಮಗ್ ಆರೆನ ಎಡ್ಡೆ ಪೊಲಬು. ಇಂಚಪೊಗು ಒರ ಒಂಜಿ ಕಾರ್ಯಕ್ರಮೊಟು ಭೇಟಿಯಾದಿತ್ತೆರ್. ಅಂತೂ ಕಟೀಲ್ ಪ್ರಾಕ್‌ದ ಮಂಡಲೆಗ್ ಈ ವೆಂಕಟ್ರಾಯ ಮಾಸ್ತಿನ ಎಡ್ಡೆ ಪರಿಚಯವುಂಡು. ಸುಮಾರು 84ನೇ ವಯಸ್ಸೆಡ್ ಈ ಹರಿದಾಸೆರ್ ಕೀರ್ತಿಶೇಷರಾಯೆರ್. ಅಂಕಿತ /ಕಾವ್ಯನಾಮ ಇಜ್ಜಂದೆ ಬರೆಯ್ತು ಭಜನೆಲೆನ್ನಾ ಕೀರ್ತನೆಂದೇ ಮನ್ನಿತ್ತೆಡ್, ವೆಂಕಟ್ರಾಯೆರೆನ್ ಹರಿದಾಸೆರೆ ಸಾಲ್‌ಡ್ ಉಂತಾವುನ ಈ ಕಚ್ಚೊಗು ಪ್ರೇರಣೆ ಕೊರಿನಂಚಿ, ಶ್ರೀ ಹರಿ - ಗುರುಕ್ಲೆನ್ ನೆನೆತೊಂದು ದಾಸೆರೆ ಚರಣೊಗು ಅಡ್ಡ ಬೂರೋಣ್ಣೆ.

43. ನಿಡಂಬೂರು ರಾಮದಾಸೆರ್ : ಒಡಿಪುದ ಅಂಬಲ್ವಾಡಿ ಗ್ರಾಮೊದ ನಿವಾಸಿ ರಾಮದಾಸ ಬಲ್ಲಾಳೆರ್ (ಜ.1898). ಶ್ರೀಕೃಷ್ಣನ ಪರಮ ಭಕ್ತೆರ್. ನಿಡಂಬೂರು ಬಲ್ಲಾಳ ವಂಶೊಗು ಶ್ರೀ ವಾದಿರಾಜ ಸ್ವಾಮಿಲು ಮೂಜವತಾರೊದ ಮಾರುತಿ ಬೊಕ್ಕ ಭೂವರಾಹ ದೇವೆರೆ ವಿಗ್ರಹ ಕೊರೈಂದ್ ಹಿರಿಯೆರ್ ಉಲ್ಲೇಖವುಂಡು. ರಾಮದಾಸೆರ್ 'ಶ್ರೀಕೃಷ್ಣ ಸ್ತುತಿ' ಭಜನೆದ (ಕನ್ನಡ) ಬೂಕುನು ಪ್ರಕಟ ಮಲ್ತೆರ್ (1977). ಒಟ್ಟುಗು ಆರೆನ 141 ಪದ್ಯೊಲು ಲಭ್ಯವುಂಡು. ಅವೆನ್ ಕನ್ನಡ ಬೊಕ್ಕ ಸಂಸ್ಕೃತಿ ಇಲಾಖೆದ ಸಹಕಾರೊಡು ಸರಕಾರ ಸಮಗ್ರ ದಾಸ ಸಾಹಿತ್ಯ ಸಂಪುಟೊಗು ಸೇರ್ದೆಡ್ ಪ್ರಕಟಣೆ ಮಲ್ತೆಂಡ್. ಶ್ರೀ ರಾಮದಾಸೆರ್ ಒಡಿಪುದ ಸಂಸ್ಕೃತ ಕಾಲೇಜಿಡ್/ ಹೈಯರ್ ಎಲಿಮೆಂಟರಿ ಶಾಲೆಡ್ ಅಧ್ಯಾಪಕೆರಾದಿತ್ತೆರ್. ಆರೆಗ್ 7 ಜನ ಆಣ್ಣಾಲೆಳು. 6 ಜನ ಪೊಣ್ಣಾಲೆಲು. (ಮೊಕ್ಲೆಡ್ ಮಲ್ಲ ಮಗೆನೇ ಶ್ರೀ ವ್ಯಾಸರಾಯ ಬಲ್ಲಾಳೆರ್ - ಕನ್ನಡದ ಹಿರಿಯ ಸಾಹಿತಿ - ಇತ್ತೆ ಬೆಂಗಳೂರ್ ನಿವಾಸಿ) ಶ್ರೀ ದಾಸೆರ್ ಸಂಸ್ಕೃತ ಕಾವ್ಯ; ಕನ್ನಡ ಕಾವ್ಯ, ನಾಟಕೊಳೆನ್, ಪುರಾಣ ಕತೆಕ್ಲೆನ್ ಗದ್ಯ ರೂಪೊಡು ಬರೆತೆರ್. ಇಂಚ ಅನೇಕ ಕೃತಿಳೆನ್ ನಮ್ಮ ತುಳುನಾಡ್ಡ ಜನೊಕ್ಲೆಗ್ ಕೊಡುಗೆಯಾದ್ ಕೊರ್ಪು, ಮಣ್ಣೊದ ಋಣೊನು ಸಂದಾಯ್ತು ಶ್ರೀ ದಾಸೆರ್ 1988ಟ್ ಹರಿಪಾದ ಸೇರೈರ್. ಆರೆಗ್ ನಮ ಮಾತೆರ್ನಾ ಕೃತಜ್ಞತೆನರ್ಪಿಸವುನ ನಮ್ಮ ಕರ್ತವ್ಯ. ಹರಿದಾಸೆರೆ ಚರಣೊಗು ನಮೋ ನಮು:!

44. ಕಲ್ಲಮುಂಡೂರು ಶ್ರೀನಿವಾಸ ದಾಸೆರ್: ದಕ್ಷಿಣಕನ್ನಡ ಜಿಲ್ಲೆದ ಕಲ್ಲ ಮುಂಡೂರು ಗ್ರಾಮೊದ ದೈಲಬೆಟ್ಟು ನಿವಾಸಿ ಶ್ರೀನಿವಾಸ ದಾಸೆರ್, ದೈಲಬೆಟ್ಟು ನಾರಾಯಣ ಭಟ್, ಬೊಕ್ಕ ಕಮಲಮ್ಮನ ಮಗೆ. ದಾಸೆರೆನ ಅಕ್ಕ ಜಲಜ. (ಕಟೀಲು ಶ್ರೀನಿವಾಸ ಉಪಾಧ್ಯಾಯೆರ್ ಬುಡೆದಿ)

ದಿಂಜಿದಿ ಬಡತನೋಟು, ಸರೀಟ್ ಉಣ್ಣುರೆಗ್ಗಾ ಇಜ್ಜಂದೆ, ಇಲ್ಲ್ ನಿಲಿಕೆ ಸಂಸಾರೊ ತಾಪತ್ರಯ ಇತ್ತಂಡಲಾ, ಪಂಡರಾಪುರದ ಪಾಂಡುರಂಗ ವಿರಲನ ಪರಮ ಭಕ್ತೆರ್ ಈ ದಾಸೆರ್ ನಿತ್ಯ ಭಜನೆ ಮಾತ್ರ ಬುಡಯೆರ್! ಕಡೆಗಂತೂ ಪಾಂಡುರಂಗನ್ ತೂವೊಡೊಂದ್, ನಾಲಿಲ್ಲ್ ನಟ್ವೆದ್ ಕೆಟ್ ಸೇರ್ ಕಾಸಾಡ್, ಏರೆಗ್ಗಾ ಪಣಂದೆ ಸೀದಾ ಪಂಡರಾಪುರೊಗು ಪೊದೊ ವಿರಲನ ಸೇವೆ ಮಲ್ತೊಂದು ಭಜನೆ ಮಲ್ತಿನಾರ್. ಕಡೇಕ್ ಹರಿಪ್ರೇರಣೆಡ್ ಊರು ಸೇರ್, ಗ್ರಾಮೊದ ದೇವಸ್ಥಾನೊಡು ಪರ್ಯಾಯ ಅರ್ಚಕ ವೃತ್ತಿಡ್ ಲೌಕಿಕ ಜೀವನ ಮಲ್ತಿನಾರ್. ಪೌರೋಹಿತ ಮಲ್ತೊಂದು, ಜ್ಯೋತಿಷ್ಯ ಪಣೊಂದು, ಜಾತಕ ಬರೆವೊಂದು ನಿತ್ಯ ಜೀವನೊದ ಪಡಿಕ್ ಈ ಉದ್ಯೋಗನ್ನಾ ಮಲ್ತೊಂದಿತ್ತಿನಾರ್. ಶಾಲೆಡ್ ಕಲ್ತಿನಿ 4ನೇ ತರಗತಿ. ಬೊಕ್ಕ ಅಮ್ಮೆರೆಡ್ ಪೌರೋಹಿತ. ಪಂಡಿತ ಗೋಪಾಲ ಚೋಯಿಸೆರೆಡ್ ಜ್ಯೋತಿಷ್ಯ ಶಾಸ್ತ್ರ ಅಧ್ಯಯನ (ಬೃಹಜ್ಜಾತಕ ಅಧ್ಯಯನ) . ದೈಲಬಟ್ಟು ಶ್ರೀ ಮಹಾಲಿಂಗೇಶ್ವರ, ಮಹಾಗಣಪತಿ, ಅಬ್ಬಗ ದಾರಗ ದೇವಸ್ಥಾನೊಡು ಪರ್ಯಾಯ ಅರ್ಚಕೆರಾದ್ ಸೇವೆ ಮಲ್ತೊಂದಿತ್ತಿನಾರ್. ದಾಸೆರೆ - ಚೂರ್ಣಿಕೆ ಪನ್ನಿನಿ, ಭಜನೆ, ತೀರ್ಥಯಾತ್ರೆ, ಯಕ್ಷಗಾನದ ಅರ್ಥಗಾರಿಕೆ - ಉಂದು ಆರೆನ ಹವ್ಯಾಸ.

ನಿತ್ಯೊಲಾ ಏತ್ ರಾತ್ರಿಯಾಂಡಲಾ ಆರೆನ ಹರಿದಾಸ ಪಂಥೊದ ನೇಮ ನಿಷ್ಠೆನ್ ಬುಡಂದೆ, ತಾಳ ಬೊಟ್ಟುದು ಭಜನೆ ಮಲ್ಪಂದೆ ಚೆಪ್ಪಯೆರ್! ಉಂದೆನ್ ಯಾನ್ ಎಲ್ಲಿಪ್ಪುನಗ ಎನ್ನ ಕಣ್ಣಾರೆನೇ ತೂತಿನಾಳ್! ಆರೆನ ದೀರ್ಘ ಭಜನೆ ಕೇಣ್ಣರೆ ತಾಳೆ ಇಜ್ಜಂದೆ (ತಡರಾತ್ರಿ ಭಜನೆ) ಉಪದ್ರವಾಪುಂಡುಂದು ಇಲ್ಲದೊಲಾಯಿಡ್ ಪಿದಾಯಿ ಕುಲ್ಲದೆರ್ ಭಜನೆದ ಮೈಮೆ ಗೊತ್ತಿಂಜಂದಿನಕ್ಕು. ಪಾತೆರ್ನಗ ನಾಲಗೆ - ಉಬುಳಾದಿತ್ತಂಡಲಾ, ಭಜನೆ ಪಣ್ಣಗ ಸರಿಯಾದೇ ನಾಲಗೆ ಮಗುರುಂಡು! ಉಂದು ಒಂಜಿ ಚೋದ್ಯನೇ ಆಂಡಲಾ ನಿಜ! ಎನ್ನ ಅಜ್ಜಿರಿಲ್ಲಡೆಗ್ ಆ ಹರಿದಾಸೆರ್ (ಶ್ರೀನಿವಾಸ ದಾಸೆರ್) ಬನ್ನಗ, ಯಾನ್ ಆರೆನ ಭಜನೆನ್ ಕಣ್ಣಾರೆ ತೂತೆ! ಎನ್ನ ಅಜ್ಜಿನ ಸಂಬಂಧಿಕೆರಾಪೆರೆ ಆ ದಾಸೆರ್. ಅಂತೂ ಭಜನೆದ ಮೈಮೆ ಏತೊಂಜಿ ಪಣ್ಣಾ!

ಆ ದಾಸೆರೆ ಚೋಕ್ಕು ಇನಿಗ್ ಎಡ್ಡೆ ಲೈನ್‌ಗ್ ಬತ್ತೆದ್ ಮಾತೆರ್ ಸಿರಿವಂತಿಗೆ ಪಡೆಯೆರ್! ದಾಸೆರ್ ಮಾತ್ರ ವಿರಲನ ಸ್ಮರಣೆಡೇ ದಿನ ಕಳೆವೊಂದು ಬಡತನ ಉಣ್ಣುಂಡಲಾ, ಚೋಕ್ಕೆಗ್ ವಿದ್ಯಾದಾನ ಮಲ್ತೆರ್. (ದಾಸೆರೆ ಬುಡೆದಿ ಶಾರದ. ದಂಪತ್ಯೆರೆಗ್ 4 ಆಣ್, 3 ಪೊಣ್ಣು ಚೋಕ್ಕು) ಇಂಚಪೊಗು ಆರೆನ ಚೋಕ್ಕೆನ್ ಯಾನ್ ಭೇಟಿಯಾಯ್ತೆಗ (ಕಲ್ಲಮುಂಡೂರುಗು ಎನ್ನ ಚಿಕ್ಕಮ್ಮ ಕಸ್ತೂರಿ ಟೀಚರ್‌ನೊಟ್ಟುಗು ಪೋಯ್ತೆಗ) ಪಣ್ಣೆರ್ - "ಎಂಕ್ಲೆ ಅಮ್ಮೆರ್ ಕಲ್ಪದಿನೊ ಭಜನೆನೇ ಎಂಕ್ಲೆ ಕುಟುಂಬದೊ ಉಸಿರು! ಅಯ್ಯಾವರನೇ ಎಂಕ್ಲೆ ಮಾತೆರ್, ಇನಿಗ್ ನೆಮ್ಮದಿಡ್ ಈ ಸುಖೊನು ಅನುಭವಿತೊಂದುಲ್ಲ" - ಪಂಡೆರ್ ದಾಸೆರೆ ಮಗೆ ಜಯರಾಮೆರ್. (ನಿವೃತ್ತ ಅಧ್ಯಾಪಕೆರ್ ಬೊಕ್ಕ ಪ್ರಸ್ತುತ ದೇವಳದ ಅರ್ಚಕೆರ್) ಅಂತೂ ಭಜನೆದ ಮೈಮೆನ್ ಮಾತೆರೆಗ್ಗಾ ತೋಜಾಯಿನ ಹಿರಿಯ ದಾಸೆರೆಗ್ ಭಕ್ತಿಪೂರ್ವಕವಾದ್ ಅಡ್ಡ ಬೂರೊಂದು ದಾಸೆರೆ ಕುಟುಂಬೊಗು ಎಡ್ಡೆ ನಟ್ಟೊಂದು ಈ ಲೇಖನೊನು ಮುಕ್ತಾಯ ಮಲ್ಪುವೆ.

45. ಹರಿದಾಸ ಕುಕ್ಕಜೆ ಐತಪ್ಪ ಯಾನೆ ರಾಮಯ್ಯ ನ್ಯಾಕೆ: ಪಾಣೆ ಮಂಗಳೂರ್ದ ಇರಾ ಗ್ರಾಮದ ಕುಕ್ಕಜೆ ನಿವಾಸಿ ಐತಪ್ಪ ಯಾನೆ ರಾಮಯ್ಯ ನ್ಯಾಕೆರ್ ಹರಿಭಕ್ತಿ ಪ್ರಚಾರ ಮಲ್ತಿನ ಶ್ರೇಷ್ಠ ಹರಿದಾಸೆರ್. ಪುರಾಣೊಡು ಬರ್ಪಿ ತತ್ವ ವಿಚಾರೊಲೆನ್ 'ಜ್ಞಾನಾಮೃತ' ಪಣ್ಣೆ ಭಕ್ತಿ ರಸಪೂರಿತ ನೀತಿ ಸೂಕ್ತಿಳೆನ್ (ಕನ್ನಡ ಭಾಷೆಡ್) 1500 ಭಾಮಿನಿ ಷಟ್ಪದಿಡ್ (ಪ್ರಥಮ ಭಾಗ) ಬರೆದ್, ಭಕ್ತಿ ಪ್ರಚಾರ ಮಲ್ತಿನ ಕೀರ್ತಿ ಈ ಹರಿದಾಸೆರೆಗ್. ಹರಿಕಥಾ ಕೀರ್ತನೆಲೆನ್ ಮಲ್ತೊಂದು ನಿತ್ಯ ಹರಿಸೇವೆ ಮಲ್ತಿನಿ, ಈ ದಾಸೆರೆನ ಬಗ್ಗೆ ಹೆಚ್ಚಿದ ಮಾಹಿತಿ ಎಂಕ್ ತಿಕ್ಕೊದಿಜಾಂಡಲಾ, ಆ ದಾಸೆರೆನ ವಿಷಯೊನು ಎಂಕೊದಗದ್ ಕೊರಿನಂಚಿ ಹಿರಿಯ ಸಾಹಿತಿ, ಶ್ರೀಯುತ ಪು. ಶ್ರೀನಿವಾಸ ಭಟ್ಟ, ಕಟೀಲು - ಮೇರೆಗ್ಲಾ, ಹರಿದಾಸೆರೆಗ್ಲಾ ಎನ್ನ ಉಡಲ್ದಿಂಜಿ ಸೊಲ್ತೆಲು.

46. ಜತ್ತಿ ಈಶ್ವರ ಭಾಗವತೆರ್: ತಿಟ್ಟಲ್ ಸೀಮೆದ ಬಾಯಾರ್ ಊರುದ ಜತ್ತಿ ಕೃಷ್ಣ ಭಟ್ಟಿನ ಮಗೆ ಜತ್ತಿ ಈಶ್ವರ ಭಟ್. ಎಲ್ಲೆಡೇ ಆಶುಕವಿತ್ವ ಶಕ್ತಿಡಿತ್ತಿ ಈಶ್ವರ ಭಟ್ ಪದ್ಯ ರಚನೆ ಮಲ್ಪಿ ಸಾಮರ್ಥ್ಯೊಡು ಕ್ರಮೇಣ ಯಕ್ಷಗಾನ ಪ್ರಸಂಗ ಕಥೆ ರಚನೆ, ಕೀರ್ತನೆಲೆನ್ ರಚನೆ ಮಲ್ತೆರ್. ಭಾಗವತಿಕೆ ಮಲ್ತೊಂದು ಯಕ್ಷಗಾನ ರಂಗೊಡು ಜತ್ತಿ ಈಶ್ವರ ಭಾಗವತೆರ್ಂದೇ ಪುದರ್ ಪಡೆಯೆರ್. ಅಂಚಿನೇ ಹರಿಕಥಾ ಕಾರ್ಯಕ್ರಮ ಮಲ್ಪುನಿ, ಹರಿಕಥಾ ಕೃತಿರಚನೆ ಮಲ್ಪುನೆಟ್ಟಾ ದುಂಬಾಯ್ ಈ ಹರಿದಾಸೆರೆನ್ ಯಾನ್ ಅಲಕ್ಷಿತ ಹರಿದಾಸೆರೆನ ಸಾಲ್ಗ್ ಸೇರ್ದಾದ್, ಭಾಗವತೆರ್ಗ್ ಹರಿದಾಸೆರೆ ಪಟ್ಟಿ ಕೊರ್ಪಾಯೆ. ಕನ್ನಡ ಬೊಕ್ಕ ತುಳು ಭಾಷೆಡ್ ಅನೇಕ ಕೀರ್ತನೆ, ಯಕ್ಷಗಾನ ಪ್ರಸಂಗ, ಹರಿಕಥಾ ಸಾಹಿತ್ಯೊಳೆನ್ ಬರೆದ್, ತುಳುಟ್ಟಾ ಹರಿಕಥೆ ಮಲ್ತೊಂದಿತ್ತಿನಾರ್, 'ತುಳು ಕೀರ್ತನೆ ಮಾಲೆ' ಸೇರ್, ಒಟ್ಟುಗು ಎಣ್ಮ ಹರಿಕಥಾ ಸಾಹಿತ್ಯ ಕೃತಿಳೆನ್ ಬರೆದ್, ಬೊಳ್ಳುಗು ಕೊಣ್ಣೆದೊಂದ್ ವಿದ್ವಾಂಸೆರೆನ ಹೇಳಿಕೆ. ಆರ್ ಬರೆಯೊ 'ಗೋಪಿ-ಕೃಷ್ಣ ಸಂವಾದೊ' - ಪಣ್ಣೆ ತುಳು ಪದ್ಯೊನು ಪರಿಶಿಷ್ಟೊಡು ಕೊರುಂಡು. ಅಂತೂ ಜತ್ತಿ ಈಶ್ವರ ಭಾಗವತೆರ್ಗ್ ಹರಿದಾಸೆರೆ ಸಾಲ್ಗ್ ಮಣೆ ಪಾಡ್ಲೆ ಗೌರವ ಸಂದಾವೊನ ಈ ಸುಸಂದರ್ಭೊಡು, ಹಿರಿಯೆರೆನ ಆಶೀರ್ವಾದೊನು ನಟ್ಟೊಣ್ಣೆ.

47. ಜತ್ತಿ ಕೃಷ್ಣ ದಾಸೆರ್: ಬಾಯಾರು ಗ್ರಾಮೊದ ಪ್ರಸಿದ್ಧ ಹರಿದಾಸೆರಾಯಿಂಚಿ ಜತ್ತಿ ಈಶ್ವರ ಭಾಗವತೆರ್ ಮಗೆ ಜತ್ತಿ ಕೃಷ್ಣ ಭಟ್ ಅಮ್ಮೆರೆಲೆಕಾನೇ ಆಶುಕವಿಯಾದ್ ಅನೇಕ ಕೀರ್ತನೆಲೆನ್ (ಕನ್ನಡ ಭಾಷೆಡ್) ಬರೆದ್ ಸಂತ್ಯಪ್ಪಿ ಪಡೆಯ್ತಾರ್. ಗೃಹಸ್ಥಾಶ್ರಮಿಯಾದಿತ್ಂಡಲಾ ವೈರಾಗ್ಯ ಜೀವನೊಡು, ಅನೇಕ ಪುಣ್ಯಕ್ಷೇತ್ರೊಳೆನ್ ಸಂದರ್ಶಿಸೋದು ಪುಣ್ಯ ಸಂಪಾದನೆ ಮಲ್ತೊಂಡಿನ ಮಹಾತ್ಮೆರ್, ದುರ್ದೈವವಶಾತ್, ಒಂಜಿ ಕಾರ್ನ್ ಕಳೆವೊಂದಿತ್ಂಡಲಾ, ಸರಸ್ವತೀ ಸೇವೆನ್ ಬುಡಂದಿನಾರ್ ಕೃಷ್ಣದಾಸೆರ್. ಆರೆಗ್ ಅನೇಕ ಯಕ್ಷಗಾನ ಪ್ರಸಂಗೊಲು ಬಾಯ್ಬಟ ಬರೊಂದಿತ್ಂಡ್ಗೆ. ಆಂಡಲಾ ಪರಾವಲಂಬನೆಗ್ ಬೂರಂದೆ, ನೆರೆಕರೆತ ಊರ್ದ ಜಾತ್ರೆ

ಸಮಾರಂಭೋಲೆಡ್ ಬೂಕುಳೆನ್ ಮಾರೊಂದಿತ್ತೆರಾಂದ್ ಕೆಲವು ಹಿರಿಯರೆನ ಹೇಳಿಕೆ. ಕಟೀಲು ದೇವಿನ ಪರಮ ಭಕ್ತೆರಾದ್, "ಶ್ರೀಕ್ಷೇತ್ರ ಕಟೀಲು" ಪಣ್ಣಿ ಕಟೀಲು ದೇವೀ ಸ್ತುತಿಪರವಾಯ್ಚಿ ಅನೇಕ ಪದ್ಯೋಲೆನ್ ರಚಿಸೊಯೆರ್. ಅವು ಕುಡ್ಲದ 'ಒಂದಾಣೆ ಮಾಲೆ'ಡ್ ಪ್ರಕಟವಾದಿತ್ತಂಡ್ಗೆ. ಇಂಚೊಪೊಗು "ದಿ| ಜತ್ತಿಯವರ ಯಕ್ಷಗಾನ ಕೃತಿಗಳು ಮತ್ತು ಕೀರ್ತನೆಗಳು - ಸಂಪುಟ - 1" - ಈ ಬೂಕುಡ್ ನಮ್ಮ ಕಥಾ ನಾಯಕೆರಾಯ್ ಜತ್ತಿ ಕೃಷ್ಣದಾಸೆರೆ ಪದ್ಯೊಲ್ಲಾ ಮುದ್ರಣವಾದ್ಂಡ್. ಈ ಬೂಕುನು ಎಂಕೊದಗದ್ ಕೊರಿನ ಹಿರಿಯೆರಾಯ್ ಕಟೀಲು ಪು. ಶ್ರೀನಿವಾಸ ಭಟ್ಟೆಗ್ ಎನ್ನೊಡಲು ದಿಂಜಿನ ಸೊಲ್ಮೆಲು. ಕೃಷ್ಣದಾಸೆರ್ ತನ್ನೊ ಪದ್ಯೊಳೆಡ್ ಅಮ್ಮೆರೆನ ಅಂಕಿತ - 'ವೀಶ್ವೇಶ್ವರನ್ನಾ ತನ್ನೊ ಅಂಕಿತ - 'ಕೃಷ್ಣ' ದೊಟ್ಟುಗು ಸೇರಾದೆರ್. ವಾವೊಂಜಿ ಪಿತ್ಯಭಕ್ತಿ ತೂಲೇ!

48. ಮಯ್ಯವಟಿ (ಮೈರ್ಪಾಡಿ) ವೆಂಕಟರಮಣಯ್ಯ: ಕುಂಬಳೆದ ಮಾಯಿಪ್ಪಾಡಿ ಅರಮನೆಟ್ ಶ್ಯಾನುಭಾಗರಾದಿತ್ತಿ ವೆಂಕಟರಮಣಯ್ಯೆರ್ ಕ್ರಮೇಣ ಕುಳಾಯಿದ ಕೈತಲ್ಡುಪ್ಪಿ ಮೈರ್ಪಾಡಿ (ಮಯ್ಯರ ಪಾಡಿ)ಡ್ ಬತ್ತದ್ ನಿಲೆಯಾಯ್ತಾರ್. ತನ್ನೊ ಪಳಯನ ಮಗೆ ಚಿತ್ರಾಪುರ ರಾಮ ಐಗಳೆನ್ ಶಿಷ್ಯೆಂದ್ ಗ್ರಹಿತ್ದ್, ತನ್ನೊ ಆಧ್ಯಾತ್ಮ ಜೀವನೊದ ಬೊಳ್ಳುನು ತೋಜಾದ್ ಕೊರಿನಾರ್. ಹರಿದಾಸೆರಾದ್, ಭಜನೆ, ಯಕ್ಷಗಾನ ಕಾರ್ಯಕ್ರಮೊಕ್ಲೆಡ್ ಸೇರೊಂದ್ ನಿರಂತರ ಹರಿಸೇವೆ ಮಲ್ಪೆರೆಗಾದ್ ಕೂಟೊನು ಕಟ್ಟಿನಾರ್. ಕನ್ನಡ ಭಾಷೆಡ್ ಯಕ್ಷಗಾನ ಕೃತಿಕ್ಲೆನ್ :- ಪ್ರಹ್ಲಾದ ಚರಿತ್ರೆ, ಮದಾಲಸಾ ಕಲ್ಯಾಣ, ಶೂರಪದ್ಮ ವಧೆ, ಜಯಸಿಂಹ ಚರಿತ್ರೆ ಬರೆಯ್ತಾರ್. 'ವೆಂಕಟರಮಣ', 'ವೆಂಕಟೇಶ', ಅಂಕಿತೊಡು ಭಾಮಿನಿ ಷಟ್ಪದಿಡ್ ಬರೆಯ್ತೊ ಕೃತಿಕ್ಲೆನ್:

1. ಶ್ರೀ ವೆಂಕಟಗಿರಿ ಮಹಾತ್ಮೆ
2. ಸಂಕ್ಷೇಪ ಉತ್ತರಕಾಂಡ ರಾಮಾಯಣ
3. ಕಾವೇರಿ ಮಹಾತ್ಮೆ

ಇಂಚೀ ಮಹಾನುಭಾವೆರೆನ್ ನಮ್ಮ ದಕ್ಷಿಣಕನ್ನಡ (ಅವಿಭಜಿತ) ಜಿಲ್ಲೆದ ಹರಿದಾಸೆರೆ ಸಾಲ್ಗ್ ಸೇರಾದ್, ಇರೆತ ಮದೆಟ್ಟುಪ್ಪಿ ಕಾಯಿಳೆನ್ ಚೊಳ್ಳುಗು ಕೊಣಪಿನ ಈ ಕಜ್ಜೊಗು ಕೈಜೋಡಾದ್, ಬೂಕುದ ಮಾಹಿತಿಳೆನ್ ಕೊರ್ತು ಸಹಾಯ ಮಲ್ತಿನ ನಮ್ಮ ಹಿರಿಯ ಸಾಹಿತಿ ಶ್ರೀಯುತ ಪು. ಶ್ರೀನಿವಾಸ ಭಟ್, ಕಟೀಲು - ಮೇರೆಗ್ ಎನ್ನ ಭಕ್ತಿಪೂರ್ವಕ ಕೃತಜ್ಞತೆಲು.

49. ಚಿತ್ರಾಪುರರಾಮಐಗಳ್: ಪ್ರೈಮರಿ ಶಾಲಾ ಶಿಕ್ಷಕೆರಾದ್, ಲೌಕಿಕ ಜೀವನದೊಟ್ಟುಗು ಆಧ್ಯಾತ್ಮ ಜೀವನೊಗು ಒತ್ತು ಕೊರಿನಂಚಿ ಚಿತ್ರಾಪುರ ರಾಮ ಐಗಳೆರ್ ತನ್ನ ತಿದ್ಯಮ್ಮೆರ್ ಬೊಕ್ಕ ಆಧ್ಯಾತ್ಮ ಜೀವನೊದ ಗುರುವಾಯಿಂಚಿ ಮೈರ್ಪಾಡಿ ವೆಂಕಟರಮಣಯ್ಯೆರ್ನ ಮಾರ್ಗದರ್ಶನೊಡು

ಆರೆನ ಬೆರಿಟೇ ಪಜ್ಜೆ ಪಾಡೊಂದು ಪೋಯ್ನಾರ್. ಐನ್ ಆಣುಲು, ರಡ್ಡ್ ಪೋಣ್ಣು ಜೋಕ್ಕೆನ್ ಪಡೆಯ್ನು ಪುಣ್ಯಾತ್ತೆ, ಭಜನೆ ಮಂಡಳಿ ಕಟ್ಕೊದ್, ಪಣಂಬೂರು -ಚಿತ್ರಾಪುರ -ಕುಳಾಯಿಡ್ ಭಜನೆದ ಕ್ರಾಂತಿನೇ ಮಲ್ತಿನಾರ್! ಆರೆನ ಬೆರಿಸಾಯೊಡು ಇತ್ತಿನ ನನೊರಿ ಭಕ್ತಿ ಕುಳಾಯಿ ಕೃಷ್ಣಯ್ಯ ಮಾಸ್ಪರ್. 'ಕೀರ್ತನ ತರಂಗಿಣಿ' ಪಣ್ಣಿ, ಭಜನೆ ಬೂಕುಡು 'ರಾಮ' ಮುದ್ರಿಕೆಡ್ ಕೀರ್ತನೆನ್ ಬರೆತೆರ್ ರಾಮ ಐಗಳ್. ಈ ಬೂಕುನು ಯಾನ್ ಶ್ರೀಯುತ ಪು. ಶ್ರೀನಿವಾಸ ಭಟ್, ಕಟೀಲು - ಮೇರೆನ ಸಂಗ್ರಹೊಡ್ಡು ಮಾಹಿತಿಗಾತ್ರ ಪಡೆವೊಂಡೆ.

ರಾಮ ಐಗಳ್ ಮಲ್ಲಮಗೆ - ಶ್ರೀಯುತ ಲಕ್ಷ್ಮೀಶ ಐಗಳೆರೆನ್ ಎಂಕ್ ಭೇಟಿ ಮಲ್ಪಾದ್, ವಿಷಯೊನ್ ತೆರಿಯೋಣ್ಕೆರೆ ಸಹಾಯ ಮಲ್ತಿನ, ಶ್ರೀ ನಂದನೇಶ್ವರ ದೇವಸ್ಥಾನ, ಪಣಂಬೂರು - ಟ್ರಸ್ಟಿಯಾದಿಂಚಿ ಶ್ರೀಯುತ ರಾಮಚಂದ್ರ ಹೆಬ್ಬಾರೆಗ್ಲಾ ಅಂಚಿನೇ ಮಾಹಿತಿ ನೀಡಿನ ಶ್ರೀ ಲಕ್ಷ್ಮೀಶ ಐಗಳೆಗ್ಲಾ, ಶ್ರೀಯುತ ಕಟೀಲು ಪು. ಶ್ರೀನಿವಾಸ ಭಟ್ಟೆಗ್ಲಾ - ಎನ್ನ ಉಡಲ್ದಿಂಚಿ ಸೊಲ್ತೆಲ್.

50. ಹರಿದಾಸ ದೇವಣ್ಣೆರ್: ಮೊಗವೀರ ಸಮಾಜೊದ ಶ್ರೇಷ್ಠ ವ್ಯಕ್ತಿಯಾದ್, ಮೂಲತಃ ಉಳ್ಳಾಲದ ಬರಿತ ಬೇಂಗ್ರದ ನಿವಾಸಿ ಹರಿದಾಸ ದೇವಣ್ಣೆರ್. ಹರಿಸೇವೆ ಮಲ್ಪರೆ ಜಾತಿ ಅಡ್ಡ ಬರ್ಬುಜಿ. ಭಕ್ತಿಯೇ ಮೂಲು ಪ್ರಧಾನ. ಅಂಚಿನೇ ಹರಿದಾಸರೆ ವೇಷ ಭೂಷಣೊಡು ಹರಿಕತೆ ಮಲ್ತೊಂದಿತ್ತಿನಾರ್ ಹರಿದಾಸ ದೇವಣ್ಣೆರ್, ನಮ್ಮ ಪಾವಂಚೆದ ಹರಿದಾಸ ಲಕ್ಷ್ಮೀನಾರ್ಣವಪ್ಪಯ್ಯರೆನ ಸಮಕಾಲೀನರ್. ಬೆಂಗ್ರ ನಾರಾಯಣದಾಸರ್ ದೇವಣ್ಣೆರ್ನ ಶಿಷ್ಯವರ್ಗೊಡು ಸೇರಿನಾರ್. ಹರಿದಾಸ ದೇವಣ್ಣೆರ್ ಬರೆತಿ ಭಜನೆದ ಬೂಕು (ಕನ್ನಡ ಭಾಷೆಡ್) ಬೊಳ್ಳುಗು ಬೈದೊಂಡೊಂದ್ ತೂಯ್ನಾರಾಯ್ನು ವಿದ್ವಾಂಸರೆನ ಹೇಳಿಕೆ.

ಉರ್ವ ಮಾರಿಗುಡಿ ದೇವಸ್ಥಾನದ ಮೊಕ್ತೇಸರ್ರೆಗ್ ಬೊಕ್ಕ ಆಡಳಿತ ಮಂಡಳಿ ಸದಸ್ಯೆರೆಗ್ ಎನ್ನ ಉಡಲ್ದಿಂಚಿ ಸೊಲ್ತೆಲು.

51. ಬೆಂಗ್ರ ನಾರಾಯಣ ದಾಸರ್: ಬೆಂಗ್ರ ಹರಿದಾಸ ನಾರಾಯಣ ಕರ್ಕೇರೆರ್ ಆ ಕಾಲದ ಮೊಗವೀರ ಸಮಾಜೊದ ಪ್ರಸಿದ್ಧ ಹರಿದಾಸರ್. ರಡ್ಡ್ ಕಣ್ಣುಲ್ಲಾ ಕುರುಡಾತ್ತಿನೊ ಹುಟ್ಟು ಕುರುಡೆರಾದಿತ್ತೊಂಡಲಾ, ಸ್ವತಃ ಹಾರ್ಮೋನಿಯಂ ಬಾರಿಸೋಂದು ಪದ್ಯ ಪಣ್ಣೆನೆನ್ ಎನ್ನ ಅಮ್ಮಲಾ ಎಲ್ಲಿಪ್ಪುನಗ ಕಟೀಲ್ಡ್ ತೂತ್ತಿನೊ ನೆಂಪು ನನ್ನಲಾ ಉಂಡುಂದು ಪಂಡೆರೆನಡ! ಇಂಚೀ ಮಹಾನುಭಾವೆರ್ ಕಣ್ಣೆಜ್ಜಂಡಲಾ ಭಕ್ತಿಡೇ ಎದೆದೊಳ್ಳಾದ ಕಣ್ಣೆಡ್ ಶ್ರೀ ಕೃಷ್ಣನ್ ತೂದ್ ಸಂತೋಷ ಪಡೆಯ್ನಾರ್! ಇಂಚೀ ಮೊಗವೀರ ಸಮಾಜೊದ ಹರಿದಾಸರೆನ ಪರಿಚಯೊನು ಎಂಕ್ 'ಮೊಗವೀರ' ಕನ್ನಡ ಮಾಸ ಪತ್ರಿಕೆದ ಮೂಲಕ ಒದಗದ್ ಕೊರಿನ, ಉರ್ವ ಮಾರಿಗುಡಿ ದೇವಸ್ಥಾನದ ಮೊಕ್ತೇಸರರಾಯ್ನೊ ಶ್ರೀಯುತ ಸುವರ್ಣೆರೆಗ್ ಎನ್ನ ಅನಂತ ಕೃತಜ್ಞತೆನೆನ್ ಅರ್ಪಿಸೊದ್ ಶ್ರೀ ದಾಸರೆಗ್ಲಾ, ಶ್ರೀ ದೇವಿಗ್ಲಾ ಎನ್ನ ಭಕ್ತಿಪೂರ್ವಕ ನಮನಲೆನ್ ಸಂದಾವೆ.

|| ಶ್ರೀ ಕೃಷ್ಣಾರ್ಪಣ ಮಸ್ತು ||

ತುಳುನಾಡ್ಡ ತುಳು ಕೀರ್ತನೆ ಬರೆತಿ ಹರಿದಾಸೆರ್

ಬೊಕ್ಕ ತುಳು ಕೀರ್ತನೆಲ್ಲ ಸಂಗ್ರಹ

ಪಟ್ಟಿ - ೨

ಸಂ.	ದಾಸೆರೆ ಪುದರ್	ಕಾಲ (ಕ್ರಿ.ಶ.)	ಅಂಕಿತನಾಮ / ಕಾವ್ಯನಾಮ	ತುಳು ಕೀರ್ತನೆಲು ಸಂ.
1.	ಶ್ರೀ ವಾದಿರಾಜ ಸ್ವಾಮಿಯೆರ್ (ಸೋದೆಮಠ)	1480-1600	ಹಯವದನ	1
2.	ಶ್ರೀ ವಿಶ್ವೇಂದ್ರ ತೀರ್ಥರ್	1881-1943	ರಾಜೇಶ ಹಯಮುಖ	1
3.	ಪಾವಂಜೆ ಲಕ್ಷ್ಮೀನಾರಾಣಪ್ಪಯ್ಯರ್	1854-1924	ಲಕ್ಷ್ಮೀನಾರಾಯಣ	4
4.	ಪಣಂಬೂರು ಗುರು ಸದಾನಂದೆರ್	1876-1946	ಸದಾನಂದ, ಶ್ರೀನಿವಾಸ	9
5.	ಸಂತ ಭದ್ರಗಿರಿ ಅಚ್ಯುತ ದಾಸೆರ್	1932-	ಮೂಲ ನಾರಾಯಣ	21
6.	ಹರಿದಾಸಿ ಉಡುಪಿ ಯಶೋದಮ್ಮ	1931-	ಯಶೋದೇಶ ಕೃಷ್ಣ	16
7.	ಸಂತ ಭದ್ರಗಿರಿ ಕೇಶವದಾಸೆರ್	1935-1997	ದಾಸ ಕೇಶವನುತ	2

ಅಲಕ್ಷಿತ ಹರಿದಾಸೆರ್ :

ಸಂ.	ದಾಸೆರೆ ಪುದರ್	ಕಾಲ (ಕ್ರಿ.ಶ.)	ಅಂಕಿತನಾಮ /ಕಾವ್ಯನಾಮ	ತುಳು ಕೀರ್ತನೆಲು ಸಂ.
1.	ಹೆಬ್ಬಿ - ಕಂಡಿಗ ಪದ್ಮನಾಭ ಚೆನ್ನಿ	1908-1988	ಪದ್ಮನಾಭ	1
2.	ಪಣಂಬೂರು ಲಕ್ಷ್ಮೀನಾರ್ಣಪ್ಪಯ್ಯರ್	19ನೇ ಶತಮಾನ	ನಾರಾಯಣ	1
3.	ಪುಂಡೂರು ದಾಮೋದರ ಪುಣೆಚಿತ್ತಾಯೆರ್	1881-1971	ಆಯಾಯ ಕ್ಷೇತ್ರದ ದೇವೆರ್ ಪುದರ್	3
4.	ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯೆರ್	19ನೇ ಶತಮಾನದ ಪೂರ್ವಾರ್ಧ		1
5.	ಪುಂಡೂರು ವೆಂಕಟರಾಜ ಪುಣೆಚಿತ್ತಾಯೆರ್	1936 -	-	7
6.	ಕಳುವಾರು ವೆಂಕಟರಾಯೆರ್	1905-1983	ವೆಂಕಟಪತಿ, ವೆಂಕಟರಮಣ	1
7.	ಜತ್ತಿ ಈಶ್ವರ ಭಾಗವತೆರ್	1872-1945	ವಿಶ್ವೇಶ್ವರ, ವಿಶ್ವನಾಥ	2
8.	ಉಡುಪಿ ಶ್ರೀಶದಾಸೆರ್	1935-	ಶ್ರೀಶ	16

ತುಳು ಕೀರ್ತನೆಕಾರರಾಯಿಂಚಿ ಹರಿದಾಸೆರೆ ಜೀವನ / ಸಾಧನೆದ

ಸಂಕ್ಷಿಪ್ತ ಪರಿಚಯ

"ದಾಸನ ಮಾಡಿಕೋ ಎನ್ನ| ಸ್ವಾಮಿ ಸಾಸಿರ ನಾಮದ ವೆಂಕಟರಮಣ" ಪಂಡ್ಲ್ ಸುಗಿತೆರ್ ಶ್ರೀ ಪುರಂದರ ದಾಸೆರ್. ಶ್ರೀ ಹರಿನ್ 'ಈಶ' ಪಂಡ್ಲ್ ತೆರಿನಕ್ಲ ಮಾತೆರ್ಲಾ ಆಯೊನ ದಾಸೆರೆ. ದಾಸ ಪಂಡ 'ಸೇವಕೆ' ಪಂಡ್ಲ್ ಅರ್ಥ. ಆಯ್ಲೆಡ್ಲಾವರ ದಾಸೆರ್ ಮಲ್ತಿ ಸಾಹಿತ್ಯೊಲು, ಅವು ವಾ ಭಾಷೆಡಿತ್ತಂಡಲಾ (ಸಂಸ್ಕೃತ/ಕನ್ನಡ/ತುಳು/ಕೊಂಕಣಿ / ಮರಾಠಿ - ಇತ್ಯಾದಿ) ಅವು ಪುರಾ ದಾಸಸಾಹಿತ್ಯನೇ ಆಂಡಲಾ ಇನಿಗ್ ಕನ್ನಡೊಡು ಬತ್ತಿನೊ ಪದ, ಪದ್ಯ, ಸುಳಾದಿಲು ದಾಸಸಾಹಿತ್ಯಂದೇ ಪ್ರಚಲಿತವಾತ್ಂಡ್. ಹರಿದಾಸೆರ್ ಮಾತೆರ್ಲಾ ಮಧ್ವಾಚಾರ್ಯೆನೇ 'ಗುರು' ಪಂಡ್ಲ್ ನಂಬುವೆರ್; ಮಧ್ವ ಸಿದ್ಧಾಂತೊನೇ ದಾಸರಾಯೆರ್ ಸಿದ್ಧಾಂತ. ಶ್ರೀ ಮನ್ಮಥ್ವಾಚಾರ್ಯೆರ್ ರಚನೆ ಮಲ್ತಿ 'ದ್ವಾದಶ ಸ್ತೋತ್ರ'. ರಾಗ - ತಾಳೊಡ್ಲ ಕೂಡ್ಲ ಬತ್ತಿ ಸ್ಫೂರ್ತಿ, ದಾಸ ಸಾಹಿತ್ಯೊಗು ಅಂಕುರಾರ್ಪಣೆಂದೇ ಪಣೊಲಿ. ತುಳುನಾಡುಡು ಮಧ್ವಾಚಾರ್ಯೆರ್ ಕಾಲೊಡ್ಲಾ ತುಳು ಭಾಷೆ ಬಳಕೆಡಿತ್ತಂಡಲಾ ಮಧ್ವಾಚಾರ್ಯೆರ್ ಕೇವಲ ಸಂಸ್ಕೃತೊಡೇ ಸಾಹಿತ್ಯ ರಚನೆ ಮಲ್ತೆರತ್ತಂದೆ ತುಳು ಭಾಷೆಡ್ ಮಲ್ತರೆ ಪೋಯಿಚೆರ್.

ಸಾಧಾರಣ ಪದಿನ್ನೇನೇ ಶತಮಾನೊಡು ಉಂದುವೇ ಪರಂಪರೆಟ್ ಶ್ರೀ ವಾದಿರಾಜ ಸ್ವಾಮಿಲೆನ ಕಾಲೊಡೇ ದಾಸ ಸಾಹಿತ್ಯೊದ ತುಳು ಕೀರ್ತನೆಗ್ ನಾಂದಿಯಾಂಡ್!

1. ಶ್ರೀ ವಾದಿರಾಜ ಸ್ವಾಮಿಯೆರ್ (ಕಾಲ: ಕ್ರಿ.ಶ. 1480-1600)

ಭಾವೀ ಸಮೀರೆಂದ್ ತೆರಿದ್, ಲಾತವ್ಯಾಂಶೊಡು, ಪರಶುರಾಮ ಕ್ಷೇತ್ರೊದ ಕುಂಭಾಸಿದ ಪಕ್ಕೊಡುಪ್ಪಿ 'ಹೂವಿನಕೆರೆ' ಪಣ್ಣಿ ಗ್ರಾಮೊಡು 'ಮಾಘ ಶುದ್ಧ ದ್ವಾದಶಿ'ದಾನಿ ಅವತಾರೊ ತಾಳಿನ ಮಹಾತ್ಮೆರ್. ಅಮ್ಮೆ ರಾಮಾಚಾರ್ಯೆರ್ ಅಪ್ಪೆ ಗೌರೀದೇವಿ. ಇಲ್ಲಡ್ಲ ಪಿದಾಯಿ ಪುಟ್ಟಿ ಬಾಲೆ ಇಲ್ಲಗ್ ಸಂದುಜಿ ಪಂಡಿನೊ ಗುರು ವಾಗೀಶ ತೀರ್ಥೆರೆ ಆ ಪುಟ್ಟಿ ಬಾಲೆಗ್ ಗುರುವಾಯೆರ್! ಬಾಲೆ ಪುಟ್ಟಿ ಜಾಗೊನೇ ಇನಿಕ್ 'ಗೌರೀ ಗದ್ದೆ' ಪಂಡ್ಲ್ ಪ್ರಚಾರ ಪಡೆಂಡ್. ಪುಟ್ಟಿ ಬಾಲೆಗ್ 'ಭೂ ವರಾಹ' ಪಂಡ್ಲ್ ಪುದರ್ ದೀದ್, 5ನೇ ವರ್ಷೊಡು ಉಪನಯನ, ಎಳನೇ ವರ್ಷೊಡು ಸನ್ಯಾಸ ಸ್ವೀಕಾರೊನು ಗುರು ವಾಗೀಶ ತೀರ್ಥೆರೆಡ್ಲ ಪಡೆಯೆರ್. ವಾದಿಲೆನ್ ಜೈತೆರ್.

ಯುಕ್ತಿಮಲ್ತಿಕಾ, ರುಕ್ಮಿಣೀಶ ವಿಜಯ, ಗುರ್ವರ್ಥ ದೀಪಿಕಾ, ಹರಿಭಕ್ತಿಲತಾ, ಇತ್ಯಾದಿ ಗ್ರಂಥೊಲೆನ್ ದೇವ ಭಾಷೆಡ್ ರಚನೆ ಮಲ್ತೆರ್.

ವೈಕುಂಠ ವರ್ಣನೆ, ಲಕ್ಷ್ಮೀ ಶೋಭಾನೆ, ಗುಂಡಕ್ರಿಯೆ ಸ್ವಪ್ನಪದ, ಹರಿಸರ್ವೋತ್ತಮಸಾರ - ಇತ್ಯಾದಿ ಗ್ರಂಥೊಲೆನ್ ಕನ್ನಡ ಭಾಷೆಡ್ ಬರೆಯೆರ್.

ಅಸಂಖ್ಯ ಸ್ತೋತ್ರಲೆನ್, ಕೀರ್ತನೆಲೆನ್ ಪಂಡ್ಲ್ ಸುಗಿತೆರ್.

ಕಡಲೆ ಮಡ್ಡಿ ಮಲ್ತಾದ್ ಸಿರಿಹರಿಕ್ ತಿನ್ನಾಯ್ಲೊ ಮಹಾತ್ಮೆರ್!
 ನಾರಾಯಣ ಭೂತನ್ ಗೆಂದಾದ್, ತನ್ನೊ ಕೆಲಸೊದಾಳಾದ್ ಮಲ್ತೊಂಡೆರ್!
 ಜಿನವಿಗ್ರಹೊನು ವಿಠಲ ದೇವೆರಾಪಿಲೆಕ್ಯ ಮಹಾತ್ಮೆ ತೋಜಾಯೆರ್!
 ತಿರುಮಲೆ (ತಿರುಪತಿ)ನ್ ಮೊಣಕಾರ್ಡೇ ಮಿತ್ತರ್, ಸಾಲಿಗ್ರಾಮ ಮಾಲೆನ್
 ಶ್ರೀನಿವಾಸ ದೇವೆರೆಗ್ ಸಮರ್ಪಣೆ ಮಲ್ತೆರ್!
 ವಾಲಿ ಭಂಡಾರೊಡ್ ಶ್ರೀ ರಾಮದೇವೆರೆನ್ ಕೊಣತ್ತೆರ್!
 ವಾದಿಳೆನ ಸದ್ಡಗೊಯೆರ್! ಬದರಿಡ್ ತ್ರಿವಿಕ್ರಮ ದೇವೆರೆನ್ ತರ್ಪಾದ್ ಸೋದೇಡ್
 ಪ್ರತಿಷ್ಠೆ ಮಲ್ತೆರ್!
 ಒಡಿಪುಡು ಶ್ರೀ ಕೃಷ್ಣ ದೇವೆರೆಗ್ 2 ವರ್ಷಗೊರ ಪರ್ಯಾಯ ಆಪುಣಂಚಿ ಕ್ರಮನು
 ಜಾರಿಗ್ ಕೊಣತ್ತೆರ್!
 ಧವಳ ಗಂಗಿಗ್ ಗಂಗಿನ್ ತರ್ಪಾಯೆರ್!

120 ವರ್ಷ ಬದ್ಯಾದ್ ಬಾಳ್ವೊ, ಮಾತೆರ್ ಕಣ್ಣಿಗ್ ಗೋಚರಿಸೊಂದಿತ್ತಾದ್,
 ಕಡೇಕ್ ಸಜೀವವಾದ್ ವೃಂದಾವನ ಪ್ರವೇಶ ಮಲ್ತಾದ್, ಪಂಚವೃಂದಾವನೊಂಟು ನಿಲೆಯಾಯೆರ್!

ಶ್ರೀ ವಾದಿರಾಜೆರೆಗ್ ತುಳುನಾಡ್ಲೊ ತುಳುವೆರೊ ಮಿತ್ತ್ ಬಾರೀ ಪ್ರೀತಿ - ದಯೆ.
 ದೋಲು ಬೊಟ್ಟುನೊ ವರ್ಗಂತಾಕ್ಕೆನೊ ಮಿತ್ತ್ ದಯೆಟ್ ದಶಾವತಾರ ಕೀರ್ತನೆನ್ ತುಳುಟು
 ಬರೆತ್ ಕಲ್ಪೊತೆರ್. ಈ ಕೀರ್ತನೆನ್ ಪರಿಶಿಷ್ಟೊಂಟು ಕೊರ್ತುಂಡು. ಈ ಪದ್ಯೊನು ಕನ್ನಡ
 ಭಾಷೆಡ್ಲಾ ಅನುವಾದ ಮಲ್ತಾದ್ಂಡ್. ನೂತ್ತ ಪದ್ಯಾದ್ ಚರಣೊಂತೊ 'ಶ್ರೀ ಲಕ್ಷ್ಮೀ ಶೋಭಾನೆ'
 ಪದೊಂಕೆನು ಜನೊಂಕ್ಲೆನೊ ಆಯುಷ್ಯ, ಭವಿಷ್ಯ ವೃದ್ಧಿಗಾದ್ ತಯಾರ್ ಮಲ್ತೆರ್. ಆರೆನ್ ಈ
 ಪದ್ಯೊದ ಕಡೇಟ್ ಪಂತಿನ ಫಲಶ್ರುತಿಚೇ ಕೊರ್ತಿಲೆಕಾನೇ, ಮದ್ದೆದ ಇಲ್ಲಡ್ ಈ ಪದ್ಯೊನು
 ಪಂಡೊಂಡ ವಧು-ವರೆರೆಗ್ ಸಂತೋಷಲಾ, ಮದ್ಮಾಲೆಗ್ ಓಲೆಭಾಗ್ಯೊಲಾ ದಿನೊದಿನೊಕು
 ಹೆಚ್ಚುಂಡು. ದೇವರೆ ಕೃಪೆಟ್ ಪಂಡಿನೊ ಈ ಪುಣ್ಯೊ ಪದ 'ಶ್ರೀ ಲಕ್ಷ್ಮೀ ಶೋಭಾನೆನ್' ಶಿವಳ್ಳಿ
 ಬ್ರಾಹ್ಮಣೇರ ತುಳುಟು ಇಂಚಪೊಗು ಅನುವಾದ ಮಲ್ತಾದ್ಂಡ್. ಅಂಚಿನೇ ಶ್ರೀ ಪುರಂದರದಾಸೆರೆ
 ಕೆಲವು ಪದೊಕುಲ್ಲಾ ತುಳು ಭಾಷೆಗ್ ಅನುವಾದವಾತ್ಂಡ್.

ಅನುವಾದಿತ ಕೃತಿಗಳು:

1. ಭಾವೀ ಸಮೀರ ಶ್ರೀ ವಾದಿರಾಜ ಸ್ವಾಮಿಯೆರ್ ಕನ್ನಡ ಭಾಷೆಡ್ ಬರೆತಿ 'ಲಕ್ಷ್ಮೀ ಶೋಭಾನೆ
 ಹಾಡು' - ಉಂದೆನ್ ಪುಸ್ತಕ ರೂಪೊಡು - 'ಲಕ್ಷ್ಮೀ ಶೋಭಾನೆ' (ಶಿವಳ್ಳಿ ತುಳು ಭಾಷೆಡ್)
 ತುಳು ಭಾಷಾಂತರ ಮಲ್ತಿನಾರ್ : - ಎಸ್. ದೇವೇಂದ್ರ ಪೆಜತ್ತಾಯೆರ್, ಉಡುಪಿ
 ಪ್ರಕಾಶಕೆರ್: ವಲ್ಲರೀ ಪ್ರಕಾಶನ, ಉಡುಪಿ - 2006

ಶ್ರೀ ವಾದಿರಾಜೆರ್ ಬರೆತಿ 'ದಶಾವತಾರ' ತುಳು ಕೀರ್ತನೆನ್, ಕನ್ನಡ ಭಾಷಾಂತರ ಮಲ್ತಾದ್ ತನ್ನೊ ಪದ್ಯೊ ಸಂಕಲನೊಡು ಸೇರ್ದಾದೆರ್, ನಮ್ಮ ಕಾಸರಗೋಡುದ ಪ್ರಸಿದ್ಧ ಕವಿ ಬೊಕ್ಕ ಲೇಖಕೆರ್.

ಪುಸ್ತಕ - 'ತುಂತುರು ಹಾಡು' (ಶಿಶು ಗೀತೆಗಳು) (ಪದ್ಯ ಸಂಖ್ಯೆ - ೩೧ - ದಶಾವತಾರ)
ಲೇಖಕೆರ್ : ಮಧುರಕಾನನ ಗೋಪಾಲಕೃಷ್ಣ ಭಟ್ಟ
ಪ್ರಕಾಶಕೆರ್: ಮಧುರ ಧ್ವನಿ ಪ್ರಕಾಶನ, ಬೆಳ, ಕಾಸರಗೋಡು - 2001.

2. ಪುರಂದರ ದಾಸೆರೆ ಪದ್ಯೊಲೆನ್ ಕೆಲವೆರ್ ತುಳು ಭಾಷಾಂತರ ಮಲ್ತಾದೆರ್.

ಕಬ್ಬಿನಾಲೆ ವಸಂತ ಭಾರದ್ವಾಜೆರ್ ಬೊಕ್ಕ ಸತ್ಯನಾರಾಯಣ ಪುಣಂಚಿತ್ತಾಯೆರ್. ಅನುವಾದಕೆರಾದಿತ್ತಿ ಈ ಪದ್ಯೊಲು ತುಳು ಧ್ವನಿಸುರುಳಿ ಮೂಲಕ ಪ್ರಕಟವಾತ್ಂಡ್. ಇಂಚಪೊಗು ಈ ಧ್ವನಿಸುರುಳಿಡ್ ಪ್ರಕಟವಾಯ್ಲೊ ಕೆಲವು ಪದ್ಯೊಲು ಪುಸ್ತಕ ರೂಪೊಡು ಮಾರುಕಟ್ಟೆಗ್ ಬೈದ್ಂಡ್.

ಪುಸ್ತಕ - "ಪೊಸತ್ತ್ ತುಳು ಭಕ್ತಿಗೀತೆಲು" (ತುಳು ಧ್ವನಿಸುರುಳಿದ ಸಂಗ್ರಹ)

ಸಂಗ್ರಾಹಕೆರ್ : ಬಿ. ಕೆ. ಶ್ರೀಮತಿರಾವ್, ಮಂಗಳೂರು

ಪ್ರಕಾಶಕೆರ್ : ವಿನಾಯಕ ಬುಕ್ ಸ್ಟಾಲ್, ಮಂಗಳೂರು.

ತುಳುಕು ಅನುವಾದ ಮಲ್ತಿನ ಅನುವಾದಕೆರಾಯ್ಲಿ ವಿದ್ವಾಂಸೆರೆಗ್ ಎನ್ನ ದಿಂಜಿದುಡಲ್ಲ ಸೊಲೈಲು.

||ಶ್ರೀ ಕೃಷ್ಣಾರ್ಪಣ ಮಸ್ತು||

2. ಶ್ರೀ ವಿಶ್ವೇಂದ್ರ ತೀರ್ಥರ್ (ಕಾಲ: ಕ್ರಿ.ಶ. 1881-1943)

ಒಡಿಪುದ ಶ್ರೀ ವೆಂಕಟರಮಣಾಚಾರ್ಯರೆ ಮಗೆ ಲಕ್ಷ್ಮೀನಾರಾಯಣಗ್ 16 ವರ್ಸೊಗು ಸನ್ಯಾಸ ದೀಕ್ಲೆ ಕೊರ್ಪು 'ಶ್ರೀ ವಿಶ್ವೇಂದ್ರ ತೀರ್ಥ' ಪಂಡ್ ಅನುಗ್ರಹಿಸೊಯೆರ್ - ಗುರು ಶ್ರೀ ವಿಶ್ವಾಧೀಶ ತೀರ್ಥರ್. ಸೋದೆ ಮಠಾಧೀಶರಾದಿತ್ತಿನಾರ್ - ಶ್ರೀ ವಿಶ್ವಾಧೀಶೆರ್ ಶಿಷ್ಯರ್, ಇನ್ನಂಚೆಡ್(ಉಂಡಾರ್) ಶ್ರೀ ವಿಷ್ಣುಮೂರ್ತಿ ಹಯವದನ ಸ್ವಾಮಿ ಪ್ರಾಥಶಾಲೆನ್ ಸ್ಥಾಪನೆ ಮಲ್ತಿನಾರ್ - ಅಷ್ಟ ಮಠೊಕ್ಲೆಡೇ ಪ್ರಥಮವಾದ್ ಹೈಸ್ಕೂಲು ಸ್ಥಾಪನೆ ಮಲ್ತಾದ್, ಆಧುನಿಕ ಶಿಕ್ಷಣೊಗು ಸುರೂಕು ಲಗ್ಗೆ ಪಾಡಿನಾರ್!

44 ವರ್ಷ ಕಾಲ ಪೀರೊಡಿತ್ತಾದ್ ಮೂಜಿ ಸರ್ತಿ ಪರ್ಯಾಯೊಲೆನ್ ನೆರವೇರ್ಪಯೆರ್!

ಶ್ರೇಷ್ಠ ವಿದ್ವಾಂಸೆರಾದ್ ವನಾಷಧಿ ವಿಷಯೊಡು ವಿಶೇಷ ಪಾಂಡಿತ್ಯ ಪಡೆಯ್ತಾರ್!

'ರಾಜೇಶ ಹಯಮುಖ' ಅಂಕಿತೊಡು, ಅನೇಕ ಕನ್ನಡ (47) ಬೊಕ್ಕ ತುಳು(1) ಕೃತಿಳೆನ್ ರಚನೆ ಮಲ್ತಿನಾರ್!

ಈ ಒಟ್ಟು 48 ಕೃತಿಳೆನ ಸಂಗ್ರಹೊನ್ 'ಕೀರ್ತನ ಮಂಜರೀ' ಪಂಡ್ ಶ್ರೀಸೋದಾ

ವಾದಿರಾಜ ಮರೊ ಪ್ರಕಟ ಮಲ್ತಾದ್(1955). 'ವಾದಿರಾಜಾಷ್ಕ' - ಪಣ್ಣೆ ಸಂಸ್ಕೃತ ಕೃತಿನ್ನಾ ಆರ್ ರಚನೆ ಮಲ್ತಾದರ್.

ಪಂಜಿಮಾರ್ಡುಪ್ಪಿ ಸೋದೇಮರೊತ ಜೀರ್ಣೋದ್ಧಾರೊನ್ನಾ, ಒಡಿಪುದ ವೃಂದಾವನೊತ ಕಟ್ಟೋಣನ್ನಾ ಆರ್ ನವೀಕರಣ ಮಲ್ತಾದರ್.

ಶ್ರೀ ವಿಶ್ವೇಂದ್ರರ್ ಬರೆತಿ ಒಂಜಿ ತುಳು ಪದ್ಯೊನು ಪರಿಶಿಷ್ಟೊಡು ಕೊರುಂಡು. ದ್ರೌಪದಿನೊ ಮದಿಮೆದ ವರ್ಣನೆನ್ ಬಾರೀ ಪೊರ್ಲುಡೇ ವಿವರಿಸದರ್ - ಆ ಪದ್ಯೊಡು.

||ಶ್ರೀ ಕೃಷ್ಣಾರ್ಪಣ ಮಸ್ತು||

3. ಪಾವಂಜಿ ಲಕ್ಷ್ಮೀನಾರ್ಣಪ್ಪಯ್ಯ (ಕಾಲ : ಕ್ರ.ಶ. 1854-1924)

ದಕ್ಷಿಣ ಕನ್ನಡ ಜಿಲ್ಲೆದ ಮೂಲ್ಕಿದ ಕೈತಲ್ಪುಪ್ಪಿನೊ ಅತ್ತೂರು ಗ್ರಾಮೊದ ಸ್ಥಾನಿಕ ಬ್ರಾಹ್ಮಣ ಸಮಾಜೊದ ಶ್ರೀ ವೆಂಕಟಕೃಷ್ಣಯ್ಯೇರ್ಗೆ ಪುಟ್ಟಿನೊ ಆಣ್ ಬಾಲೆ ಲಕ್ಷ್ಮೀನಾರಾಯಣೆ. ತನ್ನೊ ಅಣ್ಣಗ್ ಜೋಕ್ಕು ಇಚ್ಚೇಂದ್, ತನ್ನೊ ಮಗೆ ಲಕ್ಷ್ಮೀನಾರಾಯಣನ್ ದತ್ತೊಗಾದ್ ಕೊರ್ಯರ್. ಆಂಡ ಮಂಕಾದ್, ಜಡಭರತನಲ್ಕ ಉಪ್ಪಿ ಈ ಬಾಲೆನ್ ಮಾತೆರ್ನಾ ತಾತ್ಸಾರ ಮಲ್ತಿನೆಡ್ಡಾವರ ಲಕ್ಷ್ಮೀನಾರಾಯಣೆ ತನ್ನೊ ಪತ್ತನೇ ವಯಸ್ಸಡೇ ಇಲ್ಲ ಬುಡ್ಡ್ ಪಣಂದೆ ಪೋಯೆ.

ಅಂಡಲೆಪಿ ಬಾಲಕನ್ ಕಾರ್ಕಳೊಡುಪ್ಪಿ ಶ್ರೀ ಕಾಶೀಮಠಾಧೀಶರ್(ಗೌಡ ಸಾರಸ್ವತ ಬ್ರಾಹ್ಮಣ ಸಮಾಜೊದ ಗುರುಕುಳು) ಶ್ರೀ ಭುವನೇಂದ್ರತೀರ್ಥ ಸ್ವಾಮೀಜಿಯೆರ್ ಆಶ್ರಯ ಕೊರ್ಪು ಸಾಂಕೆರ್. ಲಕ್ಷ್ಮೀನಾರಾಯಣೆ ಆರೆಡ ಸಂಸ್ಕೃತ, ಕಾವ್ಯಾದಿಲೆನ್ ಅಭ್ಯಾಸ ಮಲ್ತಾದ್, ಆಶುಕವಿಯಾಯಿ ಕೂಡ್ಲೆ, ಸಿದ್ಧಾಪುರ ವೆಂಕಟರಮಣ ಪ್ರಭುಲೆಡ್ ಹರಿಕಥೆ ಕೀರ್ತನೆಲ್ಕ ಉಪದೇಶ ಕೊರ್ಪಾಯೆರ್ ಸ್ವಾಮೀಜಿಯೆರ್. ಗುರುಕೆ ಅನುಗ್ರಹೊಡ್ಡಾವರ ಹರಿದಾಸೆ ಲಕ್ಷ್ಮೀನಾರಾಯಣೆ ಕ್ರಮೇಣ ಎಡ್ಲೆ ಸ್ಥಾನಮಾನ ಗಳಿಸೊಂದು ಸಮಾಜೊಡು ಗಣ್ಯವ್ಯಕ್ತಿಯಾದ್ ಮೆರೆಯೆರ್.

'ಲಕ್ಷ್ಮೀನಾರಾಯಣ' ಅಂಕಿತೊಡು ಅನೇಕ ಕೀರ್ತನೆಲೆನ್ ರಚಿಸೊದು, 'ಹರಿದಾಸ ಪಾವಂಜಿ ಲಕ್ಷ್ಮೀನಾರ್ಣಪ್ಪಯ್ಯೇರ್' ಪಂಡ್ಲೇ ಜನೊಕ್ಕೆ ಬಾಯಿಡ್ ಪೊಗಳ್ ಬತ್ತೆರ್! ಆರೆನ ಕೀರ್ತನೆಲೆ ಸಂಗ್ರಹೊನು 'ಪಾವಂಜಿ ಹರಿದಾಸ ವಾಣಿ' ಪನ್ನಿ ಪುಸ್ತಕೊನು ಪಾವಂಜೆದ ಸತ್ಸಂಗ ಸಮಿತಿ ಪ್ರಕಟ ಮಲ್ತಂಡ್. ಮದ್ಮೆ ಆದ್, ಬುಡೆದಿ, ಜೋಕ್ಕೆನ ಸಾವುಗ್ ತೀರಾ ವಿರಾಗಿ ಆದ್, ಬೈರಾಗಿ ಲೆಕ್ಕ ಊರೂರು ತಿರ್ಗೊಂದಿತ್ತಿಲೆಕಾನೇ, ನಮ್ಮ ಜಿಲ್ಲೆದ ಕೆಲವು ದೇವಸ್ಥಾನೊಲೆನ್ ದರ್ಶನ ಮಲ್ತಾದ್, ಉತ್ಸವ, ಜಾತ್ರದ ಸಂದರ್ಭೊಡು ಅನೇಕ ದೇವರೆ ಕೀರ್ತನೆಲೆನ್ ಕಟ್ಟೊಂದಿತ್ತೆರ್. ಆರೆನ ಕೃತಿ ಸಂಕಲನೊಲು ಕಾರ್ಕಳ, ಬಂಟ್ವಾಳ, ಪಾವಂಜೆಡ್ ಪ್ರಕಟವಾಂಡ್.

ಶೈವ ಬ್ರಾಹ್ಮಣೆ ಆದಿತ್ತಂಡಲಾ, ಆರ್ ತನ್ನೊ ಕೃತಿಕುಳೆಡ್ ಹೆಚ್ಚಾದ್ ಮಾಧ್ವ ಸಂಪ್ರದಾಯೊದ ವಿಷ್ಣು ಪರವಾಯೊ ಪದೊಕುಳೆನೇ ರಚನೆ ಮಲ್ತಿನಾರ್. ಪಾವಂಜೆ ಸುಬ್ರಹ್ಮಣ್ಯ ದೇವಸ್ಥಾನೊಗು ತನ್ನೊ ಆಸ್ತಿ, ಪಾಸ್ತಿಲೆನ್ ಪೂರಾ 'ಕೃಷ್ಣಾರ್ಪಣೆ' ಪಂಡ್ಲೆ ಅರ್ಪಿಸೊದು ತನ್ನೊ

ಅಂತೂ ಕಾಲಮುಟ್ಟಲಾ ಅವ್ಲೇ ಇತ್ತೆರ್. ಲಕ್ಷ್ಮೀನಾರ್ಣಪ್ಪಯ್ಯೆರ್ ನೇಲೊ ಭಾವಚಿತ್ರನ್ ಪಾವಂಚೆದ ಸುಬ್ರಹ್ಮಣ್ಯ ದೇವಸ್ಥಾನೊಡು ಇನಿಗ್ಲಾ ತೂವರೆ ತಿಕ್ಕುಂಡು.

ಸುಮಾರು 200 ಕನ್ನಡ ಕೃತಿಕುಳು ಬೊಕ್ಕ ಕೆಲವು ತುಳು ಕೀರ್ತನೆಲೆನ್ ರಚನೆ ಮಲ್ತೆರ್.

ಕನ್ನಡ ಬೊಕ್ಕ ಸಂಸ್ಕೃತಿ ನಿರ್ದೇಶನಾಲಯೊಡ್ಲ ಕರ್ನಾಟಕ ಸರಕಾರ, ಆರೆನ ಕನ್ನಡ ಪದೊಕ್ಲೆನ್ ಪ್ರಕಟ ಮಲ್ತಂಡ್. ಇತ್ತೆ ಎಂಕ್ ತಿಕ್ಕಿನೊ 4 ತುಳು ಪದೊಕ್ಲೆನ್ ಪರಿಶಿಷ್ಟೊಡು ಕೊರ್ತುಂಡು. 'ಪಾವಂಚೆ ಹರಿದಾಸ ವಾಣಿ' ಪಣ್ಣಿ ಬೂಕುಡ್ಲ ಎಂಕೊದಗಯೆರ್ ಈ ಪದೊಕ್ಲೆನ್, ಕುಟೀಲ್ದ ಹಿರಿಯ ವಿದ್ವಾಂಸರಾಯ್ಚಿ ಪ್ರ. ಶ್ರೀನಿವಾಸ ಭಟ್ ಆರೆನ ಸಂಗ್ರಹೊಡ್ಲ. ಶ್ರೀಯುತೆರೆಗ್ ಎನ್ನ ಉಡಲ್ದಿಂಜಿ ಸೊಲ್ತೆಲು. ಅಂಚೆನೇ ಪಾವಂಚೆ ದೇವಸ್ಥಾನೊದ ಆಡಳಿತ ಮಂಡಳಿದಕ್ಲೆ ಎಂಕ್ ಪೊಸತ್ತಾದ್ ಮುದ್ರಣ ಆಯ್ಚಿ 'ಹರಿದಾಸ ಕೀರ್ತನ' (ಪಾವಂಚೆ ಹರಿದಾಸರ ಕೃತಿಸಂಪುಟ) ಕೊರ್ತು, ಈ ಕಾರ್ಯೋಗು ಶುಭ ಹಾರೈಸ್ಯೆರ್. ಆಕ್ಲೆಗ್ಲಾ ಎನ್ನೊ ಅನಂತ ಕೃತಜ್ಞತೆಲು.

ಬ್ರಾಹ್ಮಣೇರ್ ತುಳುಟು ಬರೆತಿ ಈ ನಾಲ್ ಪದೊಲು ಸಂಪ್ರದಾಯೊದ ಪದೊಲು. ಮದ್ದೆದಿಲ್ಲಡ್ ಬೀಗೆರ್ ದೂರುಣೊ ಪದೊಕುಳೆನ್ (ಬ್ರಾಹ್ಮಣೇರ್ ಮದಿಮೆಡ್) ಬಾರೀ ಪೊರ್ಲುಡೇ ಬರೆತೆರ್ ಹರಿದಾಸೆರ್.

ಇಂಚೇ ಕನ್ನಡ ಬೊಕ್ಕ ತುಳುಟು ಬರೆತಿ ಹರಿದಾಸೆ ಪಾವಂಚೆ ಲಕ್ಷ್ಮೀನಾರ್ಣಪ್ಪಯ್ಯೆರ್ ತುಳುವಪ್ಪೆನ ಸಿರಿ ಮುಡಿಕ್ ತನ್ನೊ ತುಳು ಪದೊ ರತ್ನಮಾಲೆನ್ ಏರ್ಪಾದ್, ಅಪ್ಪೆನ ಋಣ ಸಂದಾಯೆರ್. ಶ್ರೀ ಹರಿದಾಸೆರೆ ಚರಣೊನು ತುದಿತೊಂದ್ ತುಳು ಜನೊಕ್ಲೆ ಪರವಾದ್ ದಾಸೆರೆಗ್ 'ನಮೋ ನಮಃ' ಪಂಡ್ ಈ ಲೇಖನೊನ್ ಮುಕ್ತಾಯ ಮಲ್ಪುವೆ.

|| ಶ್ರೀ ಕೃಷ್ಣಾರ್ಪಣ ಮಸ್ತು ||

4. ಪಣಂಬೂರು ಗುರು ಸದಾನಂದೆರ್ (ಕಾಲ : ಕ್ರಿ.ಶ. 1876-1946)

ಮಂಗಳೂರುಡು 'ಪಣಂಬೂರು' ಬೀಚ್ ಬರಿಚೇ ಉಪ್ಪಿನಂಚಿ ಬಾರೀ ಪ್ರಸಿದ್ಧಿ ಪಡೆಯ್ಲೊ ಶ್ರೀ ನಂದನೇಶ್ವರ ಬೊಕ್ಕ ಶ್ರೀ ವಿಷ್ಣುಮೂರ್ತಿ ದೇವಸ್ಥಾನೊಳೆರಡುಂಡು. ಪಣಂಬೂರು ನಂದನೇಶ್ವರ ದೇವಸ್ಥಾನೊದ ಪಡ್ಲೆ ದಿಕ್ಕೊದ 'ಬಕುಲವನ' ಪಣ್ಣಿ ಕುಟೀರೊಡು ಸ್ಥಾನಿಕ ಬ್ರಾಹ್ಮಣೆರೆ ವಂಶೊದ ಪಂಡಿತರಾಯ್ಚಿ ಶಿವಸಿದ್ಧಿ ಶರ್ಮ ಬೊಕ್ಕ ಸತ್ಯವತಿ ದಂಪತಿಯೆರೆಗ್ ಸುರುತ ಆಣ್ಣಾಲೆ ಲಕ್ಷ್ಮೀನಾರಾಯಣೆ, ಬೊಕ್ಕ ರಡ್ಡನೇ ಆಣ್ಣಾಲೆ (ಕ್ರಿ.ಶ. 1876) ನಮ್ಮ ಕಥಾನಾಯಕೆರೆಗ್ 'ಶ್ರೀನಿವಾಸ' ಪಂಡ್ ನಾಮಕರಣವಾಂಡ್. ಆಕ್ಲೆನ ಮನೆತನೊತ ಆರಾಧ್ಯ ದೇವೆರ್ ಗೋಪಾಲಕೃಷ್ಣ. ಶ್ರೀನಿವಾಸಗ್ ಎಲ್ಯ ಪ್ರಾಯೊಡೇ ದೈವ ಭಕ್ತಿ, ಪುರಾಣ ಓದುನ ಅಭ್ಯಾಸ, ಯಕ್ಷಗಾನೊದ ಮಲ್ತ ರಕ್ತಗತವಾದಿತ್ತ್ಂಡೆದೇ ಪಣೊಲಿ. ಪಣಂಬೂರು ಯಕ್ಷಗಾನ ಮಂಡಳಿಗ್ ಸೇರ್ಲ್ದ ಹಾಸ್ಯಗಾರರಾದಿತ್ತಿ ಶ್ರೀನಿವಾಸಯ್ಯೆರ್ ಕ್ರಮೇಣ ವಿಶೇಷವಾಯ್ಲೊ 'ಅರ್ಥಧಾರಿ' ಬೊಕ್ಕ 'ಯಕ್ಷಗಾನ ಪಟು' ಶೀನಪ್ಪಯ್ಯೆರ್ ಪಂಡ್ಲೇ ಪುದರ್ ಪಡೆಯ್ಲಾರ್.

ಪುರಾಣ ವಾಚನ, ಪ್ರವಚನೋ ಮಲ್ತೊಂದು ಸುತ್ತಮುತ್ತೊದ ಜನೊಕ್ಕೆನ ಗೌರವಾದರೊಗು ಪಾತ್ರೊದಾ, 'ಸದಾನಂದ', 'ಶ್ರೀನಿವಾಸ' ಮುದ್ರಿಕೆಡ್ ಅನೇಕ ಪದ್ಯೊಲೆನ್ ಕನ್ನಡ ಬೊಕ್ಕ ತುಳು ಭಾಷೆಡ್ ಬರೆಯೆರ್.

ಗಂಗಮ್ಮ ಪಣ್ಣಿ ಪೊಣ್ಣಡ ಮದ್ಮೆ ಆದ್, 5 ಜನ ಚೋಕ್ಲೆನ್ (2 ಆಣ್; 3 ಪೊಣ್ಣು) ಪಡೆದಿತ್ತಂಡಲಾ ವೈರಾಗ್ಯ ಕವಚೊನು ಧರಿಸೋಂದಿನಾರ್. ಸಮಾಜೊದ ಜನೊಕ್ಕು 'ಗುರು ಸದಾನಂದೆರ್' ಪಂಡ್ಲೇ ಮರ್ಯಾದೆ ಕೊರ್ಪು ಗುರ್ತಿಸೋಯೆರ್. ಆರ್ ಬರೆತಿ ಪದ್ಯೊಲು ಸುಮಾರು ನಾಲ್ ಸಂಪುಟೊಡು ಬೊಲ್ಪುಗು ಬೈದೊಂಡ್. ಆರೆನ 'ಕೀರ್ತನಾಮೃತ' ಮೂಜನೇ ಸಂಪುಟೊದ ತುಳು ಪದ್ಯೊಲೆನ್ ಸಂಗ್ರಹ ಮಲ್ತಿನಾರ್, ಗುರು ಸದಾನಂದೆರೆ ಪುಳ್ಳಿ (ಕಡೇತ ಮಗಳ್ - ಭವಾನಿನ ಮಗೆ)ಯಾಯಿಂಚಿ ಪಿ. ಪುರುಷೋತ್ತಮ ಭಟ್, ಚಿತ್ರಾಪುರ.

ಕನ್ನಡ ಬೊಕ್ಕ ಸಂಸ್ಕೃತಿ ಇಲಾಖೆಡ್ ಪ್ರಕಟವಾಯಿಂಚಿ ಸಮಗ್ರ ದಾಸ ಸಾಹಿತ್ಯೊಡು (ಸಂಪುಟ - 24) ಓದಿನಗ ಎಂಕ್ ತೆರಿದ್ ಬತ್ತಂಡ್, ಈ ದಾಸೆರ್ ತುಳು ಭಾಷೆಡ್ಲಾ ಪದ್ಯೊ ಬರೆತೆರ್ಂದ್.

ಅಂಚಿನೇ ತುಳು ಪದ್ಯೊ ಸಂಗ್ರಹೊಗಾತ್ರ ಪಣಂಬೂರ್ಡ್ ಶ್ರೀ ನಂದನೇಶ್ವರ ದೇವಸ್ಥಾನೊಗು ಬತ್ತದ್ ವಿಚಾರಿಪುನಗ, ಅವ್ವು ಶ್ರೀಯುತ ರಾಮಚಂದ್ರ ಹೆಬ್ಬಾರೆರ್ ಎಂಕಾತ್ರ ಸುಮಾರ್ ಜನೊಟ ವಿಚಾರ್ತೆರ್ (ಪೋನುಡು). ಕಡೇಕ್ ಚಿತ್ರಾಪುರ ದೇವಸ್ಥಾನೊದ ದ್ವಾರದ ಬರಿಟುಪ್ಪಿ (ಹೋಟೇಲ್ ದ್ವಾರದ ಬರಿಟ್) ಟೈಲರ್ (ಟೊಪ್ಪಿ ಭಟ್) ಪಿ. ಪುರುಷೋತ್ತಮ ಭಟ್ಟೆನ್ ಭೇಟಿಯಾವರೆ ಸೂಚನೆ ಕೊರ್ಪೆರ್. ಅಂಚಿನೇ ದೇವಸ್ಥಾನೊಡ್ಲಾ ಬಸ್ಸು ಪತ್ತದ್ ಚಿತ್ರಾಪುರೊಗು ಬತ್ತೆ. ಟೊಪ್ಪಿದ ಭಟ್ ಪಿದಾಯಿಡೇ ಕುರ್ಚಿಡ್ ಕುಲ್ದಿತ್ತೆರ್. ವಿಚಾರ್ಪುನಗ ಆರೆಗ್ ಬಾರೀ ಖುಷಿಯಾಂಡ್. "ಎನ್ನ ಅಜ್ಜನೊ ಪದ್ಯೊಕ್ಕೆನ್ ಬೊಲ್ಪುಗು ಕೊನರ್ಪರತ್ತಾ" - ಪಂಡ್ಲೆ ಎನ್ನ ಮಿತ್ತದ ಗೌರವೊಡು, ತನಟ ಉಪ್ಪಿ ಪರತ್ತಾದಿನೊ ಒಂಜೇ ಒಂಜಿ ಪ್ರತಿ ಉಪ್ಪಿನ ಪುಸ್ತಕನೆಂಕ್ ಜೆರೋಕ್ಸ್ ಪ್ರತಿ ದೆಪ್ಪೆರೆಗ್ಂದ್ ಕೊರ್ಪೆರ್. ಅಂಚಿನೇ ಅಯ್ತ ಪ್ರತಿ ದೆತ್ತಿ ಬೊಕ್ಕ ವಾಪಸ್ ಕೊರ್ಪು ನಮಸ್ಕಾರ ಮಲ್ತೆ ಹಿರಿಯರಾಯಿನಾರ್ ಗುರು ಸದಾನಂದೆರೆ ಪೀಳಿಗೆದಾರೆಗ್ ಸೊಲ್ಮೆ ಸಂದಾವರೆ ಮರಪಂದೆ.

'ಕೀರ್ತನಾಮೃತ' - ಮೂಜನೇ ಭಾಗೊಡು ಗುರು ಸದಾನಂದೆರ್ ತುಳು ಭಾಷೆಡ್ ಆರೇ ಬರೆತಿ 9 ಪದ್ಯೊಲು ಇತ್ತಂಡ್. ಗುರು ಸದಾನಂದೆರೆ ಅಣ್ಣೆ ಲಕ್ಷ್ಮೀನಾರಣಪ್ಪೆರ್ ಬರೆತಿ ಪದ್ಯೊನು (ಚಿತ್ರಾಪುರತೊ ಶ್ರೀ ದೇವಿನೋ ಮಂಗಲ ಪದ್ಯ) - ಕಡೇಟ್ 10ನೇ ಪದ್ಯವಾದ್ ಕೊರ್ತುಂಡು. ('ಕೀರ್ತನಾಮೃತ', ಮೂಜನೇ ಭಾಗೊಡು, ಪು. ಸಂ. 14-16) ಇಂದೆನ್ ಅಲಕ್ಷಿತ ಹರಿದಾಸೆರೆಂದ್ ಬೇತೆನೆ ತೋಜಾದ್ಂಡ್. ಈ ಪುಸ್ತಕೊ ಸುರತ್ಕಲ್ ಕೆ. ವೆಂಕಟಾರಾಯಾಚಾರ್ಯರೆ ಪ್ರಕಾಶನೊಡು ಬೊಲ್ಪುಗು ಬೈದೊಂಡ್. ಪರಿಶಿಷ್ಟೊಡು 9 ಪದ್ಯೊಲೆನ್ ಕೊರ್ತುಂಡು.

"ನಾರಾಯಣ ಸ್ವಾಮಿ ದೇವರೆ | ಎಂಕ್ಕು
ಕಾತೊಂದುಳ್ಳೆ ಈರೆನ್ ತೂಯೆರೆ"

9 ಸೊಲ್ಲುಡ ಈ ಪದ್ಯೊಡು ದೇವರೆನ ಅಲಂಕಾರ, ಪೂಜೆದ ವಿವರೊನು ತೋಜಾದೆರ್.

"ಶರಣಾಗತೆರಾದ್ ನಟ್ಟೊಣ್ಣು ಯೆಂಕುಳು
ಕರುಣಾಸಾಗರ ಪರಮಾತ್ಮಾ
ಹರಿಯೆ ಮಾಯೆ ಸೃಷ್ಟಿ ಮಲ್ತಿನಿ
ದೊರೆಯೆ ಈಯೆ ತಾಂಕೊಂಡುಪ್ಪುನಿ"

ಈ ಪದ್ಯೊಡು ಹರಿಸರ್ವೋತ್ತಮ; 'ಈಶೆ - ಈರ್; ದಾಸೆ - ಯಾನ್' ಪಣ್ಣೆ ಪಾತೆರೊ ನೆಗತ್ತ್ ತೋಜುಂಡು.

ಗುಣತ್ರಯೊಟುಪ್ಪಿ ಆಹಾರೊಲು (ಸಾತ್ವಿಕ, ರಾಜಸ, ತಾಮಸ) ದೇಹದ ಮಿತ್ತ್ ಎಂಚ ಪರಿಣಾಮ ಬೀರುಂಡು ಪಣ್ಣೆ ಎಚ್ಚರಿಕೆನ್ನಾ ಕೊರೆರ್ ದಾಸೆರ್. (ಕೀ. ಸಂಖ್ಯೆ 3 & 4).

"ಹಿರಿಯಾಕ್ಕು ಗಟ್ಟಿಗೇರಾ | ನಿಕುಳು ಪಣ್ಣೆ |
ಕಿರಿಯಾಕ್ಕು ಗಟ್ಟಿಗೇರಾ ||

ಈ ಪದ್ಯೊಡು ಹಿರಿಯೆರ್ ದುಂಬುಡು ಎಂಚ ಇತ್ತೆರ್? ಇತ್ತೆದ ಕಿರಿಯೆರ್ (ಎಲ್ಯಾಕ್ಕು) ದಾನೆ ಮಲ್ತೊಂದುಲ್ಲೆರ್ ಪಣ್ಣೆ ಅಕ್ಲೆನ ನಡತೆಗ್ ಒಂಜಿ ಎಡ್ಡೆ ಸಂದೇಶ (ಕಿವಿ ಮಾತು) ಕೊರೆರ್. (ಕೀ. ಸಂ. 5 & 6).

ಕಂಡಾನಿಜ್ಜಂದಿ ಪೊಣ್ಣೋವ್ವೆಗ್ ಉಪದೇಶ ಮಲ್ತಾದೆರ್ ದಾಸೆರ್ -

"ಕಂಡು ಕೆಲಸ ಮಳ್ಳಡೆ | ಪೊಣ್ಣೋವುಳು |
ಗೆಂಡೊಗ್ ಬೂರೊಣಡೆ ||

.....
ನರಜನ್ಮ ತಿಕ್ಕಂದಪ್ಪೆ | ಈ ಜನ್ಮೊಡ್ |

ಸ್ಥಿರಸುಖ ಪಡೆಲೆ ಪಣ್ಣೆ ||

ಗುರು ಹಿರಿಯೆರ್ ಶಾಸ್ತ್ರ ಸಾರ ಪಂಡಿನ ಕೇಣ್ಡ್ |

ಪರಮಾತ್ಮನ್ ನೆನೆತೊಂದು ಸದಾನಂದೊಡುಪ್ಪುಲೆ ||"

ಪಣ್ಣ್ ಎಚ್ಚರಿಕೆದ ಪಾತೆರೊನು ಉಚ್ಚಾರ ಮಲ್ತೆರ್. (ಕೀ. ಸಂ. 7)

"ದುಣ್ಣ ಉಂಡುಡ ಬಣ್ಣ ಉಂಡಣ್ಣ | ಕೇಣಣ್ಣ |

ದುಣ್ಣ ಬಣ್ಣೊಡು ಮಾತಲಾವಣ್ಣ ||ಪ||

ದುಣ್ಣ ಪನ್ನಿನ ಪಣವು ಕಾಸು | ಬಣ್ಣ ಪನ್ನಿನ ಪಣವುದ ಕೇಸ್ |

ದುಣ್ಣ ಬಣ್ಣಲ ರಡ್ಡ್ ಇಜ್ಜಿಡ | ಕಣ್ಣ ನೀರ್ ಕಟ್ಟಂದಣ್ಣ || ಅ. ಪ. ||

ನೀತಿ ಶಾಸ್ತ್ರ ಪುರಾಣ ಫಣ್ಣಿನ | ಪಾತೆರೊಗು ಮನಸ್ ಕೊರ್ದು |

ರೀತಿದೆ ಈ ದೇಹ ತಾಂಕೊಂಡ | ಪ್ರೀತಿದೆ ಸಾಂಕುವೆ ಸದಾನಂದ ||೪||"

ಪ್ರಾಸ ಬದ್ಧೋಡಿತ್ತಿ ಈ ಪದ್ಯೋ, ಪುರಂದರ ದಾಸರೆ ಪದ್ಯೋನೊಂಜೆನ್ ನೆಂಪ್ಪೆಗು ಕೊಣಪ್ಪೆಂಡು.

"ರೊಕ್ಕ ಎರಡಕ್ಕು ದುಃಖ ಕಾಣಕ್ಕು" - ಈವರೆ ಪದ್ಯೊಡ್ಲಾ ಅರ್ಥ ಮಾತ್ರ ಒಂಜೇ. ಸಮಾಜೊಗು ಎಡ್ಡೆಪು ಬಗೆಯೊಂದು ಜನೊಕ್ಕೆಗ್ ಹಿತವಚೆನೊದ ನೀತಿ ಬೋಧೆ ಪಾರ ಕೊರ್ಟೆರ್ ಹರಿದಾಸೆರ್ ತನ್ನೊ ಪದ್ಯೊಲೆಡ್. (ಕೀ. ಸಂ. 8 & 9)

ನಿಜ ಸುಖೊತ ಅನುಭೂತಿಯೆ ಮುಕ್ತಿ. ಅಯ್ತು ಸಾಧನೆನೇ ಭಕ್ತಿ. ಶ್ರೀ ಗುರು ಸದಾನಂದ ದಾಸೆರ್ ಬರೆತಿ ಕೀರ್ತನೆಲು ಬೋಳೂರುಡ್ಲ ಮೂಲ್ಕಿ ಮುಟ್ಟು ಕೆಲವೆರೆಡ ಕೃತಿ-ಬೋಧನೆಲು ಪ್ರಭಾವ ಬೀರ್ಂಡೊಂದೇ ಪಣೊಲಿ. ಆರೆನ ಬರವಣಿಗೆಡ್ ಸಹಕರಿಸೊಂದಿತ್ತಿನ ಆರೆನ ಪಟ್ಟಿಶಿಷ್ಯ ರಾಮ ಕೋಟಿಯನ್ (ಕ್ರಮೇಣ ಮುಂಬೈ ನಿವಾಸಿ) ಕೀರ್ತನಾಮೃತ - 4ನೇ ಸಂಪುಟೊನು ಮುಂಬೈಡ್ ಪ್ರಕಟಿಸೊಡು, ತನ್ನ ಗುರುನೊ ಋಣ ಸಂದಾಯೆರ್.

ಅಂತೂ ಈ ಕೀರ್ತನೆಲೆ ಸಂಗ್ರಹ ಮಲ್ತೊಂಚಿ ಹರಿದಾಸೆ ಪಿ. ಪುರುಷೋತ್ತಮ ಭಟ್, ಟೈಲರ್, ಚಿತ್ರಾಪುರ - ಕುಳಾಯಿ - ಮೇರೆಗ್ ಎನ್ನ ಕೃತಜ್ಞತೆ ಸಲಿಸೊಂದು, ಹರಿದಾಸೆ ಸದಾನಂದ ಗುರುಕ್ಕೆನ ಪಾದೊಗಡ್ಡ ಬೂರೊಂದು ತುಳುವಪ್ಪೆನ ಸಿರಿಮುಡಿಕ್ ಈ ತುಳು ಕೀರ್ತನೆಲ್ಲ ಮಾಲೆನ್ ಮುಡಿಪಾದ್, ತುಳುನಾಡ್ ಮಾತಾ ಹರಿದಾಸೆರೆಗ್ಲಾ ಎನ್ನ ಭಕ್ತಿ ಪೂರ್ವಕವಾದಿಂಚಿ ಸೊಲ್ತೆ ಸಂದಾವೆ.

|| ಶ್ರೀಕೃಷ್ಣಾರ್ಪಣಮಸ್ತು ||

5. ಸಂತ ಭದ್ರಗಿರಿ ಅಚ್ಯುತ ದಾಸೆರ್ (ಜನನ : ಕ್ರಿ. ಶ. 1932)

ಹರಿಕಥಾ ಲೋಕೊದ 'ಭೀಷ್ಮ' ಅದುಪ್ಪಿನಾರ್, ನಂಕ್ ಮಾತೆರೆಗ್ಲಾ ಹಿರಿಯೆರಾದುಪ್ಪಿನಾರ್ ಸಂತ ಭದ್ರಗಿರಿ ಅಚ್ಯುತದಾಸೆರ್.

"ದಾಸರೆಂದರೆ ಪುರಂದರ ದಾಸರಯ್ಯಾ" - ಪಂಡ್ಲ್ ಪುರಂದರ ದಾಸೆರೆನ್ ಆರೆನ ಗುರುಕ್ಲಾಯಿನ ಶ್ರೀ ವ್ಯಾಸರಾಯೆರೆ ಪುಗರ್ಟೆರ್ ಆ ಕಾಲೊಡು. "ಹರಿದಾಸರೆಂದರೆ ಶ್ರೀ ಅಚ್ಯುತ ದಾಸರಯ್ಯಾ" - ಪಂಡ್ಲ್ ಪುಗರ್ಟೆರ್ ನಮ್ಮ ತುಳುನಾಡ್ ಭಕ್ತೆರ್. ಇನಿಕ್ ನಮ್ಮ ತುಳುನಾಡ್ಡ್ ಮಾತ್ರ ಅತ್ತ್, ಇಡೀ ಕರ್ನಾಟಕೊಡೇ "ಹರಿದಾಸೆರ್ ಪಂಡ ಅಚ್ಯುತದಾಸೆರೆ ಸೈ!" ಪಂಡ್ಲ್ ಕೊಂಡಾಡ್ತೆರ್, ಹರಿಕತೆತ ಸಬಿನ್ ಪೀರ್ಡಿನ ಸರ್ವ ಜನೊಕ್ಕು.

ಇಂಚೇ ಮಹಾ ವಿದ್ವಾಂಸೆ, "ಹರಿಕಥಾ ಭೀಷ್ಮ ರಾದುಪ್ಪಿನಂಚಿ, ಮಹಾನುಭಾವೆರಾಯಿನೊ ಸಂತ ಭದ್ರಗಿರಿ ಅಚ್ಯುತ ದಾಸೆರೆನ್ ಮುಖತೆ: ಭೇಟಿ ಆದಿತ್ತಿನೊ ಪರಿಚಯೊಡು, ಆರೆನ ಜೀವನ/ ಸಾಧನೆದ ಕೃತಿಕುಳೆನ ಸಂಗ್ರಹೊನು ಈ ಲೇಖನೊಡು ಕೊರ್ಟೆರೆಗಾದ್ ಆರೆಡ ನೆಪ್ಪೊಂಡೆ. ಯಾನೊರ್ತಿ ಎಲ್ಲ ಲೇಖಕಿಯಾದಿತ್ತೆಂಡಲಾ ಎನ್ನ ಪಾತೆರೊಗು ಬಿಲೆ ಕೊರ್ದು, ಯಂಕ್ ಬೋಡಾಯಿನೊ

೪೪

ಆರೆನ ಕೃತಿ ರಚನೆಳನ್ನಾ, ಕೆಲವು ತುಳು ಹರಿಕಥೆತ ಸಿ.ಡಿ.ಲೆನ್ನಾ ಕೊರ್ರು ಮನ್ನಿತೆರ್. ಉಡಲ್ದಿಂಚಿ ಸೊಲ್ಮೆಲೆನ್ ಆರೆಗ್ ಸಂದಾವೊಂದು ಸಂತ ಭದ್ರಗಿರಿ ಅಚ್ಯುತ ದಾಸೆರೆನ ಬಗ್ಗೆ ಎಂಕ್ ತೆರಿನಂಚಿ ಬಾಲಭಾಷೆಡ್ ಬರೆವರೆ ಪಿದಾಡ್ಯೆ.

ಅವಿಭಜಿತ ದಕ್ಷಿಣ ಕನ್ನಡ ಜಿಲ್ಲೆದ ಒಡಿಪು ತಾಲೂಕುದ ಭದ್ರಗಿರಿ ಪಣ್ಣಿ ಊರ್ದ ಶ್ರೀ ವೆಂಕಟರಮಣ ಪೈ ಬೊಕ್ಕ ರುಕ್ಮಿಣೀ ದೇವಿ ದಂಪತ್ಯೇರೆಗ್ ಐವೆರ್ ಆಣ್ಣೋಕ್ಲೆಡ್ ರಡ್ಡನೇ ತಾರೇ ನಮ್ಮ ಕಥಾನಾಯಕೆರಾಯ್ನೊ ಭದ್ರಗಿರಿ ಅಚ್ಯುತದಾಸೆರ್. ದಾಸೆರೆ ಪಳಯೆರಾದಿಂಚಿ ನರಸಿಂಹ ಪೈ - ಮೇರ್ 18ನೇ ವಯಸ್ಸಾಡೇ ಪರಲೋಕನ್ ಸೇರೈರ್. ಅಯ್ನ್ ಬೊಕ್ಕ ಮಾತೆರೆಗ್ಲಾ ಹಿರಿಯನಾರ್ (ಮೆಗ್ಗನಾಕ್ಲೆಗ್) ಅಚ್ಯುತದಾಸೆರೇ. ದಾಸಾಶ್ರಮ, ಅಂತರಾಷ್ಟ್ರೀಯ ಕೇಂದ್ರೊದ ಸ್ಥಾಪಕೆರ್ಲಾ, ಅಧ್ಯಕ್ಷೆರ್ಲಾ, ಅಂತರಾಷ್ಟ್ರೀಯ ಕೀರ್ತಿ ಪಡೆಯಿನಂಚಿನಾರಾದಿತ್ತಿ ದಿ| ಸಂತ ಭದ್ರಗಿರಿ ಕೇಶವದಾಸೆರೆಗ್ಲಾ ಮೇರ್ (ಅಚ್ಯುತದಾಸೆರ್) ಪಳಯೆ ಆದಲ್ಲೆರ್. ಮೆಗ್ಗನಾಕ್ಲಾಯಿನೊ ಭದ್ರಗಿರಿ ಶ್ರೀ ಸರ್ವೋತ್ತಮ ದಾಸೆರ್ ಬೊಕ್ಕ ಭದ್ರಗಿರಿ ಶ್ರೀ ವಿಠಲದಾಸೆರ್ಲಾ ಕೀರ್ತನೆ ಭಜನೆಲೆಡ್ ಎಡ್ಡೆ ನಿಷ್ಠೆಡೇ ಸೇವೆ ಮಲ್ತೊಂದುಲ್ಲೆರ್.

ಶ್ರೀ ಅಚ್ಯುತದಾಸೆರೆ ಕೈಪತ್ತಿ ಬುಡೆದಿ ಸೌ| ಶ್ರೀಮತಿ ಪಣ್ಣಿನಾರ್ ಆದರ್ಶ ದಂಪತಿಯೆರಾದ್, ದಿಂದಿಜಿ ಸಂಸಾರೊಡೇ ಕಂಸಾರಿನ್ ನೆನತೊಂದು, ಸರ್ವಜನ ಪ್ರಿಯೆರಾದ್, ಸರ್ವಮಾನ್ಯೆರಾದ್, ಪರಮ ಸೌಭಾಗ್ಯವತಿಯಾದ್, ಪತಿವ್ರತಾ ಶಿರೋಮಣಿ ತನ್ನೊ ಮುತ್ತೈಸಿತನೊಟೀ, ವೈಕುಂಠ ವಾಸಿಯಾಯೆರ್.

ಶ್ರೀ ದಾಸೆರೆಗ್ ಮೂವೆರ್ ಆಣ್ಣೋಕ್ಲೆ ಬೊಕ್ಕ ನಾಲ್ವೆರ್ ಪೊಣ್ಣೋಕ್ಲೆ ಉಲ್ಲೆರ್. ಮಾತಾ ಜೋಕುಲ್ಲಾ ಸಂಗೀತ ವಿದ್ವಾಂಸೆರಾದ್, ಸಂಗೀತದ ವಿವಿಧ ರಂಗೊಡು ಪರಿಣತೆರಾದ್ ಸೇವೆ ಮಲ್ತೊಂದು, ಶ್ರೀ ದಾಸೆರೆ ವಂಶೊದ ಕೀರ್ತಿಗ್ ಬಂಗಾರ್ಡ ಕಳಶ ಕುಲ್ಲಾದೆರ್!

ಶ್ರೀ ದಾಸೆರ್ ಸಂಸಾರೊಡಿತ್ತೊದ್ಲಾ ಮಹಾಯೋಗಿಯಾದಿತ್ತಿನಾರ್. ಕ್ರಿ.ಶ. 1951 ಮಾಘ ಮಾಸೊಡು ಶಿವರಾತ್ರಿ ದಾನಿ ಭದ್ರಗಿರಿತ ಶ್ರೀ ಕಾಮೇಶ್ವರ ದೇವಸ್ಥಾನೊಡು ಸುರುತ ಹರಿಕಥೆ ಪ್ರಾರಂಭ ಮಲ್ತೆರ್. ಒಡಿಪುಡು ಶ್ರೀ ಕಾಶೀಮಠಾಧೀಶ ಸುಧೀಂದ್ರ ತೀರ್ಥೆರೆ ಚಾತುರ್ಮಾಸ್ಯ ಸಂದರ್ಭೊಡು (1956) ಬುಡಂದೆ ನಾಲ್ ತಿಂಗೊಳು ಮಹಾಭಾರತನ್ ಹರಿಕಥೆ ರೂಪೊಡು ಮಲ್ತೆರ್. ಶ್ರೀ ದಾಸೆರೆ ಪಾಂಡಿತ್ಯೊನು ತೊದು ಸ್ವಾಮಿಯೆರ್ ದಾಸೆರೆಗ್ ಚಕ್ರಾಂಕನ ಪಾಡ್, 'ಮೂಲನಾರಾಯಣ' ಅಂಕಿತ ಪ್ರದಾನ ಮಲ್ತಾದ್, ಬಂಗಾರ್ಡ ಪದಕದೊಟ್ಟುಗು 'ಕೀರ್ತನಾಗ್ರೇಸರ' ಪಣ್ಣಿ ಬಿರುದು ಕೊರ್ರು ಅನುಗ್ರಹ ಮಲ್ತೆರ್. ಸತ್ಸಂಗ ಪ್ರವಾಸೊಡು ಭಕ್ತಿರೊಟ್ಟುಗು ಆ ಸೇತು ಹಿಮಾಚಲ ಯಾತ್ರೆ, ಸಮಗ್ರ ಕರ್ನಾಟಕ, ತಮಿಳ್ನಾಡು, ಕೇರಳ, ಆಂಧ್ರ, ಮಹಾರಾಷ್ಟ್ರ, ಉತ್ತರ ಭಾರತ ಸಂಚಾರೊಡು ವೈದಿಕ ಧರ್ಮದೊಟ್ಟುಗು ಸಂತ ಸಾಹಿತ್ಯ ಪ್ರಚಾರ ಮಲ್ತೆರ್ ಹರಿದಾಸೆರ್!

ದೀಕ್ಷಾಬದ್ಧ ಜೀವನೋಡು, ಇಲ್ಲಾನೇ ಗುರುಕುಲ ಮಲ್ತೊಂಡೆರ್; ಅನೇಕ ಶಿಷ್ಯರೆಗ್, ಪ್ರಶಿಷ್ಯರೆಗ್ ಹರಿಕಥಾ ಅಭ್ಯಾಸ ಮಲ್ಪಾದ್, ಸ್ವಾಧ್ಯಾಯ ಪ್ರವಚನೋಡ್, ಇನಿಕಾಕ್ಲ್ ಮೆರೆಪಿಂಚಿ ಕೀರ್ತಿ, ಅವು ಸಂತ ಭದ್ರಗಿರಿ ಅಚ್ಯುತ ದಾಸೆರೆಗ್ ಸಂದೊಡು!

ಶ್ರೀ ದಾಸೆರ್ 'ಮೂಲ ನಾರಾಯಣ' ಅಂಕಿತೊಡು ಕನ್ನಡ, ಕೊಂಕಣಿ, ತುಳು, ಮರಾಠಿ ಭಾಷೆಲೆಡ್ ಸಾವಿರಾರು ಕೀರ್ತನೆಲೆನ್ ರಚನೆ ಮಲ್ತಾದ್ ಕೀರ್ತನ ಸಂಪ್ರದಾಯ ಮುಂದರಿತೆರ್. ಕೀರ್ತನಾಭ್ಯಾಸಿಲೆಗಾದ್ 'ಶ್ರೀ ಹರಿಕಥಾ ಸಿಂಧು', 'ರಾಮಾಯಣ', 'ಭಾಗವತ' ಪಣ್ಣಿ ಮಹಾನ್ ಗ್ರಂಥೊಲೆನ್ ಬರೆಯೆರ್. ಅನೇಕ ಹರಿಕಥೆಕ್ಲೆನ್ ರಚನೆ ಮಲ್ತೆರ್.

ಆರೆನ ಕೆಲವು ತುಳು ಹರಿಕಥೆಕ್ಲು ಬಾರೀ ಜನಮೆಚ್ಚುಗೆ ಪಡೆದಾಂಡ್.

ಉದಾ: ಶ್ರೀ ಭಕ್ತ ದಾಮಾಜಿಪಂತ

ಶ್ರೀ ಸಂತ ಚೊಖಾಮೇಳ

ಶ್ರೀ ನಾರಾಯಣ ಗುರು

ಗೋರ ಕುಂಬಾರೆ

(ಇತ್ತೆ ಸಿ.ಡಿ. ರೂಪೊಡು ಬೈದಾಂಡ್.)

ಅನೇಕ ಧಾರ್ಮಿಕ, ಸಾಂಸ್ಕೃತಿಕ ಸಂಸ್ಥೆಲೆಡ್ ಸನ್ಮಾನಿತರಾಯ್ತೊ ಶ್ರೀ ದಾಸೆರೆಗ್ ರಾಜ್ಯ ಪ್ರಶಸ್ತಿ, ಸಂಗೀತ ನೃತ್ಯ ಅಕಾಡಮಿ ಪ್ರಶಸ್ತಿಲು ದೊರಕಾಂಡ್. ಕರ್ನಾಟಕ ಸರಕಾರೊತ ಸರ್ವೋನ್ನತ ಕನಕ-ಪುರಂದರ ಪ್ರಶಸ್ತಿ ಪುರಸ್ಕೃತ ಬೊಕ್ಕ ಹಂಪೆ ಕನ್ನಡ ವಿಶ್ವವಿದ್ಯಾನಿಲಯೊದ ಸರ್ವೋನ್ನತ ನಾಡೋಜ ಪ್ರಶಸ್ತಿ ಪುರಸ್ಕೃತ, ಕೀರ್ತನಾಗ್ರೇಸರ, ಕೀರ್ತನಾಚಾರ್ಯ, ಹರಿಭಕ್ತ ಪಾರಾಯಣ, ಹರಿದಾಸ ಕುಲಭೂಷಣ, 'ಕೀರ್ತನ ಕೇಸರಿ' ಶ್ರೀ ಸಂತ ಭದ್ರಗಿರಿ ಅಚ್ಯುತದಾಸೆರ್ ಚರಣೊಗಡ್ ಬೂರೊಂದು, ಆರೆನ ತುಳು ಕೀರ್ತನೆಲೆ ಸಂಗ್ರಹೊನು (ಪರಿಶಿಷ್ಟೊಡು ಕೊರುಂಡು) ಎಲ್ಯ ಮಟ್ವೆಡ್ ಎಂಕ್ ತೆರಿನಾತ್ ತೆರಿಪಾವೆ. ಒಟ್ಟು ತುಳು ಕೀರ್ತನೆ ರಚನೆ - 21.

ಗಣಪತಿ ಸ್ತುತಿ, ಗುರುಸ್ತುತಿಲು ಬೊಕ್ಕ

ಚೊಖಾಮೇಳ ಹರಿಕಥೆತ ಪೀಠಿಕೆದ ಪದ;

ಚೊಖಾಮೇಳನ ಪಂಡರಪುರದ ಯಾತ್ರದ ಸಂದರ್ಭೊದ ಪದ;

ತತ್ವಜ್ಞಾನ, ವಚನ, ದೇವದರ್ಶನೊದ ಕುತೂಹಲ;

ದೇವಸ್ಥಾನೊದೊಲಯಿ ಚೊಖಾಮೇಳನ್ ಪೊಗೈರೆ ಬುಡಂದಿನಗ - ಇಂದೆಕ್ ಮಾತಾ ಸಾಂದರ್ಭಿಕ ಪದ್ಯೊಲು;

ಚೊಖಾಮೇಳನ್ ವಿಠಲೆ ದೇವಸ್ಥಾನೊದೊಲಾಯಿ ಲೆಪ್ಪುನಿ;

ವಿಠಲನೊಟ್ಟುಗು ಬೊಖಾಮೇಳನೊ ಸಂಭಾಷಣೆ ಪದ, ಆಯೆ ಕಳ್ಳೆ ಪಂಡ್ ಅಪವಾದೊ ಬತ್ತಿನಗ, ಆಯೊನ ಪ್ರಾರ್ಥನೆದ ಪದ - ಇತ್ಯಾದಿ.

ಗೋರಾ ಕುಂಬಾರೆ - ಹರಿಕಥೆಕ್ ಪೀಠಿಕೆದ ಪದ್ಯೊಡು ಉಪದೇಶ; ಗೋರಾ ಕುಂಬಾರನೊ

ಬುಡೆದಿ ಗಂಗೂಬಾಯಿ ಒಂಜಿ ವರ್ಷೋದ ಬಾಲೆಗ್ ಪುಟ್ಟಿ ಪರ್ಬೊದ ದಿನೊಕು ಆರತಿ ಮಲ್ಪುನ ಸಿದ್ಧತೆಗಾದ್ ಕಂಡನ್ನೆಡ ಮಲ್ತಿ ನಿವೇದನೆದ ಪದ್ಯ;

ಬಾಲೆನ್ ಕಳೆವೊಂಡಿನ ಗೋರ ಕುಂಬಾರೊನ ದುಃಖೊದ ಪದ್ಯ - ಇತ್ಯಾದಿ ನವರಸಭರಿತವಾಯ್ ಕೀರ್ತನೆನ್ ಕೇಣ್ಣಿಗ ಕಣ್ಣಿನೀರ್ ಕೋಡಿ ಪರಪುಣೆಟ್ ಅಚ್ಚರಿಯಾವಂದ್ ಪಣ್ಣೇ!

ಶ್ರೀ ದಾಸರೆ ನಿರಂತರ ಸಂಚಾರೊಡ್ಲಾ ಆಧಾರೊ ಗ್ರಂಥೊಲೆನ್ ನೆನಪುಡು ದೀಯೊಂದ್ ಅದ್ಭುತ ಗ್ರಂಥರಚನೆ ಮಲ್ಪುನ ಶ್ರೀ ಅಚ್ಯುತ ದಾಸರೆಗ್ 'ತಿರುಗಾಡುವ ವಿಶ್ವಕೋಶ' ಪಂಡ್ ಗೌರವ ಕೊರ್ತೆರ್ ಭಕ್ತೆರ್!

ಹರಿಕಥೆದೊಟ್ಟುಗು ಪ್ರೇಕ್ಷಕೆರೆನ್ ಕೈಟ್ ತಾಳ ತಟ್ವಾದ್ ಭಜನೆ ಮಲ್ಪಾವುನ ಒಂಜಿ ವಿಶೇಷ ಕಲೆ ಉಂಡು ನಮ್ಮ ಭದ್ರಗಿರಿ ಅಚ್ಯುತ ದಾಸರೆಡ!

'ತಾಳವ ತಟ್ಟಿದವ ವೈಕುಂಠಕ್ಕೋಡಿದವ' - ಪಣ್ಣೆರ್ ಪುರಂದರ ದಾಸರ್.

"ಏರ್ ದಾಲಾ ಪಾಪ ಮಲ್ತಿನೇ ಇಜ್ಜಿಂದಾಂಡ, ಅಕ್ಲ ತಾಳ ತಟ್ವಾದ್ ಭಜನೆ ಮಲ್ಪುನಿ ಬೊಡ್ಡಿ" ಪಣ್ಣ್ ಜನೊಕ್ಕನೆ ಅಳ್ಕ ದೆಪ್ಪಾದ್, ನಾಚಿಕೆ ಬುಡ್ಡು ರಡ್ಡ್ ಕೈಟೊಟ್ಟುಗು ಗಟ್ಟಿಯಾದ್ ತಾಳ ಪಾಡ್ಪಾದ್ ಭಜನೆ ಪಣ್ಣಾವುನ ಶ್ರೀ ದಾಸರ್ ಪಾಪಿಲೆನ್ ಉದ್ಧಾರ ಮಲ್ಪರೆಂದೇ ಪುಟ್ಟಿದಿ ಒರಿ ನಮ್ಮೂರ್ಡ ಅವತಾರ ಪುರುಷೆರ್!

ತುಳುನಾಡ್ ಜನೊಕ್ಲ ಇನಿಗ್ಲಾ ಹರಿದಾಸರ್ - ಪಂಡ "ಅಚ್ಯುತ ದಾಸೆರಾ?" ಪಂಡ್ ಸುರುಟು ಕೇಣ್ಣೆರ್. ಇಡೀ ಕರ್ನಾಟಕ ಮಾತ್ರ ಅತ್ತ್ ವಿಶ್ವದಾದ್ಯಂತ ಭದ್ರಗಿರಿ ಅಚ್ಯುತದಾಸೆರ್ ಅಭಿಮಾನಿ ವರ್ಗೊನು ಪಡೆಯ್ತಾರ್.

76 ವರ್ಷೊಳೆಡ್ ಸಾರ್ಥಕವಾದ್ ಬಾಳಾದ್, ಆಧ್ಯಾತ್ಮ ಜೀವನೊಡು ದಿಂಜಿದ್, ಸುವಾಸನೆ ಬೀರ್ಡ್ ಅರಳ್ತಂತಿನೊ "ಸೊರಗದ ಪೂ" ಈ ನಮ್ಮ ದಾಸೆರ್! ಹರಿದಾಸರೆ ಕುಲದೇವರಾಯ್ ಶ್ರೀ ಪಾಂಡುರಂಗ ವಿಠಲನ್ ಅರ್ತಿಡ್ ಸೇವೆ ಮಲ್ತೊಂಚಿ ಈ ದಾಸರೆ ಕೃತಿರಚನೆದ ಮಾಲೆನ್ ಶ್ರೀ ಗುರುಪ್ರಿಯವಿಠಲನ ಚರಣೊಗು ಅರ್ಪಿತ ಮಲ್ತೊಂದು, 'ಸರ್ವೇಜನಾಃ ಸುಖಿನೋ ಭವಂತುಃ' ಪಣ್ಣೊಂದು, ಶ್ರೀ ದಾಸರೆ ಕಾರ್ಡ್ಡ ಬೂರೊಂದು 'ಓಂ ಶಾಂತಿಃ ಶಾಂತಿಃ ಶಾಂತಿಃ' ಪಣ್ಣಿ ಶಾಂತಿ ಮಂತ್ರೊಡು ಈ ಲೇಖನೊಗು ಮಂಗಳ ಪಣ್ಣೆ.

|| ಶ್ರೀಕೃಷ್ಣಾರ್ಪಣಮಸ್ತು ||

6. ಹರಿದಾಸಿ ಉಡುಪಿ ಯಶೋದಮ್ಮ (ಕಾಲ : ಜನನ : ಕ್ರಿ.ಶ. 1931)

ದಕ್ಷಿಣ ಕನ್ನಡ (ಅವಿಭಜಿತ) ಜಿಲ್ಲೆಡ್ ಹರಿದಾಸಿ (ಮಹಿಳಾ ಹರಿದಾಸೆರ್) ಯೆರ್ ಇತ್ತ್ ಚೆರ್ ಪಣ್ಣಿ ಅಪವಾದೊನು ತಪ್ಪದರ್ ನಮ್ಮನೇ ಒಡಿಪುದ

(1) 'ಗಿರಿಬಾಲೆ' ಅಂಕಿತೊದ ಸರಸ್ವತೀ ರಾಜವಾಡೆ (ಕ್ರಿ.ಶ. 1913-1994)

(2) 'ಯಶೋದೇಶ ಕೃಷ್ಣ' ಅಂಕಿತೊದ ಹರಿಕಥಾ ಪ್ರವೀಣೆ / ಭಜನೆ ಯಶೋದಮ್ಮ. 'ಗಿರಿಬಾಲೆ' ಪಂಡ್ ಪ್ರಸಿದ್ಧ ಆತಿನೊ ಸರಸ್ವತೀ ರಾಜವಾಡೆ - ಭಾವೀ ಸಮೀರೆಯ್ ಸೋದೆ ಮಾಧೀಶೆರಾದಿಂಚಿ ಶ್ರೀ ವಾದಿರಾಜ ಸ್ವಾಮಿಳೆನ ಪರಮ ಭಕ್ತರ್. ವಾದಿರಾಜೆರೆ ಮಿತ್ತ್ ಕನ್ನಡ ಭಾಷೆಡ್ ಬರೆತಿ ಅನೇಕ ಕೀರ್ತನೆಲು ಬೊಲ್ಪುಗು ಬೈದೊಂಡ್. (ತುಳುಟು ಬರೆತಿಚೆರ್)

ಪು : ಭಾಗ ೧ - ಯುಗಪುರುಷ ಪ್ರಕಟನಾಲಯ, ಕಿನ್ನಿಗೋಳಿ - 1966

ಭಾಗ ೨ - ಶ್ರೀ ಗುರುಕೃಪಾ ಪ್ರಕಾಶನ, ಉಡುಪಿ - 1966.

ಅಂಚೆನೇ ಬೊಕ್ಕ ಬೊಳ್ಳುಗು ಬತ್ತಿ ನಮ್ಮ ಕಥಾನಾಯಕಿ ಹರಿದಾಸಿ ಉಡುಪಿ ಯಶೋದಮ್ಮ ಇನಿಗ್ ಮಂಡೆ ಬೋಳ್ತಿನ ಮಡಿ ಪೊಂಜವು - ವಿಧವೆ ಆದುಲ್ಲೆರ್ದಲಾ, ಧೈರ್ಯಶಾಲಿಯಾದ್ 'ಪೊಣ್ಣು ಅಬಲೆ ಅತ್ತ ಸಬಲೆ' ಪಂಡ್ ಇಡೀ ಸಮಾಜೊಗೇ ಮಾದರಿಯಾದ್, ಮಾರ್ಗದರ್ಶಕೆರಾದ್, ಎಣ್ಣು ಜೋಕ್ಲೆನ ಅಪ್ಪೆ ಆದುಲ್ಲೆರಡಲಾ, ತಾನೇ ತನ್ನ ಕೈಟ್ ಸ್ವಂತ ಅಡಿಗೆ ಮಲ್ತೊಂದು, ಒಂಜಿ ಎಲ್ಯ ಕುಟೀರೊಡು ಏರೆ ಹಂಗ್‌ಲಾ ಇಜ್ಜಂದೆ ಸ್ವತಂತ್ರವಾದುಲ್ಲೆರ್.

ಇಂಚೊಪೊಗು ಎಂಕ್ ಆರೆನ ಪರಿಚಯವಾಂಡ್. ಎಂಕ್ಲೀವೆರ್ಲಾ ಒಂಜೇ ಓಡೊಡು ಸುದೆ ನೀಂದೊಂದುಲ್ಲಾಂಡ್ ಪಣೊಲಿ. ಬಾಯ್ಲಿಲಿಕೆ ಪಾತೆರ. ದಿಂಜಿದುಡಲ್ ಆದರ. ಮನಸ್ಸಿಡೀ ನಿರ್ಮಲ. ಒರ್ಮಲಾ ತೊಂಡಲಾ ಆರೆನ ಕೋಣೆಡ್ ಸಿರಿಕೃಷ್ಣ ದೇವೆರೆ ವಿವಿಧ ಭಂಗಿದೊ ಚಿತ್ರೊಲು! ವಿಚಿತ್ರ ಆಂಡಲಾ ಉಂದು ಸತ್ಯ. ಶ್ವೇತಾಂಬರಿ ಮಡಿ ಪೊಂಜವು. ಈ ಹರಿದಾಸಿ, ಹಾರ್ಮೋನಿಯಂ ಬಾರಿಸೊಂದು, ಕೆಲವು ಪೊಣ್ಣೋಕ್ಲೆಗ್ ಅವ್ವವ್ವ ತಾಳ ಪಾಡ್ ಭಜನೆ, ಸಂಗೀತ ಕಲ್ಪಾವೊಂದು; ಸಭೆ, ಸಮಾರಂಭೊಡು ತಾನೇ ಅಳ್ಕಿಜ್ಜಂದೆ ಹರಿಕಥೆ ಮಲ್ತೊಂದು (ಕಾಸಾದಾಸೆ ಇಜ್ಜಂದೆ, ಕೊರಿನಾತೆಗ್ / ಕೆಲವು ಸರ್ತಿ ಧರ್ಮಾರ್ಥಗ್ಲಾ ಮಲ್ಪುವೆರ್) ಏತ್ ಪೊರ್ತುಗುಲಾ ಬಾಯಿಡ್ 'ಕಷ್ಟಾ ಕೃಷ್ಣಾ' ಪಣೊಂದು, ಶ್ರೀಕೃಷ್ಣನ ಪರಮಭಕ್ತಿಯಾದುಪ್ಪಿ ಯಶೋದಮ್ಮನ್ ತೊನಗ ಒರ ಆರೆನ ಪಾದೊಗಡ್ಡ ಬೂರ್ಗಾಂಡ್ ಮನಸ್ಸಾಪುನ್ಯಂತೂ ಸಹಜ.

ಆರೆನ್ ಯಾನ್ ಪ್ರಥಮ ಬಾರಿ ಭೇಟಿಯಾಯಿನಿ ಶ್ರೀ ಮನ್ಮಥ್ವಾಚಾರ್ಯರೆನ ಜನ್ಮಸ್ಥಳ ಪಾಜಕ ಕ್ಷೇತ್ರೊಡು. ಅಡೆಗ್ ಆರ್ ಪ್ರತೀ ಐತಾರೊಲಾ ಬತ್ತೆದ್ ಪೊಣ್ಣೋಕ್ಲೆಗ್ ಸಂಗೀತ, ಭಜನೆ ಕಲ್ಪಾವೆರ್ ಇನಿಗ್ಲಾ. ಆರೆನಡ ಪ್ರೀತಿ, ವಿಶ್ವಾಸೊಡೇ ಪಾತೆರ್ಪಾದ್, ಒಡಿಪುದುಪ್ಪಿ (ಶ್ರೀಕೃಷ್ಣ ವಿಲಾಸ ಹೋಟೆಲೆ ಪಿರವುಡು) ಆರೆನ ಇಲ್ದದ ವಿಳಾಸ ಕೊರೈರ್.

ದುಂಬೇ ಆರೆನ ಪರಿಚಯ ಇತ್ತಿನೆಡ್ಲಾವರ ಎಂಕ್ ಈ ಸಂಶೋಧನೆಗ್ ಆರೆನ ಬಗ್ಗೆ ವಿಷಯ ಸಂಗ್ರಹ ಮಲ್ಪರೆ ಮಸ್ತ ಅನುಕೂಲವಾಂಡ್. ಆರ್ ಬರೆತಿ ಕೆಲವು ತುಳು ಕೀರ್ತನೆದೊಟ್ಟುಗು ಆರೆನ ಹರಿಕಥೆತ ಸಿ.ಡಿ. ಒಂಜೆನ್ನಾ ಎಂಕ್ ಕೊರ್ಪ್ಪು, ತನ್ನೊ ಔದಾರ್ಯಾನು ಮೆರೆಪಾಯೆರ್.

ಸಂಕ್ಷಿಪ್ತವಾದ್ ಯಶೋದಮ್ಮನ ಚರಿತ್ರನ್ ಇಂಚ ಪಣೊಲಿ: ಒಡಿಪುದ ಪ್ರಸಿದ್ಧ ವಕೀಲೆರ್ಲಾ, ರಾಜ್ಯ ಪ್ರಶಸ್ತಿ ವಿಜೇತೆರ್ಲಾ ಆದಿತ್ತಿ ಶ್ರೀಯುತ ಕೆ. ಯಲ್. ಐತಾಳೆರೆನ ಕಡಿರೆ ಮಗಳೇ ಯಶೋದಮ್ಮ. ಬಾಲ್ಯೊದ ಗುರುವೇ ಅಪ್ಪಮ್ಮೆರ್. ಒಡಿಪುದ ಸೈಂಟ್ ಸಿಸಿಲೀಸ್ ಕಾನ್ವೆಂಟ್‌ಡ್ ಒಂಬನೇ ಮುಟ್ಟು ಓದಿ ಬೊಕ್ಕ, 14ನೇ ವಯಸ್ಸಾಡ್ ಗುಂಡಿಬೈಲ್ ಶಿವರಾಮ ಸರಾಫೆರೆನ ರಡ್ಡನೇ ಮಗ ಲಕ್ಷ್ಮೀನಾರಾಯಣ ಭಟ್ಟೆನ್ ಮದ್ಮೆ ಆಯೆರ್. ಹೋಟೆಲ್ ಶ್ರೀಕೃಷ್ಣ ವಿಲಾಸ, ಸಂತೆಕಟ್ಟೆದ ಮ್ಹಾಲಕೆರಾಯೆರ್. ಇನಿಗ್ ನಾಲ್ಕನ ಆಣುಲು ನಾಲ್ಕನ ಪೊಣ್ಣುಲೆನ ಅಪ್ಪೆ ಆದುಲ್ಲೆರ್.

ಬಾಲ್ಯೊಡೇ ಸಂಗೀತ, ನೃತ್ಯ, ನಾಟಕಾಭಿನಯೊಟು ಅನೇಕ ಪ್ರಶಸ್ತಿ ಪಡೆಯಿನ ಯಶೋದಮ್ಮ, ತನ್ನೊ ಕಂಡನ್ನನ ಪ್ರೋತ್ಸಾಹೊಡು ಬೊಕ್ಕ ಜೋಕ್ಲೆನ ಸಹಕಾರೊಡು ಸುಮಾರು ಕಡೆಟ್ ಭಜನೆ, ಹರಿಕಥಾ ಕಾರ್ಯಕ್ರಮೊಳೆನ್ ಮಲ್ತೆರ್. 9ನೇ ವಯಸ್ಸಾಡೇ ಶಾಸ್ತ್ರೀಯ ಸಂಗೀತೊನು ಕಿನ್ನಿಗೊಳಿ ದಿ. ಪದ್ಮನಾಭ ಆಚಾರ್ಯರೆಡ ಬೊಕ್ಕ ದಿ. ನರಸಿಂಹ ಸೇರಿಗಾರೆರೆಡ; ಶಾಸ್ತ್ರೀಯ ನೃತ್ಯೊನು ಕಡಿಯಾಳಿ ಕಾಳು ಭಟ್ಟೆಡ; ಹರಿಕಥೆನ್ ಕಿನ್ನಿಮೂಲ್ಕಿ ಪದ್ಮನಾಭ ಆಚಾರ್ಯರೆಡ ಕಲ್ತೆರ್.

ಕನ್ನಡ, ತುಳು, ಇಂಗ್ಲಿಷ್, ಹಿಂದಿ, ತಮಿಳು, ಕೊಂಕಣಿ ಭಾಷೆಲೆನ್ ತೆರಿದಿನಾರ್. ಕೀರ್ತಿಶೇಷ ಶ್ರೀ ವಿದ್ಯಮಾನ್ಯ ತೀರ್ಥರ್ (ಫಲಿಮಾರು ಮಠಾಧೀಶೆರ್) ಯಶೋದಮ್ಮಗ್ ಆಶೀರ್ವಾದ ಮಲ್ತೆದ್ 'ಯಶೋದೇಶ ಕೃಷ್ಣ' ಪಂಡ್ ಅಂಕಿತೊನು ಅನುಗ್ರಹ ಮಲ್ತೆರ್.

ಸುಮಾರ್ 40 ವರ್ಷೊಡ್ಲಿಂಚ ಉಡುಪಿ ಶ್ರೀಕೃಷ್ಣ ಮಠೊಟು ಬಯ್ಯದ ಪೊರ್ತುಗು ಮಹಿಳೆರೆಗ್ ತಾರತಮ್ಮ ಭಜನೆ, ಲಕ್ಷ್ಮೀ ಶೋಭಾನೆ ಕಲ್ಪಾವೊಂದುಲ್ಲೆರ್. ಯಶೋದಮ್ಮನ ಕೈಡ್ ಭಜನೆ ಕಲ್ತಿನ ಮಹಿಳೆಯೆರೆಡ್ ಇನಿಗ್ ಅಲ್ಪಾಲ್ಪ ಅನೇಕ ಮಹಿಳಾ ಭಜನಾ ಮಂಡಳಿಳು ಮೂಡ್ಪು ಬೈದೊಂಡ್!

ಯಶೋದಮ್ಮ ಕಟ್ಟಿನ 'ಶ್ರೀಕೃಷ್ಣ ಮುಖ್ಯಪ್ರಾಣ ಭಗಿನೀ ಭಜನಾ ಮಂಡಳಿ' ಕೆಲವು ಕಡೆಟ್ ಭಜನೆಡ್ ಪ್ರಶಸ್ತಿ ಪಡೆದೊಂಡ್. ಆರೆನ ಕೆಲವು ಸಾಧನೆಲೆನ್ ಮೂಲ್ ತೂವೊಲಿ:

1. 40 ವರ್ಷೊಡ್ಲಿಂಚಿ ಭಜನೆ

2. 35 ವರ್ಷೊಡ್ಲಿಂಚಿ ಹರಿಕಥಾ ಕಾರ್ಯಕ್ರಮ

3. ಹರಿಕಥಾ ಕಾರ್ಯಕ್ರಮೋಟು ಸಂದಿ ಬಿರುದುಲು;

ಪೂಜ್ಯರಾಯ್ನ ಪೇಜಾವರ ಶ್ರೀ ವಿಶ್ವೇಶತೀರ್ಥರ್ - 'ಭಕ್ತಿ ಮೀರಾ'
 ಫಲಿಮಾರು ಮಠಾಧೀಶರ್ - ಶ್ರೀ ವಿದ್ಯಾಮಾನ್ಯರ್ - 'ಹರಿಕಥಾ ಪ್ರವೀಣ'
 ಅದಮಾರು ಮಠಾಧೀಶರ್ - ವಿಭುದೇಶ ತೀರ್ಥರ್ - 'ಹರಿಕಥಾ ರಂಜಿನಿ'
 ಧರ್ಮಸ್ಥಳೊದ ಧರ್ಮಾಧಿಕಾರಿ - ಶ್ರೀ ವೀರೇಂದ್ರ ಹೆಗ್ಡೆರ್ - 'ಹರಿದಾಸಿ
 ಯಶೋದಮ್ಮ'

ಪುತ್ತಿಗೆ ಮಠಾಧೀಶರ್ - ಶ್ರೀ ಸುಗುಣೇಂದ್ರ ತೀರ್ಥರ್ - 'ಭಗವದ್ಗೀತೆ ಪಾರಾಯಣ
 ಮಂಡಳಿದೊ ಅಧ್ಯಕ್ಷಿರಾದ್' ಯಶೋದಮ್ಮನ್ ನೇಮಕ ಮಲ್ತೆರ್.

ಯಶೋದಮ್ಮ ಕನ್ನಡ ಬೊಕ್ಕ ತುಳು ಭಾಷೆಡ್ ಸುಮಾರು ಕೀರ್ತನೆಲೆನ್ ಬರೆತೆರ್.
 ಕನ್ನಡೊಡು ಬರೆತಿ ಕೆಲವು ಸ್ತೋತ್ರಲು ಪುಸ್ತಕ ರೂಪೊಡು ಪ್ರಕಟವಾತ್ಂಡ್. ಆರೆನ
 ತುಳು ಭಾಷೆದ ಪದ್ಯೊಲೆಗ್ ಇತ್ತೆ ಕಾಲ ಕೂಡ್ತು ಬೈದಂಡ್. ತುಳು ಕೀರ್ತನೆಲೆಡ್ :

1. 'ತೊಕ್ಕಂದಿ ತುಡರ್' - ಪಾರ್ದನ ರೂಪೊಡು -

"ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ನಾ...
 ಪುಣ್ಯದ ಭೂಮಿಡ್ ಪೊರ್ಲುಡ ಊರೊಂಜಿ
 ಪಾಜ್ಯೆ ಪಣ್ ಪಣ್ ಪೆರ್ಗೆ...||"

ಹರಿದಾಸೆರೆ ಮೂಲಗುರುವಾದಿಂಚಿ ಶ್ರೀ ಮಧ್ವಾಚಾರ್ಯರೆನ ಇಡೀ ಚರಿತ್ರೆನ್ ಪಾರ್ದನ
 ರೂಪೊಡು ಬರೆತೆರ್ ಬಾರೀ ಪೊರ್ಲುಡು, ರಡ್ಡ್ ಸಾಲುಪ್ಪಿ 81 ಸೊಲ್ತುಡು.

ಪಾರ್ದನೊದ ಕಡೇಕ್ 'ಫಲಶ್ರುತಿ'ನ್ನಾ ಕೊರ್ಡ್,
 "ತುಳುನಾಡ್‌ದಾ ತೊಕ್ಕಂದಿ ತುಡರ್ ಜಗೊಕೇ
 ಜ್ಞಾನದ ಬೊಲ್ಪು ತೋಜಾಂಡ್‌ಯೇ||"
 ಪಂಡ್ ಸೊಲ್ತೆ ಸಂದಾದೆರ್ ನಮ್ಮ ಹರಿದಾಸಿ ಉಡುಪಿ ಯಶೋದಮ್ಮ.

2. ದೇವೆರೆ ತೂಯೆರೆ ಒಂಜಿ ಜನ್ಮ ಪಾಪಂದ್ - ಈ ಪದ್ಯೊಡು "ನಿನ್ನ ಸೇವೆನ್
 ಏಪಲಾ ಮಲ್ತೊಂದು ಮೋಕ್ಷಗ್ ಪೋವರೆ ಪಾಪಂದ್ ಎಂಕ್ ಒಂಜೇ ಜನ್ಮ ಕೊರ್ತಿ ದೇವೆರೆ"
 - ಪಂಡ್ ದೇವೆರೆಡ ನಟ್ಟೊಂದೆರ್ ಪತ್ತೊಂಜಿ ಸೊಲ್ತುಡು.

3. "ನನ ಎಂಕ್ ಗತಿಯೇರ್ ಪಣ್ಣಾ ರಂಗಯ್ಯ |

ಕಾನಿಕೆ ಈರೆಗ್ ಎನ್ನ ಮನಸಯ್ಯಾ ||

ಈ ಪದ್ಯೊ ಹಿರಿಯೆರೆ ಬಾಯಿಡ್ ಇನಿಕ್ಲಾ ಕೇಂಡ್ ಬರ್ಪುಂಡು. 'ಶಿವರಂಜಿನಿ' ರಾಗೊಡು
 ಯಶೋದಮ್ಮ ಈ ಪದ್ಯ ಪಣ್ಣಗ ಮೈ ಇರ್ಮನೆ ಆಪುಣೆಟ್ ಅಚ್ಚರಿ ಇಜ್ಜಿ!

"ನಿನ್ನ ಪಾದನೆ ಗತಿ ಎಂಕ್ ಏಪಾಲಾ

ನಿನ್ನ ಸ್ಮರಣೆನೀ ಬಾಯಿಗ್ ಬರ್ಪಾಲಾ
 ನಿನ್ನ ದಾಸೆರೆ ಸೇವೆನೀ ಕೊರ್ಪಾಲಾ
 ಯಶೋದೇಶ ಕೃಷ್ಣ ಎಂಕ್ ಈಯೇ ಸರ್ವಲಾ

||3||"

ಆರ್ತರಾದ್ ಲೆಪ್ಪುನ ಈ ಪದ್ಯೋನೊರ ಪಂಡಿನಗ, ಯಶೋದಮ್ಮಗ್ 'ಮಿಂಚು'
 ಹೊಳೆಯಿನೊರೂಪೊಡು ಶ್ರೀಕೃಷ್ಣ ದೇವೆರೆ ದರ್ಶನವಾಂಡ್‌ಗೆ! ಅಂತೂ ಆರೆನ ಆರ್ತನಾದೊಗು
 ದೇವೆರ್ ಓಕೊಣೈರಂದೇ ಎಣ್ಣೆಗ್!

(4) "ಯಾನ್ ದಾನೆಮಲ್ತೆ ಯಾರಂಗಯ್ಯ
 ಯೆನನಿ ಮಿತ್ತ್ ದೆರ್ಪುಲೆ ಯಾ ಕೃಷ್ಣಯ್ಯ"

ಈ ಪದ್ಯೋನೊಡುನಗ ಪುರಂದರ ದಾಸೆರೆನ ಪದ್ಯೊದನೆಂಪಾಪುಂಡು.

(ಪು. ಕೀ.) "ನಾನೇನ ಮಾಡಿದನೋ ರಂಗಯ್ಯಾ ನೀನೆನ್ನ ಸಲಹಬೇಕೋ||"

ಮೂಜಿ ಚರಣೊದ ಈ ಪದ್ಯ ಪುರಂದರ ದಾಸೆರೆ ಪದ್ಯೊನು ತುಳು ಭಾಷೆಗ್ ಭಾಷಾಂತರ
 ಮಲ್ತೆಲೆಕ್ಕ ತೋಜುಂಡು.

5. ವಿಧವೆ ಪೊಣ್ಣನ ಗೋಳು - ಸ್ವತಃ ಯಶೋದಮ್ಮ, ತನ್ನೊ ದುಃಖನ್ ತೋಡೋಂದೆರ್
 ಈ ಪದ್ಯೊಡು.

ಕೃಷ್ಣಲೀಲೆ: (ಪದ್ಯ ಸಂಖ್ಯೆ 6-8) - ಈ ಪದ್ಯೊಕ್ ಪುರಂದರ ದಾಸೆರೆ ಪದ್ಯೊಕ್ಲೆನ್
 ತುಳು ಭಾಷೆಗ್ ಅನುವಾದ ಮಲ್ತೆಲೆಕ್ಕ ಉಂಡು.

"ರಾಮನಾಮದ ಮಹಿಮೆ ತೆರಿಯರೆ ಏರೆಗ್ ಸಾಧ್ಯಯೇ
 ರಾಮನಾಮನೆ ದಾಸಿ ಯಶೋದನೊ ಹೃದಯದ ಜ್ಯೋತಿಯೇ||
 ಪಂಡ್ ತುದಿತೆರ್ ಶ್ರೀ ರಾಮಸ್ತುತಿಟ್ (ಪದ್ಯ ಸಂ. 10)

'ವಿದ್ಯಾಧಿದೇವಿಯೆ ಶಾರದಮ್ಮಾ' - ಪಂಡ್ ವಿದ್ಯಾಭಿಮಾನಿದೇವಿ ಶ್ರೀ ಶಾರದಾಮಾತೆನ
 ಸ್ತುತಿ ಭಕ್ತಿಡೇ ಮೂಡ್ತುಂಡು. (ಪ. ಸಂ. ೧೧)

ಸ್ವಪ್ನದರ್ಶನ ಸ್ತುತಿ (ಪ. ಸಂ. 12)

"ಗೋಕುಲೊಂಟು ಎಂಚ ನನ ನಾವು ಬದುಕುಣಾ
 ಮಧುರೆಗ್ ಕೃಷ್ಣೆ ನಮನ್ ಬುಡ್ತು ಪೋಂಡಾ||

ಶಿವಳ್ಳಿ ಬ್ರಾಣೇರೆ ತುಳು ಭಾಷೆಡ್ ಬರೆತಿ ಈ ಪದ್ಯೊಡು ನಂದಗೋಕುಲೊಗು ಅಕ್ಕೂರೆ
 ಕೃಷ್ಣ - ಬಲರಾಮರೆನ್ ಮಧುರೆಗ್ ಲೆತ್ತೊಂದು ಪೋವೆರೆ ಬತ್ತಿನಗ, ಗೋಪಿಯೆರೆಗಾಯಿನೊ
 ವೇದನೆನ್ ತೋಡೋಂದೆರ್ ಮೂಲು ಯಶೋದಮ್ಮ - (ಪದ್ಯ ಸಂ. 14).

ದಿಟ್ಟ ಮಹಿಳೆ ಹರಿದಾಸಿ ಯಶೋದಮ್ಮ ಈತೇ ಅತ್ತಾವಂದೆ, ಕನ್ನಡ ಬೊಕ್ಕ ತುಳು
 ಭಾಷೆಡ್ಲಾ ಹರಿಕಥೆನ್ ರಚಿಸೋದು ಹರಿಕಥೆ ಮಲ್ಪುವೆರ್.

ಯಶೋದಮ್ಮನ ತುಳುಭಾಷೆದ ಹರಿಕಥೆ ರಚನೆಲು:

1. ಭಕ್ತ ಕುಚೇಲ
2. ದ್ರೌಪದಿ ಅಕ್ಷಯಾಂಬರ - (ಸಿ.ಡಿ. ರೂಪೊಡುಲಭ್ಯ)
3. ಚಂದ್ರಹಾಸ ಚರಿತ್ರೆ
4. ಭಕ್ತ ಪ್ರಹ್ಲಾದ
5. ಅಯ್ಯಪ್ಪ ಚರಿತ್ರೆ
6. ಶ್ರೀ ಗುರು ರಾಘವೇಂದ್ರ ಚರಿತ್ರೆ
7. ಶ್ರೀ ಕೃಷ್ಣ ಲೀಲೆ
8. ಭಕ್ತೆ ಶಬರಿ

ಈ ತುಳು ಭಾಷೆದ ಹರಿಕಥೆಟ್, 'ಭಕ್ತ ಕುಚೇಲ' 35 ವರ್ಷೊಡ್ ದುಂಬು ಆರ್ ರಚನೆ ಮಲ್ತಾದ್, ಸೋಂದಾ ಶ್ರೀವಾದಿರಾಜ ಮರೊಟು ಸುರುತ ಪ್ರದರ್ಶನ. ಅಲ್ಪಡ್ ಬೊಕ್ಕ ನಿರಂತರ ಹರಿಕಥಾ ಕಾರ್ಯಕ್ರಮೊಟು ಭಕ್ತಾ ಭಿಮಾನಿಡ್ ಗೌರವ ಪಡೆಯ್ನಾರ್. 'ಭಕ್ತೆ ಶಬರಿ'ನ ಕತೆ ಪಣ್ಣ ಗಂತೂ ಇಡೀ ಸಭೆನೇ ಕಣ್ಣ ನೀರ್ ಪಾಡ್ಂಡ್ಗೆ!

ಕಳಿನೊ ವರ್ಷೊ (2006) ಯಶೋದಮ್ಮ ಗ್ 75 ವರ್ಷೊದ ಸಂಭ್ರಮೊ! ಜೊತೆಕ್ ಜಿಲ್ಲಾ ಪ್ರಶಸ್ತಿ (ಇತ್ತೆದ ಉಡುಪಿ ಜಿಲ್ಲೆ) ಬೊಕ್ಕ ಅನೇಕ ಸಂಘ ಸಂಸ್ಥೆ ಳೆನ ಸನ್ಮಾನೊಲು ಸಾಲಾ ಸಾಲಾದ್ ಯಶೋದಮ್ಮ ನ್ ನಾಡೊಂದು ಬೈದ್ ಡಾಂದ್ ಪಂಡ ಆರೆನ ಪ್ರತಿಭೆ ಎಂಚಿ ನವೂಂದ್ ನಮ ತರಿಯೊಣೊಲಿ. ಇಂಚಿ ಹರಿದಾಸಿಯ ಶೋದಮ್ಮ ಗ್ ಒಡಿಪು ಶ್ರೀಕೃಷ್ಣ ದೇವೆರ್ ನನಲಾ ಆಯುರಾರೋಗ್ಯ ವೈರಾಗ್ಯ ಭಾಗ್ಯೊನು ಕೊರ್ತು ಹರಿಸೇವೆ ಮಲ್ತಾವಡ್ ಡಾಂದ್ ದೇವೆರ್ ನ್ ಪ್ರಾರ್ಥನೆ ಮಲ್ತೊಂದು ತುಳುವಪ್ಪೆನ ಸಿರಿಮುಡಿಕ್ ಉಡುಪಿ ಮಲ್ತಿಗೆದ ಪೂತ ಮಾಲೆನ್ ನೈದಲಂಕಾರ ಮಲ್ತಾದ್, ಅಪ್ಪೆನ ಕಾಂತಿ ಹೆಚ್ಚಾವಡ್ ಡಾಂದ್ ಪಣೊಂದ್ ತುಳುವಪ್ಪೆನ ಋಣ ಸಂದಾವೆ! ಸಮಸ್ತ ತುಳುವೆರೆನ ಪರವಾದ್ ಹರಿದಾಸಿಯ ಶೋದಮ್ಮ ಗ್ ಎನ್ನ ಸೊಲ್ಮೆ ಸಂದಾವೆ!

|| ಶ್ರೀ ಕೃಷ್ಣಾರ್ಪಣ ಮಸ್ತು ||

7. ಸಂತ ಭದ್ರಗಿರಿ ಕೇಶವ ದಾಸೆರ್ (ಕಾಲ : ಕ್ರಿ.ಶ. 1935-1997)

ಸಂತ ಭದ್ರಗಿರಿ ಅಚ್ಚುತ ದಾಸೆರೆನ ಸ್ವಂತ ಮೆಗೈಯಾದಿಂಚಿ, ಕೇಶವ ದಾಸೆರ್ ಪತ್ತೊಂಜನೇ ವರ್ಷ ಪ್ರಾಯೊಡೇ ಕೀರ್ತನ ಕಲೆತ ಅಭ್ಯಾಸ ಮಲ್ತಾದ್, ಬಾಲ ಹರಿದಾಸ ಪಣ್ಣಿ ಬಿರ್ಡ್ ಪಡೆಯ್ನಾರ್. ಕ್ರಮೇಣ ಹರಿಕಥಾ ಲೋಕೊಡು ಸಂತ ಭದ್ರಗಿರಿ ಕೇಶವ ದಾಸ ಪಂಡ್ ಕೀರ್ತಿ ಪಡೆಯೆರ್. ಹತ್ತೊಂಬತ್ತನೇ ವಯಸ್ಸಡ್ ರಮಾಬಾಯಿ (ಮದ್ಮೆಡ್ ದುಂಬು ಪುದರ್

ನಿರ್ಮಲ) ಪಂಡಿ ಪೊಣ್ಣಾನೊಟ್ಟು, ಶ್ರೀ ದಾಸೆರ್ ಗೃಹಸ್ಥಾಶ್ರಮದೊಟ್ಟುಗು, ಕಥಾ ಕೀರ್ತನ ಬೊಕ್ಕ ಬಿ.ಎ.ಎಲ್.ಎಲ್.ಬಿ. ಪದವಿಲೆನ್ ಪಡೆಯ್ತಾರ್.

ಸಚ್ಚಾರಿತ್ರ್ಯದ ಸದ್ಗುಣಿ ಮಹಿಳೆ - ರಮಾಬಾಯಿ, ಇಲ್ಲಡ್ ಮೋಕೆದ ಮರ್ಮಾಲಾದ್ ಹಿರೆಯೆರ್ನ ಸೇವೆದೊಟ್ಟುಗು, ಶ್ರೀ ದಾಸೆರೆನ ಹರಿ ಸೇವೆಗ್ಲಾ ಕೈ ಚೋಡಾಯ್ನ ಈ ದಂಪತ್ಯೆರೆಗ್ ಇರ್ವೆರ್ ಸುಪುತ್ರರಾಯೆರ್. ಕಡೀರ ಮಗೆ - ಮುರಳಿ, ಮಡೀರ ಮಗೆ - ರಾಧೇಶ್ಯಾಮ್. ಲಾ ಕಾಲೆಚ್ ಡಿಗ್ರಿ ಪಡೆತಿತ್ತಂಡ್ಲ, ವಕೀಲ ವೃತ್ತಿಡ್ ಕೆಲವು ಸಲ ಸುಳ್ಳು ಪಣೊಡಾಪುಣೆಡ್ಲಾವರ ಆರ್ ಭಗವಂತನ ಬಗ್ಗೆ ಹೆಚ್ಚಿದ ಶ್ರದ್ಧೆಡ್, ಧರ್ಮಶಾಸ್ತ್ರನ್ ಅಧ್ಯಯನ ಮಲ್ತೊಂದ್, ಕೆಲವು ಗಣ್ಯ ವ್ಯಕ್ತಿಲೆನ ಮೆಚ್ಚುಗೆನ್ ಪಡೆಯೆರ್.

ಹರಿಕಥಾ ರಂಗೊಡ್ ಕೀರ್ತನ ಕೇಸರಿ, ದಾಸರತ್ನ, ಕೀರ್ತನ ಸಾಗರ, - ಇಂಚ ಕೆಲವು ಬಿರ್ದ್ಲೆ ಸರಮಾಲೆದ ಸರಾದರೆರಾಯೆರ್ ಶ್ರೀ ಕೇಶವದಾಸೆರ್ !

ಬೆಂಗಳೂರ್ ನಿವಾಸಿಯಾದ್ ಅವು ದಾಸಾಶ್ರಮ, ಕೀರ್ತನ ಕಾಲೇಜು, ಪುರಂದರ ವಿಠಲ ಮಂದಿರ, ದಾಸ ಕೀರ್ತನ ಮಂಡಳಿ - ಇತ್ಯಾದಿ ಸಂಘ ಸಂಸ್ಥೆಲೆನ್ ಸ್ಥಾಪನೆ ಮಲ್ತಿ ದಾಸೆರ್ ದಾಸವಾಣಿ, ದಾಸಚ್ಯೋತಿ ಪಣಿ ಕನ್ನಡ ಬೊಕ್ಕ ಇಂಗ್ಲಿಷ್ ಆಧ್ಯಾತ್ಮ ಮಾಸ ಪತ್ರಿಕೆಲೆನ್ ಪ್ರಾರಂಭ ಮಲ್ತೆರ್. ಪ್ರತಿ ವರ್ಷೊಲಾ ಒಡಿಪುಗು ಹಲವು ಜನ ಭಕ್ತೆರೆನ್ ಲೆತ್ತೊಂದ್ ಬರೊಂದಿತ್ತೆರ್. ತನ್ನ ಜನ್ಮಸ್ಥಳವಾದಿಂಚಿ ಭದ್ರಗಿರಿಟುಪ್ಪಿ ಪ್ರಾಕ್ದ ದೇವಸ್ಥಾನೊದ ಜೀರ್ಣೋದ್ಧಾರನ್ನಾ ಮಲ್ತೆರ್ ಶ್ರೀ ದಾಸೆರ್. ಆರೆನ ಭಕ್ತೆರೆಡ್ಲ ಶ್ರೀ ದಾಸೆರ್ ಗುರುದೇವ ಪಣ್ಣ್ ಗೌರವೊ ಪಡೆಯೆರ್.

ಎಣ್ಣು ಸರ್ತಿ ಶ್ರೀ ದಾಸ ದಂಪತಿಲು ವಿಶ್ವಯಾತ್ರೆ ಮಲ್ತಾದ್, ಹರಿಭಕ್ತಿದ ಡಂಗುರ ಸಾರ್ಯೆಗಾದ್ ಐರೋಪ್ಯ ದೇಶೊಲೆಗ್ ಪೋದ್, ಪಶ್ಚಿಮ ಜರ್ಮನಿ, ಇಂಗ್ಲೆಂಡ್, ಅಮೇರಿಕ, ಆಫ್ರಿಕಾ - ಇತ್ಯಾದಿ ದೇಶ ವಿದೇಶೊಡು ಕೀರ್ತನಾ ಪದ್ಧತಿದ ಬೀಜೊನ್ ಬಿತ್ತಾದ್ ವಿದೇಶೊಡ್ಲಾ ಅನೇಕ ಶಿಷ್ಯೆರೆನ್ ಪಡೆದ್ ಭಾರತಾಂಬೆನ ಕೀರ್ತಿ ಪತಾಕೆನ್ ಬಾನೆತ್ತರಗೇರ್ಪಾಯ್ನ ಕೀರ್ತಿದೊಟ್ಟುಗು ಸಾವಿರಾರು ಕೀರ್ತನೆಲೆನ್, ಭಜನೆಲೆನ್ ಕನ್ನಡ, ಹಿಂದಿ, ಮರಾಠಿ, ಕೊಂಕಣಿ, ತುಳು ಭಾಷೆಲೆಡ್ ರಚನೆ ಮಲ್ತಾದ್ ಭಕ್ತಿಗಂಗಿ, ಭಜನ ಗಂಗಿನ್ ವಿಶ್ವವ್ಯಾಪಿಯಾದ್ ಪರಪ್ಪಾಯೆರ್ ! "ಭಜನೆನೇ ಮುಕ್ತಿಗ್ ಸಾದಿ" ಪಂಡ್ಲ ಸಾರ್ಯೆರ್ !

ಶ್ರೀ ದಾಸೆರ್ ರಚನೆ ಮಲ್ತಿ ಕೀರ್ತನೆಲೆ ಇತೊತ್ತೇ ಅನೇಕ ಬೂಕುಲೆಡ್ ಪ್ರಕಟವಾತ್ಂಡ್. ಆಶು ಕವಿತ್ವವುಪ್ಪಿ ಶ್ರೀ ದಾಸೆರ್ ಮಹಾ ಮೇಧಾವಿಯಾದಿತ್ತಾದ್, ಭಾರತದಾದ್ಯಂತ ಅನೇಕ ಪುಣ್ಯ ಕ್ಷೇತ್ರೊಲೆನ್ ಶಿಷ್ಯೆರೊಟ್ಟುಗು ಸಂದರ್ಶನ ಮಲ್ತಾದ್, ಹರಿಕೀರ್ತನಾ ಪ್ರದರ್ಶನ, ಪ್ರವಚನದೊಟ್ಟುಗು ಹರಿಭಕ್ತಿದ ಸುಧೆನ್ ಭಕ್ತೆರೆಗುಣ್ಣಾಯೆರ್ !

ರಾಮ ಲಕ್ಷ್ಮಣೆರೆನಲ್ಪ ತೇಜೋವಂತರಾಯೊ ಶ್ರೀ ಭದ್ರಗಿರಿ ಅಚ್ಯುತ ದಾಸೆರ್ ಬೊಕ್ಕ ಭದ್ರಗಿರಿ ಕೇಶವದಾಸೆರ್ ಹರಿಕಥಾ ಲೋಕೊಡು ಭದ್ರ ಬುನಾದಿ ಪಾಡ್ಲಾಯೆರ್.

ಬೆಂಗಳೂರು ನಗರೊಡು ಹರಿದಾಸಾಶ್ರಮ ಟ್ರಸ್ಟ್ ಸ್ಥಾಪನೆ ಮಲ್ತಾದ್ ಅನೇಕ ಪ್ರತಿಭಾವಂತರಾದಿತ್ತಿ ಹರಿದಾಸೆರೆಗ್ ಸನ್ಮಾನ ಮಲ್ತೆರ್. ದಾಸಾಶ್ರಮ ಅಂತರಾಷ್ಟ್ರೀಯ ಕೇಂದ್ರದ

ಸ್ಥಾಪಕೆರ್ಲ್, ಅಧ್ಯಕ್ಷೆರ್ಲ್ ಆದಿತ್ತ್ವದ್ ಅಂತರಾಷ್ಟ್ರೀಯ ಕೀರ್ತಿ ಪಡೆದಿನ ಧೀಮಂತೆರ್ ಸಂತ
ಭದ್ರಗಿರಿ ಕೇಶವದಾಸೆರ್ !

ಭದ್ರಗಿರಿ ಸಹೋದರೆರ್ ಯಕ್ಷಗಾನ, ನಾಟಕ ಅಭಿನಯಳೆಡ್ ಪರಿಣತೆರ್. ಅನೇಕ
ಕೀರ್ತನೆ, ನಾಟಕೊಳೆನ್ ಬರೆದ್, ಪ್ರಕಟಣೆ ಮಲ್ತದ್, ಅಭಿನಸೊಯ್ ಶ್ರೀ ಕೇಶವದಾಸೆರ್
ಕೀರ್ತನ ನಾಟಕ ವಿಶಾರದ ಪಂಡ್ ಪ್ರಶಸ್ತಿ ಪಡೆಯೆರ್ !

ಶ್ರೀ ದಾಸೆರೆ ಕೃತಿಳೆನ ಕೊಡುಗೆ :

ಪುರಂದರೋಪನಿಷತ್ತು - 4 ಭಾಗೊಲು

ಭಗವನ್ನಾಮ ಜ್ಯೋತಿ (ಭಜನೆ - ಕೀರ್ತನ)

ಅಣ್ಣನ ಪತ್ರಗಳು ; ಪ್ರೇಮಾಮೃತ (ಭಜನೆ - ಕೀರ್ತನ)

ದಾಸರಾಮಾಯಣ (ಗದ್ಯ) ; ಪರಮಾತ್ಮ ಲೀಲಾಮೃತ (ಭಜನೆ - ಕೀರ್ತನ)

ದಾಸ ಭಾರತ (ಗದ್ಯ) ; ದಾಸ ಹೃದಯ ತರಂಗ (ಭಜನೆ)

ಸದ್ಗುರು ವಚನಾಮೃತ - ಅತ್ತಾವಂದೆ ಅನೇಕ ಹರಿಕಥಾ ಗ್ರಂಥೊಲು.

ಆರೆನ ವಿದೇಶೀ ಭಕ್ತೆರೆಗಾದ್ ಇಂಗ್ಲಿಷ್ ಭಾಷೆಡ್ ಸುಮಾರು 10 ಪುಸ್ತಕೊಲೆನ್ ಬರೆದ್
ಪ್ರಕಟಣೆ ಮಲ್ತೆರ್.

ಸಂತ ಕೇಶವ ದಾಸೆರೆನ ಬಗ್ಗೆ ಆರೆನ ಶಿಷ್ಯೆರ್ಲ್ ಕೆಲವು ಪುಸ್ತಕೊಳೆನ್ ಬರೆತೆರ್.

ಉದಾ : 1) ಭದ್ರಗಿರಿಯ ಭಕ್ತಿಯೋಗಿ (ಶ್ರೀ ಸದ್ಗುರು ಕೇಶವದಾಸರ ಜೀವನ ಚರಿತ್ರೆ)

2) ಸದ್ಗುರು ಸಂತ ಕೇಶವದಾಸ ವಿರಚಿತ 'ಕೇಶವ ಕೀರ್ತನ ಗಂಗಾ'

3) ಸಂತ ಶ್ರೀ ಭದ್ರಗಿರಿ ಕೇಶವದಾಸರ ಕೀರ್ತನೆಗಳು

ಈ ಕೀರ್ತನೆ ಬೂಕುಡು ಶ್ರೀ ದಾಸೆರ್ ರಚಿಸೊಯ್ ಕೇವಲ 2 ತುಳು ಕೀರ್ತನೆಲು
ಇಂಚಪೊಗು ಎಂಕ್ ತಿಕ್ಕಂಡ್. ಅವೆನ್ ವರಿಶಿಷ್ಟೊಡು ಕೊರ್ತುಂಡು.

ಅಂತೂ ದೇಹದ ಕಣೊ ಕಣೊಟ್ಟಾ ದೇವೆರೆನಾಮೋನೇ ಜಿಂಜಿದಿತ್ತಿ ಶ್ರೀ ದಾಸೆರ್
ಬಾಯ್ಲೆ "ಪಾಂಡುರಂಗ, ನಾರಾಯಣ" ನಾಮಸ್ಮರಣೆ ಮಲ್ತೊಂದೇ ಒಂಜಿದಿನ (1997)
ಹರಿಪುರೊನು ಸೇರೈರ್.

ತೌಳವ ಮಾತೆನ ಪುಣ್ಯ ಗರ್ಭೊಡು ಪುಟ್ಟಿ ಭದ್ರಗಿರಿತ ಭಕ್ತಿಯೋಗಿಗ್ ಸಮಸ್ತ ತುಳುವೆರೆನ
ಪರವಾದ್ ಯಾನ್ ನಮನೊಳೆನ್ ಸಂದಾವೆ.

ಎನ್ನ ಕೋರಿಕೆನ್ ಮನ್ನಿತ್ವದ್ ಸಂತ ಕೇಶವದಾಸೆರೆನ ಕೆಲವು ಬೂಕುಳೆನ್ ಎಂಕೊದಗದ್
ಕೊರ್ದ್ ಆರೆನ ಬಗ್ಗೆ ಸಂಕ್ಷಿಪ್ತ ಮಾಹಿತಿಳೆನ್ ತೆರಿಪಾಯಿನ ಶ್ರೀ ದಾಸೆರೆ ಪಳಯೆಯಾದುಪ್ಪಿ
ಹರಿಕಥಾ ಭಿಷ್ಣು - ಸಂತ ಭದ್ರಗಿರಿ ಅಚ್ಯುತ ದಾಸೆರೆಗ್ ಯಾನ್ ದಿಂಜಿದುಡಲ್ದ ಸೊಲೈಲೆನ್
ಸಂದಾವೆ. ಶ್ರೀ ದಾಸರಾಯೆರೆ ಚರಣೊಗ್ ನಮೋನಮಃ ಪಣೋಂದು ಈ ಲೇಖನೊಗು
ಪರೆನೊಯ್ಪುವೆ.

|| ಶ್ರೀ ಕೃಷ್ಣಾರ್ಪಣ ಮಸ್ತು ||

ತುಳುನಾಡ್ ಅಲಕ್ಷಿತ ಹರಿದಾಸೆರ್

1. ಹೆಬ್ಬಿ-ಕಂಡಿಗಪದ್ಮನಾಭ ಜೆನ್ನಿ (ಕಾಲ: ಕ್ರಿ.ಶ. 1908-1988)

ದಕ್ಷಿಣ ಕನ್ನಡ (ಅವಿಭಜಿತ) ಜಿಲ್ಲೆದ ಹೆಬ್ಬಿಡುಪ್ಪಿ ಕಂಡುಗ ಪಣ್ಣಿ ಹಳ್ಳಿಡ್ ಶಿವಳ್ಳಿ ಬ್ರಾಹ್ಮಣ ಕುಟುಂಬೊಡು (ಕುಶಿಕ ಗೋತ್ರ) ನಾರ್ಣಪ್ಪ ಜೆನ್ನಿ ಬೊಕ್ಕ ಕಾವೇರಮ್ಮ ದಂಪತಿಯೆರೆಗ್ 'ಪದ್ಮನಾಭ' ಪಣ್ಣಿ ಆಣ್ಣಾಲೆ ಪುಟ್ಟುಂಡು.

ಎಲ್ಯ ಪ್ರಾಯೊಡೇ ಯಕ್ಷಗಾನ, ಪುರಾಣೊ ಪ್ರವಚನ ಕೇಣುನ ಅಭ್ಯಾಸ ಪದ್ಮನಾಭಗ್ ಮೈಗೂಡ್ಡಿತ್ತಂಡ್. ಅಮ್ಮೆರ್ ನಾರ್ಣಪ್ಪೆರ್ಲಾ ಯಕ್ಷಗಾನೊದ ಅರ್ಥಧಾರಿಳಾದಿತ್ತೆರ್.

ಪ್ರಾಯೊಗ್ ಬತ್ತಿ ಮಗಕ್ ಅಪ್ಪಮ್ಮೆ ಮದ್ಮೆ ಮಲ್ಲೆರ್.

ವೃತ್ತಿಡ್ ಕೃಷಿಕರಾಯ್ಲೊ ಪದ್ಮನಾಭ ಜೆನ್ನಿಲೆಗ್, ಸುರುತ ಬುಡೆದಿಗ್ ಮೂಜಿ ಜೋಕ್ಕಾಯ್ಲಗ ಜೆನ್ನಿಲೆಗ್ ಪತ್ತೀ ವಿಯೋಗ ಆಂಡ್. ಎಲ್ಯೆಲ್ಯ ಜೋಕ್ಕೆಗ್ ಅಪ್ಪೆನ ಪಿರೀತಿ ಬೋಡೊಂದ್ ಜೆನ್ನಿಯೆರ್ ರಡ್ಡನೇ ಮದ್ಮೆ ಆಯೆರ್. ಆರೆನ ಪುದರ್ ರುಕ್ಮಿಣಿಯಮ್ಮ ಪಂಡ್ (ಜೀವಂತವಾದುಲ್ಲೆರಿತ್ತೆ). ರುಕ್ಮಿಣಿಯಮ್ಮಗ್ ಅಜಿ ಜನ ಜೋಕ್ಕು. ಆರೆನ ಪುಳ್ಳಿಡ ಪದ್ಮನಾಭ ಜೆನ್ನಿಯೆರೆನ ವಿಚಾರೊನು ಕೇಂಡೆರ್ ಎಂಕಾತ್ರ, ಎನ್ನೊ ಆತ್ತೀಯ ಗೆಳತಿ ಬೊಕ್ಕ ಲೇಖಿಕೆ, ಇಂದಿರಾ ಹಾಲಂಬಿ (ಉಡುಪಿ) ಯೆರೆನ ಮೆಗ್ಗಿ ಯಶೋದಾ ನಾರಾಯಣ ಜೆನ್ನಿ. ಯಶೋದಾ ಜೆನ್ನಿಯೆರೆಗ್ ತಮ್ಮಲೆ (ಕಂಡನ್ನೆನ ತಿದ್ಯಮ್ಮೆರ್) ಬೂರೈರ್, ನಮ್ಮ ಕಥಾನಾಯಕೆ - ಪದ್ಮನಾಭ ಜೆನ್ನಿ. ಶ್ರೀಮತಿ ಇಂದಿರಾಹಾಲಂಬಿ ಬೊಕ್ಕ ಯಶೋದಾ ಜೆನ್ನಿ (ಅಕ್ಕ-ತಂಗೈಲ್ಲ್)ಗ್ ಎನ್ನ ಅನಂತ ಕೃತಜ್ಞತೆಲು.

ಸ್ವತಃ ಯಕ್ಷಗಾನ ಅರ್ಥಧಾರಿ ಬೊಕ್ಕ ಆಶುಕವಿತಾ ರಚನಾಗಾರೆಯೊ ಪದ್ಮನಾಭ ಜೆನ್ನಿಲು 'ಪದ್ಮನಾಭ' ಅಂಕಿತೊಡು ಕನ್ನಡ ಬೊಕ್ಕ ತುಳುಟು ಬರೆಯೊ ಅನೇಕ ಕೃತಿಳೆಡ್, ಇತ್ತೆ ನಂಕ್ ತೆರಿಡ್ ಬತ್ತಿಲೆಕ ಇಂಚ ಪಣೊಲಿ:

ಕನ್ನಡ - ಯಕ್ಷಗಾನ ಕೃತಿಕುಳು

1. ಪುಷ್ಪವೇಣಿ ಸ್ವಯಂವರ

2. ನಾರದ ಪ್ರತಾಪ

3. ರಾಮಾಯಣ

4. ಕಂಜಾಕ್ಷಿ ಪರಿಣಯ

ಆರೇ ಬರೆತಿನ ರಾಮಾಯಣ ಕಥೆನ್ ಹಳ್ಳಿಡ ಜನೊಕ್ಕೆ ಗಾದ್ ಪ್ರವಚನ ಮಲ್ತೊಂದಿತ್ತೆರ್. 'ಪದ್ಮನಾಭ' ಅಂಕಿತೊಡು - ಜೆನ್ನಿಯೆರ್ ತುಳುಟು ಸುಮಾರು ಪದ್ಮೊಲೆನ್ ರಚನೆ ಮಲ್ಪಿತ್ತಂಡಲಾ, ಇನಿಕ್, ಆ ಕೃತಿಕುಲು ಅಲಕ್ಷಿತವಾದ್, ಕೇವಲ ಒಂಜೇ ಒಂಜಿ (ಶಿವಳ್ಳಿ ತುಳುಟು ಬರೆಯೊ) ಪದ್ಯ ಮಾತ್ರ ನಮ್ಮ ಕಣ್ಣಾಗ್ ತೋಜಿದ್ ಬೈದೊಂಡ್. ಕಟೀಲ್ ಊರ್ದ ಹಿರಿಯ ಸಂಶೋಧಕರಾಯ್ಲಂಚಿ, ಎನ್ನ ಸಾಹಿತ್ಯೊ ಕೃಷಿತೊ ಬುಳೆಚಿಲ್ಗ್ ಸಹಕಾರೊ ನೀಡ್ಲೆನಂಚಿ ಪುಣ್ಯಾತ್ಮರಾಯಿನೊ ಶ್ರೀಯುತ ಪು. ಶ್ರೀನಿವಾಸ ಭಟ್, ಕಟೀಲ್, ಆರೆನ ಸಂಗ್ರಹೊಡ್ಡಿತ್ತಿ ಜೆನ್ನಿಯೆರೆನ ಒಂಜಿ ತುಳು ಪದ್ಯ ಬೊಕ್ಕ ಒಂಜಿ ಕನ್ನಡ ಪದ್ಯೊದ ಪ್ರತಿಲೆನ್ ಎಂಕ್ ಕೊರ್ರು

ಮಹದುಪಕಾರ ಮಲ್ತೆರ್. ಶ್ರೀಯುತೆರೆಗ್ ಎನ್ನೊ ಉಡಲ್ದಿಂಜಿ ಸೊಲ್ಮೆಲ್. (ಪರಿಶಿಷ್ಟೊಡು ಒಂಜಿ ತುಳುಪದ್ಯ ಕೊರುಂಡು) ಇಂಚಿ ಅಲಕ್ಷಿತ ಹರಿದಾಸೆರೆ ಕೃತಿಕುಳು ಬೊಲ್ಪುಗು ಬರೋಡೊಂದೆ ಪಣ್ಣಿನೊ ಎನ್ನೊ ಉದ್ದೇಶ. ಸುಮಾರು 80 ವರ್ಷೊ ಬಾಳ್ವ ಬದಾಕ್ದಾ, ನಮ್ಮ ಸಮಾಜೊಗು ಕೊಡುಗೆ ನೀಡಿಂಚಿನೊ ಹರಿದಾಸೆರೆ ಸಿರಿ ಚರಣೊಗು ನಮಿತೋಂದ್ ಎನ್ನೊ ಈ ಲೇಖನೊಗು ಪರ್ಮೆ ಒಯ್ಯುವೆ.

|| ಶ್ರೀಕೃಷ್ಣಾರ್ಪಣಮಸ್ತು ||

2. ಪಣಂಬೂರು ಲಕ್ಷ್ಮೀನಾರಣಪ್ಪಯ್ಯ (ಕಾಲ: 19ನೇ ಶತಮಾನ)

ಹರಿದಾಸ ಪಣಂಬೂರು ಗುರು ಸದಾನಂದೆರೆಗ್ (ಶ್ರೀನಿವಾಸಯ್ಯ) ಅಣ್ಣೆ ಆದಿಂಚಿ ಲಕ್ಷ್ಮೀನಾರಣಪ್ಪಯ್ಯೆರ್ ನಮ್ಮ ಜಿಲ್ಲೆದ ಅಲಕ್ಷಿತ ಹರಿದಾಸೆರೆ ವರ್ಗೊಡೊರಿಯೆಂದೇ ತೆರಿಯೊಲಿ. (ಗುರು ಸದಾನಂದೆರೆ ಚರಿತ್ರನ್ ಬೇತೆನೇ ಕೊರುಂಡು) 'ನಾರಾಯಣ' ಅಂಕಿತೊಡು ಬರೆತಿ ಒಂಜಿ ತುಳು ಭಾಷೆದ ಕೀರ್ತನೆನ್ ಬೊಲ್ಪುಗು ಕೊಣತ್ತಿನಾರ್ - ನಮ್ಮೂರ್ಲ ಚಿತ್ರಾಪುರ ಪಿ. ಪುರುಷೋತ್ತಮ ಭಟ್ - (ಟ್ಕಲರ್). ಪಣಂಬೂರು ಗುರು ಸದಾನಂದೆರೆ ಮಗಳೆನ ಮಗೆ (ಪುಳ್ಳಿ) ಆದಿಂಚಿ ಚಿತ್ರಾಪುರ ಪುರುಷೋತ್ತಮ ಭಟ್, ತನ್ನೊ ಅಜ್ಜೆರೆ (ಗುರು ಸದಾನಂದೆರೆ) ಕೃತಿಕುಳೆನ್ ಸಂಗ್ರಹ ಮಲ್ತಾದ್ ಕೀರ್ತನಾಮೃತ (ತುಳು ಭಾಷೆದ ಕೃತಿಕುಳು) - ಮೂಜನೇ ಸಂಪುಟೊನು, ದಿ. ಸುರತ್ಕಲ್ ಕೆ. ವೆಂಕಟರಾಯಾಚಾರ್ಯರೆ ಪ್ರಕಾಶನೊಡು ಬೊಲ್ಪುಗು ಕೊಣತ್ತೆರ್. ಈ ಪುಸ್ತಕೊಡು 9 ತುಳು ಕೃತಿಲು - ಗುರು ಸದಾನಂದೆರೊಂಡ, ಬೊಕ್ಕ 1 ಕೀರ್ತನೆ ಲಕ್ಷ್ಮೀನಾರಣಪ್ಪಯ್ಯೆರೆ. ಚಿತ್ರಾಪುರತೊ ಶ್ರೀ ದೇವೀನ್ ಸುಗಿತಿನ ಮಂಗಲ ಸ್ತೋತ್ರ ಉಂದು. ಆರೆನ ಬಾಕಿ ಕೃತಿಕುಳೆನ ಬಗ್ಗೆ ದಾಲಾ ತೆರಿಯಂದ್. ಈ ಒಂಜಿ ಕೃತಿನ ಪರಿಶಿಷ್ಟೊಡು ಅಲಕ್ಷಿತ ಹರಿದಾಸೆರೆ ಕೃತಿ - ಪಂಡ್ ತೋಜಾದೊಂಡ್.

ಕೃತಿಕೊ ಪ್ರತಿನ ಎಂಕೊದಗದ್ ಕೊರಿನೊ ಪುರುಷೋತ್ತಮ ಭಟ್ರೆಗ್ ಎನ್ನೊ ಉಡಲ್ದಿಂಜಿ ಸೊಲ್ಮೆಲು.

|| ಶ್ರೀಕೃಷ್ಣಾರ್ಪಣಮಸ್ತು ||

3. ಪುಂಡೂರು ದಾಮೋದರ ಪುಣಿಚಿತ್ತಾಯೆರ್ (ಕಾಲ: 1888-1971)

ಪುಂಡೂರು ದಾಮೋದರ ಪುಣಿಚಿತ್ತಾಯೆರ್ ತುಳು-ಕನ್ನಡ ಭಾಷೆದ ಅಶುಕವಿಕ್ಲ. ಕಾಸರಗೋಡುದ ಪುಂಡೂರು ಮನೆತನೊಟು ಹಿರಿಯ ವ್ಯಕ್ತಿಯಾದ್ ಮೆರೆದ್, ಸಾಹಿತ್ಯೊಗು ವಿಶೇಷ ಕೊಡುಗೆ ಕೊರಿಂಚಿ ಮಹಾನುಭಾವೆರ್.

ಆರೆನ ಕನ್ನಡ ಕೃತಿಕುಲು -

1. ಷಷ್ಠಿವ್ರತ ಮಹಾತ್ಮೆ

2. ಶೋಭನ ಗೀತೆ

3. ನಲ್ಲಿತ್ತಟ್ಟು ಕ್ಷೇತ್ರ ಮಹಾತ್ಮೆ

ಆರನ ತುಳು ಕೃತಿ: ಕುಂಬಳೆ ಸೀಮೆತ ಚರಿತ್ರ

ಇತ್ತೆ ಈ ಲೇಖನೊದೊಟ್ಟುಗು ಆರನ ಮೂಜಿ ಪದ್ಯೊಲೆನ್ ಪರಿಶಿಷ್ಟೊಡು ಕೊರುಂಡು.

ಕ್ರಮವಾದ್ ಹರಿದಾಸರೆ ಪಂಥೊಡು ಬತ್ ಜಂಡಲಾ, ಹರಿಸ್ತುತಿ ಮಲ್ತಿಂಚಿ ಹರಿದಾಸೆರ್ ಶ್ರೀ ಪುಂಡೂರು ದಾಮೋದರ ಪುಣಿಚಿತ್ತಾಯೆರ್, ಆರನ ಮೂಜಿ ಶಿವಸ್ತುತಿಲೆನ್ ಅವಲೋಕನ ಮಲ್ತಿನಗ, ಮೂಜಿ ಪದ್ಯೊಲ್ಲಾ ಬ್ರಾಹ್ಮಣೆರೆ ತುಳುಟುಂಡುಂದ್ ತೆರಿವುಂಡು.

1. ನಮೋ ನಮೋ ಗಿರಿಜೆನ ಮದಿಮಾಯಗ್ |

ಹಿಮಕರ ಶೇಖರ ಶಂಕರಗ್ ||ಪ ||

ಬೇಡನೊ ವೇಷೊನ್ ಪಾಡ್ ತ್ ಪೀಡಿಪಿ | ಕಾಡ್ ಮೈಗೊಂಕೆನ್ ನಾಡೋಣುತ್ |

ಕಾಡ್ ಕಾಡ್ ತಿರುಗಾಡಿಪಿ ದೇಲಂ|ಪಾಡಿತ ದೇವೆರೆ ದೇವೆರೆಗ್ ||

2. ಶಿವಸ್ತುತಿ - 2 ಬೊಕ್ಕ ಶಿವಸ್ತುತಿ - 3 - ಉಂದೆಟ್ ನಿಲಿಕೆ ಶಿವ ಮಹಾತ್ಮೆನೇ ತೋಜಿದ್ ಬರ್ಪುಂಡು. ದೇಲಂಪಾಡಿದೊ ಮಹಾಲಿಂಗ ದೇವೆರೆನ್ ಪುಗರ್ಡೆರ್ ದಾಸೆರ್. ಅಂತೂ ಭಕ್ತಿದೊ ಬುಗ್ಗೆ ಉರ್ಕಾದ್ ಓದುನಕ್ಲೆಗ್ ಶಿವ ದೇವೆರೆನ್ ಪ್ರತ್ಯಕ್ಷ ತೋಜಾವುನ ಜಾಣ್ಮೆ ನೆಗತ್ತ್ ತೋಜುಂಡು, ಪುಣಿಚಿತ್ತಾಯೆರೆನ ಕೃತಿಟ್. ಆಂಡಲಾ ಇಂಚೀ ಆಶುಕವಿಕ್ಲೆನ್ ನಮ್ಮ ಜನೊಕ್ಕು ಮದತ್ತೇ ಬುಡ್ಯೆರತ್ತಾ ಪಣ್ಣೆನ್ನ ಅನಿಸಿಕೆ. ಅಯ್ಯಾದ್ ಇತ್ತೆ ಆರನ ತುಳು ಪದ್ಯೊ ಸಂಗ್ರಹೊನು ಅಲಕ್ಷಿತ ಹರಿದಾಸೆರೆನ ಪಟ್ಟಿಡ್ ಸೇರ್ಪಾದ್ಂಡ್.

ಪೂಜ್ಯೆರ್ ರಚನೆ ಮಲ್ತಿ ಈ ಮೂಜಿ ಪದ್ಯೊಕ್ಲೆನ್ ಆರನ ಮಗೆ - ಶ್ರೀಯುತ ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರ್ ಎಂಕೊದಗ್ ದ್ ಕೊರೆರ್. ಆರೆಗೆನ್ನ ಉಡಲ್ಡಿಂಜಿ ಸೊಲ್ಮೆ ಸಂದಾವೊಂದು ಹಿರಿಯ ಹರಿದಾಸೆರೆನ ಕಾರ್ಗಡ್ ಬೂರೊಂದು ಈ ಲೇಖನನ್ ಮುಕ್ತಾಯ ಮಲ್ಪುವೆ.

||ಶ್ರೀ ಕೃಷ್ಣಾರ್ಪಣ ಮಸ್ತು||

4. ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯೆರ್

(ಕಾಲ: 19ನೇ ಶತಮಾನ)

ದೇಲಂಪಾಡಿ ನಾರಾಯಣ ಅರಳಿತ್ತಾಯೆರ್ ತುಳು ಕವಿವರ್ಯೆರ್ (ಜ. 1807). ಆಂಡ ಯಾನ್ ಮೇರೆನ್ ಅಲಕ್ಷಿತ ಹರಿದಾಸೆರೆ ವರ್ಗೊಗು ಜೋಡಣೆ ಮಲ್ಪುವೆ. ಆರ್ ಸುಮಧುರವಾಯಿನೊ ತುಳು ಪದ್ಯೊನು ಬರೆತೆರ್. ಅವೆನ್ ಪರಿಶಿಷ್ಟೊಡು ಕೊರುಂಡು. ಆ ಕವಿತೆದ ಮಾಧುರ್ಯ ತೂಯ್ತುಗ, ಖಂಡಿತಾ ಆರ್ ಬೇತೆಲಾ ಸುಮಾರು ಪದ್ಯೊಲೆನ್ ರಚನೆ ಮಲ್ತಿಪ್ಪರೆ ಯಾವುಂದು ತೆರಿವುಂಡು. ಆಂಡ ಇತ್ತೆ ನಂಕ್ ಕೇವಲ ಒಂಜೇ ಒಂಜಿ ಪದ್ಯೊನ್

ಬಾರೀ ಜತನೊಡು ಒದಗದ್ ಕೊರೆರ್, ಕಾಸರಗೋಡುದ ತುಳು ಸಾಹಿತ್ಯ ಸಂಶೋಧಕೆರಾಯಿನಾರ್ ಶ್ರೀಯುತ ವೆಂಕಟರಾಜ ಪುಣೆಚಿತ್ತಾಯೆರ್. ಎನ್ನೊ ಕೋರಿಕೆನ್ ಮನ್ನಿತ್‌ದ್, ಹಿರಿಯೆರೆನ ತುಳು ಪದ್ಯೊಲೆನ್ ಕಡಪುಡ್ಡು ಕೊರಿನ ಹಿರಿಯ ಬಂಧುಲಾಯ್ಲೊ ಶ್ರೀಯುತ ಪುಣೆಚಿತ್ತಾಯೆರ್‌ಗ್ ಎನ್ನೊ ಉಡಲ್ದಿಂಜಿ ಸೊಲ್ತೆಲು.

ದೇಲಂಪಾಡಿದ ನಾರಾಯಣ (ವಾಸು) ಅರಳಿತ್ತಾಯೆರೆನ ಶಿವಳ್ಳಿ ಲಾವಣೆಡ್-

"ಶಿವೆ ನಲಿಪುವೆರ್ ಸೂವೆರೆ ಪೋಯಿ ಬಲ್ಲೆ
ನವ ವಿದೊ ಭಕ್ತಿಟಾರೆನ್ ದ್ಯಾನಿತೊಳ್ಳೆ ||

.....
ಮಾಸೊಂಟ್ ಎರಡ್ ಪ್ರದೋಷೊಂತ ದಿವಸ
ಘೋಷಿಪಿ ವಾದ್ಯ ಸಂಗೀತೊಂತ ರಭಸೊ
ಶೇಷಾಭರಣೆ ನಾಟ್ಯ ನಲಿಪಿ ವಿಲಾಸೊ
ವಾಸುಕೇಶ್ವರಗ್ ಪಣೆಯೆರೆ ಪೂರೈಸೊ ||೬||

.....
ಪಾಲಿಪೊಡೆಂದ್ ಗೌರೀಶಗ್ ಶರಣು
ದೇಲಂಪಾಡಿದ ಮಹಾಲಿಂಗಗ್ ಶರಣು ||೭||

ಅರಳಿತ್ತಾಯೆರ್ ತನ್ನೊ ಈ ಶಿವಳ್ಳಿ ಲಾವಣೆಡ್, ತನ್ನೊ ಊರ್ದ ಕ್ಷೇತ್ರ ದೇವತೆಯಾಯ್ಲೊ ದೇಲಂಪಾಡಿ ಮಹಾಲಿಂಗನ ಸ್ತುತಿ ಮಲ್ತೆರ್. 'ಶಿವೆ ನಲಿಪುವೆರ್' - ಈ ಪದ್ಯೊಡು ಶಿವನೊ ನಾಟ್ಯ ವೈಭವನ್ ಕಣ್ಣೆಗ್ ಕಟ್ಟಿಲೆಕ್ಕ ವರ್ಣನೆ ಮಲ್ತಾದೆರ್ ಹರಿದಾಸೆ ಅರಳಿತ್ತಾಯೆರ್.

ಈ ದಾಸೆರೆನ ಒರಿನೊ ನನೊದ ಕೃತಿಕುಲ್ಲಾ ನಮ್ಮ ಕೈಸೇರಾಂಡ, ತುಳುಸಾಹಿತ್ಯೊದ ತುಪ್ಪೆದ ವಜನೆ ನನ್ನೊಲಾ ಹೆಚ್ಚುಂಡು ಪಣ್ಣುನ ಅಭಿಲಾಷೆ.

ಅಂತೂ ಅವಿಭಜಿತ ದಕ್ಷಿಣ ಕನ್ನಡ ಜಿಲ್ಲೆದ ಅಂಗವಾಯ್ಲೊ ಕಾಸರಗೋಡುಡ್ಲಾ ತುಳು ಭಾಷೆದ ಪೂತ ಕಮ್ಮನೆ ಪರಡ್ಡಿನೊ ಕೇಣ್ಡ್, ಭಾರೀ ಖುಷಿಟೇ ಎನ್ನೊ ಈ ಸಂಶೋಧನೆದ ಲೇಖನೊದ ಮದ್ಮಾಲೆನ ಐತೊಗು, ಈ ಅರಳಿತ್ತಾಯೆರೆನ ಕೀರ್ತನೆದ ಪೂವೊಂಚೆನ್, ಸಿರಿಮುಡಿಕ್ ಸೇರ್ಪಾದ್ ಪೂರ್ಣ ತೋಜಾಯಿನ ನಮ್ಮ ಹಿರಿಯೆರಾಯಿನೊ ಕೀರ್ತಿಶೇಷ ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯೆರೆಗ್ಲಾ ಬೊಕ್ಕ ಕೃತಿ ಒದಗದ್ ಕೊರೊ ಹಿರಿಯ ಸಾಹಿತಿ ಸಂಶೋಧಕೆರಾಯ್ಲೊ ಶ್ರೀ ಪುಂಡೂರು ವೆಂಕಟರಾಜ ಪುಣೆಚಿತ್ತಾಯೆರೆಗ್ಲಾ ಎನ್ನೊ ಅನಂತ ಕೃತಜ್ಞತೆ ಸಲ್ಲಿಸೊಂದ್ ಈ ಕೃತಿನ್ ಎನ್ನೊ ಆರಾಧ್ಯ ದೇವತೆ ಶ್ರೀ ಗುರುಪ್ರಿಯ ವಿಠಲನೊ ಚರಣೊಗು ಅರ್ಪಿತ ಮಲ್ಪುವೆ.

|| ಶ್ರೀ ಕೃಷ್ಣಾರ್ಪಣ ಮಸ್ತು ||

5. ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರ್ (ಕಾಲ : ಜ. ಕ್ರ.ಶ. 1936)

ತುಳುಭಾಷೆದ ಸಾಹಿತ್ಯೊಗು ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರೆನ ಕೊಡುಗೆ ಅಪಾರ. ಕುಂಬಳೆ ಸೀಮೆಡ್ ಉಪಲಬ್ಧವಾಯ್ಲೊ ತಾಳೆಗರಿಯೋಲೆಡ್ ತುಳು ಲಿಪಿಚೇ ಬರೆದಿತ್ತಿನೊ ತುಳುಭಾಷೆದ ಪ್ರಾಕ್ದ ಸಾಹಿತ್ಯೊ ಕೃತಿಲಾಯಿನ -

1. ಶ್ರೀ ಭಾಗವತೊ (1984)
2. ಕಾವೇರಿ (1987)
3. ತುಳು ದೇವಿ ಮಹಾತ್ಮೆ (1991)
4. ಮಹಾಭಾರತೊ (2000)

ಈ ನಾಲ್ ಗ್ರಂಥೊಲೆನ್ ಪತ್ತೆ ಮಲ್ತಾದ್, ಶೋಧಿಸದ್, ಸಂಪಾದನೆ ಮಲ್ತಿ ಕೀರ್ತಿ ಶ್ರೀ ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರ್ಗ್.

ಆಲಡೆ (1983), 'ಕುಡಲಮಲ್ಲಿಗೆ'(1998) ಸಂಕಲನೊತ ಕವಿ ಶ್ರೀ ಪುಂಡೂರು ಪುಣಿಚಿತ್ತಾಯೆರ್ ಅನೇಕ ತುಳು ಭಕ್ತಿಗೀತೆಲೆನ್ ರಚನೆ ಮಲ್ದೆರ್. ಅಂಚಿನೇ ಸಂಸ್ಕೃತ ಭಾಷೆದ ಶಿರೋಮಣಿಯಾಯ್ಲೊ ಈ ಹರಿದಾಸೆರ್ (ಶ್ರೀ ಪಿ. ಪುಣಿಚಿತ್ತಾಯೆರ್) ಅನೇಕ ಸಂಸ್ಕೃತ ಕೃತಿ ರಚನೆನ್ನಾ ಮಲ್ದೆರ್.

1. ಭಕ್ತ ಕುಚೇಲ (ರೂಪಕ)
2. ಕರುಣಾ (ರೂಪಕ)
3. ಕಿಂಕರ್ಮ ಕಿಮಕರ್ಮೇತಿ (ರೂಪಕ)
4. ಬುದ್ಧಂ ಶರಣಂ ಗಚ್ಚಾಮಿ (ರೂಪಕ)
5. ಗಂಗಾಲಹರಿ (ರೂಪಕ)
6. ಕೃಷ್ಣ ಜನನ (ಯಕ್ಷ ರೂಪಕ)
7. ಮೈತ್ರಾವರುಣಿ ಚರಿತ (ಯಕ್ಷಗಾನ ಪ್ರಸಂಗ)
8. ಸುಬ್ರಹ್ಮಣ್ಯ ಸುಪ್ರಭಾತ
9. ಮಲ್ಲಿ ಕಾರ್ಜುನ ಸುಪ್ರಭಾತ

ಈ ಹರಿದಾಸೆರ್ ಸಂಸ್ಕೃತ, ಕನ್ನಡ, ತುಳು ಭಾಷೆಡ್ಲಾ ಕೃತಿ ರಚನೆ ಮಲ್ದೆರ್. ಮೇರೆನ ಕವಿತೆಲು ಸುಮಾರು ನೂದು ಧ್ವನಿಸುರುಳಿಡ್ ಪ್ರಕಟವಾತ್ಂಡ್.

ತುಳು ಸಾಹಿತ್ಯೊಗು ಭದ್ರ ಬುನಾದಿ ಪಾಡಿನೊ ಈ ಮಹಾಮಲ್ಲೊ ಕೃತಿಕಾರ್ಡ್ ರಚನೆಲೆಡ್ - ಮಹಾರಾಷ್ಟ್ರ ಬೊಕ್ಕ ಕೇರಳದ ಪಠ್ಯ ಪುಸ್ತಕಲೆಡ್ ಮೇರೆನ ಶಿಶುಗೀತೆಲು ಪ್ರಕಟವಾತ್ಂಡ್.

ಈ ಎನ್ನೊ ಸಂಶೋಧನಾ ಲೇಖನೊಗು ಆರೆನ ಸುಮಾರು 7 ಪದ್ಯೊಲೆನ್ ಕಡಪುಡ್ಲಾ ಕೊರೆರ್ ಶ್ರೀ ಪುಣಿಚಿತ್ತಾಯೆರ್. ಪರಿಶಿಷ್ಟೊಡು ಅವೆನ್ ಕೊರುಂಡು.

ಆರನ ಕೃತಿಕುಲೆಡ್ - ಗಣಪತಿ ಸ್ತುತಿ, ನಿನ್ನ ಜೋಕುಲು, ಕೃಷ್ಣಾ ನಿನ ಲೀಲೆ, ಏತ್ ಪುಗರೊಲಿ, ಕರುಣಾಮಯಿ, ಒರಿಯೆನೇ ದೇವೆರ್, ಉಡುಪಿ ಕೃಷ್ಣೆ. ಇಂಚ ಈ 7 ಪದ್ಯೊಲ್ಲಾ ಒಂಚೆತ್ತೊಂಚಿ ಕಾವ್ಯ ರಸಭರಿತವಾದುಂಡು. ಈ ಮಾಮಲ್ಲ ಸಾಹಿತಿಲೆನ್ ತೂಕ ಮಲ್ಪುನ ಯೋಗ್ಯತೆ ಎಂಕೆಂಚ ಬರು ಪಣ್ಣೇ? ಎನ್ನ ಕೋರಿಕೆಗ್ ಮಣೆದ್ ಆರ್ ತನ್ನೊ ಕೃತಿಲೆನ್ ಕಡಪುಡ್ಡು ಕೊರಿನ ಈ ಮಹಾನುಭಾವೆರೆನ ಎಣೆ ದಾಂತಿ ಔದಾರ್ಯೋಗು ಯಾನ್ ಮೂಕಿಯಾದ್ ಪೋಯೆ! ಇಂಚೇ ಸುಭಗೆರೆನ ಕಾರ್ಗಡ್ಡ ಬೂರೊಂದು, ಆಶೀರ್ವಾದೊನು ನಟ್ಟೊಂದು ಈ ಹೆಡ್ಡಿಯೊರ್ತಿ ಸಂಶೋಧನೆ ಮಲ್ಪರೆಂದ್ ಪಿದಾಡ್ಡಿನಾಳೆನ್ ಗುರುಹಿರಿಯೆರ್ಲಾ, ನಂಬುದಿ ದೇವೆರ್ಲಾ ಕೈ ಪತ್ತಾದ್ ಸಾದಿ ತೋಚಾವೊಡುಂದ್ ಅಂಗರೊಂದು ರಡ್ಡ್ ಕೈಟೊಟ್ಟು ನಟ್ಟೊಂದು, ತುಳುವಪ್ಪೆನ ಸಾಹಿತ್ಯ ತುಪ್ಪೆ ಉರ್ಕಾರೊಡುಂತು ಪಣ್ಣೆನ ಅಂಗಲಾಪುಗು 'ತಥಾಸ್ತು' ಪಣೊಡುಂದ್ ಆ ಎನ್ನೊ ಪೆದ್ದಿದಿ ಅಪ್ಪೆನ್ನಾ, ತುಳುವಪ್ಪೆನ್ನಾ ಕೇಣೋಣ್ಣೆ.

|| ಶ್ರೀ ಕೃಷ್ಣಾರ್ಪಣ ಮಸ್ತು ||

6. ಕಳುವಾರು ವೆಂಕಟರಾಯೆರ್ (ಕಾಲ : ಕ್ರಿ.ಶ. 1905-1983)

ಕೃಷ್ಣಾಪುರದ ಕೈತಲ್ದ ಕಳುವಾರು ಗ್ರಾಮೊದ ಬೊಳ್ಳಾಚೆದ ನಿವಾಸಿ, ವೆಂಕಟರಾಯೆರ್ ಅಧ್ಯಾಪಕೆರಾದ್ ಸುಬ್ರಹ್ಮಣ್ಯ, ಕಟೀಲು, ಕೃಷ್ಣಾಪುರ - ಪೇಜಾವರ ಚರ್ಚ್ ಹ್ಯಾಯರ್ ಎಲಿಮೆಂಟರಿ ಶಾಲೆಡ್ ಸೇವೆ ಮಲ್ತಿನಾರ್. ರಾಯೆರೆಗ್ ಒರ್ತಿ ಅಕ್ಕ ಬೊಕ್ಕ ಮೂಜಿ ಜನ ಮೆಗ್ಗನಕ್ಕು. ಅಧ್ಯಾಪಕೆ ವೆಂಕಟರಾಯೆರೆಗ್ ಪತ್ನಿ ಶ್ರೀಮತಿ ಪದ್ಮಾವತಿಯಮ್ಮ - ಈ ದಂಪತಿಯೆರೆಗ್ (ಮೂಜಿ ಜನ ಆಣು ಬಾಲೆಲು, ನಾಲ್ ಜನ ಪೊಣ್ಣು ಬಾಲೆಲು) ಏಳ್ ಜನ ಜೋಕ್ಕನ ಸಂತಾನ.

ಆಣುಲು - ರಾಮಚಂದ್ರ, ಕೃಷ್ಣ, ರಾಘವೇಂದ್ರ
ಪೊಣ್ಣುಲು - ಲಕ್ಷ್ಮಿ, ಲಲಿತ, ಮೋಹಿನಿ, ಶಕುಂತಲ

ಶ್ರೀ ವೆಂಕಟರಾಯೆರ್ ಸ್ವತಃ ಕವಿತಾ ರಚನಾ ಶಕ್ತಿಯಿತ್ತಿನ ಪ್ರತಿಭಾವಂತೆರ್. ಕೆಲಸೊಡು ಪೋಯ್ ಕ್ಷೇತ್ರೊಲೆಡ್, ರಾಯೆರ್ ಅನೇಕ ಕನ್ನಡ ಪದ್ಯೊಲೆನ್ ರಚನೆ ಮಲ್ತೆರ್. ಆರನ ಕೃತಿ ರಚನೆದ ಪ್ರತೀನ್ ಒದಗಯ್, ಆರನ ನೇಲ್ಯ ಮಗೆ (ನಿವೃತ್ತ ಬ್ಯಾಂಕ್ ಅಧಿಕಾರಿ) ಶ್ರೀಯುತ ರಾಮಚಂದ್ರರಾಯೆರೆಗ್ ಎನ್ನ ಅನಂತ ಕೃತಜ್ಞತೆಲು.

ವೆಂಕಟರಾಯೆರ್ ಒಂಚೇ ಒಂಜಿ ತುಳು ಕೃತಿ ಎಂಕ್ ತಿಕ್ಕಿನೆನ್ ಲೇಖನದ ಪರಿಶಿಷ್ಟೊಡು ಕೊರುಂಡು.

ಈ ಪದ್ಯ ಎಲ್ಯಾದಿತ್ತೊಂಡಲಾ ಅರ್ಥ ಮಲ್ತೊಣ್ಣಿಕ್ಲೆಗ್ ಮಾತ್ರ ಅವು ಅರ್ಥ ಅವು. ಪದ್ಯೊದ ಕೆಲವು ಸಾಲು ಇಂಚ ಉಂಡು:

ಮಂಗಳ ಗುತ್ತುದ ಬೊಟ್ಟುದಯೆ | ಯ್ಯಾನ್

ವಿಟ್ಟು ಮುರಾರಿ ದೇವರೆ

||೧||

ಎನ್ನ ಉಳ್ಳೇಲ್ ಮಾಜಿ ಪಟ್ಟೇರ್

ಇಸಶಾಲ್ ಗಂಟಾನ್ ಕೊರ್ತೆರ್

||೨||

ಪರತರ ಲೆಕ್ಕೊಗು ಕರ್ತಾದಾರ್

ರಸೀದಿ ಕೊಂಡು ಬರೆ ಪಣ್ಣೇರ್

||೩||

ಉಂದು ಒಂಜಿ ನಮೂನೆದ 'ಮುಂಡಿಗೆ'ದ ಲೆಕ್ಕ ಒಗಟಾದ್ ಬರೆತೆರ್. ಆಧ್ಯಾತ್ಮದ ಗೂಡಾರ್ಥದ ಮರ್ಮನ್ ಈ ಕಬಿತೆಡ್ ತೋಜಾದೆರ್. ವೆಂಕಟರಾಯೆರ್ ಹೆಚ್ಚಿದ ಪದ್ಯೊಳೆಡ್ 'ವೆಂಕಟಪತಿ', 'ವೆಂಕಟರಮಣ' - ಅಂಕಿತೊಡು ಬರೆತೆರ್. ಆಂಡ ಕೇವಲ ಕೆಲವು ಪದ್ಯೊಳೆಡ್ ಅಂಕಿತ ಪಾಡ್‌ದಿಜೆರ್. ಉದಾ: ಈ ತುಳು ಪದ್ಯೊಡ್‌ಲಾ ಅಂಕಿತ ಇಚ್ಚಿ. ಖಂಡಿತಾ ಆರ್ ನನ್ನಲಾ ಸುಮಾರ್ ಪದ್ಯ ಬರೆತೆರ್‌ಗೆ. ಆರೆನ ಇಲ್ಲಗ್ ತೂ ಬೂರಿನಗ ಲೇಖನದ, ಬೂಕುದ ಕೆಲವು ಕಟ್ಟುಲು ಉರಿದ್ ಪೋಂಡುಂದು ವ್ಯಥೆಚೇ ಪಂಡೆರ್ ಮಲ್ಲಮಗೆ ರಾಮಚಂದ್ರ ರಾಯೆರ್. ಆರೆನ ಸುಮಾರು 15 ಪದ್ಯೊಲು (ಕನ್ನಡ ಭಾಷೆದ) ಬೊಕ್ಕ ಕೆಲವು ದೇವೆರ್ (ಹಿರಿಯ ದಾಸರೆನ ರಚನೆದ) ಭಜನೆ ಪದ್ಯೊದೊಟ್ಟುಗಿತ್ತಿ ಈ ಬೂಕುಡು ಈ ಒಂಜಿ ತುಳು ಪದ್ಯಾಂಡಲಾ ಎಂಕೊದಗ್‌ಡತ್ತಾ ಪಣ್ಣಿ ಸಂತೋಷದೊಟ್ಟುಗು ಹಿರಿಯ ದಾಸೆರ್ ಶ್ರೀ ವೆಂಕಟರಾಯೆರೆನ ಚರಣೊಗು ಎನ್ನ ಉದ್ದಂಡ ನಮಸ್ಕಾರೊದೊಟ್ಟುಗು ಈ ಲೇಖನ ಮುಕ್ತಾಯ ಮಲ್ಪುವೆ.

7. ಜತ್ತಿ ಈಶ್ವರ ಭಾಗವತೆರ್(ಕಾಲ:1872-1945): ತಿಟ್ಟೆಲ್ ಸೀಮೆದ ಬಾಯಾರ್ ಊರುದ ಜತ್ತಿ ಕೃಷ್ಣ ಭಟ್ಟಿನ ಮಗೆ ಈಶ್ವರ ಭಟ್. ಎಲ್ಲಿಡೇ ಆಶುಕವಿತ್ವ ಇತ್ತಿ ಈಶ್ವರ ಭಟ್, ಯಕ್ಷಗಾನ ರಂಗೊಗು ಬೊಕ್ಕ ಹರಿಕಥಾ ಕ್ಷೇತ್ರೊಗು ಪಚ್ಚೆ ದೀಯ್ತಾರ್. ಆ ಕಾಲೊದ ಪಾವಂಜಿ ಲಕ್ಷ್ಮೀನಾರ್ಣಪ್ಪಯ್ಯೆರ್ ಸಮಕಾಲೀನೆರ್ ಜತ್ತಿ ಈಶ್ವರ ಭಟ್. ಜತ್ತಿಯೆರ್ ವಂಶ ಪರಂಪರೆಯಾದ್ ಯಕ್ಷಗಾನ ಭಾಗವತಿಕೆ, ಅರ್ಧಗಾರಿಕೆ ಹಿರಿಯೆರೆಡ್ ಬೈದಿ ಬಳುವಳಿ. ಅಂಚಿನೇ ಈಶ್ವರ ಭಟ್, ಯಕ್ಷಗಾನ ಭಾಗವತಿಕೆದೊಟ್ಟುಗು ಯಕ್ಷಗಾನ ಕಥಾ ಪ್ರಸಂಗೊನ್ನಾ ರಚನೆ ಮಲ್ತೊಂದು, 'ಜತ್ತಿ ಈಶ್ವರ ಭಾಗವತೆರ್' ಪಂಡ್ಲೆ ಪುದರ್ ಪಡೆಯ್ತಾರ್! ಆ ಕಾಲೊಡ್ತಿ ಕೆಲವು ಹರಿದಾಸೆರ್ ಹರಿಕಥೆನ್ನಾ ಮಲ್ತೊಂದು, ಯಕ್ಷಗಾನೊಡ್ಲಾ ಬೆನೊಂದಿತ್ತೆರ್. ಜತ್ತಿ ಈಶ್ವರ ಭಾಗವತೆರ್ ಹರಿಕಥಾ ಕಾಲಕ್ಷೇಪ ಕಾರ್ಯಕ್ರಮೊಳೆನ್ ಮಲ್ಪಿಂಚಿ ಹರಿಕೀರ್ತನಕಾರೆರ್ ಆದಿತ್ತಿನಾರ್. ತುಳು ಭಾಷೆಡ್ಲಾ ಹರಿಕಥೆ ಮಲ್ತೊಂದಿತ್ತೆದ್, 'ತುಳು ಕೀರ್ತನ ಮಾಲೆ' ಸೇರ್ ಒಟ್ಟು ಎಣ್ಣು ಹರಿಕಥಾ ಸಾಹಿತ್ಯ ಕೃತಿಳೆನ್ ಬರೆದ್ ಬೊಳ್ಳುಗು ಕೊಣ್ಣೆದೆರ್‌ಂದ್ ವಿದ್ವಾಂಸೆರ್ ಹೇಳಿಕೆ. ಜತ್ತಿಯೆರ್ ಬರೆತಿ 'ಗೋಪಿ-ಕೃಷ್ಣ ಸಂವಾದೊ' - ಪಣ್ಣಿ ತುಳು ಕೃತಿನ ಪರಿಶಿಷ್ಟೊಡು ಕೊರ್ತುಂಡು. ಈ ಪದ್ಯೊ ಎಂಕ್ 'ಗೀತೆ ಮಲ್ಲಿಗೆ' ಪನ್ನಿ ತುಳು ಕಾವ್ಯ ಭಗವದ್ಗೀತೆ -ಬೂಕುದೊಲಾಯಿಡ್ ಕಡೇಟ್ ತೂವರೆ ತಿಕ್ಕಂಡ್.

ತುಳುಕಾವ್ಯ - 'ಗೀತೆಮಲ್ಲಿಗೆ' : ತುಳುನಾಡ್‌ದ ಮೂಲ್ಕಿ ಸೀಮದ ಮಲ್ಲ ಕವಿ, ಜಿಲ್ಲಾ ಜಡ್ಜೆರ್ (ನಿವೃತ್ತೆರ್) ಆದಿತ್ತಿ ಮೂಲ್ಕಿ ನರಸಿಂಗರಾಯೆರ್(ಕಾಲ: 1876-1947) ಶ್ರೀಕೃಷ್ಣ ದೇವೇರನ ಧರ್ಮೋಪದೇಶದ 'ಭಗವದ್ಗೀತೆ' ಪನ್ನಿನ ತುಳು ಕಾವ್ಯೊನು, 'ಗೀತೆ ಮಲ್ಲಿಗೆ' ಪನ್ನಿ ಪುದರ್‌ಡ್, ಭಯ ಭಕ್ತಿಡ್ ಬರೆದ್ ತುಳು ಭಾಷೆಡ್ ಅಚ್ಚಿ ಮಲ್ತಾದ್ ಭಕ್ತಿರೆಗ್ ಎದುರುದೀದ್ ಮಾನಾದೆರ್. (ಪ್ರಕಾಶಕೆರ್: ಶ್ರೀ ವೀರ ವಿಠಲ ಪುಸ್ತಕ ಭಂಡಾರ, ಮಂಗಳೂರು) ಸರಳವಾದ್ ಜನೊಕ್ಕೆಗ್ ಅರ್ಥ ಆಪಿಲೆಕ್ಕ ಪೊರುಡು ಶ್ಲೋಕ ರೂಪೊನು ತೆರಿಪಾದ್, ಭಕ್ತಿ ಮಾರ್ಗೊನು ತೋಜಾಯಿನ ಮೂಲ್ಕಿದ ಕವಿ ಶ್ರೀ ನರಸಿಂಗರಾಯೆರ್‌ಗ್, ನಮ್ಮ ತುಳುವೆರೆನ ಪರವಾದ್ ಯಾನ್ ಭಕ್ತಿ ಪೂರ್ವಕವಾದ್ ಸೊಲ್ತೆ ಸಂದಾವೆ.

ಜತ್ತಿ ಈಶ್ವರ ಭಾಗವತೆರೆನ ತುಳು ಕಾವ್ಯ - ಗೋಪಿ-ಕೃಷ್ಣ ಸಂವಾದೊದ ಬಗ್ಗೆ ಎನ್ನ ಅನಿಸಿಕೆ :

"ದಾನೆಯಾ ಕೃಷ್ಣ ನಿನ್ನಾನ್ | ಜಾಣೆ ಪಣ್ಣೆರ್ ಮಾಂತ |
ನಾಣ ಬತ್ತಂಡ ದೂರು | ಬೇನೆ ಮಾಳ್ವಂತೆ ಬುಡಯೆ ||ಪ||

ಅಪ್ಪೆ ಯಶೋದೆಗ್ ಗೋಪಿಯೆರ್ ಕೃಷ್ಣನ ಮಿತ್ತ್ ದೂರು ಕೊಣತ್ತಿನೆಕ್, ಅಪ್ಪೆ ಯಶೋದೆ ಬಾಲೆ ಕೃಷ್ಣನ್ ಜೋರು ಮಲ್ಪುವಳ್. ಬಾಲೆ ಕೃಷ್ಣ ವಿಧವಿಧೊಟು ಅಪ್ಪೆನ್ ಸಮಾಧಾನೊಡೇ ಮಾಣಾವೆ.

"ಕಣ್ಣೆದುರುಪ್ಪುನೆಂಚ ಕೇಣ್ಣೆಯೆನ್ನಪ್ಪೆ | ಕಣ್ಣಿಡೆ ದಾಸೆರೆ ಮನಸಾಟೇ ಇಪ್ಪೆ ||
ಅಪ್ಪೆ.... ಇಂಚ ಪಂಡಿ ಬಾಲೆ ಕೃಷ್ಣನ್ ಅಪ್ಪೆ -
"ನ್ಯಾಯಾ ಮಾಂತಲ ಸೂಪೆ | ಬಾಯಿ ಬುಡುಲಗೆ ಕೃಷ್ಣ |
ರಾಯ ನೋಪುಪೆ ನಿಕ್ಕ ನ್ಯಾಯೊ ಇತ್ತಂಡ ಸರಿಯೊ ||"

ಪಂಡಳ್ ಅಪ್ಪೆ ಯಶೋದೆ. ಅದನಗ ಕೃಷ್ಣೆ - "ಬಾಯಿ ಸೂಲೆಂದಾತ್ | ಬಾಯಿ ಬುಡ್ಡಾಗ | ಬಾಯಿ ಬುಡ್ಡಾಗ | ಬಾಯಿಟ್ ಬ್ರಹ್ಮಾಂಡೊ ಸೂಯೆರಪ್ಪಾಗ" | ಅಪ್ಪೆ ಯಶೋದೆ, ಬಾಲೆ ಕೃಷ್ಣನ ಬಾಯಿಡ್ ಬ್ರಹ್ಮಾಂಡೊನೇ ಸೂಯಳ್‌ಗೆ! ಬಾಲೆನ್ ಅರೊದ್ ಪತ್ತಾದ್ ಮೋಕೆಡ್ ಮುದ್ದು ಕೊರ್ಪು ಪೇರ್ ಕೊರಿನಗ, ಬಾಲೆ ಕೃಷ್ಣೆ ತೆಳಿತೆಗೆ! - ಬಾರೀ ಖುಷಿಟೇ ಓದೊಳಿ ಈ ಪದ್ಯೊನು. ಅಂಚಿನೇ ಮಂಗಳ ಪದ್ಯೊಲಾ ಭಕ್ತಿಟೇ ಸುಗಿತಂಡ್. ಈ ತುಳು ಪದ್ಯೊ ಬರೆದ್ ಜನೊಕ್ಕೆಗ್ ಸಿರಿಕೃಷ್ಣ ದೇವೆರೆ ದರ್ಶನ ಮಲ್ಪಾಯಿಂಚಿ ಹರಿದಾಸೆ ಜತ್ತಿ ಈಶ್ವರ ಭಾಗವತೆರೆಗ್ ಯಾನ್ ಭಕ್ತಿಡೇ ಆರೆನ ಕಾರ್ಗಡ್ಡ ಬೂರೋಣ್ಣೆ.

8. ಉಡುಪಿ ಶ್ರೀಶದಾಸೆರ್(ಕಾಲ: ಜ.ಕ್ರಿ.ಶ. 1935 -): ಒಡಿಪುದ ನಿವಾಸಿ ರಾಮಕೃಷ್ಣ ಘನಪಾರಿ ಬೊಕ್ಕ ಜಲಜಾಕ್ಷಿ ದಂಪತೈರೆಗ್ ಒಟ್ಟು ನಾಲ್ ಆಣು ಜೋಕ್ಕು. 1. ಶ್ರೀನಿವಾಸ 2. ಕೃಷ್ಣ 3. ವೇದವ್ಯಾಸ 4. ಶ್ರೀಶ. ಮಾತೆರ್ಲಾ ಅಮ್ಮೆರೆ ಕಾನೇ ಘನಪಾರಿಳಾದುಪ್ಪಿನಕ್ಕು. ಕಡೇತಾರೇ 'ಶ್ರೀಶದಾಸೆ' ಪಣ್ಣೆ ನಮ್ಮ ಕಥಾನಾಯಕೆ. ಒಡಿಪುದ ಹಂಡೆ ಶ್ರೀ ಪಾದದಾಸೆರೆಡ್ಡ

ಹರಿಕಥಾ ರಂಗೋಗು ಆರನ ಮೋಕೆದ ಶಿಷ್ಯರಾದ್, ಹರಿದಾಸರಾದ್, ಹರಿಕಥಾ ಕಾರ್ಯಕ್ರಮ ಮಲ್ತೊಂದಿತ್ತಿನಾರ್. ಅನೇಕ ಹರಿಕಥಾ ಸಾಹಿತ್ಯೊಲೆನ್ನಾ ಬೊಕ್ಕ ಕೀರ್ತನೆಲೆನ್ನಾ, ತುಳು ಬೊಕ್ಕ ಕನ್ನಡ ಭಾಷೆಡ್ 'ಶ್ರೀಶ' ಅಂಕಿತೊಡು ಬರೆತೆರ್. ಹರಿದಾಸಿ ಒಡಿಪುದ ಯಶೋದಮ್ಮ ನೊಟ್ಟುಗು ಶ್ರೀಶದಾಸೆರೆನ್ ಭೇಟಿಯಾವರೆ ಯಾನ್ ಪೋದಿತ್ತೆ. ಮಲ್ತೊ ವಿದ್ವಾಂಸರಾಂಡಲಾ ಹರಿದಾಸೆರ್ ಬಡತನೊನು ಅರೋದು ಪತ್ತಿನಾರ್. ಆರನ ಜೀವನ, ಸಾಧನೆಲೆನ ವಿಷಯೊನು ಆರನ ಬಾಯಿಡ್ಲೇ ಕೇಂಡ್ ಬರೆದ್ ದೆತೊಂಡೆ.

ಶ್ರೀಶದಾಸೆರೆನ ಬುಡೆದಿ ಸರೋಜಮ್ಮ. ಮೊಕ್ಲೆಗ್ ಮೂಜಿ - ಆಣ್‌ಜೋಕ್ಲು, ನಾಲ್ವೆರ್ - ಪೊಣ್ಣು ಬಾಲೆಳು.

- ಆಣ್ಣಾಲೆಳು: 1. ಮದ್ದೇಶ - ತಬ್ಬಾವಾದಕ
2. ಪ್ರಾಣೇಶ - ಖಂಜೀರವಾದಕ
3. ಮಹೇಶ - ತಬ್ಬಾ, ಮೃದಂಗ, ಹಾರ್ಮೋನಿಯಂ ವಾದಕ

ಪೊಣ್ಣು ಜೋಕುಲು : 1. ಸುಧಾರಾಣಿ 2. ಮಮತಾ 3. ಸವಿತಾ 4. ಕವಿತಾ

ಮಾತಾ ಜೋಕುಲ್ಲಾ ವಿದ್ಯಾವಂತೆರ್, ಸಂಗೀತಗಾರೆರ್ ಬೊಕ್ಕ ಹರಿಕಥಾ ಕೀರ್ತನೆ ಕಾರ್ಯಕ್ರಮೊಡು ನಿರಂತರ ಸೇವೆ ಮಲ್ತೊಂದುಲ್ಲೆರ್.

ಶ್ರೀಶದಾಸೆರ್ 50 ವರ್ಷ ಪರ್ಯಂತ ಹರಿಕಥಾ ರಂಗೊಡು ಬೆನ್ನಿನ ಅನುಭವ ಇತ್ತಿನಾರ್. ಇತ್ತೆಲಾ ಬೇಡಿಕೆ ಇತ್ಂಡ ಹರಿಕಥೆ ಮಲ್ಪುವೆರ್. ಉಡುಪಿ - ಕಲ್ಪಂಕದ ಮಾರ್ಗದ ಬರಿಟ್ "ಶ್ರೀ ಸರಸ್ವತಿ ಮ್ಯೂಸಿಕಲ್" ಪಾಠಶಾಲೆಡ್ ಅನೇಕ ವಿದ್ಯಾರ್ಥಿಲೆಗ್ ಸಂಗೀತ ವಾದನದ ಶಿಕ್ಷಣ (ತಬ್ಬಾ, ಮೃದಂಗ, ಖಂಜೀರ, ಹಾರ್ಮೋನಿಯಂ ಇತ್ಯಾದಿ); ಕರ್ನಾಟಕ ಶಾಸ್ತ್ರೀಯ ಸಂಗೀತ; ಹರಿಕಥಾ ರಂಗೊದ ಶಿಕ್ಷಣ - ಇಂಚ ಅನೇಕ ಬಗೆತ ವಿದ್ಯೆಳೆನ್ ಕಲ್ಪಾವುನ ಶಿಕ್ಷಕರಾದುಲ್ಲೆರ್.

ಶ್ರೀಶದಾಸೆರ್ ಸುಮಾರು ಸಾವಿರಗಟ್ಟಲೆ ಬೂಕುಳೆಡ್ ಪದ್ಯ ಬರೆದ್ ಸಂಗ್ರಹ ಮಲ್ತ್ ದೀತೆರ್ ಪಂಡ್ ಆರೇ ಎನಡ ಪಂಡೆರ್. ಆರನ ಸ್ವಂತ ರಚನೆದ ಕೆಲವು ಕೃತಿಕುಳು:

ಯಕ್ಷಗಾನ ಪ್ರಸಂಗ ರಚನೆಲು:

1. ಉಡುಪಿ ಕ್ಷೇತ್ರ ಮಹಾತ್ಮೆ
2. ಗಣೇಶ ಜನ್ಮ
3. ಗರುಡ ಗರ್ವಭಂಗ
4. ಗುಣಕೇಶಿ ಕಲ್ಯಾಣ

ಹರಿಕಥಾ ಕೃತಿಗಳು: ಭಾಗವತ, ಮಹಾಭಾರತ, ರಾಮಾಯಣ, ಪದ್ಮಪುರಾಣದ ಕತೆಕ್ಲು. ಹರಿಕಥಾ ರಂಗೊಡು ಶ್ರೀಶದಾಸೆರ್ - ಕೀರ್ತನಾಲಂಕಾರ, ಹರಿಕಥಾ ವಿಶಾರದ ಪಣ್ಣಿ ಬಿರುದುಳೆನ್

ಪಡೆಯಾರ್. ಹರಿಸೇವೆದೊಟ್ಟುಗು ಸ್ವಂತ ಸೇವೆನ್ ನಿರಂತರ ಮಲ್ಪುನ ಇಂಚೀ ಮಹಾನುಭಾವೆರೆಗ್, ನಮ ತುಳುವೆರ್ ಗೌರವಾದರೊಟು ಅಭಿನಂದಿಸೋವೊಡೊಂದು ಪಣೋಂದು ಯಾನ್ ಪೂಜ್ಯ ಶ್ರೀಶದಾಸೆರೆಗ್ಲಾ, ಒಡಿಪುದ ಹಿರಿಯೆರಾಯಿಂಚಿ ಹರಿದಾಸಿ ಯಶೋದಮ್ಮಗ್ಲಾ ತರೆ ಬಗ್ಗೊಂದು ಅಕ್ಕನ ಅಶೀರ್ವಾದ ನಟ್ಟೋಣ್ಣೆ.

ಶ್ರೀಶದಾಸೆರೆ ತುಳು ಕೀರ್ತನೆಲು (16 ಕೀರ್ತನೆಲು) ನಮ್ಮ ತುಳುನಾಡ್ಡ ಹರಿದಾಸೆರೆ ತುಳು ಕೀರ್ತನೆಳೆಡ್, ಎಡ್ಡೆ ಹಜಪ್ಪುದ ಬೊಕ್ಕ ತೂಕವಾದುಪ್ಪಿಂಚಿ 'ಗಟ್ಟಿ' ಪದೊಕುಳು. ಆರೆನ ಕೀರ್ತನೆಳೆಡ್ ಗಣಪತಿ ಸ್ತುತಿ, ನೀತಿ ವಚನೊಲು, ದೇವತಾಸ್ತುತಿ, ಉಗಾಭೋಗ, ನಿಂದಾಸ್ತುತಿ, ನಿವೇದನೆ, ದಾಸ್ಯ, ಮುತ್ಸದೆ - ಯಮ ಸಂವಾದೊ ಪಣ್ಣಿ ಪ್ರಕಾರೊಡು ದಾಸೆರ್ ಬರೆತೆರ್ಂದ್ ಓದಿನಗ ತೆರಿಯೊಣೊಲಿ.

ನೀತಿ ವಚನೊಲು:-

"ಹಾಳ್ ಹರಟೆ ಬುಡ್ಡೆ | ಮನಸಾಡ್
ನಾರಾಯಣ ಪಣ್ಣೇ ||" (ಕೀ. ಸಂ. 2)

"ಬತ್ತಿನಿ ದಾಯೆಗ್ಂದ್ ತೆರಿದ್ ಬದ್ಕಾಲಾ -
ಕತ್ತಿದ ಬಾಯಿಡ್ ಕಾರ್ಡಿದ್
ನೆತ್ತಿದ ಕಣ್ಣ್ಡ್ ಸರಿಯಾದ್ ತೂದು
ಕುತ್ತುನಿ ಕಂಟೆಲ್ ಕೊಂಡತೊನಡಾ..."

ಮೂಲು "ನೆತ್ತಿದ ಕಣ್ಣ್ಡ್" ಪಂಡ ಜ್ಞಾನೊದ ಒಳಯಿದ ಕಣ್ಣ್ಡ್ ಸರಿಯಾದ್ ತೂವೊಣೊಡು ಪಣ್ಣಿ ಸಂದೇಶ ಕೊರೆರ್.

ಅಂಚಿನೇ

"ಕಾರ್ನ್ ದೀನಗ ಏರ್ ತಗ್ಗನ್ ತೆರಿಯಂದೆ
ಕಾರ್ ಜಾರ್ಡ್ ಬೂರುಂಡ, ಕುಸುಕುದು

ದೂರದೂರು ನಿಕ್ಕಾ ತಿಕ್ಕಂದ್ || " - ಪಣ್ಣೆರ್ (ಕೀ. ಸಂ. 3)

- ಮೂಲು "ದೂರದೂರು" ಪಂಡ ಮೋಕ್ಷ ಅಥವಾ ವೈಕುಂಠ ಪಣ್ಣಿ ಸಂದೇಶ.

"ಪೆಲಕಾಯಿದ ಮೇಣೊಡು ತಿಕ್ ಬೂರ್ನೊ ಕೆಲಂಜಿ
ಸುಲಭೊಡು ಪಾರ್ಗ್ ಸಾಧ್ಯಾವಾ ?" (ಕೀ. ಸಂ. 9)

ಏತ್ ಪೊರ್ಲುದ ಉದಾರ್ಮೆ ಕೊರ್ತೆರ್ ಈ ಪದೊಡು ದಾಸೆರ್. ನಮ ಮಾತಾ ಈ ಪ್ರಪಂಚೊದ ಸಂಸಾರೊ ಬಂಧನ ಪಣ್ಣಿ ಲೌಕಿಕ ಆಸೆದ ಪೆಲಕ್ಕಾದ ಮಯಣೊಗು ತಿಕ್ಕಾದ್ ಒದ್ದಾಡೊಂದುಲ್ಲ. ಅಯ್ಡ್ ಪಿದ್ಯಾ ಬರೋಡೊಂದಾಂಡ, ದೇವೆರೆನ ಸ್ಮರಣೆ ನಿತ್ಯ ಮಲ್ಪೊಡು ಪಣ್ಣಿ ಉಪದೇಶ ಕೊರೆರ್.

"ದಾನೇಂದ್ ನಟ್ಟುವೇ ನಿನ್ನ ಕೈಟ್ ಏನ್ ಇಸೇ|
ಅಪ್ಪೆ ನೀ ಕೊರು ಪಂಡ್ ನಟ್ಟುಗನಾ ನಿನ್ನ ಕೈಟ್
ಅಪ್ಪೆ ದಾದ ಕೊರ್ಯಳ್ ಧ್ರುವರಾಜಗ್ ||

"ಅಮ್ಮೆರೆನಿ ಕೊರ್ಪನಾ ಪಣ್ಡ್ ನಟ್ಟುಗನಾ
ಅಮ್ಮೆ ದಾನೆ ಕೊರಿಯೆ ಆ ಪ್ರಹ್ಲಾದಗ್ ?|| " (ಕೀ. ಸಂ. 14)

ಈ ಪದ್ಯೊನು ಓದಿನಗ ದಾಸ ಶ್ರೇಷ್ಠರೆಡೊರಿಯೆರಾಯ್ನೊ ಶ್ರೀ ಗೋಪಾಲದಾಸೆರೆ
ಕೀರ್ತನೆದ ಸಾಲುಳು ನೆಂಪಾವುಂಡ್.

ಶ್ರೀ ಗೋಪಾಲ ದಾಸೆರ್ -

"ಏನ ಬೇಡಲಿ ನಿನ್ನ ಬಳಿಗೆ ಬಂದು

ಜನನಿಯ ಕೊಡು ಎಂದು ಜಯವಂತ ಬೇಡುವೆನೆ
ಜನನಿ ಏನಿತ್ತಳಾ ಧ್ರುವರಾಯಗೆ ||
ಜನಕನ ಕೊಡು ಎಂದು ಜಗದೀಶ ಬೇಡುವೆನೆ
ಜನಕನೇನಿತ್ತನಾ ಪ್ರಹ್ಲಾದಗೆ ?|| "

ಇಂಚಿ ಗೋಪಾಲ ದಾಸೆರೆ ಪದ್ಯೊನು ಅನುವಾದ ಮಲ್ತೆಲೆಕ್ಕ ತೋಜುಂಡು. ಅಂಚೆನೇ
ಕೀ. ಸಂ. 13 - ಪುರಂದರದಾಸೆರೆ ಪದ್ಯೊನು ಅನುವಾದ ಮಲ್ತೆಲೆಕಾ ತೋಜುಂಡು. ತುಳುಭಾಷೆಡ್
ಹರಿದಾಸೆರೆ ಉಗಾಭೋಗ ಒಂಜಿ ವಿಶೇಷ ರೀತಿಡೇ ನೈದ್ಂಡ್!

" ಕಲ್ಲಾದ್ ಬೂರ್ದಿತ್ತಿ ಅಹಲೈ ಮಲ್ಲೆ ಬೇಡೆರೆ ಕುಲೊತ ಗುಹ, ಕಾಡ್ ಮರೊಟುಪ್ಪಿ
ಚಂಚಲ ಸ್ವಭಾವೊದ ಕಪಿಕ್ಲೆನ ಉದ್ಧಾರ ಮಲ್ತಿನ ಶ್ರೀರಾಮೆ - ಈ ಮೂಜಿ ಗುಣೊಕುಲ್ಲಾ
ಉಪ್ಪಿ ನರಮಾನ್ಯನೆನನ್ ಉದ್ಧಾರ ಮಲ್ತೊಲ್ಯತ್ತಾ " - ಪಂಡ್ ನಿವೇದನೆ ಮಲ್ತೊಂದೆರ್
ಶ್ರೀಶದಾಸೆರ್ (ಉಗಾಭೋಗ, ಕೀ. ಸಂ. 16).

ಮುತ್ತೈದೆ - ಯಮ ಸಂವಾದೊ (ಕೀ. ಸಂ. 6) - ಬಾರಿ ಪೊರ್ಲುಡೇ ಸಂವಾದ
ಬರೆತೆರ್. ಕಣ್ಣ್ ಕೈಕಾರ್ ಗಟ್ಟಿ ಇತ್ಂಡಲಾ, ಕಾಲ ಕೂಡ್ ಬನ್ನಗ ಮಾತೆರ್ನಾ ಒಂಜಿ ದಿನ
ಯಮಲೋಕೊಗು ಪೋವೊಡೇ. ಕಾಯಾ, ವಾಚಾ, ಮನಸಾ ಶ್ರೀಶನ (ದೇವೆರೆನ) ಸ್ಮರಣೆ
ಮಲ್ತಾದ್ ಉದ್ಧಾರಾಲೆ ಪಣ್ಣೆರ್ - ಶ್ರೀಶದಾಸೆರ್. ಇಂಚಿ ಕೀರ್ತನೆಲೆನ್ ಬರೆದ್, ಹರಿದಾಸ
ಸಾಹಿತ್ಯೊದ ತುಪ್ಪೆನುರ್ಕಾಯ್ನ ಪೂಜ್ಯ ದಾಸೆರೆಗ್ ನಮ್ಮ ತುಳು ನಾಡ್ ತುಳುವೆರೆನ ಪರವಾದ್,
ಯಾನ್ ಸೊಲ್ತೆ ಸಂದಾವೆ.

|| ಶ್ರೀಕೃಷ್ಣಾರ್ಪಣಮಸ್ತು ||

4. (ಅ) ತುಳು ಕೀರ್ತನೆಲು

1. ಶ್ರೀವಾದಿರಾಜ ಸ್ವಾಮಿಯೆರೆನ ತುಳು ಕೀರ್ತನೆ

ರಾಗ: ಷಣ್ಮುಖಪ್ರಿಯ

ಮಟ್ಟತಾಳ

ಲೇಲೇಲೇ ಲೇಲೇ ಕಂಡು ಲೇಲೇಲೇಗಾ	ಪ
ಲೇಲೇಲೇ ಲೇ ಲೇ ಕಂಡು ಲೇಲೇಲೇಗಾ	ಅ.ಪ.
ಕಣ್ಣ್ ಬುಡ್ಡ್ ನೀರ್‌ಡ್ ತೂಪಿನಾರ್ ಏರ್‌ಗಾ	
ಅಣ್ಣೆ ಪಣ್ಣೆ ಕೇಣ್ಣೆ ಮತ್ಸದೇವರತ್ತೆಗಾ	೧
ಪರ್ವತಾನಿ ಬೆರಿಟ್ ದೀದ್ ದೆರ್ತಿನೇರ್‌ಗಾ	
ಸರ್ವಲೋಕದೊಡೆಯ ಕೂರ್ಮ ದೇವರತ್ತೆಗಾ	೨
ರಕ್ಕಸಾನಿ ಕೆರ್ಡ್ ಭೂಮಿದೆರ್ತಿನೇರ್‌ಗಾ	
ಧಾತ್ರಿ ಸಲಹಿದಿತ್ತಿ ವರಹದೇವರತ್ತೆಗಾ	೩
ಕರಳಮಾಲೆ ಕಂಟೆಲ್‌ಡ್ ದೀತಿನೇರ್‌ಗಾ	
ಮರಳದಾನಿ ಶೂರೆ ನಾರಸಿಂಹರತ್ತೆಗಾ	೪
ಚಕ್ರಪಾಣಿ ಬಲಿಟ್ ಭೂಮಿ ನಟ್ಟಿನೇರ್‌ಗಾ	
ಚಕ್ರಪಾಣಿ ಅದಿತಿಪುತ್ರ ವಾಮನತ್ತೆಗಾ	೫
ಕ್ಷತ್ರಿಯೆರೆನಿ ಬಾರಿ ಸರ್ತಿ ಕೆರ್ತಿನೇರ್‌ಗಾ	
ಸತ್ಯ ಪಣ್ಣೆ ಕೇಣ್ಣೆ ಪರಶುರಾಮರತ್ತೆಗಾ	೬
ಉಪ್ಪುನೀರ್ ಕಡಲಕಟ್ಟ ಕಟ್ಟಿನೇರ್‌ಗಾ	
ಸರ್ಪಶಾಯಿ ರಾಮರೆನಿಪಿ ದೇವರತ್ತೆಗಾ	೭
ಅರ್ಜುನಾಗ್ ಸಾರಥಿತ್ವ ಮಲ್ತಿನೇರ್‌ಗಾ	
ನಿರ್ಜರಾರಿ ಬಲತಿ ಕೃಷ್ಣ ದೇವರತ್ತೆಗಾ	೮
ವಸ್ತ್ರ ಬುಡ್ಡ್ ಬತ್ತಲೇಡ್ ಉಂತಿನೇರ್‌ಗಾ	
ಸೂತ್ರಧಾರೆ ಬೌದ್ಧರೆನಿಪಿ ದೇವರತ್ತೆಗಾ	೯
ಕುದುರೆ ಮಿತ್ತ್ ಮಿತ್ತೆರ್‌ಂದ್ ತಿರ್‌ಗಿನೇರ್‌ಂಗಾ	
ಭದ್ರಕಾಯೆ ರಾಜೆರೆನಿಪಿ ದೇವರತ್ತೆಗಾ	೧೦

2. ಶ್ರೀ ವಿಶ್ವೇಂದ್ರ ತೀರ್ಥರನ ತುಳು ಕೀರ್ತನೆ

ರಾಗ - ಬೇಹಾಗ್ ತಿಶ್ರಜಾತಿ

ಏಕತಾಳ

ಮದಿಮೆ ಒಂಜಿ ದ್ರುಪದರಾಜ ಮಂದಿರೊಂಟು |
ಬುದೆಲಾಡ್ ಚುರುಟಿ ಫೇಣಿ ರಾಶಿ ರಾಶಿ ||ಪ||

ಅಂದಡೆಂಕ್ಕು ಬೇಗ ಪೋಂಡ ಬೋಡನಾತ್ |
ತಿಂದ್ ತಿಂದ್ ಪೋವಳ್ಕಾತ ಬೇಗ ಬಲ್ಲೆ ||೧||

ಪೋನಗಾಕ್ಕೆ ಪಯಿಕ್‌ಡೊರಿ ಜಿಂಜ ಬೀರ್‌ಸೆ |
ಸುಂದರಾಂಗ ಭೀಮದೇಹ ಸೂತು ಪಣುಪೆ ||೨||

ಅಂದಡೆಂಕ್ಕೆ ಪಯಿಕ್‌ಡ್ ಇಂಬೈ ದ್ರೌಪದೀನಿ |
ಮಂದ ಮಂದ ಪೋತು ಪೋತು ತುಂಬುವೆ ಸತ್ಯ ||೩||

ಇಂಚ ಮಂತ ಭೂಸುರೇಕ್ಕೆ ಸಂಘಾ ಸಂಘಾ |
ಚಂಚಲಾಕ್ಷಿ ಕಥೆನ್ ಮಂತ ಪಣುಪೆರಾತಾ ||೪||

ಪಂಚಪಾಂಡವೇಕ್ಕೆ ಮನಸ್ ಪಂಚಬಾಣ |
ವಂಚನೇಗ್ ಶಿಕ್‌ನಾತ ಜಾನೆ ಪಣ್‌ಕೆ ||೫||

ರಾಜನಾಥ ಹಯಮುಖಾಂಫಿ ನೆನತೊಂತು |
ಪೋಪಿ ಪೋರ್ಲು ಸೂವೆರೇಗ್ ಬೇಗ ಬಲ್ಲೆ ||೬||

3. ಪಾವಂಜಿ ಲಕ್ಷ್ಮೀನಾರ್ಣಪ್ಪಯ್ಯರನ ತುಳು ಕೀರ್ತನೆಲು

1.

ಜಾನೆ ಪಣ್ಣುಣ ಅತ್ತಿಗೆ ಏತ್ | ಸಮ- |
ಧಾನ ಮನಸ್‌ಗ್ ಗೆತೊಣಿಗೆ ||
ಮಾನ ಮರ್ಯಾದಿ ಈತ್ | ಇದ್ಯಾಂಡ |
ಕೇಣುವೆರ್ ಏರ್ ಬೆತ್ ||೧||

||೧||

ತೆಳಿಕ್ ಸರಿ ಅಳೆತ ನೀರ್ | ಕೊಡ್ಲೆಲ್ಗಾ |
 ಪುಳಿ ಹೆಚ್ಚಿ ಪಾಡ್ಡಾನೇರ್ ||
 ಕಲೆಂಗ್‌ದಾನೊ ಕಜಿಪು ಮಂತಾ | ಎಡ್ಡೆಂತೊ |
 ಬಳೆಸುಣೊ ಬಾಳ ಒಂತ ||೨||


ಅಟ್ಲ ಮಂತತ್ ಪಿನಯಳ್ | ಇಲ್ಲೊಳ್ತ |
 ಕಟ್ಟಿ ಪೂರ್ಲಪ್ಪ ಇಂಬಳ್ ||
 ಗಟ್ಟಿಗದಿ ಪಣಿಯರಿದ್ಡಿ | ಪೊಣ್ಣೋವೆ |
 ಹುಟ್ಟಿತ್ತ ನಾಯಿಬುದ್ಡಿ ||೩||

ದಿಬ್ಬಣಂತ ಪೊಣ್ಣೋವೆನ್ | ಬರಡ್‌ಂತ |
 ಬೊಬ್ಬೆ ಪಾಡಿಯಳ್ ತಾನ್ ||
 ಡಬ್ಬುಪಾತೆರ ಪಂಡತ್ | ಬತ್ತಿತ್ತೆ |
 ಗೊಬ್ಬುವಳ್ ಸಿತ್ತಮಿತ್ತ ||೪||

ಮಣ್ಣಂಚಿಸೀರೆ ಸುತುತು | ನಲಿಪುವಳ್ |
 ಬಣ್ಣಗಾರಿಕೆ ಸೋಜೋತು ||
 ಕಣ್ಣ ಮಂತಾಣ್ಣೋವೆಡ | ಪೊಣ್ಣೋವೆ ||
 ಗಣ್ಯ ಒಂತಾಂಡ ಉಂಡ ||೫||

ಕರಂಟ್ ಪೋತುನು ಪರಮಾನ್ನ | ಅತ್ತಿಗಿಗ್ |
 ಒರಂಟ ಎಂಕುಳೆಡ ಜಾನ್ನ ||
 ಸಿರಂಟ್ ಪೋತುನ ನೈವೇದ್ಯ | ಅಂಬಡೆದ |
 ಕೊರಂಟಾತ್ ಇರೆಟ್ ಇದ್ಯ ||೬||

ಭಾರಿ ಒಣಸಾನ್ ನಂಕ್ | ಪಾಪಪ್ಪ |
 ನೀರ್ ಕೊಣಬಲ್ಲ ಎಂಕ್ ||
 ಊರುಡೀ ಕೀರ್ತಿಪೋಯ ಶ್ರೀ | ಲಕ್ಕೋ- |
 ನಾರಾಯಣನೊ ನಿಜ ಮಾಯ ||೭||



2

ನೀರಜಾಮುಖಿ | ನೀರೋಂಡು ಪಣ್ಣಪ್ಪ ||ಪಲ್ಲ||
 ನೀರಜಾಮುಖಿ ನೀರೋಂಡು | ಇನ್ನೊ |
 ಭಾರಿ ಸಂಭ್ರಮ ಬಜಿ ಬಂಡ್ | ಆಹಾ |
 ಸೀರೆದ ಸೆರಗ್‌ನ್ ವಾರೆ ಅಂತತ್ ಕಿಂಞ |
 ಮೋರೆಡ್ ಎದುರುಡು ಪಾರ್ ಪೋಪುಣ ಪಾಪು ||ಅನು||

ಕಜಿಪು ಗಿಜಿಪು ಜಾನೆ ಪಣ್ಣೆ | ಅರೆ- |
 ಪಜಿಯಂತದಳಾತ್ ಸರಿಕೆ | ಬಾಯಿಡ್ |
 ಬಜಿ ಡಬ್ಬು ಪಾತೆರ ನಿಲೈ | ಆಹಾ |
 ಯಜಮಾನ್ತಿ ಮೋರೆನ್ ಸಜಪೊಡು |
 ಪೊಣ್ಣೋವೆ ನದಾರಿದ್ಡಿ ಈ ಇನ್ನೊ |
 ಮೆಜಿಕ್‌ನ್ ಸೋಜೋತ ||೦||

ಸಾರ್ ಅಂತದಿ ಸೌಭಾಗ್ಯ | ನನ |
 ಏರೆಡ ಪಣ್ಣೆ ವೈರಾಗ್ಯ | ತೇಕೆ |
 ಬಾರ್ ಉಡಿಗಿರೆಗುಂದು ಯೋಗ್ಯ | ಆಹಾ |
 ಭಾರಿ ಭೋಜನ ಪುಳಿ ಸಾರ್‌ಡ್ ತೀರ್‌ನ್ |
 ಕೇರಿಗ್ ಈ ಒರ್ತಿ ಬಜಾರಿ ಇತ್ತಂಡ ಪಾಪು ||೨||

ಪಾಪು ಪರಮಾನ್ನಂತೊ ಸುದ್ದಿ | ಬೆಲ್ಲ |
 ಸೂಪೋತ್ತ್ ಮಾತ್ರ ಬೆತ್ತಿದ್ಡಿ | ಜಾಲ |
 ತೀಪೆದೊ ಬಾಬೇ ಇದ್ದಿ | ಆಹಾ |
 ಸೂಪೋಲ ಮೋರೆನ್ ಏ ಪಾಪಿ ಅತ್ತಿಗೆ |
 ಕೋಪ ಅಂಪಡ ಇನ್ನೊ ಸುರ್ಪನ್ ಮಾರಿಯ ||೩||

ಗುಣುಗುಣು ಒಳೆಯಿ ಪಾತೆರುವ | ಇರೆನ್ |
 ಗೆಣೆತ್ ಗೆಣೆತ್‌ತ್ ಬಳಸುವ | ಮಾಂತ |
 ಜನನ್ ಸೂಸೂತು ತೆಳಿಪುವ | ಆಹಾ |
 ಗುಣವಂತೆ ತಾನ್‌ಂತ ಹಾಂಕಾರ ಸೋಜೋಪ |
 ಉಣುಗುಂಡಲ ಕೈ ಮಿಣಿಮಿಣಿ ಸೂಪ ||೪||

ಕೆಲೆಂಜಿರಾಪುಣು ಇರೆತ್ತೊ ಮಿತ್ತ್ | ನನ |
 ಬಿಳೆಸುಣೊ ಬುಡು ಆನ್ ಮಸ್ತ್ | ಬಂಜಿದ |
 ಒಳೆಯಿ ಮಗ್ತಾರುಣು ಪಿತ್ತ್ | ಆಹಾ |
 ಜಲಜನಾಭೆ ಲಕ್ಷ್ಮೀ ನಾರಾಯಣೆ ನಂಕ್ |
 ಒಲಿಪಿ ಉಪಾಯನ್ ನೆಲೆಮಂತ್ ಸೂವೊಡು ||೫||

3. ಪ್ರೀತಿಯಾಪುಣು ಇನನ್ ಸೂನಗ | ಏವೋಲ ಇನ್ನೊ |
 ನೂತನಂತೊ ಪಾತೆರ ಕೇಣ್ಣಗ ||
 ಏತ್ ಜೇವಳೆಗಾಲಾ ಇನ್ನೊ |
 ರೀತಿ ಬರನ್ ಸೂವರೆ ಪೋಂಡ ||
 ಜಾತಿ ನಾಯಕಿ ಇನನ್ |
 ಸೂತು ಮನಸ್ ಸೋತು ಪೋನು ||೧||

ಗಾಜಿದೊ ಬುರುಡೆದೊ ರೀತಿ ಸೋಜುಣು ಮಿರೆ ಕೈತೊ |
 ಕಾಜಿ ಎಡಕಾಜಿಜೀತ್ನೊ ಸಾಜ ಸೂವರೆ ||
 ಮಾಜಿ ಪೋವನ್ ಇನ್ನೊ ಮೋಣೆದೊ |
 ತೇಜ ಚಂದ್ರನ್ ಮಿಕ್ಕುತುಂಡು ||
 ತಾಜ ಪುತ್ತೊಳಿ ಬೊಂಬೆ ಇನಟ |
 ಮೋಜು ಮಂಪೊಡಿನ್ನಾಜೆ ಎಂಕ್ ||೨||

ಎಣ್ಣ್ ತೆಣ್ಣ್ ತ್ ಇನ್ನೊ ಗುಣನ್ ಎನ್ನೊ ಮೈಮಂತ ಬಚ್ಚಿನ್ |
 ನಿರ್ಣಯೊಂಕುಲ ಇನಟ ಪಂಥ ಆಂಡಲ ||
 ಕಣ್ಣ್ ಪಾಪನ್ ಇನ್ನೊ ಮೈತ |
 ಬಣ್ಣ ಬಂಗಾರ್ದೊ ವರ್ಣ ಸೋಜುಣು ||
 ಭಿನ್ನ ಮಂಪಡ ಮಮತೆಯುಂಡುಡ |
 ಪಣ್ಣ ಪಾತೆರ ಕೇಣ್ಣ ನಿಶ್ಚಯ ||೩||

ಬಾಳ ಪಾತೆರ ಜಾಯೆಗಿನಟ ಲೋಲಮಂಪಂತೆ ಮನಸ್ |
 ಜಾಲ ಒಯಿಟ್ಟ ಬೂಳುಣದ್ದಿ ಇನ್ನೊ ||
 ಲೀಲೆ ಸೂವಂತೆ ನಮನ್ |
 ಶ್ರೀಲಕ್ಷ್ಮೀನಾರಾಯಣನೆ ||
 ಪಾಲನೆ ಮಂಪೆ ಬಾಲೆಳೆನ್ ಸಹಕೊಳ್ಳು |
 ಮೇಲ್ ಮಂಪೆ ಗೋಪಾಲಕೃಷ್ಣೆ ||೪||

4. ವಾರಿಜಮುಖಿ ಕೇಣ್ಣಿ ನೀರ್ ಗೆತೋಣ್ಣಿ | ಎಡ್ಡೆ ನೀರ್ ಗೆತೋಣ್ಣಿ |
 ಭಾರಿ ಉಬ್ಬೆಸ ಭಾಳ ಜೋರಾನ್ ಪಣ್ಣಿ ||ಪ||

ಜಾರ್ತ್ ಬೂಳ್ಳಡ ಕೈ ಊರುತು ಲಕ್ಕಾಲ |
 ಮೋರೆದೊ ಮಡೆ ಜಿಂಜನೀರ್ಡ್ ಜೆಕ್ಕಾಲ ||
 ಸಾರ್ ಪರಮಾನ್ನ ಪಾರಣೆ ಕೊಳಾಯ |
 ದೂರಿ ಪಾತೆರ ಪಣ್ಣುಣ ಸರಿಯು ||ಅನು||

ದೊಂಡೆಬಿಚ್ಚಿನ ಮುಟ್ಟು ದೂರ್ತೆಂಕುಳೆನ್ |
 ಸೆಂಡಿಗೆ ರಾಶಿನ್ ತಿಂದಳ್ ತಾನ್ ||
 ಮಂಡೆಡ್ ನೀರುಂಡು ಮೆಲ್ಲನೆ ಬರಡ್ |
 ಗುಂಡುದೊ ಶಬ್ದೊಂಟು ಬರ್ಪುಣು ಕರಡ್ ||
 ದಿಂಡೆರ್ ಮಾಂತ ಆಣ್ಣೋವುಳೆ ಸಭೆಟ್ |
 ಚೆಂಡೆದ ಲೆಕ್ಕನೆ ಬೂಳ್ಳಳ್ ನೆಲಟ್ ||೧||

ಲೆಕ್ಕ ಅಂಪರೆ ಬಲ್ಲಿ ಚಕ್ಕುಲಿ ಅಗಿನೋ |
 ಚೊಕ್ಕ ಇರೆಟ್ ಪಾಡ್ಣೊ ಮಾಂತಲ ಮುಗಿನ್ ||
 ಬೊಕ್ಕಸಂತಲ್ಕನೆ ಸೋಜುಣು ಬಂಜಿ |
 ಮುಕ್ಕುನೊ ಪಾಪನ ಎರ್ಮೆದೊಕಂಜಿ ||
 ಲಕ್ಕರೆ ತೀರುಣ ಜಾನೆಂತ್ ಪಣ್ಣಿ |
 ಫಕ್ಕನೆ ತೆಳಿಪೆರ್ ನಾಚಿಕೆ ಕೇಣ್ಣಿ ||೨||

ಒಂಜಿ ಸೋಜುಣು ಓಡಾರಿನೊ ಮಣ್ಣು ಗುಳ್ಳೆ |
 ಕಂಜಿ ಪಾಡ್ವಳ ಜಾನ್ನ ಜಾನೆಂತ್ ಪಣ್ಣೆ ||
 ಒಂಜಿ ಜುಲಾಬುದೊ ಮಾತ್ರೇನ್ ಕೊಳ್ಳೆ |
 ಗಂಜಾಂಡಲ ಒಂತ ಪರ್ವಳ ಸೂಕ ||
 ಕಂಜನಾಭೆ ಲಕ್ಷ್ಮೀನಾರಾಯಣೆ ನ- |
 ಮ್ಮಂಜಿಕೆ ಮಾಂತ ಪರಿಹರಿಪೊಡು ನನ ||a||

4. ಪಣಂಬೂರು ಗುರು ಸದಾನಂದರೆನ ತುಳು ಕೀರ್ತನೆಲು

೧. ರಾಗ - ಆರಭಿ

ತ್ರಿಪುಟ ತಾಳ

ನಾರಾಯಣ ಸ್ವಾಮಿ ದೇವರೆ | ಎಂಕ್ಕು
 ಕಾತೊಂದುಳ್ಳ ಈರೆನ್ ತೂಯರೆ ||ಪ||
 ಏರ್ದ್ ಗರುಡ ಮಿತ್ತ | ಸವಾರಿ ಮಲ್ತದೆಂಕೆ ಮಿತ್ತ |
 ಕರುಣ ದೀದ್ ಈರೆ ಪೊರ್ಲುನು | ವರ ಎಂಕೆಗ್ ತೋಜಾವುಲೆ ||ಅ.ಪ.||

ಕೋಟಿ ಸೂರೈರೆ ಲೆಕ್ಕ ತೋಜುನ |ಕಿ|
 ರೀಟ ತರೇಟ್ ಈರ್ ದೀತಿನ ||
 ನೀಟಾ ಇಂಚಿ ಕುಂಡಲೊಳೆ | ನಾಟದ ಹುಬ್ಬುದ ನಡುಟ್ |
 ಗೀಟ್‌ದಲ್ಕ ಉಪ್ಪುನಾಮ | ಬೊಟ್ತ್ ಇತ್ತಿ ಶ್ರೇಷ್ಠ ಪೊರ್ಲುಡ ||೧||

ಕರುಣಾಕಟಾಕ್ಷದ ಕಣ್ಣದ | ಪೊಸ |
 ಪರಿಟ್ ತೋಜುಂಡ್ ಮೂಂಕ್ ಮೋಹದ ||
 ಅರುಣೋದಯದಲಕ್ಕ ತುಟಿಕುಳ್ | ಬೆರವೊಂದುಪ್ಪಿ ಸಾಲ್‌ಡ್ ಕೂಳಿಲು |
 ಅರಲ್ಲಿ ಕಮಲದಲಕ್ಕ ಮೋರೆ | ಭೂರಿ ಪ್ರಕಾಶೋಡ್ ಬೆಳಗೊಂದುಪ್ಪುನ ||೨||

ರತ್ನಾದಿ ಆಭರಣ ಮೈಟುಪ್ಪುನ | ಎಡ್ಡೆ |
 ಪುತ್ತೊಳಿ ಲಕ್ಕಂತಿ ಕುಂಟ್ ತುತ್ತಿನ ||
 ವಿಸ್ತಾರೊಡ್ ನಾಲ್ ಕೈಟ್ | ಪತ್ತೊಂದುಪ್ಪಿ ಆಯುಧೊಳ್ |
 ಕಸ್ತೂರಿ ಗಂಧಾದಿಲೆಡ್ | ಅರ್ತಿಡ್ ಲೇಪನದ ಪರಿಮಳದ ||a||

ಶರಣೆರೆನುದ್ಧಾರ ಮಲ್ಪುನ | ಕಾರಾದ |
 ಉರಿಗೆಜ್ಜೆ ಪಾಡಗ ವಿನೋದದ ||
 ಬೆರಲ್ಡ್ ರತ್ನಾದಿಳೆಡ್ | ಎರೆಗೊಂದುಪ್ಪಿ ಉಂಗುರೊಳ್ |
 ಮಿರಿಮಿರಿಂದೆದ್ ತೋಜುವುಗುರಾದ | ಮೆರೆವುಂದುಪ್ಪಿ ಪಾದೊಳ್ ಮಹಿಮೆದ ||೪||

ಮಲ್ಲಿಗೆ ಜಾಜಿ ಸೇವಂತಿಗೆ ಪಿಂಗಾರ | ರೆಂಜೆ
 ಸುಳ್ಳಿ ಸೌಗಂಧಿ ಮಂದಾರ ||
 ತುಲಸಿ ಕಮಲ ವೈಜಯಂತಿ | ಎಲ್ಯ ಗೋರಟೆ ದುಂಡ್‌ಮಲ್ಲಿಗೆ |
 ಬಿಲ್ಲುಪತ್ರ ಗುಲಾಬಿ ಪೂಕುಳೆ | ಮಾಲೆದಲಂಕಾರ ಮೂರುತಿ ||೫||

ಭೇರಿ ನಗಾರಿ ಶಂಖ ದುಂದುಭಿ | ಮೃದು |
 ಸಾರಸ್ವರತ ವೀಣಾ ತಂಬುರಿ ||
 ಬಾರಿ ಕಹಳೆ ವಾದ್ಯ ಕೊಳಲು | ಹಾರೊನಿ ಮೃದಂಗ ಪಿಟಿಲು |
 ಸಾರಂಗಿ ಸಿತಾರ್ ತಬಲ | ದರ್ಬಾರಾದ ಸೇವೆ ಬಿರಾದ್ ||೬||

ಸೊಗಸಾದ ಮೃಷ್ಟಾನ್ನ ಭಕ್ಷ್ಯ ಪಾಯಸ | ಎಡ್ಡೆ |
 ತಿಗತನೆಯ್ ಸಕ್ಕರೆ ಪಂದ್‌ರ್ ಗೋರಸ ||
 ಬಗೆಬಗೆತ ಬಜ್ಜೆಯಿ ಬಚ್ಚಿರೆ | ಮಿಗಿಲಾದ್ ಅರ್ಪಿತ ಮಲ್ತಾದ್ |
 ಗುಗ್ಗುಲ ಧೂಪಾರತಿನ ಬೆಳಗಾದ್ | ಭಾಗವತೆರೆ ಸಂಕೀರ್ತನೆ ಕೇಣುನ ||೭||

ರಂಭಾದಿ ಉರ್ವಶಿಳೆನ ನರ್ತನ | ಎಡ್ಡೆ |
 ತುಂಬುರೆ ನಾರದೆರ ಗಾಯನ ||
 ಇಂದ್ರಾದಿ ದೇವರ್ಕೊಳ್ ಜಯಜಯತೆಂದಾದ್ | ವಂದನೆ ಮಳ್ತಾದ್ ಮಾತ |
 ಅಂದವಾಯಿನ ತರತರ ಪೂತ | ವೃಂದ ಬರ್ಸ ಸ್ವೀಕರಿಸೊಣೈ ||೮||

ಭಕ್ತವತ್ಸಲ ಎನ್ನಿ ಬಿರುದಾದ | ಇರೆ |
 ಕೀರ್ತಿ ಕೇಂಡಾದ್ ಪಾದ ಸೇರಾದ ||
 ಅರ್ತಿಡೆಂಕ್ಯನ್ ಆದರಿತಾದ್ | ಪ್ರೀತಿಡೆಂಕ್ಯೆ ಇಷ್ಟಾರ್ಥ ಕೊರ್ದ್ |
 ಭಕ್ತಿಭಾಗ್ಯದ ನಿಜಪದವಿಡ್ | ಮುಕ್ತಿಸುಖದ ಸದಾನಂದ ಕೊರ್ಲೆ ||೯||

೨. ರಾಗ : ಮೋಹನ

ಅಷ್ಟತಾಳ

ಶರಣಾಗತರಾದ್ ನಟೋಣ್ಣ ಯೆಂಕುಳ್ |
ಕರುಣಾಸಾಗರ ಪರಮಾತ್ಮಾ ||
ಹರಿಯೆ, ಮಾಯೆ ಸೃಷ್ಟಿ ಮಲ್ತಿನಿ |
ದೊರೆಯೆ, ಈಯೆ ತಾಂಕೊಂಡುಪ್ಪುನಿ |
ಗುರುವೆ, ಈ ಸುಚ್ಛಾನ ಕೊರ್ದಾ |
ಸ್ಥಿರ ಸುಖೋಟ್ ಸರ್ವೆರೆನ್ ಕಾಪುಲ

||೧||

ಮತಿಗೆಟ್ಟಾದೆಂಕೆನ್ ಗತಿಗೆಟ್ಟಾ ಬತ್ತಾದ್ |
ಯೆತೆ ಪತ್ತಾದೆಣ್ಣುಣಾಂಡೆ ||
ಮತಿನ ನಿರ್ಮಲ ಮಳ್ತಾದೆಡ್ಡೆ |
ಗತಿನ ತೋಜಾದ್ ಯೆತೆ ಪರಿಹರಿಸಾದ್ |
ಪತಿತ ಪಾವನಯೆನ್ನಿ ಬಿರುದಾದ |
ಕತೆಕುಳಂದಾಡ ಕೀರ್ತಿ ಮೆರೆಸಲ

||೨||

ಚಂಚಲೊಡುಪ್ಪೀ ಪ್ರಪಂಚ ಸಂಸಾರೊಡ್ |
ಯೆಂಚ ಉಪ್ಪುನಿ ದಾನೆಂದ್ ||
ಅಂಚನೆಂಚನ ಯೆಂಚನೆನಿಪೀ |
ಇಂಚಿನಾಕ್ಕೆಗ್ ಇಂಚನೆಂದಾದ್ |
ವಂಚನೆಚ್ಚಾಂದೆ ಭಕ್ತರೆನ್ನೀ |
ವಾಂಚಲೊಡ್ ಇಷ್ಟಾರ್ಥ ಕೊರ್ಲ

||೩||

ಆಯುರಾರೋಗ್ಯ ಸದ್ಭಾಗ್ಯದಾನಂದೊಡ್ |
ಈಯೆಂಕುಗಿಷ್ಟಾರ್ಥ ಕೊರ್ದ್ ||
ಬಾಯಿಡೇಪಲ ನಿನ್ನ ಸ್ಮರಣೆಡ್ |
ಪ್ರಿಯರಾಯನಿನ ಭಕ್ತ ಸಂಗೊಡ್ |
ಈಯೆ ಎಂಕೆನ ಬಂಧುವಾದ್ |
ಶ್ರೇಯಸ್ಸಾಡ್ ತಾನೊಣು ಸದಾನಂದ

||೪||

೩. ರಾಗ : ಕಾಂಬೋಧಿ

ಅಷ್ಟತಾಳ

ಸುಖ ದುಃಖೋಗ್ ಕಾರಣ ದಾನೆ | ಏರಾಂಡ ಪಣ್ಣೆ | ಅತ್ತಂಡ ಕೇಣ್ಣೆ |
ಸುಖ ದುಃಖೋಗ್ ಕಾರಣ ದಾನೆ ||

ಸುಖೋಕ್ ದೇಹ ಸೌಖ್ಯ ಬೋಡು |
 ಸೌಖ್ಯೋಗ್ ಆರೈಕೆ ಬೋಡ್ |
 ಮುಖ್ಯ ದೇಹಾರೋಗ್ಯ ಮಲ್ಲೆರೆ |
 ರೋಕ್ಯ ರೂಢಿ ಮಳ್ಳೊಂದುಪ್ಪೊಡ್ ||೧||

ಸಾತ್ವಿಕ ರಾಜಸ ತಾಮಸಲ | ಈ ಮೂಜಿ ಗುಣೊಟ್ |
 ಸತ್ಯ ಗುಣನೆ ಮೇಲ್ ಮಾತೆಕಾಲ ||
 ಒತ್ತಡ್ತಿರೀ ರಾಜಸಗುಣ |
 ಕುಸ್ತಿದಾಕ್ಯೆಗ್ ಮುಖ್ಯ ಕಾರಣ |
 ವ್ಯರ್ಥ ತಾಮಸಾನರ್ಥ ಮಲ್ತಾದ್ |
 ನಿತ್ಯ ದುಃಖೋಗ್ ತಾದಿ ಮಳ್ಳೊ ||೨||

ಮಾತ ಗುಣಲ ಆಹಾರೊಡಾಪಿನಿ | ಅಯ್‌ನಾವಂತೆ ಪಣ್ಣೆ |
 ವಾತಪಿತ್ತಶ್ಲೇಷ್ಮ ಡುಪ್ಪುನಿ ||
 ಈತೆಟೊಂತೆ ಮಿಕ್ಯದ್ ಪೋಂಡ |
 ಅತ್ತಡೊಂತೆ ಕಡಿಮೆಲಾಂಡ |
 ಕುತ್ತ ತಪ್ಪಂದ್, ಸತ್ಯ ಉಪ್ಪಂದ್ |
 ಮೃತ್ಯು ಬತ್ತದ್ ನುರ್ತ್ ತಿನ್ನು ||೩||

ತಾಮಸ ಆಹಾರೊಡಾಪಿನಿ | ಇತೆಪಂಡಿಯವಗುಣ |
 ಜನ್ಮನೆಂಚಲ ಹಾಳ್ ಮಳ್ಳುನಿ ||
 ಕಲ್ಮಶೊಳ್ ಹೆಚ್ಚಿಗಾದ್ |
 ದುರ್ಮನಸ್‌ಗ್ ಕಾರಣಾದ್ |
 ಧರ್ಮ ತತ್ತದ ಧರ್ಮ ಬುದ್ಧಿದ |
 ವರ್ಮವಾಪಿನಿ ನರಕೊಡರ್ಪಿನಿ ||೪||

ರಾಜಸ ಆಹಾರ ತಿಂದೊಂಡ | ಮದಗರ್ವ ಹೆಚ್ಚಾದ್ |
 ಪೂಜೈರೆನ ಶಾಪ ಪಡೆವೊಂದ್ ||
 ಸಜ್ಜಿ ಮಲ್ತಾದ್ ಇಲ್ಲ್ ಬೂರ್ಡ್ |
 ಊರ್ಜಿತದ ಬದ್‌ಕ್ ಪೋದ್ |
 ಅಚ್ಚೆ ಮಳ್ಳಿನ ಭೂಮಿ ಮಾರ್ದ್ |
 ವ್ಯಾಜ್ಯ ಮಳ್ತಾದ್ ಜೈಲ್‌ಡ್ ಪಾಡ್ ||೫||

ಸಾತ್ವಿಕ ಆಹಾರ ತಿಂದಾಂಡ | ಆರೋಗ್ಯ ಭಾಗ್ಯೋಡ್ |
 ಕೀರ್ತಿ ಪಡೆದ್ ಸೌಖ್ಯ ತಿಕ್ಕಾಂದ ||
 ಮೃತ್ಯು ಪೋದ್, ಅರ್ತಿಡಿತ್ತದ್ |
 ಇತ್ತಿನಾಯುಷ್ಯ ಪಡೆದ್ |
 ಕರ್ತೃ ಆ ಸದಾನಂದ ಪಾದದ |
 ಭಕ್ತಿ ದೀದ್ ಮುಕ್ತಿ ಪಡೆವೊಳಿ ||೬||

೪. ರಾಗ - ಕಲ್ಯಾಣ

ಅಷ್ಟತಾಳ

ತಾಮಸ ಆಹಾರ ಮಲ್ಲಡೆ | ಕಲ್ಮಶೋಳ್ ಹೆಚ್ಚಾದ್ |
 ತಮ್ಮ ಬತ್ತದ್ ಜ್ವರೋಟ್ ಬೂರಡೆ ||
 ಕಾಫಲೆಡ್ ಬಾವೊಡಾವ್ | ಕೈಮಾಸಾಂದಾದ್ ಕಕ್ಕೊಡಾವ್
 ನಿರ್ಮಲದ ಬುದ್ಧಿ ಕೆಟ್ಟಾದ್ | ಜನ್ಮ ವ್ಯರ್ಥ ಕಳೆವೊಡಾವ್ ||೧||

ಪಿತ್ತ ತರೆಕ್ ಏರ್ದಾಲಾ ಪೋವ್ | ಅತ್ತಂದೆ ಬೇತೆ |
 ಕುತ್ತ ಪತ್ತದ್ ನೆತ್ತೆರ್ ಹಾಳಾವ್ ||
 ಪತ್ತಿ ಬುಡೆದಿಗ್ ವ್ಯರ್ಥಲಾವ್ | ಸಂತತೀನ್ ಕಳೆವೊಡಾವ್ |
 ಪೈತ್ಯ ದಿಂಜಿದ್ ಸತ್ತ ಕುಂದಾದ್ | ಮೃತ್ಯು ಬರಿಯೆರೆ ಕಾರಣಾವ್ ||೨||

ಗಂಗಸರೋಟ್ ಮಂಗಲೆಕ್ಕಾವ್ | ಕಲಿ ಪರ್ದೆಯೇರಾಂಡ |
 ಅಂಗ ತತ್ತದ್ ಪೆಂಗಲೆಕ್ಕಾವ್ ||
 ಭಂಗಿ ಬೀಡಿದ ಪುಗೆನ್ ವೊಯ್ತದ್ |
 ಅಂಗೊಡಿತ್ತಿ ಧಾತು ಕೆಟ್ಟಾದ್ |
 ಭಂಗ ಪಡೆದ್ ತಮ್ಮ ಲೆತ್ತದ್ |
 ಸಂಗಮೊಗ್ ಬೇಗ ಪೋವೊಡಾವ್ ||೩||

ಕಾಪಿ ಪರ್ನಗ ಚೇಪೆ ಆಪುಂಡ್ | ತಿಗಲೆದ ಉಳಯಿ |
 ಲೇಪ ಪತ್ತದ್ ಉಡಲ್ ಕಾಯುಂಡ್ ||
 ಆಪಿ ಕೆಲಸೊಗ್ ಜಗಟ್ ತೀರುಜಿ |
 ಕೋಪ ಯೇರ್ದ್ ದಾಲ ತಡೆವುಜಿ |

೫. ರಾಗ - ಶಂಕರಾಭರಣ

ಏಕತಾಳ

ಹಿರಿಯಾಕ್ಕು ಗಟ್ಟಿಗೇರಾ | ನಿಕುಳು ಪಣ್ಣೆ |
ಕಿರಿಯಾಕ್ಕು ಗಟ್ಟಿಗೇರಾ

||ಪ||

ಹಿರಿಯಾಕ್ಕು ಮಲ್ತಿನವ್ | ಕಿರಿಯಾಕ್ಕೆಗುಣೈರಾಂಡ್ |
ಕಿರಿಯಾಕ್ಕು ಮಲ್ತಿನವ್ | ಏರೈರೆಗುಣೈರಾಂಡ್

||ಅ.ಪ.||

ಪೊಕ್ಕಡೆ ತಿರ್ಗಂದೆಲಾ | ಹಿರಿಯಾಕ್ಕು |
ತಕ್ಕ ಕೆಲಸ ಮಲ್ತದಾಲಾ ||
ರೊಕ್ಕ ಲೆಕ್ಕೊಡ್ ದೀದ್ | ಪುಕ್ಕೇರ್ಲಕ್ಕಾವಂದೆ |
ಪಕ್ಕನೆ ಉಂಡಾದ್ | ಸೌಖ್ಯೋನೆ ಪಡೆಯೆರ್

||೧||

ಇತ್ತೆದಾಕ್ಕು ತೂನಗಾ ಏರೈರೆನ |
ಜತೆಟ್ ತಿರ್ಗದ್ ಬನ್ನಗ |
ಪೂರ್ತ್ ಗಂಜಿಜ್ಜಿ | ತುತ್ತೈರೆ ಕುಂಟ್ ಇಜ್ಜಿ |
ಕತ್ತಲೆಗ್ ತುಡಾರೊಂಜಿ | ಪೊತ್ತಾವರೆಣ್ಣೆಜ್ಜಿ

||೨||

ಮದ್ಮೆ ಮಸಿರಿ ಮಲ್ತದಾಲಾ | ಹಿರಿಯಾಕ್ಕು |
ಪೊದೆಪು ತುತ್ತದ್ ಇತ್ತದಾಲಾ |
ವಿಧಿಟ್ ಸಂಸಾರೊಡ್ | ಹದೊಟ್ ಇತ್ತೊಂದಾಲಾ |
ಬದಲೊರಿಕ್ ತಿಕ್ಕಾಂದೆ | ಹದಪಣ್ಣೊಂದಿತ್ತೆರ್

||೩||

ಪೂರ್ತ್ ಮೂಡ್ಡಾಯಿ ಬೊಕ್ಕ | ಲಕ್ಕದ್ ಮುಂಡ್ |
ತುತ್ತೊಂದುಚೊಂದ್ ಪಕ್ಕ ||
ಠಕ್ಕೈರೆನ್ ಕೂಡೊಂದ್ | ಚಕ್ಕುಲಿ ನುರ್ತೊಂದ್ |
ಗುತ್ತಿದಾರೆನ ಲೆಕ್ಕೊ | ಡಿತ್ತೆದಾಕ್ಕಾಯೆರ್

||೪||

ಹುಟ್ಟು ಮಲ್ತದಿ ಕಾಸನ್ | ಪೋಷಣೆಗಾದ್ |
ಒಟ್ಟ್ ಮಲ್ತದಿ ರೊಕ್ಕೊನ್ ||
ಗುಟ್ಟುಡ್ ಚೀಲೊಡ್ | ಕಟ್ಟದ್ ಹಿರಿಯಾಕ್ಕು |
ಗಟ್ಟಿಡ್ ದೀವೊಂದ್ | ಶ್ರೇಷ್ಠರಾದಿತ್ತೆರ್

||೫||

ಹಿರಿಯಾಕ್ಕೆ ಪೆಟ್ಟಿಗೆದ | ಪೊಂಜೇವಾಳೆನ |
 ಕರಂಡೆಡಿತ್ತಿನ ಪೂರ್ವೊದ ||
 ಕರಿಮಣಿ ಸರ ದುಡ್ಡು | ಮುರು ಮೂಕುತಿ ಪೂಜೊಂದ್ |
 ಪರ್ದ್ ತಿಂದ್ ತಿರಗ್ಗನ | ಕಿರಿಯಾಕ್ಕೆ ದರ್ಬಾರ್ ||೬||

ಆಪತ್ತಗೊಂದೆಕ್ಕೆಗ್ | ಮಲ್ಲಿನ ಬದ್ಕ |
 ತೂಪಾದತ್ತಂದೆ ಅಕ್ಕಳೆಗ್ |
 ಚೀಪೆ ಪರಿಯೆರೆ ದುಡ್ಡು | ತಪ್ಪಂದೆ ಕೊರಿಯತ್ತ |
 ಕೋಪ ಯೇರೆಡ ಮಲ್ಪುನಿ | ಪಾಪಿಳೆಂಕ್ಳಾಯ ||೭||

ಚೀಪೆಗ್ ಬಾಯಿ ಕೊರ್ಯಾ | ಹಿರಿಯಾಕ್ಕೆನ |
 ತಾಪೊಗ್ ಗುರಿಲಾ ಆಯ ||
 ಆಪಿ ಸತ್ಕರೊಟಗ್ | ಏಪಲಾ ದೂರಾಯ |
 ಮಾಪು ಕೊರ್ದೆಂಕ್ಳೆನ್ | ಕಾಪುಲ ಶ್ರೀಕೃಷ್ಣ ||೮||

ಜೋಕ್ಕೆನೆಂಕ್ಕೆ ತೆಟ್ಟಾಯ್ನಿ | ತಿರಗರೆ ಬು |
 ಡ್ಡಾಕ್ಕೆ ಶೋಕ್ಗ್ ಕಾಸ್ ಕೊರಿನಿ |
 ಮೂರ್ಬೆರಾದೆಂಕುಳಾ | ನೇಕಪರಾಧ ನಿ |
 ರಾಕರಿತ್ದ್ ದೇವೆರೆ | ತಾಂಕ್ ಸದಾನಂದೊಡ್ ||೯||

೬. ರಾಗ -ಕಾಪಿ

ಅಷ್ಟತಾಳ

ಮಾತೆರ್ಲಾ ಗಟ್ಟಿಗೇರ್ - ಈ ಕಾಲೊಡ್ |
 ನೀತಿ ಬುಡ್ಡ್ ತೆಟ್ಟೆರ್ ||೧೦||

ಖ್ಯಾತಿವಂತೆರ್ ತನ್ಕುಳೆ | ಚಾತಿದರೊನ್ ಬುಡ್ಡ್ |
 ನೀತಿಡ್ ನಡಪಂದೆ | ಪ್ರೇತೊಲೆಕ್ಕಾಯೆರ್ ||೧೧.ಪ.||

ಗೋತ್ರ ಬಾಯಿಡ್ ಪಣ್ಣೆರ್ | ಕೆಲವೆರ್ ತನ್ಕುಳೆ |
 ಕೀರ್ತಿಗ್ ಬರಿ ಪಣ್ಣೆರ್ ||
 ಗೋತ್ರ ಬುಡ್ಡ್ ತುತ್ತ | ದೋತ್ರೊಗ್ ತತ್ತಾರಾಂಡ್ |

ಕೀರ್ತಿ ದ ಬರಿ ದಪ್ಪುನ ಪೂರ್ತದ ಬರಿಯಾಂಡ್ ||೧||

ಯಾನ್ ಮೇಲ್ ಈ ಕೀಳೆಂದ್ | ಪನ್ನೇರತ್ತಾಂದೆ |
 ತಾನು ಉಪ್ಪಿ ವಿಚಾರ ಮಲ್ಪುಜೆರ್ ||
 ತನನ್ ತಾನೆ ಮೇಲೆಂದ್ | ಅನ್ನರೆನ್ ಕೀಳ್ ಮಲ್ತಾದ್ ||
 ಅನ್ನರೆನ ಪಾಪ ಮಾತ | ತನ್ನ ತರೆಟ್ ತುಂಬುನಾಕ್ಯ ||೨||

ಏರೆಡವಗುಣ ಏರ್ಲ ಪಣ್ಣೆರ್ | ತನಟೀತ್ ಅವಗುಣ |
 ರಾಶಿ ಇತ್ತಿನೆಟೊಂಜಿ ಗ್ರಹಿಪುಜೆರ್ ||
 ಗುರುನ್ ಕಣ್ಣ್ಡ್ ತೂತಿನಿಜ್ಜಿ | ಹಿರಿಯೆರೆನಾ ಸುದ್ದಿ ಡಿಜ್ಜಿ
 ಇರೆತ ಗುರ್ತನೆ ಪಿನಂದಿಬೊಕ್ಕ | ಬೇರ್ದ ಗುರ್ತೊಡುಳ್ಳೆರೆರ್ ||೩||

ತಾನ್ ನಡಪುನ ಧರ್ಮ ಪಿನುಪುಜೆರ್ | ತನ್ನಕಲ್ ತೆಚ್ಚಾದ್ |
 ಕನೊಟ್ ತಿಕ್ಕುನ ಸುಖೊನ್ ನಂಬುವೆರ್ ||
 ತಾನೆ ತನನ್ ಪಿನಂದಿ ಬೊಕ್ಕ | ತನ್ನ ಸುಖೊತ ಸಾದಿತಿಕ್ಕಾ |
 ದಾನೆ ವೋಳಾ ಯಾನ್ ಏರಾ | ಎನ್ನೀಯರ್ಥ ಪಿನಂದಿನಾಕ್ಯ ||೪||

ಪೊಕ್ಕಡೆ ಆಯುಷ್ಯ ಕರಿಪುವೆರ್ | ನರಮಾನಿ ಜನೊನ್ |
 ಕಕ್ಕೆ ನಾಯಿಗ್ ತಕ್ಕ ಮಾರಾವೆರ್ ||
 ಬೊಕ್ಕ ಪಣ್ಣೆ ನಾಯಿಳಾಂಡಲ | ತಕ್ಕ ತನ ಸದ್ಧರೊಡುಂಡು |
 ಮುಕ್ಕುದುಂಡಾದ್ ಸೊರ್ಕ್ ಮಲ್ತಾದ್ | ದಿಕ್ಕ ತತ್ತಾದ್ ತಿರ್ಗಣಾಕ್ಯ ||೫||
 ಮಾತ ಸುಖೊಟ್ ದೇಹಸುಖ ಮುಖ್ಯ | ರೋಗಿಷ್ಯಗೇನಿಲ |
 ಪ್ರೀತಿ ಸಂಪತ್ತೇತಿತ್ತಂಡಲ ದುಃಖ ||
 ನೀತಿ ಶಾಸ್ತ್ರ ಪುರಾಣ ಪಣ್ಣೆ | ಪಾತೆರೊಗ್ ಮನಸ್ ಕೊರ್ದು |
 ರೀತಿಡ್ ಈ ದೇಹ ತಾಂಕ್ದ್ || ಪ್ರೀತಿ ಮಳ್ಳೊಡು ದೇವೆರೆಡ ||೬||

ಸಾತ್ವಿಕಾಹಾರ ಮಳ್ಳೊಡು | ಸಜ್ಜನೆರ ಸಂಗೊಡು |
 ಇತ್ತಿ ಜನೊದ ಅರ್ಥ ಮಳ್ಳೊಡ್ ||
 ದೂರ್ತೆರೆನಾ ಸಂಗ ಬುಡ್ಡ್ | ಕೀರ್ತಿಗೊಂತೆ ಮನಸ್ ಕೊರ್ದು |
 ಸತ್ಯವಾಯಿ ಕರ್ತೃಗರೆಗ್ದ್ | ಸ್ವಾರ್ಥಕಾಪಿ ಸಹಾಯ ನಟೊಣೊಡ್ ||೭||

ಬಂದ್ ಬಳಗ ಏತಿತ್ತಂಡ ದಾನೆ || ತಾನ್ ಮಲ್ತ ಬದ್‌ಕ್ |
ಕುಂದ್ ಇಜ್ಜಂದಿತ್ತಂಡ ದಾನೆ ||

..... ✦
ಆದಿದೇವರೆ ದಯೆವೊಂಜುಂಡುಡ | ಆದಿಸದಾನಂದೊಡುಪ್ಪೊಲಿ ||೮||

2. ರಾಗ - ಶಂಕರಾಭರಣ

ಏಕತಾಳ

ಕಂಡು ಕೆಲಸ ಮಲ್ತಡೆ | ಪೊಣ್ಣೋವುಳು |
ಗೊಂಡೊಗ್ ಬೂರೊಣಡೆ

||ಪ||

ಮಿಂಡೆರೆನ್ ಲೆತ್ತೊಂಡ್ ಕೆಲವು ಪೊಣ್ಣೋವುಳು |
ಕಂಡಿತ ಯಮಲೋಕೊಡ್ ದೊಂಡೆ ಬಿಚ್ಚಾದ್ ಬುಳ್ಳವೇರ್

||ಅ.ಪ.||

ಕಂಡಾನಿ ಇಜ್ಜೆಂದ್‌ದ್ | ಎಣ್ಣಡೆ ನಿಕ್ಕು |
ಉಂಡು ಮಲ್ತಿನಾಯೆ ತೂದುಳ್ಳೆ ||
ಮಿಂಡೆ ಬರಾಯೆ, ಯಮ ದಂಡೊಗ್ ಕೊರ್ನಗಾ
ಪಂಡೊಂಡ ಕೇಣಾಯೆ ಮುಂಡು ಬೂರ್ಡ್ ಬುಡಾಯೆ

||೧||

ಉಂಡು ಮಲ್ತಿನಾಯೆ ಮುನಿವೆ | ಕೈಪತ್ತಿಂಚಿ |
ಕಂಡಾನಿ ತ್ಯಜಿಪುವೆ ||
ಗುಂಡು ಗುಂಡಾದಿತ್ತಿ ಜೋಕ್ಕೆನ್ ನರಕದ |
ಗುಂಡಿಗ್ ನೂಕ್‌ದ್ ಮುಂಡೆಳಾದುಪ್ಪಡೆ

||೨||

ದಿಂಜಿನ ಬದ್‌ಕ್ ಪೋವ್ | ಈ ಬೇರೊಡ್ |
ಗಂಜಿಗ್ ತತ್ತಾರಾವ್ ||
ಬಂಜಿ ಕಾರಾವೊಡಾವ್ ನಂಜಿ ಮೀರ್‌ದ್ ಪೋವ್ |
ಪಂಜುರ್ಲಿ ಇಡೆಟ್ ಬೊಕ್ಕೊಂಜಿರೆ ಪಾಡೊಡಾವ್

||೩||

ತೈತಿನ ಹಿರಿಯಾಕ್ಕೆನ್ | ನರಕೊಡ್ ಪಾಡ್ |
ಇತ್ತಿ ಸಂತಾನೊಳೆನ್ ||
ಮುತ್ತಾದ್ ತಾನೊಳ್ಳ ಪೆದ್ದಿನ ಜೋಕ್ಕೆನ್ |
ದೆತ್ತೊಂದ್ ಜಾತಿಡ್ ಸರ್ಕಂದೆ ಪೋವೊಡಾವ್

||೪||

✦ ಮೂಲ ಪ್ರತಿಟ್ ಬಂಜಿ ಗೆರೆ ಬುಡ್ ಪೊತುಂಡು

ಪಂಚ ಮಹಾಪಾಪೋಳೆಡ್ | ಮೇಲಾದುಪ್ಪಿ |
 ಇಂಚಿ ಹಾದ್ರದ ಕೃತ್ಯೋಳೆಡ್ |
 ಎಂಚಿಂಚಿ ನಡತೊಂದ್ ಪಂಚಪಾಡಾವೊಂದ್ |
 ಮಂಚಾದ ಕೋಡಿಡ್ ವಂಚನೆಡ್ ತಿರ್‌ಗೊಡಾವ್

||೫||

ಈ ಲೋಕವುಪ್ಪಿ ಮುಟ್ಟಿ | ನರಕೊದ ಶಿಕ್ಷೆಡ್ |
 ಕಾಲ ಕಳೆವೊಂದ್ ಬೊಕ್ಕ ||
 ಕುಲೆ ಆದ್ ಅರಟೊಂದ್ ಬಾಲೆಳೆನ್ ಪುಂಚೊಂದ್ |
 ಕುಲೆತ ಜಾತಿಡ್ ತೆಟ್ಪಾದ್ ಕಾಲೆಳ್ ಅದುಪ್ಪಡೆ

||೬||

ನಧಜನ್ಮ ತಿಕ್ಕಂದಪ್ಪೆ | ಈ ಜನ್ಮೊಡ್ |
 ಸ್ಥಿರಸುಖ ಪಡೆಲೆ ಪಣ್ಣೆ ||
 ಗುರುಹಿರಿಯೆರ್ ಶಾಸ್ತ್ರಸಾರ ಪಂಡಿನ ಕೇಣ್ಡ್ |
 ಪರಮಾತ್ಮನ್ ನೆನೆತೊಂದ್ ಸದಾನಂದೊಡುಪ್ಪುಲೆ

||೭||

೮. ರಾಗ - ಶಂಕರಾಭರಣ

ಅಷ್ಟತಾಳ

ದುಣ್ಣ ಉಂಡುಡ ಬಣ್ಣ ಉಂಡಣ್ಣ | ಕೇಣ್ಣಣ್ಣ |
 ದುಣ್ಣ ಬಣ್ಣೊಡು ಮಾತಲಾವಣ್ಣ

||ಪ||

ದುಣ್ಣ ಪನ್ನಿನ ಪಣವು ಕಾಸು | ಬಣ್ಣ ಪನ್ನಿನ ಪಣವುದ ಕೇಸ್ |
 ದುಣ್ಣ ಬಣ್ಣಲ ರಡ್ಡ್ ಇಜ್ಜೆಡ್ | ಕಣ್ಣನೀರ್ ಕಟ್ಟಂದಣ್ಣ

||ಅ.ಪ.||

ದುಣ್ಣ ಉಂಡುಡ ಬುಡೆದಿ ಪುಗರುವಳ್ | ಆ ದುಣ್ಣ ಉಂಡುಡ |
 ಬಾಲ್ಯ ತನಟ ಕೇಂಡ್ ನಡಪುವೆರ್ ||
 ದುಣ್ಣ ಉಂಡುಡ ಕುಟುಂಬದಾಕ್ಕು | ದುಣ್ಣ ಉಂಡುಡ ಪೊದ್ದೆರಿಷ್ಟೆರ್ |
 ದುಣ್ಣ ಇಜ್ಜೆಡ ಬಣ್ಣ ತೆಟ್ಪಾದ್ ಎಣ್ಣೆದೇಣ್ಣೆದ್ ಸಯೊಡಾವು

||೧||

ದುಣ್ಣ ಬಣ್ಣೋಗ್ ಪೂಜೆ ಮಲ್ಪುವೇರ್ | ಆ ದುಣ್ಣ ಇಚ್ಚಿಡ |
 ಕಣ್ಣೊಡಾಂಡಲ ಒಂತೆ ತೂವಯೆರ್ ||
 ದುಣ್ಣ ಉಂಡುಡ ಪೊಣ್ಣು ಕೊರ್ವೆರ್ | ದುಣ್ಣ ಉಂಡುಡ ಮಾತ ಬರ್ವೆರ್ |
 ದುಣ್ಣ ಬಣ್ಣ ಇಚ್ಚಾಂದಿನಾಯನ್ | ಪುಣೊಡ್ಡ ಕಡೆಮಾತೆರ್ ಮಲ್ವೆರ್ ||೨||

ದುಣ್ಣ ಬಣ್ಣೋಳ್ ವೈಟ್ ಆಪಿನಿ | ಆ ಪಣವುಡತ್ತ |
 ಪಣವು ಎಂಚ ರಾಸಿ ಮಳ್ಳುನಿ ||
 ಪಣವು ರಾಸಿ ಮಳ್ಳೊಡಾಂಡ | ಪೂರ್ವ ಪುಣ್ಯ ಬೋಡ್ ಪಣ್ಣೆರ್ |
 ಪುಣ್ಯ ಮಳ್ಳಂದಿ ಅಣ್ಣಗೆಪಲ | ದುಣ್ಣ ಆವೊಡ್ಡ ಮಣ್ಣೆ ತುಂಬೊಡ್ ||೩||

ಎತ್ ಪುಣ್ಯದ ತಾದಿ ಉಂಡಣ್ಣ | ನಿಜ ಸುಖೊಟ್ ಉಪ್ಪುನ |
 ಬೇತೆ ಪುಣ್ಯದ ತಾದಿ ಕೇಂಡೊಣ್ಣ ||
 ನೀತಿ ಶಾಸ್ತ್ರ ಪುರಾಣ ಪಣ್ಣಿನ | ಪಾತೆರೊಗ್ ಮನಸ್ ಕೊರ್ಡ್ |
 ರೀತಿದೆ ಈ ದೇಹ ತಾಂಕೊಂಡ | ಪ್ರೀತಿದೆ ಸಾಂಕುವೆ ಸದಾನಂದ ||೪||

೯. ರಾಗ - ಶಂಕರಾಭರಣ

ಅಷ್ಟತಾಳ

ಎಂಚ ಉಪ್ಪೊಳಿ ಇಂಚಿ ಜನೊಕುಳೆಡ | ಈ ಒಂತೆ ಪಣ್ಣ |
 ಇಂಚಿನಾಂಡ ಎಂಚನಾ ದಾನ್ನ ||ಪ||

ಎಂಚೆಂಚೇರೆನ ಇಚ್ಚೆ ಉಂಡ | ಅಂಚನಂಚನೆ ನಡತಿನಾಂಡಲ |
 ಅಂಚ ಇತ್ತೊಂಡಲ ಇಂಚ ಇತ್ತೊಂಡಲ |
 ಎಂಚ ಇತ್ತೊಂಡಲ ಬಹಳ ಕಷ್ಟನೆ ||ಅ.ಪ.||

ಇಷ್ಟೆ ಆದ್ ಒಟ್ವೊಡ್ಡಿಯೆ | ಗಳಿಗದ ಉಳಯಿ |
 ನಷ್ಟ ಮಲ್ತಾದ್ ಕಷ್ಟೊನೆ ಕೊರ್ಪೆ ||
 ಗುಟ್ಟ್ ಪಂಡಿನ ನಿಷ್ಟುರಾನಗ | ಕಷ್ಟೊಗೆ ಗತಿ ಆಯಿ ಬೊಕ್ಕ |
 ಇಷ್ಟೆ ಎಂದಾದ್ ಎಂಚ ನಂಬೊಳಿ | ತಟ್ಟುನುಂಬೆನ್ ಕುಟ್ಟೆ ಮಲ್ಪುವೆ ||೧||

ಆಯೆ ಉಂಬೆ ಮಾತೆರ್ ಬೋಡತ್ತ | ಸಂಸಾರೊಡುಪ್ಪಗ |
 ಆಯಗುಂಬೆಗ್ ಸರಿಯಾದ್ ಉಪ್ಪೊಡತ್ತ ||
 ಆಯೆಗ್ ಬಂಜರ ಉಣ್ಣಾಂಡಲ | ಇಂಬೆಗ್ ಬೊಡಾಯ್ ತಿನ್ನಾಂಡಲ |
 ಆಯೆಗೊಂತೆ ತತ್ತಪೊಂಡ | ನಾಯಿಡ್ಡ ಕಡೆ ಮಲ್ಪುವೆ ಅತ್ತ ||೨||

ಸೂರ್ಕನಗ ಆಯೆ ನೆತ್ತೆರಾನೆ ಪರ್ವೆ | ಆಪತ್ತ್ ಬತ್ತದ್ |
 ಸಿರ್ಕನಗ ಉಂಬೆ ಪಟ್ಟಿಗಲಾ ಪರ್ವೆ ||
 ಕಕ್ಕ ಕಕ್ಕದ್ ಉರ್ಚಪಾಡ್ಡಗ | ಅಕ್ಕ ಅಮ್ಮ ಇಂದ್ ಪಣ್ಣೆ |
 ಲಕ್ಕದುತ್ತೆರೆ ಆಪಿ ಸಮಯೊಡ್ | ಗುರ್ಕ ಕುಟ್ಟದ್ ಮುರ್ಕು ಮಳ್ಳುವೆ ||೩||

ತನ್ನ ತನ್ನ ಸ್ವಕಾರ್ಯ ಮಲ್ಲೊಣನ | ಉಪಾಯ ಹೊರತದ್ |
 ಅನ್ನೆರೆನ ಆಪತ್ತಗೊದಗಾಯೆ ||
 ತನ್ನ ಕಜ್ಜೊಳ್ ಮಳ್ಳೊಣೆರೆ ಎನ | ಅಮ್ಮೆ ಈಯೆ ಇಂದ್ ಪಣ್ಣೆ |
 ತನ್ನ ಕಜ್ಜಾಯಿ ಬೊಕ್ಕ ಎನಮಗ | ಮಣ್ಣೆ ತಿನ್ನಾವೆ ಇಂದ್ ಪಣ್ಣೆ ||೪||

ಕಣ್ಣ್ ತೋಜುನಿ ಪೊಣ್ಣುಳೆನ ಮಿತ್ತ್ | ಅಂಚನೆ ಪೊಣ್ಣುಳ್ |
 ಕಣ್ಣ್ ತೋಜುನಿ ಆಣುಳೆನ ಮಿತ್ತ್ ||
 ಆಣುಳೆರೇರ ಪೊಣ್ಣುಳೊಟ್ಟಾಗ್ | ಪೊಣ್ಣುಳೆರೇರ ಆಣ್‌ಳೊಟ್ಟಾಗ್ |
 ಆಣ್‌ಪೊಣ್ಣುಳು ಇಂಚಿ ಹಾದ್ರೊಡ್ | ಪ್ರಾಣ ಇತ್ತದ್ ನಾಯಿಳಾನಗ ||೫||

ತನ್ನವಗುಣ ಏರ್ಲ ಪಿನ್ನುಜೇರ್ | ಊರ್ದ್ಯಾಕುಳೆ ಒಂ |
 ಜಾಂಡ ಎಡ್ಡೆ ಗುಣೊನ್ ಗ್ರಹಿಪುಜೇರ್ ||
 ತನ್‌ಕುಳು ಸುಖೊಡುಪ್ಪೊಡ್ಂದ್ಂದ್ | ಏರೇರನಸುಖೊನ್ ಬಯ್ತದ್ |
 ತನಕುಳೆದುಃಖಿತಪ್ಪೊಡ್ಂದ್ಂದ್ | ಏರೇರಗ್ ದುಃಖ ಕೊರ್ಪೆರ್ ||೬||

ಜಾತಿ ಮಾತ ಪಾತೆರೊಳೆಡಾಂಡ್ | ಇತ್ತೆ ನಡೆಪಿ |
 ರೀತಿ ಮಾತ ತೆಟ್ಟದ್ ಪೋಂಡ್ ||
 ಜಾತಿರಡ್ಡೆ ಪೊಣ್ಣ್ ಆಣ್‌ದ | ರೀತಿ ಅಂಚನೆ ಆದ್ ಉಂಡ್ |
 ಜಾತಿಧರ್ಮದ ನೀತಿ ಮಾತ | ಜಾತಿಡೊಂಜಿ ರೀತಿಡಾಂಡ್ ||೭||

ಧರ್ಮಕರ್ಮ ವಿಚಾರ ಮಳ್ಳುಜೆರ್ | ಸುಖಿದಾಸೆ ಮಳ್ಳದ್ |
 ಕರ್ಮಧರ್ಮೊನು ಒಟ್ಟೊ ಮಲ್ಲುವೆರ್ ||
 ಧರ್ಮಕರ್ಮೊಳ್ ಬೆರಕೆಳಾದ್ | ಧರ್ಮ ಮಾತ ತೆಟ್ಟಪೋಂಡ್ |
 ಧರ್ಮಕೆಟ್ಟದ್ ಕರ್ಮೊಡಾಯಿ ದುಃಖರ್ಮಫಲನೆ ತಿನ್ನೆರೆಗಾಂಡ್ ||೮||

ಮಿತ್ತ್ ಪೋಪಿನ ಯೋಚನೆನೆ ಇಚ್ಛೆ | ಮಿತ್ತಿತ್ತಿನಾಕೈಗ್ |
 ತಿರ್ತ್ ಬರ್ಪಿನ ಕೃತ್ಯದವೆ ಬುದ್ಧಿ ||
 ತಿರ್ತ್ದಾಕ್ಕು ಅರ್ತಿಡಿತ್ತೆ | ಮಿತ್ತ್ ಬರ್ಪಿನ ವೃತ್ತಿಡುಪ್ಪಗ |
 ಮಿತ್ತ್ದಾಕುಳ್ ಪಿತ್ತ್ ಏರ್ದ್ | ತಿರ್ತ್ ಜಾರ್ದ್ ಬೂರೈರತ್ತೆ ||೯||

ಸತ್ಯ ಬತ್ತಲೆಡಿತ್ತೆ ಪೋಂಡೊಂದ್ | ಪಾತೆರ್ವರಿತ್ತೆ |
 ಕತ್ತಲೆಡ್ ಬತ್ತಲೆಡ್, ಕೂಡೊಂದ್ ||
 ಕತ್ತೆ ಕತ್ತನೆ ಅವು ಅತ್ತಂದೆ | ಪೆತ್ತಕತ್ತೆ ಅವರುಂಡ ||
 ಸತ್ಯ ಇತ್ತೆ ಮುರ್ಕುಪೋಂಡ | ಪೂರ್ತ್ ಕಂತಿನ ಮೂಡೈರುಂಡ ||೧೦||

ಇತ್ತೆ ನಡಪುನನರ್ಥಪಣೈರೆಗ್ | ರಡ್ಡ್ ಸಾರ ನಾಲಯ್ |
 ಇತ್ತಿ ಮಹಾಶೇಷಡ್ ತೀರಂದ್ ||
 ಕತ್ತಲೆದವೆ ಕಾಡ್ಡಿತ್ತೆ | ಕೃತ್ತಿಮದವೆ ಇಲ್ಲಾಲಾಂಡ್ |
 ಭೂತಪ್ರೇತೋಳ್ ಒಟ್ಕೂಡ್ಡು | ಮೃತ್ಯುದೇವತೆ ಪೂಜೆ ಮಳ್ಳುವೆರ್ ||೧೧||

ಜಾತಿಡುತ್ತಮೆರಾದ್ ತೋಜುವೆರ್ | ಮನ್ನರೆಡ್ ಕೊರಗೆರ್ |
 ಜಾತಿನೀತಿಡ್ ತತ್ತ್ ನಡಪುಜೆರ್ ||
 ಬೇತೆ ಜಾತಿನ ಕೂಡೊಣಾಂದೆಲ | ಇತ್ತಿ ಜಾತಿದ ಕಟ್ ಬುಡಂದೆಲ
 ಪೂರ್ತುಡೆ ದೇವರೆನಚಾಕ್ರಿನ್ | ಅರ್ತಿಡೆ ಮಳ್ಳೊಂದು ಉಳ್ಳೆರ್ ||೧೨||

ಎಂಚಿನ ಎಗುಳ್ಳೆ ಇಂಬೆಂದ್ ನೆರಡೆಣ್ಣ | ಯಾನ್ ಪಣ್ಣೆ ಲಕ್ಕನೆ |
 ಅಂಚನಂದ್ಡ ನಿಕ್ಕು ಕೇಣ್ಣೆಣ್ಣ ||
 ಇಂಚಿ ಪಾತೆರ ಯಾನ್ ಪಂಡಿನವು | ಅಂಚನೇಂದ್ಡ್ ನಿಕ್ಕುಳು ನಂಬುದ್ |
 ಚಂಚಲದ ಕಾಡುಳೆನ್ ದಾಂಟ್ಂಡ | ಅಂಚಿನಾವ್ ಸದಾನಂದದ ಸುಖ ||೧೩||

5. ಸಂತ ಭದ್ರಗಿರಿ ಅಚ್ಯುತದಾಸರನ ತುಳು ಕೀರ್ತನೆಲು

ಗಣಪತಿ ಸ್ತುತಿ

1. ರಾಗ : ಪೂರ್ವಿಕಲ್ಯಾಣಿ

ತ್ರಿತಾಳದಿ

ಸಂದೋಡು ಸುರುತ ಪೂಜೆ |
ಸಂದೇಹ ಬುಡುಲೆ ಕಾವುವೆ ವಿಘ್ನರಾಜೆ || ||ಪ||

ಸಿಂಧೂರ ಗಂಧಾದಿ ಸುಗಂಧ ಪೂಜೊಂದಿ
ಚಂದ್ರಶೇಖರನ ಮೋಕೆದ ಮಗಾಕ್ || ||೧||

ಕಾರ್ಯಾರಂಭೊಡು ತಾರಾಯಿ ದೀದ್ ಗಣ
ರಾಯಾಗ ಯಾಯಾದಾಯಾಗ ಮರ್ಯಾದೆಡ್ || ||೨||

ಶಂಖಚಕ್ರ ಪಾಶಾಂಕುಶಧಾರಿಗ್
ಸಂಕಟ ಮೋಚನ ಮಾಲ್ಪುನಾಯಾಗ್ || ||೩||

ಸ್ಥೂಲ ಸೂಕ್ಷ್ಮಲೆಡ್ ಸಾಕ್ಷಾತ್ ಉಪ್ಪುನ
ಮೂಲನಾರಾಯಣೆ ವಾಲಕೆ ಅಂದದ || ||೪||

2. ರಾಗ : ವೃಂದಾವನಿಸಾರಂಗ

ತ್ರಿತಾಳ

ಸತ್ಯಗಣಪತಿ | ಬಾಲಾ | ನೃತ್ಯಗಣಪತಿ |
ನಿತ್ಯ ನಿನ್ನ ಸೇವೆ ಮಾಲ್ಪುನ ಭೃತ್ಯರೇಗ್ ಈಯೇ ಗತಿ || ||೧||

ಬಾಲ ಗಣಪತಿ | ಈಯೇ | ಸ್ಥೂಲಗಣಪತಿ
ದೀಲ ನಮ್ಮನ ಸದ್ಬುದ್ಧಿಡ್ ಕೊರ್ದು ಸನ್ಮತಿ || ||೨||

ಮೂಲ ಗಣಪತಿ | ಮೂಲಾಧಾರ ಗಣಪತಿ
ಮೂಲನಾರಾಯಣನ್ ನಂಕ್ ತೋಜಾಲ ಗಣಪತಿ || ||೩||

3. ರಾಗ : ಷಣ್ಮುಖಪ್ರಿಯ

ತಾಳ : ಆದಿತಾಳ

ವಿಯದಭಿಮಾನಿ ವಿಶ್ವಂಬರ |
ಚತುರ್ಭುಜ ಹೇ ಶುಕ್ಲಾಂಭರಧರ ||

ಪ್ರಸನ್ನವದನ ಸದ್ಗುಣ ಸದನ |
ವಿಘ್ನನಿವಾರಣ ಸಿತರದನ ||
ಜಿತಮದನಾ ಸೃಷ್ಟಿಸಂಹಾರಕಾರಣ
ಕೃತಿರಮಣಾ ಪ್ರದ್ಯುಮ್ನನಾರಾಯಣ ||೧||

ಈಯೇ ಗಣಪತಿ | ಈ ಬ್ರಹ್ಮಾಂಡದಪತಿ |
ನಿನ್ನ ಆಜ್ಞಾರೂಪೋಡು | ಯಾ | ಶ್ರುತಿಸ್ಮೃತಿ
ಈ ಸರ್ವೋತ್ತಮೆ | ಈಯೇ ಜಗತ್ಪತಿ
ಈಯೇ ಮೂಲನಾರಾಯಣ ಗಣಪತಿ ||೨||

ಭಕ್ತಿದಮಹಿಮೆ

4. ರಾಗ : ಭೂಪ

ಆದಿತಾಳ

ಬಾರಾಂದಯಾ | ಭಕ್ತಿ | ಬಾರಾಂದಯಾ ||
ಬಾರಾಂದಯಾ ಭಕ್ತಿ ಕೊರಾಂದೆ ದೇವೇರ್ ||

||ಪ||

ಕಲ್ತಂಡ ಬಾರಾಂದ ಕಲ್ತಂಡ ಬಾರಾಂದ
ಮೂಲ್ತಂಡ್ಲಾ ನಾಲ್ತಂಡ್ಲಾ ಬಾರಾಂದ | ಪೊಲ್ತೊಂದು ಕಾರ ||
ತೆಲ್ತೊಂದಲಂಕಾರ ಮಲ್ತೊಂಡ್ಲಾ ಬಾರಾಂದ
ಬುಲ್ತೊಂಡ್ಲಾ ಬಾರಾಂದ ಜ್ಞಾನ ದಾಂತೆ ||೧||
ವೇದೋಗ್ಲಾ ಬಾರಾಂದ | ವಾದೋಗ್ಲಾ ಬಾರಾಂದ |
ಸಾಧುಗ್ಲಾ ಬಾರಾಂದ | ಸಾಧನೆಗ್ಲಾ |
ವೇದವೇದ್ಯೆ ಆ ಮೂಲನಾರಾಯಣೇ ಪ್ರ
ಸಾದ ದಾಂತಿನ ಭಕ್ತೆರಾನ್ನಿನಕ್ಕೆಗ್ ||೨||

||೨||

5. ರಾಗ : ಯಮುನ

ತ್ರಿತಾಳ

ಗುರುಸ್ತುತಿ

ಗುರುಚರಣೋಗು ಶರಣಾಲೆ | ಆಲೆ || ಪ. ||

ಗುರುಟಾ ಮನಸಾನ್ ದೀಲೆ | ದೀಲೆ || ಅ.ಪ. ||

ಗುರುನ ನಡೆನುಡಿ | ಅವ್ವೇ ಯಂಕ್ಷೇನಮಡಿ ||
 ಗುರು ಉಪದೇಶನೆ ನಿತ್ಯತಾ ಪಡಿ |
 ಗುರುದರ್ಶನೊಡು ಪಾಪ ಪೊಡಿ ಪೊಡಿ |
 ಗುರು ಕೊರ್ಟಾವೆಯಾ ಜ್ಞಾನತೋ ಕೊಡಿ || ೧ ||

ಗುರು ತೋಜಾವೆ ಪರಮಾರ್ಥದ ಸಾದಿ |
 ಗುರು ನಮನೆತ್ತಾವೆ ದೇವಸನ್ನಿಧಿ |
 ಗುರು ಮೂಲನಾರಾಯಣನೇ ಅನಾದಿ ||
 ಗುರು ಸದ್ಗುರು ಆಯೆ ತತ್ಪದೊ ನಿಧಿ || ೨ ||

ಸಂತಚೋಖಾಮೇಳಹರಿಕಥಕ್ ಪೀಠಿಕೇತಪದ

6. ರಾಗ : ಕಲ್ಯಾಣಿ

ಆದಿತಾಳ

ಜಾತಿ ಕುಲೋಲು ದಾಯೇಗ್ಯಾ | ದಾಯೇಗ್ಯಾ || ಪ ||
 ಪ್ರೀತಿಡ್ ದೇವರೇನ ಪ್ರಾರ್ಥನೆ ಮಾಲ್ಪರೇಗ್ || ಅ.ಪ. ||

ನೀತಿ ನಿಯಮೊಡು ಇತ್ತಾದ್ - ಭಕ್ತಿ ಜ್ಞಾನ ಮಾರ್ಗೋನು |
 ಪತ್ತಾದ್ | ಭೀತಿ ಬುಡುದು ಆತ್ಮ-ಜ್ಯೋತಿ ಸ್ವರೂಪೊನು
 ಮಾತಾ ಜೀವಿಲೆಡ ತೂಪಿನ ಜ್ಞಾನಿಲೆಗ್ || ೧ ||

ನರ ಜನೊಗು ಬತ್ತಾದ್ ಮದಪಾಂದೆ | ಹರಿಸ್ಮರಣೆ
 ಮಲ್ತಾದ್ | ಮದ ಮತ್ಸರ ಕಾಮ ವಿಕಾರೋನು ಗೆಂದಾದ್ |
 ಮಧುಸೂಧನನ ಧ್ಯಾನ ಮಾಲ್ಪುನಾಯಗ್ || ೨ ||

- ಮೂಲನಾರಾಯಣ

ಚೋಖಾಮೇಳನಪಂಡರಪುರದಯಾತ್ರದಸಂದರ್ಭ

7. ರಾಗ : ಮಾಯಾ ಮಾಳ್ವ ಗೌಳ

ತಾಳ : ಆದಿತಾಳ

ಪಂಡರಪುರೋಕು ಮಂಗಳ ವೇಡೇಡ್ಡ | ತಿಂಗಳೋಗೊರ ಬರ್ಚುನ ಭಕ್ತೆ |
 ಮಂಗಳ ಭೀಮಾ ತುದೇಟ್ ಮುರುಕುದ್ ಮೈ ಮದಪುನ ಆಯೇ ಮುಕ್ತೆ ||
 ಆಯೇನ ಪುದಾರ್ ಚೋಖಾಮೇಳೆ
 ಪಗೇಲ ರಾತ್ರಿ ಬೆನ್ನುನಯೇ | ತಿಕ್ಕಿನ ಪ್ರತಿಫಲೋನು
 ತಿನ್ನುನಯೆ | ನಿಂದಾಸ್ತುತಿಲೆಗ್ ಮನಿಪಯೆ
 ಎಲ್ಲೆಗ್ ದಾದಾ? ಅನ್ನುನ ಚಿಂತೆ ಮಲ್ಪಯೆ
 ಜಾತಿಡ್ ಅಸ್ಪೃಶ್ಯೆ | ಅನ್ನಗ 'ದಿಕ್ಕೆ' ಆಯೊನ
 ದಿಕ್ಕೊಳುಯಿರ್ವೆರ್ಲಾ ಭಾಗ್ಯವಂತೇರ್ |
 ಕಂಡಣೆನ ಕೆಲಸೊಗು ಸಹಾಯ ಮಾಳ್ಳುನಾಲ್
 ಆಕೆಳೆನ ಕೆಲಸ ಮಣ್ಣ್ಡ್ |

- ಮೂಲನಾರಾಯಣ

 ತತ್ತಜ್ಞಾನ

8. ರಾಗ : ಶಿವರಂಜನಿ

ತಾಳ : ಆದಿತಾಳ

ಮಣ್ಣ್ಡ್ ಬುಲೆತಿನ ಬುಲೇನ್ ತಿಂದ್‌ದು-
 ಮಣ್ಣ್ಡು - ಮಣ್ಣ್ಗ್ ಪೋಪ ನಮ |
 ಮಣ್ಣ್ಡ್ ಪುಟುದಿನ ನಿನ್ನ ಉಡಾಲೇಡ್ ಚಿನ್ಮಯ ಮೂರ್ತಿ
 ತೂವೊಡಣ್ಣ | ಅಕಳೇಗ್ ನೆಲನೇ ಹಾಸಿಗೆ | ಆಕಾಶಾನೇ
 ಪುದೆಪರೇಗ್! ಸೂರ್ಯ ಚಂದ್ರೇ ಆಯೊನ ಇಲ್ಲಾದ ಬೊಲ್ಪು |
 ಕಯ್ಯಿ ಕೆಲಸೋಡು | ಮನಸ್ಸು ದೇವೆರೆಡ | ಆಯೆನ
 ಇಷ್ಟ ದೇವೇರ್ ಪಾಂಡುರಂಗ ವಿಠಲೆ ||

 - ಮೂಲನಾರಾಯಣ

9. ಪ್ರ. _____ ಏಕಾದಶಿದಾನಿ 'ಪಾಸಾ' ಮಾಳ್ತಾದ್ ದೇವರೇನ
 _____ ಜನೆ ಪಣ್ಣೊಂದು ಆನಂದೋಡ್ ಮೈ ಮದಪುವೆ |
 _____ ಯಾಗ್ ಪಂಡರಪುರನೇ ವೈಕುಂಠ | ಆಯೇ ನಿತ್ಯ
 _____ ಕೇವರೆಡ ನಟ್ಟುವೆ | ಓ ದೇವರೇ | ಯಂಕ್ ನಿನ್ನ
 _____ ಮುಕ್ತಿ ಬೊಡ್ಡಿ | ಯಾನ್ ನೀನಾನ್ ತೂವೊಡು | ಯಂಕ್ ದರ್ಶನ ಕೊರ್ಲಾ
 - ಮೂಲನಾರಾಯಣ

ದೇವದರ್ಶನದಕುತೂಹಲ

10. _____ ಗ : ಹಿಂದೋಳ ತಾಳ : ಆದಿತಾಳ
 ತೂಪಿನ ಯಾವ ನಿನ್ನ ರೂಪ | ವಿರಲ |
 ತೂಪಿನ ಯಾವ ನಿನ್ನ ರೂಪ ||ಪ||
 ಜಾತಿ ನೀತಿ ದಾಂತಿನ ಪಾಪಿಯಾನ್
 ಪ್ರೀತಿಡು ಪ್ರಾರ್ಥನೆ ಮಾಲ್ಪುವೆ ನಿನ್ನಾನು ||೧||
 ಪಾಪಿ ಜನಕುಲೇನ ಉದ್ಧಾರ ಮಾಲ್ಪುನ
 ಶ್ರೀಪತಿ ಪಾಂಡುರಂಗ ವಿಠಲ ವಿಠಲ ||೨||
 - ಮೂಲನಾರಾಯಣ

ದೇವಸ್ಥಾನದೊಳ್ಳಾ ಚೋಖಾಮೇಳನ್ ಬುಡಂದಿನಗ

- ರಾಗ - _____ ಮಿನಿ ಷಟ್ಪದಿ
 11. ಬುಡಾಯೆರೆನ್ನನ್ ಉಳಾಯಿ ಪೋವರೆ |
 ತಡೆಪೆರಯ್ಯಾ | ತಡೆದಲ್ವನೆ |
 ಬುಡಯಾನಾ ಎನ್ನ ಕೈನ್ ದೇವರೆ ಪಣ್ಣೆಯೇರೇಗಿತ್ತೇ ||
 ಉಡಾಲ ಪೊತ್ತುಂಡು ಉಳ್ಳಯಾ ಓ |
 ಕಡಲಡುಪ್ಪುನ ದೇವ ವಿಠಲ |
 ಬುಡುಪೆ ಪ್ರಾಣೋನು ಪಾಂಡುರಂಗಾ ಬರ್ಪುಂಡಪಕೀರ್ತಿ ||
 - ಮೂಲನಾರಾಯಣ

ಚೋಖಾಮೇಳನ್ ವಿಠಲ ದೇವಸ್ಥಾನದೊಳ್ಯಾ ಲೆಪ್ಪುನಗ

12. ರಾಗ : ಪೋಹನ

ತಾಳ : ಆದಿತಾಳ

ಬಲ್ಲಾ ಬಲ್ಲಾ ಓ ಭಕ್ತಾಗ್ರಣಿ | ಈ | ಭಾಗ್ಯವಂತೇನರಮಾನಿ

ಬಲ್ಲಾ ಬಲ್ಲಾ ಪೂರ್ಲಾಂಡ್ ನಿನ್ನ ಭಕ್ತಿ | ಪ್ರೇಮ ವೈರಾಗ್ಯೋದ ಜ್ಞಾನಿ ||

- ಮೂಲ ನಾರಾಯಣ

13. "ದೇವಸ್ಥಾನದೊಳ್ಯಾ ಬರೊಲಿಯಾ" ಪಂಡ್ ಚೋಖಾಮೇಳದೇವರೆಡಪ್ರಶ್ನೆ ಮಲ್ತಿನಗ

ಬರೊಲಿಯ ಭಗವಂತ ನಿನ್ನಾ |

ಚರಣ ಮುಟ್ಟೊಲಿಯಾ ಯಾನ್ |

ಪರಮ ಪಾತಕಿ ಪಾಪಿ | ದಿಕ್ಕೆ ಅನಾಥ ಅಜ್ಞಾನಿ ||

ಪರಮ ವೈಷ್ಣವೆ ಈ ಬಲ್ಲಾ ನಿನ್ನ |

ಸಂಗ ಸ್ವರ್ಶೋನು ಕೊರ್ಲಾ ನಿನ್ನ ಈ |

ಪರಮ ಭಕ್ತಿಗ್ ಮೆಚ್ಚಿಯ್ಯಾಂದ್ ತೊಟ್ಟುದು ಪತ್ಯೆ ಹರಿ ||

- ಮೂಲ ನಾರಾಯಣ

ಚೋಖಾಮೇಳ ವಿಠಲನ ಸ್ವರ್ಶ ಮಲ್ತಿನಗ

14. ರಾಗ : ಹಂಸಧ್ವನಿ

ಏಕತಾಳ

ತೆಟ್ಟೊಂಡ ಧರ್ಮದೇವರೆನ ತೊಟ್ಟುದು ಪತೊಂದೆಯೇ

ತೊಟ್ಟುದು ಪತೊಂದೆಯೇ |

ಕಟೊದ್ ಪಾಡ್ಲೆ ಕಳ್ಳಾನ್ | ನೋತುದು ಕೆರ್ಲೆ ಪಾಪೀನ್ |

ಪಟ್ಟಾದ ದೇವರೆನ ಮುಟ್ಟುದು ತೆಟ್ಟಾದೆ ಭಕ್ತಿ ಮಾಲ್ಪಿ ಭೃಷ್ಟಾನ್ ||

- ಮೂಲ ನಾರಾಯಣ

ಕಳ್ಳೇಂದ್ ಅಪವಾದ ಬತ್ತಿ ಚೋಖಾಮೇಳನ ಪ್ರಾರ್ಥನೆ

15. ರಾಗ : ಭಾಗೇಶ್ರೀ

ಝಂಪೆ

ತಾಳ

ಅಪರಾಧಾ ದಾಂತಿನೇಂಕ್ ಅಪವಾದ ಬೈದಿಂಡ್ |

ಕಪಟ ನಾಟಕ ಜಾಯೇಗ ಪಣ್ಣ ದೇವಾ | ಎಂಚ ಸಹಿಸೊನ್ನೊಲಿ ದೇವಾ

ಪಂಚಪ್ರಾಣ ಯೀ ಎಂಕ್ | ವಂಚನೆತೊ ಅಪವಾದೋಗು |
ಯೀಯೇ ಸಾಕ್ಷಿ | ಎಂಚಾಂಡ್ಲ ದರುಶನ ಕೊರ್ದು ಯೀ ದುಷ್ಟ
ಪ್ರಪಂಚಾನ ಬುಡುಪಾಲ ವಿಠಲ | ಬುಡುಪಾಲ ವಿಠಲ |

- ಮೂಲ ನಾರಾಯಣ

ಗಣಪತಿ ಸ್ತುತಿ

16 ರಾಗ : ಯಮುನ

ಆದಿತಾಳ

ಆನೆ ಮೋನೆದಾ ಜ್ಞಾನದ ಮೂರ್ತಿ

||ಪ||

ಜ್ಞಾನಭಕ್ತಿ ಕೊರುಲಾ ಗಣಪತಿ

||ಅ.ಪ.||

ಪಾಶಾಂಕುಶ ಪತ್ತದಾ ಈ ಕೈಟ್ |
ಕೇಸರಿ ಕುಂಕುಮ ಗಂಧೋಲು ಮೈಟ್ |
ಮೂಷಿಕ ವಾಹನ ಭಸ್ಮ ಫಣೆಟ್ |
ರಾಶಿ ಪಾಪೋಲು ಪೋಪೋ ನಿನ್ನ ದಯೇಟ್

||೧||

ಸುರೂತ ಪೂಜೆನ್ ನಿಕ್ಕ್ ಸಂದಾವೆ ಗಣಪಾ |
ಸ್ಮರಣೆ ಕೊರ್ದು ತೋಜಾಲಾ ಸ್ವರೂಪಾ |
ಮರಣ ಜನನ ಸಂಸಾರೊದಾ ತಾಪಾ |
ಹರಣ ಮಾಲ್ಪುನ ನಿನನ್ ತೂಪಿನಿ ಯಾಪ

||೨||

- ಮೂಲ ನಾರಾಯಣ

ಗುರುಸ್ತುತಿ

17. ರಾಗ : ಮಾಂಡ

ಆದಿತಾಳ

ಗುರುಪಾದಾ ಪಾವನೊ - ಪಾವನೊ |
ಗುರುಪಾದಾ ಜಲತೀರ್ಥ ಸಮಾನೊ ||
ಗುರುಪಾದ ಕಾಶಿ ಅವೆಕೇ ಭವನಾಶಿ |

ಗುರು ಪಾದೋಡುಂಡುಯೇ ಪುಣ್ಯದ ರಾಶಿ ||
 ಗುರುಪಾದೋಡು ಉಪ್ಪೋಡು ಸ್ಥಿರ ಬುದ್ಧಿ |
 ಗುರು ದಯೋಟು ಸರ್ವ ಕಾರ್ಯಾಲು ಸಿದ್ಧಿ |
 ದತ್ತಾಂಜನೇಯರೇ ಹರಿಗುರುಕುಳು |
 ಚಿತ್ತ ದೀಲೆ ಗುರು ಪಾದೋಟು ನಿಕುಳು ||

- ಮೂಲ ನಾರಾಯಣ

18. ರಾಗ : ಕಲ್ಯಾಣ

ತ್ರಿತಾಳ

ದೇವರುಪ್ಪನ ಒಲ್ಪಯಾ |
 ತೆರಿಯೋಣಲೆಯ ||ಪ||

ಬೆನ್ನುನ ಬಡವಡ ಬ್ರಹ್ಮಜ್ಞಾನೆಡ
 ಉಣ್ಣುನ ತಿನ್ನುನ ತಿನಸಿಲೆಡ ||ಅ.ಪ.||

ವಣಸ ತಿನಸಲೆಡ ಪಣ್ಣುನ ದಾದ
 ಯೀ ತಣ್ಣು ಉಷ್ಣಲೆಡ ಮನಿಪಂದಿಪ್ಪನ ಶಕ್ತಿ ಒಲ್ಪವಯಾ ||೧||

ಪಣೆಯೆರೆ ಬರಾಂದ್ - ಪಣಾಂದೆ ತೆರಿಯಾಂದ್ |
 ತೆರಿಯಾಂದೆ ಒರಿಯಾಂದ್ ಓರಿಜಾಂಡಾ | ವ್ಯರ್ಥಯಾ ||೨||

ಬಾಲೆದ ತೆಲಿಕೆಡ | ಬಡವನ ಬಯಕೆಡ |
 ಭಕ್ತಿ ಭಜನೆಡ ಭಗವಂತನ ತೂಲೆಯ ||೩||

- ಮೂಲ ನಾರಾಯಣ

ಪೀಠಿಕಾ ಪದ್ಯ (ಉಪದೇಶ)

19. ರಾಗ : ಕಲ್ಯಾಣಿ

ಭಜನೆ ಮಾಲ್ಪುಲೆ ಬಂಧುಲೆ |
ಸುಜನೇರ್ ಸೇರ್ ಭಕ್ತಿ ಭಾವೊಡು

ಆದಿತಾಳ

||ಪ||

ಭಜನೆನೆ ನಿಜಸುಖ ಭಜನೆಡೇ ಮೋಕ್ಷ

||ಅ.ಪ.||

ಯಜನ ಯಾಗೋಲೆಡ ಬರಾಂದ್ ಭಕ್ತಿ
ಭಕ್ತಿ ದಾಂತಿನಾಯಾಗ್ ತಿಕ್ಕಾಂದ್ ಮುಕ್ತಿ

||೧||

ಪುಟ್ಟುನ ತ್ಯಾಪುನ ಬಂಗದ ಬದ್‌ಕ್‌ನ್ |
ತೊಟ್ಟುದು ಪತ್ತುನ ಭ್ರಾಂತಿ ಬುಡುದು ಯಿತ್ತೆ

||೨||

ಮೋಕೆದ ಜೋಕುಳು ಬುಡೆದಿ ಬಂಧುಲೆನ್ನ |
ಸೋಂಕುನ ಸಾವುನು ತಪ್ಪಾಯೆರೆಂದ್‌ದ್

||೩||

ಗಳಿಗೆ ಗಳಿಗೆಗ್ಗಾ ಯಮನ ದೂತೆರ್ -
ಸುಲಿಗೆ ಮಾಲ್ಪುವೆರೆಂದೆಣ್ಣ್‌ದ್ ಭಕ್ತಿಡ್

||೪||

ಸತ್ಯದ ನಿತ್ಯದ ಸುಖೋನು ಕೊರ್ಪುನಾಯೆ |
ಕರ್ತೆ ಮೂಲ ನಾರಾಯಣೆ ಅಂದ್‌ದ್

||೫||

ಗೋರ ಕುಂಬಾರೊನ ಬುಡೆದಿ ಗಂಗೂಬಾಯಿ ಒಂಜಿ ವರ್ಷೊದ ಬಾಲೆಗ್ ಪುಟ್ಟಿ ಪರ್ವೊದ
ದಿನೊಕ್ ಆರತಿದ ಸಿದ್ಧ ತೆಗಾದ್ ಕಂಡನ್ನೆಡ ಮಲ್ತಿನ ನಿವೇದನೆ :

20. ರಾಗ : ಭೀಮ್ ಪಲಾಸ್

ಆದಿತಾಳ

ಆರತಿ ಮಾಲ್ಪೊಡೆಯೇ - ವಿಠಲಾಗ್ | ಆರತಿ ಮಾಲ್ಪೊಡೆಯೇ

||ಪ||

ಬಾಲೆಗ್ ಕರಯಿಂಡ್ ವರ್ಸ ಒಂಜಿ | ಪೂತ ಮಾಲೆ
ದೀದ್ ಪೊಸ ಅಂಗಿ ಷಾಡ್ಡ್ - ಇನಿ | ಆರತಿ ಮಾಲ್ಪೊಡೆಯೇ

||೧||

ಜಾಲಡುಂಡು ಬಾಲೆ ತೂಲೆ ಬರ್ಪೆಯಾನ್ |
ನಾನ್ಮಣ್ಣಾಗ್ ಪೋದು ಪಣೋಡುಯೇ | ಪಣೋಡುಯೇ ||
ಆರತಿ ಮಾಲ್ಪೊಡೆಯೇ

||೨||

- ಮೂಲ ನಾರಾಯಣ

21. ರಾಗ : ಮಾಯಾ ಮಾಳವ ಗೌಳ

ಆದಿತಾಳ

ಪ್ರಾಣ ವಿರಲೆ - ಪಂಚಪ್ರಾಣೆ ವಿರಲೇ |
 ಬಂಧು ವಿರಲೆ - ದೀನಬಂಧು ವಿರಲೇ |
 ಶ್ವಾಸ ವಿರಲೆ - ವಿಶ್ವಾಸ ವಿರಲೇ |
 ದೃಷ್ಟಿ ವಿರಲೆ - ಮಾತಾ ಸೃಷ್ಟಿ ವಿರಲೇ |
 ದೇವೇ ವಿರಲೆ - ಭಕ್ತಿ ಭಾವ ವಿರಲೇ |
 ಭಕ್ತಿಡ ವಿರಲೆ ಮುಕ್ತಿ ಕೊರ್ಪುನ ವಿರಲೇ |
 ಅಮ್ಮೆ ವಿರಲೆ - ಪರಬ್ರಹ್ಮ ವಿರಲೇ |
 ಕರ್ಮ ವಿರಲೆ - ಕರ್ಮಧರ್ಮ ವಿರಲೇ |

- ಮೂಲ ನಾರಾಯಣ

6. ಹರಿದಾಸಿ ಉಡುಪಿ ಯಶೋದಮ್ಮನ ತುಳು ಕೀರ್ತನೆಲು

1. ತೊಕ್ಕಂದಿ ತುಡರ್ (ಪಾಡ್ಡನ)

ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ಡೆನ್ನಾ ನಾ... || ಪ ||
 ಪುಣ್ಯದ ಭೂಮಿಡ್ ಪೊರ್ಲುಡ ಊರೊಂಜಿ
 ಪಾಜ್ಯೆ ಪಣ್ಡ್ ಪಣ್ ಪೆರ್ಗೆ || ೧ ||
 ಕುಂಜಾರ್ ಗಿರಿತ ಮಿತ್ತ್ ಇಪ್ಪುನೊ ಅಪ್ಪೆನೊ
 ಕೈತಾಲ್ ಉಂಡುಗೆ || ೨ ||
 ಪಾಜ್ಯೆ ಮರದ ಭಟ್ಟೆಗ್ ಆಣ್ ಜೋಕುಲ್
 ಇಜ್ಜಂದೆ ಪೊಂಡುಗೆ || ೩ ||
 ದುಃಖೊಡು ಇತ್ತೆರ್ ಭಟ್ಟೆನೊ ಬುಡದಿ
 ಒಡಿಪುಗ್ ಭಟ್ಟೆಟ್ಟು ಪೊಯೆರೆಗೆ || ೪ ||

ಒಡಿಪುಗ್ ಪೋದು ಅನಂತಾಸನ ದೇವರೆನಾ
ಇರ್ವೆರ್ಕ್ಕಾ ಸೇವೆ ಮಲ್ತೆರ್ಗೆ

|| ೫ ||

ಅಲ್ವನೇ ಒರಿ ಕೊಡಿಮರತ ಮಿತ್ತೇರ್ದ್
ನಲಿತೊಂದು ಇಂಚ ಪಂಡೇಗೆ

|| ೬ ||

ಭೂಮಿಗ್ ಜ್ಞಾನದ ಬೊಲ್ವುನಿ ತೋಜೋನ
ತುಡರೊಂಜಿ ಬರ್ಪುಂಡು ಪಂಡೇಗೆ

|| ೭ ||

ಮಾತೆರ್ಕ್ಕಾ ಜನಕುಲು ಸಂತೋಷೊಡು
ಆಯೆನ ಪಾತೆರ ಕೇಂಡೆರ್ಗೆ

|| ೮ ||

ಭಟ್ಟು ಬುಡೆದಿನ ಒಟ್ಟುಗ್
ಪಾಜ್ಯೆ ಊರುಗು ಪಿರ ಬತ್ತೇರ್ಗೆ

|| ೯ ||

ಭಟ್ಟೆ ಬುಡೆದಿಗ್ ಬಂಜಿ ನೀರ್ ಉಂತುಂಡು
ಸಂತೋಷೊಡು ಮಾತೆರ್ಕ್ಕಾ ನಲಿತೆರ್ಗೆ

|| ೧೦ ||

ವಾಯುದೇವೆರೆ ಮೂಜಿನೇ ಅವತಾರಾದ್
ಪೋರ್ಲುದ ಆಣ್‌ಮಗೆ ಭೂಮಿಗ್ ಬತ್‌ದ್
ಜನಕುಲೆನೇ ಉದ್ಧಾರ ಮಲ್ತೆರ್ಗೆ

|| ೧೧ ||

ವಾಸುದೇವೆ ಪಣ್ಣೆ ಪುದರ್‌ನೀ ದೀಯೇರ್
ಊರುದೊ ಭಾಗ್ಯಾಂದ್ ಪಂಡೇರ್ಗೆ

|| ೧೨ ||

ಮಾಣಿ ಬಾಲೆ ದಿನದಿನ ಮಲ್ತೆ ಆವೊಂದು ಬತ್ತಂಡ್
ತನ್ನ ಲೀಲೆನು ಊರೂಗು ತೋಜುಂಡುಗೆ

|| ೧೩ ||

ಪೆತ್ತದಾ ಬೀಲನಿ ಪತ್ತೊಂದು ಕಾಡ್‌ಗ್
ಪೋದು ನಲಿತೊಂದು ಇತ್ತಂಡ್‌ಗೆ

|| ೧೪ ||

ಅಮ್ಮೆರೆಗ್ ಸಾಧನೆ ದ್ವಾದಶಿ ನಾಲ್ ತೀರ್ಥ್
ಮೀಯರೆ ಆವಂದೆ ಇಪ್ಪುನಗಾ

|| ೧೫ ||

ಅಮ್ಮೇರೇಗ್ ಮೀಯರೆ ಇಲ್ಲದ ಕೆದುಟೇ
ಐನ್ ತೀರ್ಥ ಉಂಡುಂದು.ಪಂಡ್‌ಗೆ ಬಾಲೆ ||೧೬||

ನುಂಗುದಿ ಕಡ್ಡೆನ್ ತರೆಮಿತ್ ಮಲ್ತಾದ್
ಚಿಗುರಾದ್ ತೋಜಾಂಡ್‌ಗೆ || ಬಾಲೆ ತೋಜಾಂಡ್‌ಗೆ ||೧೭||

ಅಮ್ಮೇರ್ ಮಧ್ಯಾಹ್ನ ಉಣಿಸ್‌ಗ್ ಬರಂದೆ |
ಪಿದಯಿ ಜಗಲಿಡ್ ಇತ್ತೆರ್‌ಗೆ ||೧೮||

ಬಾಲೆ ವಾಸುದೇವೆ ಲೆಪ್ಪರೆ ಬನ್ನಗ |
ನಕ್ರ ಶೆಟ್ರೆನ್ ತೂಂಡುಗೆ ||೧೯||

ಪೆತ್ತದಾ ದುಡ್ಡು ಕೊರೈ ಪಂಡ್ ಕೇಣಗ |
ಕೈಟ್ ದುಡ್ಡು ಇಜ್ಜಿಂದ್ ಪಂಡೆರ್‌ಗೆ ||
ಭಟ್ಟು ದುಡ್ಡು ಇಜ್ಜಿಂದ್ ಪಂಡೆರ್‌ಗೆ ||೨೦||

ಬಾಲೆ ವಾಸುದೇವೆ ತಾನ್ ಕೊರ್‌ಪೆ ಪಂಡ್‌ದ್ |
ಪುಲ್ಲೊಟ್ಟೆ ಕೈನಿಲೈ ಕೊರಿಯೆಗೆ
ಶೆಟ್ರೆಗ್ ಕೊರಿಯೆಗೆ ||೨೧||

ನಕ್ರ ಶೆಟ್ ಇಲ್ಲಗ್ ಪೋದು | ಬಾಲೆ
ಕೊರ್ತಿ ಪುಲ್ಲೊಟ್ಟೆ ತೂಯೆಗೆ ||೨೨||

ಪುಲ್ಲೊಟ್ಟೆ ಪೂರ ಬಂಗಾರ ಆದು ಪೋತುಂಡು |
ಶೆಟ್ ಗಾಬರಿ ಆಯೆರ್‌ಗೆ ||೨೩||

ಬಾಲೆ ವಾಸುದೇವೆ ನರಮನಿ ಅತ್ತ
ದೇವೇರೇ ಅವತಾರಾಂದ್ ಪಂಡೆರುಗೆ || ಶೆಟ್ಟು || ೨೪ ||

ಅಪ್ಪೆ ಲೆಪ್ಪನಗಾ ಗಿರಿಟಿತ್ತಿ ವಾಸುದೇವೆ
ಓ ಪಂಡ್‌ದ್ ತಿರ್ತು ಲೈತೆಗೆ ||೨೫||

ಬನ್ನಗ ತಾದಿಡು ಏಳ್ ಪಣತ ಉಚ್ಚೊಂಜಿ
ಅಡ್ಡ ಬತ್ತಂಡ್‌ಗೆ ||
ತುಳಿತುದು ಕಾರ್ಡ್ ಅವೆನಿ ಕೆರಿಯೆಗೆ ||೨೬||

ಬಾಲೆ ವಾಸುದೇವನ ಕಿಂಞ ಪಾದ
ಮೂಡಿದಿನ ಗುರ್ತು ಇತ್ತೆಲಾ ಪಾದೆಡು ತೋಜುಂಡುಗೇ
ಪಾದದ ಗುರುತು ತೋಜುಂಡುಗೇ ||೨೭||

ಬಾಲೆ ವಾಸುದೇವ ಪಾತೆರೊಡು ಮಾತೆರೆನಿ ಸೋಪೋಯೆಗೇ
ಪಂಡಿತೆರೆನು ಮಾತಾ ಸೋಪೋಯೆಗೇ ||೨೮||

ಭೂಮಿಗ್ ಈಯೆ ಮಲ್ಲಾಯೆ ಆಪಾಂದು
ಪಂಡಿತೆರ್ ಆಶೀರ್ವಾದ ಮಲ್ಲೆರ್ಗೆ ||೨೯||

ಕಿಂಞ ವಾಸುದೇವ ಬಡವು ಆಪುಂಡೂಂದು ಪಂಡೇಗೇ
ಚರಿಗೆಡು ಇತ್ತಿನ ಬೇಯ್ತಿನ ಕುಡುನಿ ತಿಂದೆಗೇ ||೩೦||

ದೇವೆರೆ ದಯಟು ದಾಲಾತ್‌ಜಿ
ಅಪ್ಪೆ ಸಂತೋಷೊಡು ನಲ್ಲಲುಗೇ ||೩೧||

ಪೇರ್ಡ ಕರಕ್ ಕಲ್ಲದ ಚಪ್ಪಡಿ ಮುಚ್ಚಿಯೆರ್ಗೇ |
ಪುಚ್ಚಿ ಪರಂದಿನಲ್ಯಾ ಮಲ್ಲೆಗೇ ||೩೨||

ಸನ್ಯಾಸಿ ಆಪೆ ಪಂಡ್ ಅಪ್ಪೆ ಅಮ್ಮೆ ಕೈತಲಾಡ್ |
ಕೇಣೀರೆ ವಾಸುದೇವ ಬತ್ತೆಗೆ ||೩೩||

ಅಪ್ಪೆ ಅಮ್ಮೆ ದುಃಖೊಡು ಸನ್ಯಾಸಿ
ಆಪೀನ್ ಬೊಡ್ಡಿ ಪಂಡ್ ಪಂಡೇರ್ಗೆ ||೩೪||

ಸಂತಾನ ಉಂತುಂಡು ಸನ್ಯಾಸಿ ಆಂಡ
ಎಂಕಲೆಗ್ ದಿಕ್ ಏರಂದ್ ಪಂಡೇರ್ಗೆ ||೩೫||

ಸಂತಾನ ಆಯಿಬೊಕ್ಕ ಸನ್ಯಾಸಿ ಆಪೇಂದ್
ಅಪ್ಪೆ ಅಮ್ಮೇರ್ಗ್ ಪಂಡೇರ್ಗೆ ||೩೬||

ಭಟ್ಟಿಗ್ ಕುಡ ಒಂಜಿ ಆಣ್‌ಮಗೆ ಪುಟ್ಟಿ ಬೊಕ್ಕ
ವಾಸುದೇವ ಸನ್ಯಾಸಿ ಆಯೇಗೆ ||೩೭||

ಒಡಿಪುಡು ಅನಂತಾಸನ ದೇವರೆ ಬಳಿಟ್
ಅಚ್ಯುತ ಪ್ರೇಕ್ಷಾಚಾರ್ಯರೇ ಪಾಠ
ಪಣೊಂದು ಇತ್ತರಾಗೇ

|| ೩೮ ||

ಸನ್ಯಾಸಿ ಆವರೆ ವಾಸುದೇವೆ ಪೋದು
ಗುರುಕುಲೆ ಕೈತಲ್ ಪೋಯೆರೆ ||
ಸನ್ಯಾಸಿ ದೀಕ್ಷೆ ದೆತ್ತೊಂಡೆರೆ

|| ೩೯ ||

ಆನಂದತೀರ್ಥರೆಂಪಿ ಪುದರೆನೀ ಕೊರಿಯೆರ್ಗೇ
ಜಗತ್ತಾಗ್ ಈ ಬೊಲ್ಪು ಆಲಾ ಪಂಡಾದ್
ತರೆಮಿತ್ ಕೈ ದೀಯೆರ್ಗೇ

|| ೪೦ ||

ಸನ್ಯಾಸಿ ಆನಂದತೀರ್ಥರ್ ಯಾತ್ರೆಗ್
ಭಕ್ತಿರೊಟ್ಟು ಕೂಡಲೆ ಪಿದಾಡಿಯೆರ್ಗೇ

|| ೪೧ ||

ದೇಶ ದೇಶ ಸುತ್ತುದು ಹರಿ ಸರ್ವೋತ್ತಮ
ವಾಯು ಜೀವೋತ್ತಮ ಪಂಡಾದ್ ಸಾರಿಯೆರ್ಗೇ

|| ೪೨ ||

ಭಂಜಾರೆ ಉಂಡುದು ಸಾವಿರ ಬಾಳೆ ಪಂರ್ದಾನೀ ತಿಂದೆರ್ಗೇ

|| ೪೩ ||

ಸಾವಿರ ಬಾಳೆ ಪಂರ್ದಾ ತಿಂದಾದ್ ಮುಪ್ಪ
ಕೊಡಪಾನ ಪೇರ್ ಪರಿಯೆರ್ಗೇ

|| ೪೪ ||

ಊರು ಊರು ಸುತ್ತುದು ಸತ್ಯಧರ್ಮ ನ್ಯಾಯೋನಿ
ಮಾತ ಜನಕುಲೆಗ್ ತೆರಿಪೋಯೆರ್ಗೇ

|| ೪೫ ||

ಹಿಮಾಲಯದ ಬದರಿಗ್ ಪೋದು
ನಾರಾಯಣಗ್ ಕೈ ಮುಗಿಯೆರೆ ಪೋಯೆರ್ಗೇ

|| ೪೬ ||

ಬದರೀ ನಾರಾಯಣನ ಪೂಜೆ ಮಲ್ತಾದ್
ಗೀತೆಗ್ ಅರ್ಥ ಬರೆಯೆರ್ಗೇ

|| ೪೭ ||

ಗೀತೆದೊ ಅರ್ಥನಿ ವೇದವ್ಯಾಸ ದೇವೇರಾಗ್
ಅರ್ಪಣೆ ಮಲ್ತೆರ್ಗೇ | ಅರ್ಪಣೆ ಮಲ್ತೆರ್ಗೇ

|| ೪೮ ||

ಮಾತಾ ದೇಶೋನು ತಿರುಗುದ್ ಮಧ್ಯ ಮತನಿ ಸ್ಥಾಪನೆ ಮಲ್ತೆರೆ	೪೯
ಮಧ್ಯ ಮತನೀ ಸಾರೊಂದು ಒಡಿಪುಗ್ ಶಿಷ್ಯರೊಟ್ಟು ಪಿರಬತ್ತೆರ್ಗೆ	೫೦
ಒಡಿಪುದಾ ಪಡ್ಡೆ ಕಡಲ್ ಬರಿಕ್ ಗುರುಕುಲು ಬರೊಂದು ಇಪ್ಪೆರ್ಗೆ	೫೧
ಕಡಲ್ ಬರಿಕ್ ಗುರುಕುಲು ಬನ್ನಗ ಪಾಂಡಿ ನೀರ್ ದ ನಡುಟು ಇತ್ತಂಡೆಗೆ	೫೨
ಗಾಳಿಗ್ ಪಾಂಡಿ ಮುಲುಕರೇ ಆಯ್ನಗ ಯಜಮಾನನ ಬೊಬ್ಬನೀ ಕೆಂಡೆರ್ಗೆ	೫೩
ಗುರುಕುಲು ತಾನ್ ಪೊದೆತೊಂದಿ ಶಾಲನೀ ಬೀಸ್‌ದ್ ಬೀಸ್‌ದ್ ಗಾಳಿ ಉಂತೋದಿಯೆರ್ಗೆ	೫೪
ಪಾಂಡಿ ಕಡಲ್ ದ ಬದಿಕ್ ಬತ್ತೆದ್ ಯಜಮಾನೆ ಸಂತೋಸೊಡು ಗುರುಕುಲೆ ಕಾರ್‌ಗ್ ಅಡ್ಡ ಬೂರಿಯೆಗೆ	೫೫
ಯೆಂಕುಲೆ ಜೀವನಿ ಒರಿಪೋಯಿನಾರ್ ದೇವರೇ ಈರ್ ಪಂಡೇಗೆ	೫೬
ಬೋಡಾನ ಕೇಂಡಿನೀ ಈರೆಗೆ ಕೊರುವೆ ಪಾಂಡಿದ ಯಜಮಾನೆ ಪಂಡೇಗೆ	೫೭
ಪಾಂಡಿದ ಉಲಮಯಿ ಇತ್ತಿನೊ ಗೋಪಿ ಮುದ್ದೆಲೆನಾರ್ ಕೇಂಡೆರೆ	೫೮
ಗೋಪಿ ಮುದ್ದೆದ ಉಲಮಯಿ ಇತ್ತಿನೋ ದ್ವಾರಕೆದ ಕೃಷ್ಣನೀ ತೂಯೆರ್ಗೆ ಗುರುಕುಲು ತೂಯೆರ್ಗೆ	೫೯
ಒಂಜಿ ಗೋಪಿ ಮುದ್ದೆ ಒಡೆದ್ ಬಲರಾಮ ದೇವೆರ್ ಒಡಭಾಂಡೇಶ್ವರಡೇ ಉಂತಿಯೆರೆ	೬೦

ಮದ್ದೇರ್ ಗೋಪಿ ಮುದ್ದೆದ ಉಲಮಯಿ
ಮುದ್ದು ಕೃಷ್ಣನಿ ತೂಯೆರೆ

||೬೧||

ತರೆಟು ತುಂಬೊಂದು ಪಾರ್ದನ ಪಣೊಂದು
ಕೃಷ್ಣನೀ ಒಡಿಪುಗ್ ಕಣತೆರ್ಗೆ

||೬೨||

ಕೈಟ್ ಬಳ್ಳಾ ಮಂತನೀ ಪತೊಂದು
ಮುದ್ದು ಕೃಷ್ಣನೀ ತೂಯೆರೆ ರಡ್ ಕಣ್ ಪಾಪಂದು ಪಂಡೆರೆ

||೬೩||

ಅನಂತಾಸನ ದೇವೆರೇ ಬರಿಟೇ ಕೃಷ್ಣಗ್ ಗುಡಿ ಒಂಜಿ ಕಟ್ಟಿಯೆರೆ
ಮಕರ ಸಂಕ್ರಾಂತಿ ಉತ್ಸವ ಮಲ್ತೆರೆ

||೬೪||

ಗುಡಿತ ಉಲಮಯಿ ಕೃಷ್ಣಗ್ |
ನಿತ್ಯ ಪೂಜೆನೀ ಮಲ್ತೊಂದಿತ್ತೆರ್ಗೆ

||೬೫||

ಅಲ್ಲನೇ ಕೈತಾಲ್ ಇಪ್ಪಿನ ಪಳ್ಳನೀ
ಮಲ್ಲೆ ಮಲ್ತಾದ್ ಸರೋವರ ಮಲ್ತೆರ್ಗೆ

||೬೬||

ಕೃಷ್ಣನೋ ಪೂಜೆನೀ ತಾನೊರಿಯೆ ಮಲ್ಪಂದೆ
ಎಡುಮ ಶಿಷ್ಯೆರೆಗ್ ಕೊರಿಯೆರೆ

||೬೭||

ಎಡುಮ ಶಿಷ್ಯೆರೆಗ್ ಮಠಕುಲೆನಿ ಕಟ್ಟೋದು
ಪೊರ್ಲುಡು ಇಪ್ಪುಲೆ ಪಂಡೆರ್ಗೆ

||೬೮||

ಪದನಾಜಿ ನಮೂನೆದ ಪೂಜೆ
ಕೃಷ್ಣಗ್ ನಿತ್ಯ ಮಲ್ತೆರೆ ಪಂಡೆರ್ಗೆ

||೬೯||

ತೆನ್ಕಾಯಿ ಪೋನಗ ಗುರುಕುಲಗ್
ಅಲ್ತ ರಾಜೆ ಎದುರಾಯೆಗೆ

||೭೦||

ತೋಡುನೀ ಗಲ್ತಾದ್ ದುಂಬು ಪೋವರೆ ಪಂಡೆಗೆ
ಈಯೆ ಗಲ್ತ ತೋಜಾಲಾಂದ್
ಗುರುಕುಲು ಪಂಡ್ ದುಂಬು ಪೋಯೆರೆ

||೭೧||

ಗಲ್ತ್ ಗಲ್ತ್ ಮಣ್ಣಿನೀ ದೆರ್ದ್ದಾ ಸಾಕಾದ ರಾಜೆ ಅಲ್ಪನೇ ಬೂರೊಂಡೆಗೇ	೨೨
ಕಳ್ಳೆರಾ ಬನ್ನಾಗ ಕುಂಟುದ ಗಂಟ್‌ನೀ ದೂರದಕ್ಕಿಯೆರಾಗೇ ಕಾಸಾದ ಗಂಟ್ ಎಣ್ಣಾದ ಕಳ್ಳೆರಾ ಲಡಾಯಿ ಮಲ್ತಾದ್ ಸಯ್ತೆರಾಗೇ	೨೩
ಗಂಗೆ ತುದೆತೋ ಬದಿಕು ಬನ್ನಗ ಓಡದಾಯೆ ದಾಂಟರೆ ಕೇಣಿಜ್ಜಿಯೆಗೇ	೨೪
ತುದೆತ ನೀರಾದಾ ಮಿತ್ ನಡತೊಂದು ಗುರುಕುಲು ಶಿಷ್ಯರೊಟ್ಟು ಬತ್ತೆರಾಗೆ	೨೫
ನನ ಪಾಪು ಮೂಲು ಇಪ್ಪುನೋ ಬದರಿಗ್ ಪೋವೋಡುಂದು ಮನಟು ಎಣ್ಣೆರೆ ಅನಂತಾಸನನ ದೇವೆರೆ ಉಲಯಿ ಜೋಕುಲೆಗ್ ಪಾರ ಮಲ್ತೊಂದು ಇತ್ತೇರಾಗೇ	೨೬ ೨೭
ಪಾರ ಮಲ್ತೊಂದು ಇಪ್ಪುನಗಾ ಮಾಯಾದ್ ಬದರಿಗ್ ಪೋಯೆರಾಗೆ	೨೮
ನಾನಾ ರೂಪೊಡು ಇತ್ತೆಲಾ ಒಡಿಪುಗು ಮಧ್ಯಾಚಾರ್ಯೆರ್ ಬರ್ದೆರಾಗೇ	೨೯
ಯಶೋದೇಶ ಕೃಷ್ಣನೀ ತೂಯಿನೋ ಭಕ್ತೆರಾಗ್ ಸರ್ವ ಸಂಪದ ಕೊರ್ಪೆರೇ	೩೦
ಮಂಗಳ ಮುಖ್ಯ ಪ್ರಾಣ ದೇವೆರಾಗ್ ಮಂಗಳ ಭೀಮ ಸೇನೆರಾಗ್ ಮಂಗಳ ಗುರು ಮಧ್ಯಾಚಾರ್ಯೆರಾಗ್ ಮಂಗಳ ಯಶೋದೇಶ ಕೃಷ್ಣಗ್	೩೧

ಜ್ಞಾನದ ತುಡರ್ಲ ಬೊಲ್ಪು ತೊಕ್ಕಂದಿ
 ಗುರುಕುಲೆ ಮಹಿಮೆನಿ ಪೊಗಳ್‌ದ್
 ಪಾರ್ದನ ರೂಪೊಡು ಸೇವೆನಿ ಮಲ್ಪೆರೆ
 ಪಂಡೆರ್ ಗುರುಕುಲು ಕನಟೆಂಕ್ ||೮೨||

ಪಾರ್ದನೊಡು ಬತ್ತಿನ ಒಪ್ಪು ತಪ್ಪು ಪೂರಾ
 ಮದ್ದೇರೆ ಪಾದಕ್ ಅರ್ಪಣೆ | ಮಲ್ಪುವೆ
 ರುಕ್ಮಿಣೀಶ ಕೃಷ್ಣಗ್ ಅರ್ಪಣೆ ||೮೩||

ಅರ್ಪಣೆ ಮಲ್ತ್‌ದ್ ಜೀವನ ಸಾರ್ಥಕ
 ಆವೊಡುಂದು ಗುರುಕುಲೆಡ ಕೇಣ್‌ವೆಯೇ ||೮೪||

ಮಾತೆರ್ನಾ ಓದುಲೇ ತುಳು ಪಾರ್ದನೊನು
 ಮದ್ದೇರೆ ಕಥೆನೀ ಕೇಣ್ಣೆಯೇ ||೮೫||

ಪಾರ್ದನ ಕೇಂಡ್‌ದ್ ಓದ್‌ದ್ ಬರೆಂಡಾ
 ಬೋಡಾಯಿ ಭಾಗ್ಯೊನಿ ಕೃಷ್ಣ ಕೊರ್‌ಪೆಯೇ ||೮೬||

ತುಳುನಾಡ್‌ದಾ ತೊಕ್ಕಂದಿ ತುಡರ್ ಜಗೊಕೇ
 ಜ್ಞಾನದ ಬೊಲ್ಪು ತೋಜಾಂಡ್‌ಯೇ ||೮೭||

|| ಶ್ರೀ ಕೃಷ್ಣಾರ್ಪಣಮಸ್ತು ||

2. ದೇವರೆ ತೂಯೆರೆ ಒಂಜಿ ಜನ್ಮ ಪಾಪಂದ್

ಮಂತ್ ಕೈಟ್ ಪತೊಂದು ಉಂತಿದಿ ಕೃಷ್ಣನಿ ತೂವರೆ
 ಪಾಪಂದ್ ಎಂಕ್ ರಡ್ಡ್ ಕಣ್‌ಲೆನಿ ಕೊರ್ತಿ ದೇವರೆ ||೧||

ಕಾರ್ದ ಗೆಜ್ಜೆದ ಸ್ವರನೀ ಕೇಣ್ಡ್ ಪೂರ್ಲುಡು ನಲಿಪೆರೆ
 ಪಾಪಂದ್ ಎಂಕ್ ರಡ್ಡ್ ಕೆಬಿಕ್ಕೇನಿ ಕೊರ್ತಿ ದೇವರೆ ||೨||

ಪರಿಮಳ ತುಳಸಿ ಪೂತ ಮಾಲೆ ಕಟ್ಟರೆ
 ಪಾಪಂದ್ ಎಂಕ್ ರಡ್ಡ್ ಕೈಕ್ಕೇನಿ ಕೊರ್ತಿ ದೇವರೆ ||೩||

ಕೊಳಲ್ದ ಸ್ವರನಿ ಕೇಣ್ಡ್ ನಿನ್ನ ಕೈತಾಲ್ ಪಾರ್ ಬರ್ರೆ ಪಾಪಂದ್ ಎಂಕ್ ರಡ್ ಕಾರ್ಲೆನಿ ಕೊರ್ತಿ ದೇವರೆ	೪
ಕೃಷ್ಣಾ ಕೃಷ್ಣಾ ಪಣ್ಡ್ ಲೀಲೆದ ಭಜನೆ ಮಲ್ವೆರೆ ಪಾಪಂದ್ ಎಂಕ್ ಒಂಜೇ ನಾಲೈ ಕೊರ್ತಿ ದೇವರೇ	೫
ಗಂಧ ನಿರ್ಮಾಲ್ಯ ಮೂಸುದು ದೇಹ ಪವಿತ್ರ ಆವರೇ ಪಾಪಂದ್ ಎಂಕ್ ಒಂಜೇ ಮೂಂಕು ಕೊರ್ತಿ ದೇವರೇ	೬
ನಿತ್ಯಾ ಪ್ರಸಾದ ಬಂಜರೆ ತಿಂದ್ ಸಂತೋಷೊಡಿಪ್ಪರೇ ಪಾಪಂದ್ ಎಂಕ್ ಒಂಜೇ ಬಾಯಿ ಕೊರ್ತಿ ದೇವರೆ	೭
ನಿರ್ಮಲ ಬುದ್ಧಿ ಮನಸುಡು ನಿನನಿ ನಮಸ್ಕಾರ ಮಲ್ವೆರೇ ಪಾಪಂದ್ ಎಂಕ್ ಒಂಜೇ ಮಂಡೆ ಕೊರ್ತಿ ದೇವರೆ	೮
ನಿನ್ನ ಸೇವೆನಿ ಏಪಲಾ ಮಲ್ತೊಂದು ಮೋಕ್ಷಗ್ ಪೋವರೇ ಪಾಪಂದ್ ಎಂಕ್ ಒಂಜೇ ಜನ್ಮ ಕೊರ್ತಿ ದೇವರೇ	೯
ಎನ್ನೊ ಪನ್ನುನ ದಾಲಾ ಇಜ್ಜಿ ಮೂಲು ತೂವರೇ ಯಶೋದೇಶ ಕೃಷ್ಣ, ಬೇಗ ಬಲ್ಲ ಭಜನೆ ಕೇಣರೇ	೧೦

3. ರಾಗ : ಶಿವರಂಜನಿ

ನನ ಎಂಕ್ ಗತಿ ಯೇರ್ ಪಣ್ಣಾ ರಂಗಯ್ಯ ||ಪ||
ಕಾನಿಕೆ ಈರೆಗ್ ಎನ್ನ ಮನಸಯ್ಯ ||ಅ.ಪ.||

ಕೈಟ್ ವಜ್ರದ ಕಡಗ ಕಂಕಣ
ಮೈಟ್ ಪರಿಮಳ ಗಂಧದ ಲೇಪನ
ಸೊಂಟೊಡು ಉಡಿಗೇಜ್ಜಿ ಉರುದಾರ ಮಿಂಚುನ
ಕಾರ್ಡ್ ಗೆಜ್ಜಿ ಕ್ಕೊದ್ ನಲಿಪುನ ರಂಗಯ್ಯ ||೧||

ಕೊಳಲ್ದ ಸ್ವರನಿ ಕೇಂಡ್ ಪಾರ್ ಬತ್ತೇ
ತುಳಸಿದ ಮಾಲೆನಿ ಕಟ್ ಕೊಣತೆ
ಪುಳಿದಾಂತಿ ಬೆಳ್ಳಾಣ ಪರೈಗ್ ಕೊಣತೆ
ಸುಳಿತೊ ಸಂಸಾರೊಗು ತಿಕ್ಕಂದಿನಲ್ಕ ಕಾಪುಲ ||೨||

ನಿನ್ನ ಪಾದನೆ ಗತಿ ಎಂಕ್ ಏಪಾಲಾ
 ನಿನ್ನ ಸ್ಮರಣೆನೀ ಬಾಯಿಗ್ ಬರ್ಪಾಲಾ
 ನಿನ್ನ ದಾಸರೆ ಸೇವೆನೀ ಕೊರ್ಪಾಲಾ
 ಯಶೋದೇಶ ಕೃಷ್ಣ ಎಂಕ್ ಈಯೇ ಸರ್ವಾಲಾ ||೩||

4. ರಾಗ : ಪಣ್ಣುಖಪ್ರಿಯ

ಯಾನ್ ದಾನೆ ಮಲ್ತೆಯಾ ರಂಗಯ್ಯ
 ಯೆನನಿ ಮಿತ್ತ ದೆರ್ಪುಲೆಯಾ ಕೃಷ್ಣಯ್ಯ
 ಯಾನ್ ದಾನೆ ಮಲ್ತೆಯಾ ರಂಗಯ್ಯ ||ಪ||

ಆನೆ ಮೊಸಳೆದ ಬಾಯಿಗ್ ತಿಕ್ಕನಗಾ
 ಮೋಣೆ ತೂವಂದೆ ಪಾರ್ ಪಾರ್ ಬತ್ತಗೇ
 ದಾನೆ ನಿಕ್ ಆಯೆ ಒರಿಯೆನೇ ತೋಜುನಾ
 ಯಾನ್ ಲೆತ್ಂಡಾ ಈ ಒರಾ ಬರಯನಾ ||೧||

ರಕ್ಕಸೆನ ಮಗೆ ಪುಹ್ಲಾದಗ್ ಒಲಿಯಗೆ
 ಬೊಕ್ಕ ಧುವನಿ ತೊಡೆಟ್ ಕುಲ್ಲೋಯಗೆ
 ತಿಕ್ಕಿನ ಪಾಪನಿ ಮಲ್ತಿನಜಮಿಳಕ್
 ದಕ್ಕುನ ಜೋಕುಲೆ ಗತೀನ್ ಪಣ್ಣಯ್ಯಾ ||೨||

ಒಂಜಿ ಪುಂಡಿ ಬಜಿಲ್ಗ್ ಕುಚೇಲಗ್ ಒಲಿಯಾ
 ಗಂಜಿ ಕೊರ್ತಿ ಕನಕನಿ ಒಡಿಪುಗ್ ಲೆತ್ತಯಾ
 ಪಂಜಿದ ರೂಪೊಡು ರಕ್ಕಸೆರೆನಿ ಕೆರ್ತಾಯಾ
 ಚಿಂಜಿದಿ ಮನಟು ಯಶೋದೇಶ ಕೃಷ್ಣ ಕಾಪುಲಯಾ ||೩||

ಪೊಣ್ಣನ ದುಃಖ (ವಿಧವೆ)

5. ರಾಗ : ಶಿವರಂಜನಿ

ಯಾನ್ ದಾನಿ ಮಲ್ಪುಗೇ ಪೊಣ್ಣು ಜನ್ಮ ಬತ್ತಂಡೆ
 ಪಣ್ಣಿನೇರೆಡೆ ಎನ್ನಾ ತಾಳಿ ಭಾಗ್ಯ ಪೋಂಡೆ

ಕೈಕ್ ಕಾಜಿ ದೀವೊಂದು ತರೆಟ್ ಪೂ ಮುಡಿತೊಂದು
ಮೈಕ್ ಮಂಜಲ್ ಪೂಜೊಂದು ಪೊರ್ಲು ತೋಜೊಂದಿತ್ತೇನೆ ||೧||

ಮೋನೆದ ಕುಂಕುಮ ಬೊಟ್ಟೊಂಜಿ ತೋಜೊಂದು
ನಕ್ಷತ್ರದಲ್ಕ ಪೊಳೆವೊಂದಿತ್ತಂಡ್ ||
ಮೂಂಕುಡು ಮೂಗುತಿ ಪೊರ್ಲು ತೋಜೊಂದಿತ್ತಂಡ್
ಕೆಬಿಟ್ ಬೆಂಡಲೆ ನೇಲೊಂದಿತ್ತಂಡ್ ||೨||

ಜರಿತ ಸೀರೆನೇ ಏಪಲ್ಲಾ ತುತ್ತೊಂದಿತ್ತೆ
ಕರಿಮಣಿ ಸರಟು ಪೊರ್ಲು ತೋಜೊಂದಿತ್ತೆ
ಕಾರ್‌ದ ಬೆರಳುಗ್ ಕಾರುಂಗಿಲ ಪಾಡೊಂದಿತ್ತೆ
ಸರಪಳಿ ಗೆಚ್ಚೆ ಪಾಡ್ ಮೆಲ್ಲ ನಡತೊಂದಿತ್ತೆ ||೩||

ಕಂಡನೆ ದಾಂತಿನ ಪೊಣ್ಣುನ ಜನ್ಮ ವ್ಯರ್ಥ
ಪಣರೆ ಏರೆನಿ ಈ ಕೈತಾಲ್ ಕೊರ್ತಾ
ಕರುಣೆ ದಾಂತಿ ಜನಕುಲೆ ಮಧ್ಯಡೆ
ಪಿರಣ ಪೋನಗ ಯಶೋದೇಶ ಕೃಷ್ಣ ತೋಜುಲಾ ||೪||

ಕೃಷ್ಣಲೀಲೆ

6. ರಾಗ : ಹಿಂದುಸ್ತಾನೀ ಕಾಪಿ

ಬಾಲೆ ಪಣ್ಡ ತೆರಿಯೆರಾವಂದ್ ||ಪ||
ಕೃಷ್ಣೆ ಜಗತ್‌ಡ್ ಮಲ್ಲಾಯೇ || ||ಅಪ||

ಪುಟ್ಟುದೀ ಏಳ್ ದಿನೋಡಾಯೆ ಪೂತನೀನಿ ಕೆರಿಯೇ
ಪುಟ್ಟ ಪಾದೊಡು ತೊಲಿತುದು ರಕ್ಕಸನಿ ಕೆರಿಯೇ ||೧||

ಮಣ್ಣ್ ತಿಂದಿ ಬಾಯಿದ ಉಲಮಯಿ
ಪುಣ್ಯಲೋಕೊನಿ ತೋಜಾಯೆ
ಬಣ್ಣದ ಸೀರೆಲೆನಿ ಮರತ ಮಿತ್ ಪಾಡಿಯೇ ||೨||

೧೦೬ ಉರಿಪಿ ತೂನಿ ನುಂಗಿಯೇ
ಪರಪಿ ಪಪೋಡು ನಲಿತೆಯೇ
ಬೆರಳಾಡ್ ಗಿರಿನಿ ದೆರ್ತ್‌ದ್
ಸರ್ವರೇನಿ ಕಾತೆಯೇ

||೩||

ಕೊಡಪಾನ ಪೇರ್ ಪರಿಯೇ
ಚರಿಗೆದ ಉಲಮಯಿ ದೆಂಗ್ ಕುಲ್ಲಿಯೇ
ಮರತ ಮಿತ್ತ್ ಕೊಳಲ್ ಉರಿತ್‌ದ್
ಪೂರ್ಲು ಪೊಣ್ಣಲೆನಿ ಯಶೋದೇಶ ಕೃಷ್ಣ ಬರ್ಪಾಯೆ

||೪||

7. ರಾಗ : ಕಾಪಿ

ಗುಮ್ಮನಿ ಲೆಪ್ಪಡಯಾ ಅಮ್ಮಾ ಈ ಗುಮ್ಮನಿ ಲೆಪ್ಪಡಯಾ
ಗುಮ್ಮನಿ ಲೆಪ್ಪಡಾ ಇಲ್ಲದ ಉಲಮಯೆ

||ಪ||

ನೀರಾದ ಬರಿಕ್ ಪೋವಯೆ ಯಾನ್
ಪೇರಾದ ಕರನಿ ದರ್ಪಯೆ ಅಮ್ಮಾ
ಗುಮ್ಮನಿ ಲೆಪ್ಪಡಯಾ

||೧||

ಮರತ ಮಿತ್ತ್ ಏರಯಾ ಅಮ್ಮಾ ಯಾನ್
ಮರತ ಮಿತ್ತ್ ಏರಯಾ
ಸೆರಗಾನಿ ಒಯ್‌ಪಯೆ ಪೊಣ್ಣಲೆನಿ ತೂವಯೆ

||೨||

ಬೆಣ್ಣೆನಿ ಪೂರ ದಕ್ಕಯೆ ಅಮ್ಮಾ ಯಾನ್
ಅಣ್ಣನೊಟ್ಟು ಗೊಬ್ಬೊಂದಿಪ್ಪವೇ

||೩||

ಮಣ್ಣಾನಿ ತಿನಯೇ ಜಾಲ್‌ಗ್ ಪೋದು
ಕಣ್ಣ್ ಮುಚ್ಚಾಯೆ ಗೋಪಿಲೆನ

||೪||

ಕೃಷ್ಣನ ಪಾತೆರ ಕೇಣ್ಡ್ ಯಶೋದೆ
ಲೊಟ ಲೊಟ ಮುದ್ದು ಕೊರಿಯೋಲು

||೫||

ಪುಟ್ಟಿ ಯಶೋದೇಶ ಕೃಷ್ಣನಿ ದೆರ್ತ್‌ದ್
ತೊಟ್ಟಿಲ್‌ಡ್ ದೀದ್ ತೂಗಿಯೋಲ್

||೬||

8. ರಾಗ : ಆನಂದ ಭೈರವಿ

ಬಾಲೆ ಪಂಡ್ಡ್ ದೆರ್ತ್ ಪಸಿಯೆನೆ
ಗೋಪಾಲಕೃಷ್ಣೆನಿ ||ಪ||

ಬಾಲೆ ಪಂಡ್ಡ್ ದೆರ್ತ್ ಪಸಾಂಡ ಪೊರ್ಲುಡ
ಮೋರೆಗ್ ಮುದ್ದು ಕೊರ್ದು ಮೆಲ್ಲ ಮೆಲ್ಲ
ಪಿರ ತೂದು ಬಲಿತೆಯೇ ||೧||

ಮೆಲ್ಲ ಮೆಲ್ಲ ಬತ್ತೇಯೆ ಇಲ್ಲದ ಉಲಮಯಿ
ಬಳ್ಳೊಡ್ಡತ್ತಿನ ಕರನಿ ಒಡತೆಯೇ
ಬಳ್ಳೊಡ್ಡತ್ತಿನ ಕರನಿ ಒಡತಾದ್
ಪೇರ್ ಬೆಣ್ಣೆ ಪರ್ಡ್ ಪೋಯೆ ||೨||

ಕಂಡನೆಲಕ್ಕ ಇಲ್ಲಗ್ ಬತ್ತೇಯೆ ಗೋಪಾಲಕೃಷ್ಣೆ
ಹಾಸಿಗೇಡ್ ಪೊರ್ಲುಡು ಚಿತ್ತೆಯೇ
ಕಂಡನೆ ಪಂಡ್ಡ್ ತೆರಿದ್ ಯಾನೆ
ಮುಟ್ಟು ಬತ್ ತೂನಗಾ |
ಕೈನಿ ಒಯ್ತಾದ್ ಮುದ್ದು ಕೊರ್ದು ಪಾರ್ ಪೋಯೆ ||೩||

ರಕ್ಕಸೆರೆನಿ ಮಾತ ಕೆರಿಯೇ ಗೋಪಾಲಕೃಷ್ಣೆ
ಊರುಡಾಯೆ ದೇವೆರೆಂದ್ ಮಾತೆರೆಗ್ಗಾ ತೋಜಾಯೆ
ಬಾಲೆ ಅತ್ತಾ ನಮ್ಮೋ ಯಶೋದೇಶ ಕೃಷ್ಣ ರಾಯೆ
ಕಾಲಕಾಲೊಗು ಅವತಾರ ಮಲ್ಪಿ ಶ್ರೀಹರಿಯೆ ||೪||

9. ರಾಗ : ಖರಹರಪ್ರಿಯ

ಮೂಲ್ಲುಲ್ಲೆ ನಮ್ಮ ಕೃಷ್ಣೆ ಪಾರ್ ಬಲ್ಲೇ
ಕೈಟ್ ಬಳ್ಳಾ ಮಂತ್‌ನೀ ಆಯೆ ಪಸೊಂತುಲ್ಲೆ ||ಪ||

ಭಕ್ತಿಡ್ ನಂಬುಂಡ ವರ ಕೊಳುವೆ
ಕೈ ಮುಗಿತ್ ಒಳಿತುಂಡ ಪಾರ್ ಬರುವೇ ||೧||

ಬೊಳ್ಳಿದ ಪೀಠಡ್ ಆಯೆ ಕುಲ್ಲುದು
ಕನಕನ ಭಕ್ತಿಗ್ ಆಯೆ ಒಲಿದ್ ||೨||

ಎಣ್ಣು ಗುರುಕ್ಕೆಡ ಪೂಜೆ ದೆತೊಂದು
ಹನುಮಂತ ಭಂಟನೊಟ್ಟು ಆಯೆ ಕುತೊಂದು ||೩||

ದೂರ ದೂರ ದೇಶದ ಭಕ್ತರೆ ಕೈಟ್
ಸೇವೆನಿ ದೆತೊಂದು ಸಂತೋಷೋಡು ||೪||

ಓಲು ಓಲು ಪೋದು ನಾಡ್ತ ಸೋಪಡೆ
ನಮ್ಮೋ ಯಶೋದೇಶ ಕೃಷ್ಣ ಒಡಿಪುಡುಲ್ಲೆ ||೫||

10. ರಾಗ - ಮೋಹನ

ಯಾನೊರ ಪನ್ನೆ ನಿಗಲೊರ ಪನ್ನೆ | ರಾಮನಾಮನೀ | ಶ್ರೀರಾಮನಾಮನೀ ||
ಮಾತೆರ್ದಾ ಒರ ಪನೋಡೆ ಒಂಜಿ ರಾಮನಾಮ ನೀ ||ಪ||

ಶ್ರೀರಾಮ್ ಜೈರಾಮ್ ಜೈ ಜೈ ರಾಮ್
ಶ್ರೀ ರಾಮ್ ಜೈ ರಾಮ್ ಜೈ ಜೈ ರಾಮ್ ||ಅ.ಪ.||

ಅಮ್ಮೆ ದಶರಥೆ ಅಪ್ಪೆ ಕೌಸಲ್ಯ ರಾಮದೇವೆರೆಗ್
ಅಪ್ಪೆ ಅಮ್ಮೆ ಶ್ರೀರಾಮೆ ನಂಕ್ ಸರ್ವೆರೆಗ್ ||೧||

ವಿಭೀಷಣೆ ಮೋಕ್ಷಗ್ ಪೋಯಿನಿ ರಾಮನಾಮೊಡ್
ಆಂಜನೇಯೆ ಬ್ರಹ್ಮ ಪದವಿ ಪಡೆಯಿನಿ ರಾಮ ನಾಮೊಡ್ ||೨||

ಬಡವೆ ಮಲ್ಲಾಯೆ ಪಣ್ಣಿನ ಇಚ್ಛೆ ರಾಮ ದೇವೆರ್ಗ್
ಭಜನೆ ಮಲ್ಪರೆಗ್ ಉಂದುವೇ ಸಜ್ಜಿಯೇ ನಂಕ್ ಸರ್ವೆರೆಗ್ ||೩||

ರಾಮನಾಮದ ಮಹಿಮೆ ತೆರಿಯೆರೆ ಏರೆಗ್ ಸಾಧ್ಯಯೇ
ರಾಮನಾಮನೆ ದಾಸಿ ಯಶೋದನೊ ಹೃದಯದ ಜ್ಯೋತಿಯೇ ||೪||

11. ರಾಗ - ಮೋಹನ

ವಿದ್ಯಾದಿದೇವಿಯೆ ಶಾರದಮ್ಮಾ
ಸತ್ಯ ಲೋಕೊಡು ಇಪ್ಪುನಾ ಶಾರದಮ್ಮಾ ||

ನಲಿತೊಂದಿಪ್ಪುನ ಶಾರದಮ್ಮಾ
ಕಲಿನಿ ದೂರ ಮಲ್ಪುಲ ಶಾರದಮ್ಮಾ ||

ತೆಲಿಕೆದ ಮೋರೆದಾಲ್ ಶಾರದಮ್ಮಾ
ಬಲ್ಲಾ ವರ ಕೊರ್ಲ್ - ಎಂಕ್ಲೇಗ್ ಶಾರದಮ್ಮಾ ||

ಕಡಗ ಕೈತಿತ್ತಿ ಶಾರದಮ್ಮಾ
ಪರಿಮಳ ಪೂ ಮುಡಿತ್ತಿನ ಶಾರದಮ್ಮಾ ||

ಎಣ್ಣೆ ಕೈಯಿಪ್ಪಿನ ಶಾರದಮ್ಮಾ
ಕಡಿಮೆ ಮಲ್ಪುಲ ಕಷ್ಟನಿ ಶಾರದಮ್ಮಾ ||

ಬ್ರಹ್ಮನ ರಾಣಿ ಶಾರದಮ್ಮಾ
ಭಂಗ ಬುಡ್ಡೋಲ ಶಾರದಮ್ಮಾ ||

ಶೃಂಗೇರಿ ಪುರತ ವಾಸಿ ಶಾರದಮ್ಮಾ
ಮಂಗಳ ರೂಪದ ಶಾರದಮ್ಮಾ ||

ಬೋಡಾಯಿ ವರ ಕೊರ್ಪಿ ಶಾರದಮ್ಮಾ
ಈಡಿಜ್ಜಿ ನಿಕ್ ಎರ್ ಶಾರದಮ್ಮಾ ||

ವಿದ್ಯಾಬುದ್ಧಿ ಕೊರ್ಪಿನ ಶಾರದಮ್ಮಾ
ಶುದ್ಧ ಮನಸ್ ಕೊರ್ಲಾ ಶಾರದಮ್ಮಾ ||

ಯಶೋದೇಶ ಕೃಷ್ಣನಿ ಶಾರದಮ್ಮಾ
ಏಪಾಲ ಭಜಿಪುನೊ ಶಾರದಮ್ಮಾ ||

12. ರಾಗ - ಆಭೇರಿ

ತಾಳ - ಆದಿ

ವಸಂತಕಾಲೊಂಚೊಂಜಿ ರಾತ್ರಿ ಸ್ವಪ್ನ ಸೂಯೆ
ವಾಸುದೇವೆ ಕೃಷ್ಣ ಕೊಳಲುರಿಪುನೊ ಪೊರ್ಲುನು

||ಪ||

ಬೂಳು ಪಜೀರ್ ಮರಕುಳು
ತಾಳ ಪಾಡುನೊ ಸೂಯೆ
ಮೇಳ ಜಿಂಕೆಳೆದೊಟ್ಟುಗು
ಕುಳ್ಳಿದಿ ಪಿಲಿಕುಳೆನ್ ಸೂಯೆ

||೧||

ಮಲ್ಲಿಗೆ ಜಾಜಿ ಕೇದಗೆ ಸಂಪಿಗೆ
ಮೆಲ್ಲಮೆಲ್ಲ ನಲಿಪುಣೊ ಸೂಯೆ
ಕಲ್ಲು ಮಣ್ಣ್ ಪೊಯ್ಯೆ ಪದ
ಸೊಲ್ಲು ರಾಗ ಪಣ್ಣುಣೆನ್ ಸೂಯೆ

||೨||

ಆಕಾಶೊಂಟು ಸೆಡ್ಲ ಮಿಂಚಿ |
ಆರತಿ ಅಂಪುಣೊ ಸೂಯೆ
ಲೋಕೊಂಟಿಂಚಿ ದಾಸೆರ್ ಮಂತ |
ಯಶೋದೇಶ ಕೃಷ್ಣನ್ ಪೊಗಳುನೊ ಸೂಯೆ

||೩||

13. ರಾಗ - ಹಿಂದೋಳ

ತಾಳ - ಆದಿ

ಕೃಷ್ಣ ಮನುಷ್ಯ ಆತ್ಯೇ | ದೇವೇರೆ ಸತ್ಯ

||ಪ||

ಏಳ್ ದಿನೊತ ಬಾಲೆ ವಿಷೊಂತ ಮಿರೆನ್ ತಿಂತ್ ಕೆರುವಾ |
ಬೋಳು ಬಂಡಿ ರಕ್ಕಸನ್ ತೊಳಿತ್ ತೊಳಿತ್ ಪುಡಿ ಅಂಪಾ

||೧||

ಧೂಳು ಕೊಣತ್ ದೈತ್ಯನ್ ಆಕಾಶೊಂಟು ದೆರ್ ಕೆರುವಾ
ಬಾಳ ಸರ್ತಿ ಬತ್ತಿ ರಕ್ಕಸೆರೆನ್ ಸೀಳ್ತ್ ಸೀಳ್ತ್ ಬುಡುವಾ

||೨||

ಇಲ್ಲಗಿಲ್ಲಗ್ ಪೋತ್ ಪೇರ್ ಬೇಣ ಪರುವಾ
ಗೊಲ್ಲರೆ ಬಾರ್ಲೆದೊಟ್ಟುಗು ಮಲ್ಲೆರೆ ಕಾಳಗ ಅಂಪುವಾ

||೩||

ಕಾಳಿಂದಿ ಮಡುಟು ಮುಳ್ಳುತು ಕಾಳಿಂಗನ್ನೆಡೆಟ್ ನಲಿಪುವಾ
ಕಾಳಿಂಗನೊ ಅಹಂಕಾರನ್ ಬೋಳಂತ್ ತು ಕಾಪಾಡುವಾ

||೪||

ಬೊಳ್ಳ ಬರ್ಶ ಬನ್ನಗ ಬೆರಳ್ತ್ ಗುಡ್ಡ ದೆರ್ಪುವಾ
ಏಳ್ ದಿನ ಜನೊಂಕೆನ್ ಬಡೊವಿಪ್ಪಂತೆ ಬದುಕುವಾ

||೫||

ಗೋಪ್ಯೇರ್ ಬತ್ತಂಡಾ ಸೂಪಿ ಪೊರ್ಲು ಬೇತೆ ಉಂಡಾ
ಕೋಪಯೇರ್ಡಲಾ ಅಂಪಂತೆ ಕಳೆಪೆ ಆಕೆನೊ ಚಿಂತೆ

||೬||

ಗೊಲ್ಲ ಬಾರ್ಲೊಟ್ಟುಗು ಪೋತು ಪೋರ್ಲುಡು ಪೆತ್ತ ಮೇವೊಂತು
ಮರ್ಲ್ ಅಂಪೆ ಜೇವ್ವೇನ್ ಕೊಳಲುರಿತುತು ನಲಿತೊಂತು ||೭||

ಸೋದರ ಮಾಮೆ ಕಂಸನಾಯೆ ಸಾದರ ಸೋಜೋವಂತೆ ಗುದ್ದುತು
ಪುದರ್ ಕೊಣತೆ ಯಾದವೆರೆಗ್ ಯಶೋದೇಶ ಕೃಷ್ಣ ಜಗತ್‌ಗ್ ||೮||

14. ರಾಗ : ಶಿವರಂಜಿನಿ

ತಾಳ : ಆದಿ

ಗೋಕುಲೊಂಟು ಎಂಚೆ ನನ ನಾವು ಬದುಕುಣಾ
ಮಧುರೆಗ್ ಕೃಷ್ಣ ನಮನ್ ಬುಡ್ತು ಪೋಂಡಾ ||ಪ||

ಕಂಸೆಕಡಪ್ಪಡ್ತೆಕರೆ ಅಕ್ಕೂರೆ ಪಣ್ಣುಣಾಯನ್
ಹಿಂಸೆ ಕೊಳ್ಳೆರೆ ಕೃಷ್ಣ ಬಲರಾಮನ್
ಮೋಸ ಅಂತತ್ ಕೆರ್ಪೆಕೆರೆ ಉತ್ಸವೊಂಟ್
ಬೀಸ ಬೀಸ ಪೋತು ನಮ ರಥೊನು ಎಂತೊತಿಜಿಗ ||೧||

ಕೃಷ್ಣ ನೊ ಲೀಲೆನ್ ಒಂಜೊಂಜಿ ನೆನೆತ್‌ಂಡ
ಕಷ್ಟ ಉಂಡು ನಂಕ್ ಆಯನ್ ಮದತ್‌ಂಡ
ಪುಟ್ಟಿ ಬಾಲೆತಿಂಚಿ ನಮನಾಯೆ ಕಾಪಾಡೀಯೇ
ಕಟ್ಪಾ ಪಾಡ್ ಅಕ್ಕೂರನ್ ಗೋಕುಲೊಂಟಿಪ್ಪರೇ ||೨||

ಮಧುರೆಡಿತ್ತುನೊ ಅಪ್ಪ ಅಮ್ಮನ್ ಸೂತು
ಯಾದವರರಸೆ ಉಗ್ರಸೇನಗ್ ರಾಜ್ಯ ಕೊಳ್ಳು
ಸೋದರಮಾಮನ್ ಗುದ್ದು ಗುದ್ದುತು ಕೆರ್
ಯಶೋದೇಶ ಕೃಷ್ಣ ಪಿರಬರಂತೆ ಪೋಂಡಾ ||೩||

15. ರಾಗ - ಕಲ್ಯಾಣಿ

ತಾಳ - ಆದಿ

ಎನ್ನೊ ಜೀವನ ಸಾರ್ಥಕಾವರೆ | ನಿನ್ನೊ ಭಜನೆ ಏಪಲಾ ಅಂಪೊಲಾ ಕೃಷ್ಣಾ||

ಪುರುಷೆ ಬಾಲೆಳ್ ಮಂತೆರೆಗ್ | ಹರುಷ ಇಲ್ಲಡ್ ಜಿಂಜಡ್
ನಿಮಿಷ ನಿಮಿಷ ಹಾಳಾವಂತೆ | ದಿವಸ ನಿತ್ಯ ಭಜನೆ ಅಂಪೊಲಾ ಕೃಷ್ಣಾ ||

ಜನೊಕ್ಕು ನಕಲಿ ಅಂತೆರ್‌ಡಾ | ಮನಸ್‌ಗವೆನ್ ಕೊಣರಡಾ

ಪುಟ್ಟು ಸಾವು ದೂರ ಆವೆರೇ | ಗಟ್ಟಿ ಭಜನೆ ಅಂಪೊಲಾ ಕೃಷ್ಣಾ ||
 ಅಪ್ಪೆ ಅಮ್ಮೆ ಈಯೆ ಎಂಕ್ | ತಪ್ಪು ಹಾದಿಡ್ ಕೊಣವಡಾ
 ಸುಪ್ಪತ್ತಿಗೆ ಸುಖ ಬೋತ್ರಿ | ತಪ್ಪಂದೆ ಭಜನೆ ಅಂಪೊಲಾ ಕೃಷ್ಣಾ ||
 ಏರ್ ದೂರ್ಂಡ ಎಂಕ್ ಜಾನೇ | ಏರ್ ಪೊಗಳೊಂಡಾ ಎಂಕ್ ಜಾನೇ
 ಕಾರ್ ನಿನ್ನೊ ಏಪಲಾ ಬುಡಯೇ | ಜಾರಂತೆ ಯಶೋದೇಶ ಕೃಷ್ಣ ಕಾಪೊಲಾ ||

16. ರಾಗ : ಚಾರುಮತಿ

ತಾಳ : ಆದಿ

ಏಪಲಾ ಕೃಷ್ಣನೊ ನಾಮನ್ ನೆನೆತೊಂಡ |
 ಕಾಪುವೆ ಬುಡಂತೆ ನಮನ್ ||ಪ||
 ಕಳೆಪೆ ನಮ್ಮೊ ಬರ್ಪಿ ಕಷ್ಟೊಂಕೆನ್ |
 ಕೊಳ್ಳೆ ನಂಕ್ ಮಂತ ಸುಖನ್ ||೧||
 ಸಂಸಾರೊಂತೊ ಸುಳಿಕ್ ಸಿಕ್ಕಾತ್ ಬೂಳ್ಳಗ |
 ಕಂತೊವಂತೆ ನಮನ್ ದೆರ್ತ ಪತ್ತುವೆ ||೨||
 ಇತ್ತೆನೆ ಬೆತ್ತಾ ಬೂಳ್ಳು ಪೋಪಿ ದೇಹಂತೊ |
 ಮಿತ್ತದಾಸೆನ್ ಬುಡ್ತು ನಂಬುಂಡ ||೩||
 ಏತ್ ಜನ್ಮಂತೊ ಕರ್ಮಂತೊ ಫಲನ್ |
 ಯಶೋದೇಶ ಕೃಷ್ಣ ದೋಷ ದೂರಂಪೆ ||೪||

7. ಸಂತ ಭದ್ರಗಿರಿ ಕೇಶವದಾಸೆರೆನ ತುಳು ಕೀರ್ತನೆಲು

1. ರಾಗ - ಮೋಹನ

ಝಂಪೆತಾಳ

ಮದ ಪೊಡ್ಡಿ ದೇವರೆನ ಮದ ಭರಿತ ಮಾನವ
 ಮಧುಸೂದನ ಕೃಷ್ಣ ಪಣಲ ನಾಲಯಿಡ ||
 ಒದಗುನಕುಳ್ ಏರುಳ್ಳೇರ್ ಮರಣ ಬರ್ಪನ ಪೋರ್ತು
 ಪದುಮನಾಭನ ಬುಡಡ ಗತಿಯಿಚ್ಚಿ ಮನುಜಾ || ೧ ||

ದೇಹ ಕೊರ್ತಿನಿ ದೇಗ ದೇವರೆನ ತೂದವರೆಗ
ಮೋಹ ಕೆರೆಗ ಮಾಯಾಪರದೆ ದೆಪ್ಪರಗ ||
ಸ್ನೇಹದೀವರೆಗ ದೇವರ ಚರಣ ತೂವರೆಗ
ದಾಹ ತಣಿಪೆರಗ ಶಾಂತಿಪ್ರಾಪ್ತಿ ಮೊಳ್ಳೆರಗ || ೨ ||

ಕಣ್ಣಡ ಕೃಷ್ಣನ ದಿವ್ಯರೂಪೂನು ತೂಲ
ಬಣ್ಣನೆನ ಮಳ್ಳುಲ ಹರಿಲೀಲೆ ಸತತ ||
ಉಣ್ಣನಗ ತಿನ್ನನಗ ಮದಪೊಡ್ಡಿ ದೇವರೆನ
ಮಣ್ಣಾದ್ ಪೋಪುಂಡು ದೇಹ ತೆರಿಲಾ ಈ ಮನುಜ || ೩ ||

ಭಜನೆ ಮಾಳ್ಬಂದಿ ನಾಲೈ ವ್ಯರ್ಥ ದೇವರೆನ
ಭಜನೆ ಕೇಣಂದಿನ ಕೆಬಿ ವ್ಯರ್ಥ ವ್ಯರ್ಥ ||
ಸುಜನ ಹೃದಯಸ್ಥ ಹರಿದಾಸಕೇಶವನುತನ
ಭಜನೆ ಕೀರ್ತನೆ ಮಲ್ತ್ ಸುಖಿಯಾಲ ಮನುಜಾ || ೪ ||

2. ರಾಗ : ಜೀವನಪುರಿ

ತ್ರಿತಾಳ

ಯಾಪ ತೋಜಾವ ನಿನ್ನ ರೂಪಾನ ದೇವರೆ || ಪ ||
ಪಾಪ ಕರ್ಮಿ ಏನ ಶಾಪನೊ ಏನ್ ಮಲ್ತಿ
ಪಾಪನೊ ದಾದವೊ ಶ್ರೀಪತಿ ಯೀಯೆ ಕಾಪಾಡೊಡೊ ಸ್ವಾಮಿ || ಅ.ಪ. ||

ಏತ ಜನ್ಮ ಆಂಡೊ ಏತ ಜನ್ಮ ಪೊಂಡೋ
ಏತ ಜನ್ಮ ಧಾರಣೆ ಮಾಳ್ಪೊಡೊ
ಸೋತುಪೋಯೆ ಭವ ಚಕ್ರೊಡು ತಿಕ್ಕೊಂದು
ವಾತ ಸಂಭವನುತ ರಾಮ ರಕ್ಷಣಮಾಳ್ಪು || ೧ ||

ಓದೆರೆ ಬರ್ಪುಜಿ ಶಾಸ್ತ್ರನೆ ಗೊತ್ತಿಜ್ಜಿ
ವೇದ ಪುರಾಣಯಾನ್ ಕೇಣ್ಣನ್ ಜ್ಜಿ
ವಾದ ಶಕ್ತಿ ಇಜ್ಜಿ ದಾದಲಾ ಗೊತ್ತಿಜ್ಜಿ
ಮಾಧವ ಕೇಶವ ಭಜನೆ ಬರ್ಪುಜಿ || ೨ ||

ಗುರುಯೇರೊ ಗೊತ್ತಿಜ್ಜಿ ಉಪದೇಶ ಆತ್ಮಜಿ
ಹರಿ ಈಯೇ ಗತಿ ನಿನ್ನೊರತಿಜ್ಜಿ
ಹರಿದಾಸರೆನ ಸಂಗ ಕೊರ್ದು ಕಾಪಾಡ್ಡ |
ಹರಿದಾಸ ಕೇಶವನುತೆ ಪೂರ್ಣಕೃಪಾಳಾ

|| ೩ ||

4. (ಅ) ಅಲಕ್ಷಿತ ಹರಿದಾಸರೆ ತುಳು ಕೀರ್ತನೆಲು

1. ಹೆಬ್ಬು - ಕಂಡಿಗ ಪದ್ಮನಾಭ ಚೆನ್ನಿಯೆರೆನ ತುಳು ಕೀರ್ತನೆ

ರಾಗ - ಕೇದಾರಗೌಳ, ಅಷ್ಟತಾಳ

ಅಣ್ಣೆ ಮಾಮೆ ಭಾವೆಮಾತ ಲೇ ಲೇ ಪಾಡ್ಲೆಗಾ | ಯನ್ನ ಮಗೆ ಕಾಂತುದಿಕ್ಕೆ ಬೇಗ ಬರಡ್‌ಗಾ |
ಲೇ ಲೇ ಲೇ ಲೇಗಾ | || ಪಲ್ಲ ||

ಮಲ್ಲ ಮರೋಟು ಕೊಳ್ಳಿ ತುಂಡ್‌ಡ್ | ಕಲ್ಲುಮುಳ್ಳು ಹೂಟು ನೀರಿಡು | ಸುಳ್ಳು ಸತ್ಯ
ಜಂಭಕೋಪೋಡ್ ದೇವರತ್ತಗಾ | ಪಲ್ಲಿಪೆತ್ತ ನಾಯಿ ಆನೆಡ್ ಒಳ್ಳೆ ಮೀನ್ ಯಾಮೆ
ಪಜಿರುಡ್ | ಮಲ್ಲ ಸಿಂಹ ಮನ್ನೋ ಜಾತಿಡ್ ಉಳ್ಳೆರತ್ತಗಾ | ಲೇ ಲೇ || ೧ ||

ಸುಳ್ಳು ಸುಳ್ಳು ಗುಳ್ಳೆ ಲಕ್ಕಿ ನೆಲೇಸಮುದ್ರೋಡ್ | ಮಲ್ಲಮೀನ್ ನಾಲುಸುತ್ತ ನಲಿಪ್ಪುಂಡತ್ತಗಾ |
ನಾಲ್‌ವೇದ ಕಂಡೊಣಾಯಿನಿ | ಸೀಳ್ಲ್ ಪಡ್‌ಂಡ್‌ಲೀಲೆ ತೂದು ಕೈ
ಮುಗ್ಗಿಲೆ ದೇವರತ್ತಗಾ || ಲೇ ಲೇ || ೨ ||

ಮಲ್ಲಕೊಳ್ಳಿ ಪರ್ವತಾನಿ ರಕ್ಕಸೇರು ದೇವುತ್ತೇರ್ ಮೆಲ್ಲದೇರ್‌ತಾದು ಕಡಲ್‌ಗು
ಬೇಗದೀಯೇರತ್ತಗಾ | ಕಲ್ಲಗುಂಡು ಮುಳ್ಳುಲಕ್ಕ ಮುಳ್ಳುಡ್ ಪೊನಗಾ ಬೊಳ್ಳಿಯಾಮೆ
ರೂಪಾದ್ ದೆರ್‌ತ್ತೆರತ್ತಗಾ | ಲೇ ಲೇ || ೩ ||

ಮೋಡದಲಕ್ಕ ಇಷ್ಟಯಿನಿ ಹಾಡ್‌ಕೇರ್‌ಡ್‌ರ್ ಕೂಡ್ಲೆ ಭೂಮಿ ಪರ್ವತಾನಿ ದೇರ್‌ತ್ತೆರತ್ತಗಾ |
ಕಾಡ್‌ಡೊಂಜಿ ಬೊಳ್ಲ್ ಪಂಜಿ | ದಾಡೆನೀಡುಂಡೂ ಪಾಡ್ ಪಣ್ಣಾಗಾ
ಕಣ್ಣ್ ಬುಡ್‌ಪೆರತ್ತಗಾ | ಲೇ ಲೇ || ೪ ||

ಬಾಲೆಗೊಂಜಿ ನೋಪುನಾಗ ಕಲ್ಲ ಕಂಬೋಡೂ ಮಲ್ಲರೂಪು ನಾರಸಿಂಹ ಬತ್ತೆರತ್ತಗಾ |
ಕಾಳನ್ ತೂದು ಕರ್ಲತೋಡ್ಡುಮಾಲೆ ಪಾಡ್‌ಯೇರ್ | ಶೀಲಗೊಂಜಿ ಮುದ್ದು ಕೊಳ್ಳು
ಬುಡ್‌ಯೇ ರತ್ತಗಾ | ಲೇ ಲೇ ||೫||

ಕಿನ್ನಿ ಕಿನ್ನಿ ನಾಮಪಾಡ್ಡ್ ಮಾಣಿ ರೂಪೋಡೂ | ಬಣ್ಣ ಮಳತ್‌ದ್ ಮಣ್ಣಾ ದಾನ
ಕೇಂಡೆರತ್ತಗಾ | ಕಣ್ಣ್ ಬುಡ್‌ದು ನೇಲೆರೂಪೋಡ್ ಬಾಣಲತ್ತೆರ್ | ಪನ್ನಿಡೊಂಜಿ ಕಾರ್
ಮಂಡೆಗ್ ದೀಯೆರತ್ತಗಾ | ಲೇ ಲೇ ||೬||

ಅಮ್ಮೆ ಪಂಡಿ ಪಾತೆರೋಗು ಕೊಡ್ಡಿ ಪತ್ತೇರ್ | ಅಪ್ಪೆ ಕೇಕ್ಕಿಲು ಕಡ್ಡ್ ಜೀವ ಮಲ್ಲೇರತ್ತಗಾ |
ಹಮ್ಮು ಮಳ್ಳುನಗ್‌ಲೆನೀ ಮಾತಗುಳ್ಳ ಮಲ್ಲೇರ್ | ದಮ್ಮಯ್ಯ ಪಣ್ಣಿಗೈನಿ ಕಾತೆರತ್ತಗಾ
ಲೇ ಲೇ ||೭||

ಬಾಣಪತೊಂದು ಮೆಗ್ಗೆ ಲೆತ್ತೊಂದು ಕಾಡ್‌ಗ್ ಪೋಯೇರ್ | ತಾನೇ ಸುತ್ತದ್ ಮುರ್ಗನಿ
ಕೆರ್ದು ಪಾಡ್ಯೇರತ್ತಗಾ | ಪಿರಣದಾನ ಕೊಳೆಡ್‌ಂದಿ ನಾಯಿನಿ ಮಂಡೆ ಕಾತೇರ್ | ಹೀನಬುದ್ಡಿ
ರಾವುಣಾನಿ ಕೇರೈರತ್ತಗಾ || | ಲೇ ಲೇ ||೮||

ಗೊಲ್ಲೇರೇನಿ ಸೇರ್ಡ್ ನಲ್ತವಾಂಟೆ ಉರ್‌ತ್ತೇರ್ | ಬಿಲ್ಲ ಪಬೋಡು ಕೊಳ್ಳಿ ಆನಿನಿ
ದರ್‌ತ್ತೇರತ್ತಗಾ | ಮಲ್ಲಮಾಮ ಮಲ್ತಿ ಮಾಟ ಚಲ್ಲ ಕುಡ್ತೆರ್ | ಕಳ್ಳೆನೆಂದ್ ನೆನ್ನಾಯಿನಿ
ಕೆರೈರತ್ತಗಾ | ಲೇ ಲೇ ||೯||

ಪೋರ್ಲು ದಾ ಪೊಡ್ಡಾವೆ ಎದುರ್ ಬತ್ತಲೆನಲ್ಲೇರ್ ಮರು | ತೂದ್ ಕೈತಟ್ ತೆಲ್ಲೆರತ್ತಗಾ |
ಅರ್ಧ ಚಂದ್ರೆ ಮಂಡೆಡಿತ್ತಿ ಸಂಕ್ರ ದೇವೇರ್ | ಸರ್ಕ್ ಮಲ್ತದ್ ಮೂಜಿಪಟ್ಟ
ಸೂಡಿಯೇರತ್ತಗಾ || | ಲೇ ಲೇ

||೧೦||

ಮಂತ್ರಜಾಪ ದೇವೇರ್ ಪೂಜ ಬೂರಿ ಕಾಲೋಡೂ | ತಂತ್ರಡೊಂಜಿ ಕುದುರೆ ಮಿತ್ತದ್
ಸುತ್ತೇರತ್ತಗಾ | ಸುತ್ತಸುತ್ತ ಕತ್ತಿ ಬೀಸ್ಡ್ ಕಂತ್ರಿ ಜನನಿ ಕೆರ್ಡ್ ಪಾಡ್ ಪಂತ ಮಲ್ತಿ
ಪದ್ಮನಾಭಮೂರ್ತಿ ಯತ್ತಗಾ || ಲೇ ಲೇ ಲೇ ಲೇ ಲೇ ಗಾ ||೧೧||

2. ಪಣಂಬೂರು ಲಕ್ಷ್ಮೀನಾರಣಪ್ಪಯ್ಯರೆನ ತುಳು ಕೀರ್ತನೆ

ಚಿತ್ರಾಪುರ ಶ್ರೀದುರ್ಗಾಪರಮೇಶ್ವರಿಸ್ತುತಿ

1. ರಾಗ - ಸೌರಾಷ್ಟ್ರ

ಏಕತಾಳ

ಕಡಲ್‌ಡ್ ಉದಿತ್‌ದ್ ಹೊಳೆಹೊಳೆದ್ | ಬೆಡಗ್‌ಡ್ ತುದೆಗಿದೆ ಕಳೆಕಳೆದ್ ||
 ಮಡಿಮಂಗಲ ಪೀತಾಂಬರ ಜಾಲಿ | ಕಡೆಕಟ್ಟ್‌ಳು ನಾಲ್ ಸುತ್ತೊಡ್ ಪೊಳಿ ||
 ಕಡ್‌ಕಲ್ಲದ ನಡುಗುಡಿ ಗುಂಡೊಡ್ | ನಮ | ಒಡತಿ ಕಲ್ಲದೇವರ್ ಮೆರೆಪೇರ್ ||ಪ||

ಕಾರುಂಗಿಲ ಪಿಟ್ಟಿ ಮೇಂಟಿಕೆಳು | ಹೀರ ಗೋಧಿಕೆ ಸಾದಾ ಸರಪೊಳಿಳು ||
 ತೋರ ಕಡಗಪೈಚಾಣಿ ಪಾಡಗೊಳು | ಕೀರಸ್ವರೊತಗೆಚ್ಚೆಡೊಂಕು ವಂಕಿಳು ||
 ಸೀರೆ ನೆರಿ ಜರಿಪೊರುಳೆರ್ ಪಣೈರ್ | ಪರಿಪೂರ್ಣ ತೀರಾಂದ್ ನಿಜೊಕಿಂದು ||೧||

ಕಚ್ಚೆ ಪಾಡಾದಿ ನಡುಕುಡುದಾರ | ಸ್ವಚ್ಚ ಹೊಳೆಪಿ ದಾಪುಡು ಪುರ ||
 ಕೊಚ್ಚಿದ ಸುರುಳುಳ್ ಕೋಯಮಲಕುಳೆಡ್ | ಮುಚ್ಚಿಪೋತುಂಡ್ ನಡು ಒಡ್ಯಾಣೊಳೆಡ್ ||
 ಹೆಚ್ಚೆ ಪಣೈರೆಗಾರ್ ಇಚ್ಚೆಕೊಂಡ್ ಬಹ | ಳಚ್ಚರಿಯ ತೂಲೆಕ್ಕ ಸಾಲುಳ್ ||೨||

ಕಡಗಕಂಕಣ ಬಳೆ ಬಾಪುರಿಳ್ | ಇಡೆಟಿಡೆ ಕಾಜಿಗುರಿಂಬಳೆಳು ||
 ನಡುಕ್ ದೀತೆರ್ ದುಂಡುದೋರೆ ಚಳಕದ | ಕಡೆಕ್ ಮುರುಗಿವಂಕಿ ಬಾಜ್ ಬಂದುಳೆದ್ ||
 ಬೆಡಗ್ ತೂವೆರೆ ಭಾಗ್ಯ ಪಡೆವೊಡ್ ಒಡತಿಡ | ದೃಢ ಭಕ್ತಿಡ್ ಬಲ್ಲೆ ಪೊರ್ಲು ತೂಲೆ ||೩||

ಕರಿಮಣಿಸರ ಗುಂಡುಸರ ಪದಕ | ಹರಿಸರ ಹವಳಸರದ ಹದಕ ||
 ವರ ಮುತ್ತುದಸರ ಕಂಠಿ ಸರಕುಳ್ | ಕಿರಿಪುತ್ತೊಳಿಸರ ಚಕ್ರಸರಕುಳ್ ||
 ತರತರ ಸರಗೆಚ್ಚೆಟೀಕು ಕಸ್ತಾಳಿದ | ಪೊರುಳೆರ್ ಪಣೈ ಶ್ರೀಮೂಕಾಂಬೆ ||೪||

ಮೂಕುತಿ ಬೊಟ್ಟು ಮುಗುರು ಜಾಲಿ | ತೂಕ ಬುಲಾಕು ದಂಪತಿ ಮಾಲಿ ||
 ಪಾಕ ಕೆಂಪುಳ್ ವಜ್ರ ಕಿಟಕುಳೆದೀದ್ | ಜೋಕ್‌ಡ್ ಕಟ್‌ದಿಂಚಿ ಕಲೆನೆಲೆ ತೂದ್ ||
 ಟೀಕ್ ತೂಯೆರೆಗ್ ಭೂಲೋಕನೆ ಬೆಳಗುಂಡ್ | ಲೋಕುನ್ ಬಲೆ ತೂಕ ಸುಖಪಡೆಕೆ ||೫||

ವಾಲೆ ಮುಗುರು, ಬುಗಡಿ ಅರಳೊಲೆ | ಲೋಲಕ್ ಸಂಪೂಣಿ ಬೆಂಡೋಲೆ ||

ನೀಲದ ಮಾಗಾಯಿ ಚಂದ್ರ ಮುರುಕುಳ್ | ಲೀಲೆ ತೋಜುನ ಕನ್ನಡ ಬಾವಲಿಲ್ ||
ಸಾಲ್‌ಡ್ ನವರತ್ನ ಕಿಟಿತ ಪ್ರಕಾಶೋಳ್ | ಲೀಲೆಡ್ ಬೆಳಗ್‌ಂಡ್ ನಿಜವಿಂದ್ ||೬||

ತರೆಬಾರ್‌ದ್ ಬಕ್‌ತತೆ ಪೂಜಿದ್ | ಕುರುಳೇರ್ಡ್ ಜಡೆ ಮುಡಿ ಪಾಡ್‌ದ್ ||
ಸುರುಟಿದ ಕಟಿಯುದಿರಿದ ಕಡೆಕಟ್ಟ್‌ಡ್ | ತಿರುಪ್ ಕೇದಿಗೆ ವರಜಡೆಗೊಂಡೆ ದೀದ್ ||
ಜರಿ ರವಕೆನ್ ಎದೆಕೆರಗೊಂದ್ ಕಟ್‌ದಿಂಚಿ | ಪೊರಿಪುದುಳ್ಳಾಲ್ವಿ ಕರುಣಾಲ್ವಿ ||೭||

ಮಲ್ಲಿಗೆ ಜಾಜಿ ಸೇವಂತಿಗಳ್ | ಮುಲ್ಲೆ ಸೊರಗೆ ರೆಂಜೆ ಸಂಪೆಗಳ್ |
ಎಳ್ಳೆ ಗೋರಟೆ ಪಚ್ಚೆ ಕದಿರ್ ಮಂದಾರ | ಸುಳ್ಳೆ ಸೌಗಂಧಿ ತುಂಬೆ ತುಲಸಿ ಪಿಂಗಾರ |
ಜಲ್ಲಿ ಪಾಡ್‌ದಿ ಪೂರ್ತ್ ಬಲ್ಲಿ ಪಣೈರೆ ಪೂರ | ಬಲ್ಲೆ ತೂವರೆಗ್ ಇದಿರ್‌ಗ್ ||೮||

ರಂಗಪೂಜಾಪುಂಡ್ ಉಳಾಯಿಪೋಕ | ಸಿಂಗಾರ ದೀಪಿ ಪೂರ್ತ್‌ನೊರ ತೂಕ |
ಮಂಗಲಾರತಿ ಆಪುಂಡ್ ಅನೇಕ | ಭಂಗದ ಭವದುಃಖೊಳೆನ್ ನೂಕ ||
ಅಂಗದಿಷ್ಟಾರ್ಥಕೊರ್‌ದ್ ಬೆಂಬಲವಾದ್ | ಗಂಗಾಧರ ಬುಡೆದಿ ಕಾತೊಣ್‌ವೇರ್ ||೯||

ಮಂಗಲಪದ ಬಲೆ ಬಲೆ ಕೇಣ್ಣೆ | ಭಂಗ ಇಲ್ಲರೊ ಹ್ಯಾಂಗೆ ಎಣಿಮಾಣಿ |
ರಂಗ ರಾಮಯ್ಯ ನಾರಾಯಣ ಬಹಿನೀ | ಸಂಗ ಸುನಕರ್ತ ಹೇ ರುದ್ರಾಣಿ
ನಂಗೆ ಇವಳಮ್ಮ, ಮಹಾಲಿಂಗನರಸಿಗೆ ಜಯ | ಮಂಗಲಾರತಿಯ ಬೆಳಗಿರೆ ||೧೦||

* ಈ ಕಡೇತ ಚರಣೊಡು ಮಿಶ್ರಭಾಷೆ ತೋಜುಂಡು.

3. ಪುಂಡೂರು ದಾಮೋದರ ಪುಣಿಚಿತ್ತಾಯಿರೆನ ತುಳು ಕೀರ್ತನೆಲು

ಶಿವಸ್ತುತಿ - 1

ಆದಿತಾಳೊ

ಮೋಹನ ರಾಗೊ

ನಮೋ ನಮೋ ಗಿರಿಜೆನ ಮದಿಮಾಯಗ್ | ಹಿಮಕರ ಶೇಖರ ಶಂಕರಗ್ ||ಪ||

ಬೊಳ್ಳಿತ ಗುಡ್ಡೆತ ಮೇಲ್‌ಟ್ ಬೆಳಗ್‌ಪಿ | ಇಲ್ಲೊಳ್ಳಧಿಪತಿ ಪರಶಿವಗ್ |

ಬೊಳ್ಳಿ ಬೋರಿತ ಪುಗೇಲಾಟ್ ಕುಳ್ತತ್ | ಮೆಲ್ಲನೆ ಪೋಪಿ ಮಹೇಶ್ವರಗ್ ||
 ಹರಿವಿರಿಂಚಿಗುಳು ಸರಿಟೆಂತತಹಂ | ಕರಿತ್ತ್ ಮೇಲೈಗ್ ಸಡಿಪಾನಗ |
 ಪರಿಹರಿಪ್ಯರಲಿಂಗಾಕೃತಿಟೆಂತನ | ಪರಮೇಶಗ್ ಘಣಿ ಭೂಷಣಗ್ ||
 ಮದನೆ ಮದೊಂಟೈನಸ್ತೊನ್ ಮೇಲಾಗ್ | ಮದೆಟಾತ್ತಡಕಿ ವಿರೋಧೊಂಕ್ |
 ಎದುರಿದ್ಯಂತಿಕ್ರೋಧೊಂಟಾಯನ | ಪುದರ್ನಾಗೇತಿ ಸದಾಶಿವಗ್ ||
 ವಿರಿಂಚಿವಾಣಿಗುಳೇಣಾಂಗೊಂಟ್ ವಿ|ಹರಿಪಿ ಕಾರಣೊನ್ ಪಿಂದೊಣುತ್ |
 ಕಿರಾತರುದ್ರಾಽವೊಂಡುತುಳೆಕ್ಕೇನ್ | ಕೆರಿ ಹಾಲಾಹಲ ಕಂಧರಗ್ ||
 ವೇದೊನ್ ಕಂಡಿ ತಮಾಧಮನರ್ಯರರ | ಮಾಧವೆ ಮೀನ್ಯಾಗತಿ ಸೂತ್ತ |
 ಮೋದೊಂಟಾಯಿ ಬೀಲೊನವೃತ್ತ್ ನಿಜ | ಮೂರ್ಧ್ನಿಟ್ ಜೀಡೊಂಡೀಶ್ವರಗ್ ||
 ಕನಕಾಕ್ಷನ್ ಸೂದನೊಮಾಂತತ್ ಭೂ | ಮಿನ್ ಜೇರ್ತ್ನ ಕಿಟಿತಾಕೃತಿತ |
 ವನಜಾಕ್ಷನರೂಪೊನ್ ತಿದ್ದಿಗುಹನ | ಜನಕಗ್ ಜಯತು ಜಟಾಧರಗ್ ||
 ಶರಣು ಬತ್ತಿ ಪ್ರಹ್ಲಾದನರಕ್ಲೆಗ್ | ಹರಿ ನರಹರಿ ಆನೆನ್ ತೆರಿತ್ |
 ಶರಭಾಕಾರೊನ್ ಧರಿತ್ತ್ಯೆನ್ ಸಂ|ಹರಿತಿ ಮಹಾದೇವಗ್ ಭವಗ್ ||
 ಬಲಿ ದಾನೊನ್ ಕೊಳಿನೆಲನೊಪ್ಯರ ಹರಿ | ಬಲವಿಕ್ರಮತನು ತಾಳೊಣುತ್ |
 ಇಳೆಟೊಳಿ ದೇಹೊನ್ ಕಳೆತ್ತೆಲುನ್ಕರ | ತಲೊಂಟ್ ಪತ್ತನ ಪುರಹರಗ್ ||
 ಜಯಜಯ ಮೃತ್ಯುಂಜಯ ಜಗತ್ತಿತಯ | ಲಯ ಕೈಲಾಸನಿಲಯ ಗಿರೀಶ |
 ದಯಾಹೃದಯ ದೈತೇಯಕುಲಕ್ಷಯ | ನಯನತ್ರಯ ದೇವಗಿರೀಶ ||
 ಬೇಡನ ವೇಷೊನ್ ಪಾಡ್ತ್ ಪೀಡಿಪಿ | ಕಾಡಮೃಗೊಂಕ್ಕೆನ್ ನಾಡೊಣುತ್ ||
 ಕಾಡ್ ಕಾಡ್ ತಿರುಗಾಡಿಪಿ ದೇಲಂ | ಪಾಡಿತ್ತ ದೇವೆರೆ ದೇವೆರೆಗ್ ||

ಶಿವಸ್ತುತಿ - 2

ರೂಪಕ ತಾಳೊ

ಜಾಯಿಗಿಕುಳೆಗ್ನಟ ಸಹ | ಜಾಯಿನ ದಯೊಸೋಜಿರಿ ಶಿವ
 ಮಾಯಜಾಲೊಂಟೇನ್ ಕಷ್ಟೊಂ | ಟಾಯಿ ರಕ್ಷಿತೊಳ್ಳೆ ದೇವ

ಅರ್ಥಾರಾಗೊ

||ಪ||
 |ಅ.ಪ.||

ಆನಮೋರೆತೊಂಜಿ ಮಗೆ, ಷ ಡಾನನ ಬೆತ್ತೊರಿಯೆ; ತಂಕ್- ಐನ್ ಶಿರಸ್ ಮ್ಯಂದ್‌ಗುಡ್ಡೆ ಟಾನ ಮಗಳ್ ಬುಡೆತಿ, ಭವನೆ	೧
ಪೊತ್‌ಪಿ ಕಣ್ಣಾತ ಮಿತ್‌ಗ್ ಸುತ್ತಿ ಜಡೆಟ್ ಶುದ್ಧೋನೀರ್ ನೆತ್ತಿಟ್ ಚಂದ್ರಾರ್ಥೋ ಚರ್ಮೋ ವಸ್ತ್ರೊಂತ ವಿಚಿತ್ರ ರೂಪ	೨
ಸತ್ಯವಾನೆ ಸೈತ್ತಿ ಸಮಯೊ ಭಕ್ತಿಟ್ ಸಾವಿತ್ತಿ ಬಹುಲೊ ಸ್ತೋತ್ರೊಮಾಂತಿ ಮಾತ್ರೊ ಜೀವೊ ಕೊಳ್ಳಾ ಕಾತಿ ಕೀರ್ತಿವಂತೆ	೩
ರಕ್ಕಸೇರೆ ಮೂಜಿ ರಾಜ್ಯೊ ನೊಕ್ಕೆಲಳಿತ್ ಪೋಪಿಲೆಕ್ಕೊ ದುಖ್ಯೊಕೊಳುತ್ ಸುಡುತ್ ಸುಮನ ಸೇರ್ಕುಳಿಗ್ ಸುಖೊನು ಮಾಂತೆರ್ ೪	೪
ವಿಷೊನ್ ತಾನೆ ಪರ್‌ತಮ್ಯತೊದಿ ವಿಷದ ಕುಲೊಂಕೊಳಿತ್ತೆರ್ ಆ ಋಷಿ ಮ್ಯಕಂಡುಸುತಗ್ ಚಿರಾ ಯುಷೋಪಾಡ್ಯೆರ್ ಕರುಣೆಟೊಲಿತ್	೫
ಎರುತ ಬೆರಿಟ್ ಕುಳುತೊಂಡುತ್ ತರೆತ ಬುರುಡೆ ಸರೊಪಾಡ್‌ತ್ ೬ ಮರಿತ ತರೊ ತರೊಂತ ನಗೊನ್ ಪೊರುಲ್‌ಗ್ ಜೀಡೊಂಡಿ ಹರನೆ ೭	೬ ೭
ಪುಂಡಿ ಅರಿ ಕೊಳೊಂಡ್‌ತೊಂಜೇ ಪುಂಡ್‌ಟ್ ಶೀರೊಂಡ್ ತಾನ್ ಪುಂಡೂರೆಂದೊಳ್ ಜನಿತಿ ಪಂಡಿತ ಸುತೆ ಪಂಡೆ ಪದೊನ್	೮

ಶಿವಸ್ತುತಿ - 3

ತಾಳೊ ರ್ಪುಂಪೆ	ರಾಗೊ ಕಾನಡೊ
ಶರಣು ಶೇರೊಳ್ಳೆ ಶಿವನ್ ಸಂಕಟೊನ್	ಪ.
ಪರಿಹರಿತ್ ಸೂವೆ ಸಜ್ಜಿಟೆ ನಮ್ಮನ್	ಅ.ಪ.
ನರಟ ಪಂಜಿತ ಪಗೆಟ್ ಸರಿಟೆದ್‌ರ್ ಕಾದ್‌ತ್ ಪರಮು ಶಿವೆ ತಾನೆಂದ್ ಸೋಚೊಕೊಳುತ್ ವರಭಕ್ತಿಗೊಲಿತ್ ಮೆಚ್ಚಿತ್ ತನ್ನ ಕೃತಸ್ತ್ರೊ ಕರುಣೊಂಟ್ ಕೊಳಿ ಕಾಮಹರದೇವನ್	೧

ಬುಡುತ್ ಮಗಳೆನ್ ಮಾಮೆ | ನಡವುಡುಪಿ ಯಾಗೊಂಕ್ |
 ಬುಡೆತಿ ಪೋತೊಳ್ ತನು | ಬುಡಿ ಮನ್ನುಗ್ ||
 ಒಡನೆ ದಕ್ಷನ ತರೆನ್ ಕಡ್ ತಡಕ್ ತದ್ವರೊನ್ |
 ಪೊಡಿಮಾಂತ ತಡಕಿ ಶ್ರೀ | ಮೈಡಪಾದೊನ್ ||೨||

ಹರಿ ಪುರಾತನೊಟ್ ಸಾ | ವಿರೊ ಕಮಲೊಪುಷ್ಪೊಂಟ್
 ಸರಿಟ್ ಪೂಜೆನ್ ಮಾಂತಿ ಸಂತೋಷೊಕ್
 ಪರು ಸಾವಿರೊನ್ ಕೂಡಿ | ಪರಿತೊಂಜಿ ಚಕ್ರೊ ಪ-
 ತ್ಯರೆ ಕೈಟ್ ಕೊಳ್ ನಾದಿ ಪರಮೇಶನ್ ||೩||

ಮಗೆ ಪುಟ್ಟರೆ ಶ್ರಾದ್ಧ ದೇವೆ ಮಾಂತಿ ಮಖೊಂಟ್ |
 ಮಗಳಾವರಾಯನಂಗನೆ ಪಣ್ಣೆಕ್ |
 ಮಗ್ಗಳನಾಚಾರ್ಯ ಮಂತ್ರಾನೈಟ್ ಪೊಣ್ಣೆನ್
 ಮಗನ ರೂಪೊನೆ ಮಾಂತಿ ಮೈಗಪಾಣೆನ್ ||೪||

ಬಾಣದಾನವಗ್ ಪ್ರಸನ್ನಾತ್ ಕೇಂಡಿ ವರೊ-
 ದಾನೊ ಕೊಳಿ ರೀತಿಟನುದಿನೊಲಾಯನ |
 ಸ್ಥಾನೊಂತ ಬಾಗಿಲೊಟ್ ಕಾತೊಂಡ್ ಕುಳತಿ ಪ್ರ-
 ಧಾನೊ ಕರುಣಾಬ್ಧಿ ಭಕ್ತಾದೀನನ್ ||೫||

ಶಂಖಚೂಡಾದಿ ಖಳ ಸಂಕುಲೊನ್ ಕೆರ್ತ್ ಲೋ |
 ಕೊಂಕ್ ಸುಖೊಮಾಂತಿ ಸೋಮಾಂಕಧರನ್ ||
 ಕಿಂಕರ ಜನೊಂಕುಳೆನ್ ಸಾಂಕೊಣುತ್ ಬರ್ಪಿ ಆ |
 ಲಂಕುಡೇಲಾತ ಹರನ ಪದಪದ್ಮೊನ್ ||೬||

4. ದೇಲಂಪಾಡಿ ನಾರಾಯಣ (ವಾಸು) ಅರಳಿತ್ತಾಯೆರೆನ ತುಳು ಕೀರ್ತನೆ ಶಿವಸ್ತುತಿ

ಶಿವನಲಿಪುವೆರ್ ಸೂವರೆ ಪೋಯಿ ಬಲ್ಲೆ
 ನವವಿಧೊ ಭಕ್ತಿಟಾರೆನ್ ಧ್ಯಾನಿತೊಳ್ಳೆ ||ಪ||

ಕಾಮನಮ್ಮಗ್ ಬಲು ಮಿತ್ರಲಾವೊಣುತ್
 ಸಾಮಜದೈತ್ಯನ್ ಮಥನೊ ಮಾಣ್ಣೊಣ್ತ್ ||
 ಸೋಮಾರ್ಧಕಲೆನ್ ಶಿರಸಾಟ್ ಜೀಡೊಣ್ತ್
 ಮಾಮನ ಯಾಗೊನ್ ಧ್ವಂಸ ಮಾಣ್ಣೊಣ್ತ್ ||೧||

ಪರಶುಮ್ಯುಗಾಭಯೋವರದೊ ನಾಲ್ಕೈಟ್
 ಶಿರರುಂಡ ಮಾಲೆ ಶೋಭಿಪುಣು ಕೆಕ್ಕಿಲ್ಟ್ ||
 ಉರಗನ ಡಾಬು ನೇವಳೊ ಸಣ್ಣ ನಡುಟ್
 ಪರುವತ ರಾಯನ ಮಗಳೆಡ ತುಡೆಟ್

||೨||

ವರ ಮಹಾಲಕ್ಷ್ಮಿ ಸುಗಾನೊಮಾಂಪುವೆರ್
 ಸರಸಿಜೋದ್ಭವೆ ಕೈಟ್ ತಾಳ ಬೊಟ್ಟುವೆರ್ ||
 ಸುರಪೆಕೊಳಲ್ನ್ ಸಪ್ಪ ಸ್ವರೊಂಟ್ ಉರಿಪುವೆರ್
 ಹರಿನಾರಾಯಣೆನೆ ಮೃದಂಗೊ ಬೊಟ್ಟುವೆರ್

|| ೩ ||

ಕಮಲ ಸಂಭವ ದೇವೇಂದ್ರಾದಿ ನಿರ್ಜರೆರ್
 ಅಮರ ವಂದಿತ ನಾರದಾದಿ ತಾಪಸೆರ್ ||
 ಸಮೊಸಾಲ್ ಕಟ್ತ್ ಕೈ ಮುಗಿತ್ ಬಾಗ್ತೆರ್
 ನಮಶಿವಾಯೆಂದ್ ಮಂತ್ರೊನ್ ಜಪಿಪುವೆರ್

||೪||

ಗಜಚರ್ಮಾಂಬರೊ ನೆರಿಪತ್ ಸುತ್ತೊಣ್ಣಾತ್
 ಭುಜಗ ಭೂಷಣ ನೆಡ್ಡೆ ಪೊರ್ಲುಟ್ ಜೀಡೊಣ್ಣಾತ್ ||
 ಭಜಕೆರೆ ಜಯ ಜಯ ರವೂನೆ ಕೇಂಡೊಣ್ಣಾತ್
 ರಜತಾದ್ರಿವಾಸೆ ಬರ್ಪೆರ್ ನಲಿತೊಣ್ಣಾತ್ ||೫||

ಮಾಸೊಂಟ್ ಎರಡ್ ಪ್ರದೋಷೊಂತ ದಿವಸ
 ಘೋಷಿಪಿ ವಾದ್ಯ ಸಂಗೀತೊಂತ ರಭಸೊ
 ಶೇಷಾಭರಣೆ ನಾಟ್ಯ ನಲಿಪಿ ವಿಲಾಸೊ
 ವಾಸುಕೀಶ್ವರಗ್ ಪಣಿಯೆರೆ ಪೂರೈಸ್ಸೊ

||೬||

ಶೂಲಿ ಕಪಾಲಿ ಪಿನಾಕಿಗ್ ಶರಣು
 ಬಾಲ ಗಣಪ ಗುಹನಮ್ಮಿಗ್ ಶರಣು ||
 ಪಾಲೀಪೊಡೆಂದ್ ಗೌರೀಶಗ್ ಶರಣು
 ದೇಲಂಪಾಡಿದಮಹಾಲಿಂಗಗ್ ಶರಣು

||೭||

5. ಪುಂಡೂರು ವೆಂಕಟರಾಜ ಪುಣಿಚಿತ್ತಾಯೆರೆನ ತುಳು ಕೀರ್ತನೆಲು

೧. ಗಣಪತಿ ಸ್ತುತಿ

ಸೊಂಡಿಲ ಮೋನೆದ ನೇಲ್ಯ ಬಂಜಿದ ಓ.....-

ಗಣಪತಿ ನಿಕ್ಕೆನ್ನ ಕೈಮುಗಿಯೆ

||ಪ||

ಯೆನ್ನ ಬಾಳ್ವೆಗ್ ಬರ್ಪಿ ಸರ್ವವಿಘ್ನೋಲೆನ್

ಕಲೆದ್ ಕಾಪಾಡೊಡೊಂದ್ ಕೇಂಡೊನುವೆ

||ಅ.ಪ.||

ವೇದವ್ಯಾಸೆರ್ ಪಂಡಿನ ಭಾರತೊ

ಬರೆನಾಯೆ ತೆರಿನಾಯೆ ಈಯತ್ತಾ

ಜ್ಞಾನೊದ ಕಡಲ್ ನೆಂದ್ ನಾಯೆಗೆ

ಜ್ಞಾನಿಲೆ ಕಣ್ಣೆಗೇ ತೋಜುವಗೆ

||೧||

ಚೌತಿದ ದಿನೊತಾನಿ ಬಂಜಾರೋ ಉಂಡುದ್

ಎಲಿಮಿತ್ತ್ ಕುಲ್ಲೊಂದು ಪೋನಗಾ

ಪೊಟ್ಟೆಬಂಜಿನ್ ತೂದ್, ತಲಿತಿನ ಚಂದ್ರಗ್

ನೋಪ್ಯರಾಂದ್ ದಂತೋನೇ ಪೊಲಿತಗೆ

||೨||

ಬಡವೆ ಮಲ್ಲಾಯೆ ಪನ್ನಿನ ಭೇದೊನ್

ದೀವಂತೆ ಸಲಗುನಾ ಶ್ರೀ ವಿಘ್ನರಾಜ

ನಿನ ಕಾರಮುದೆಲ್ ಡ್ ಕುಳ್ಳಾದ್ ಭಕ್ತಿಡ್

ಸ್ತುತಿ ಮಲ್ಪುನ ಈ ಭಕ್ತನ್ ಕಾಪುಲ

||೩||

2. ನಿನ್ನ ಜೋಕುಲು

ಒಲ್ಪ ಇತ್ತಂಡಲಾ ನಿನ್ನ ಜೋಕ್ಲು

ನಿನ್ನ ಪ್ರೀತಿದ ಜೋಕುಲು

ನಿನ್ನ ಭಕ್ತಿರ್ ಎಂಕುಲು

ಕೈಬುಡಡ ಮದಪಡಾ

ಈಯೆಂಕೆ ನೇಪಲಾ
ಸಿರಿಕೃಷ್ಣ ದೇವರೇ ಈಯೆ ಶರಣು ||

ವಾವಾವ ಜನ್ನೊದಾ ಕರ್ಮಫಲೊಟು
ಈ ಜನ್ನೊಡೇ ಎಂಕ್ಲು ಪುಟ್‌ದ್ ಬತ್ತೋ||
ಕರ್ಮೊದಾ ಬಂಧನೊನು ಬುಡುಪಾದ್ ಎಂಕ್ಲು
ಸನ್ಮಾರ್ಗೊ ಸೇರುನಂಚನೆ ಮಲ್ಪುಲಾ || ಒಲ್ಪ ಇತ್ತ್ಂಡಲಾ....||

ಕತ್ತಲೆನೆ ದಿಂಜಿನಾ ಈ ಭೂಮಿಡ್
ದುಂಬು ಪೋಪಿನ ತಾದಿ ತೆರಿಯಂದೆನೇ
ಐಟ್ಟೆನೋ ನೆಟ್ಟೆನೋ ಪೋವೊಂದು ಉಲ್ಲೊ
ಎಂಕ್ಲೆ ಬದ್ಯಾಗ್ ಒಂಜಿ ಬೊಲ್ಪು ತೋಜಾಲಾ || ಒಲ್ಪ...||

ಮಣ್ಣ್‌ಡ್ ದೂಳ್‌ಡ್ ಕೊಡಿಪಂತಿಡ್
ಮಲ್ಲ ಮರಟ್ ಇರೆಟ್ ಈ ಬಾನೊಡ್
ಮಾತೋಲ್ಲ ಉಲ್ಲಗೆ, ಎಂಕ್ಲೆ ಬರಿಕ್
ಒರೊ ಬತ್ತದೆಂಕ್ಲೆನ್ ಕಾಪೊಡೀಯೇ || ಒಲ್ಪ...||

3. ಕೃಷ್ಣಾ ನಿನಲೀಲೆ

ಕೃಷ್ಣಾ ನಿನಲೀಲೆ
ಅರ್ತೊ ಆವಂದಿನ ಲೀಲೆ - ಏರೆಗ್‌ಲಾ
ಅರ್ತೊನೆ ಆವಂದಿ ಬೇಲೆ ||ಪ||

ಕಡಲ್‌ದ ನೀರ್‌ಡ್ ಊರೆ ಮುರ್ಕನಗಾ
ಗೋಳಿದ ಇರೆಟೀ ಜೆತ್ತೊನ್‌ದ್
ಕಾರ ಕೊಂಬರೆಲ್‌ನ್ ಬಾಯಿಡ್ ಜುಂಬೊನುದ್
ಇತ್ತಿನ ಬಾಲೇ ಈಯತ್ತಯಾ ||೧||

ಬಲಿ ಚಕ್ರವರ್ತಿನ ಯಾಗೊಗು ಪೋದ್
ಮೂಜಿ ಪಚ್ಚೆ ನೆಲ ನಟ್ಟೊಣ್‌ದ್
ಮೂಜೀ ಲೋಕೊನುಲ ಕಾರ್‌ದ ಪಚ್ಚೆಡೇ
ಅಲತ್‌ನ ಮಾಣೇ ಈಯತ್ತಯಾ ||೨||

ಕಾದ್ಯರ ಬೋಡಾದ್ ಕೌರವ ಪಾಂಡವ
ಕೂಟೊದ ಜನೊಕುಲು ಕುರುಕ್ಷೇತ್ರೊಡ್
ಉಂತಿನ ಸಮಯೊಡು ಅರ್ಜುನ ಬಾವನಾ
ಕುದುರೆನ್ ದೇರ್ನಾಯೆ ಈಯತ್ತಯಾ ||೩||

ಧರ್ಮೊಗು ನಾಶೊ ಬರ್ಪಿನ ಕಾಲೊಡು
ಧರ್ಮರಕ್ಷಣೆನ್ ಮಲ್ಪ್ಯರ ಬೋಡಾದ್
ಎನ್ನನ್ ಯಾನೇ ಸೃಷ್ಟಿ ಮಲ್ತೊನುವೇಂದ್
ಪಂಡಿನ ದೇವೆರ್ ಈಯತ್ತಯಾ ||೪||

"ಯದಾಯದಾ ಹಿ ಧರ್ಮಸ್ಯ
ಗ್ಲಾನಿರ್ಭವತಿ ಭಾರತ
ಅಭ್ಯುತ್ಥಾನಮಧರ್ಮಸ್ಯ
ತದಾತ್ಮಾನಂ ಸೃಜಾಮ್ಯಹಂ"
- ಪಂಡಿನ ದೇವೆರ್ ಈಯತ್ತಯಾ ||೫||

4. ಏತ್ ಪುಗರೊಲಿ

ಏತ್ ಪುಗರೊಲೀ - ನಿನ್ನಾ
ಪ್ರೀತಿನ ಯಾನ್ | ನಿನ್ನ | ಪ್ರೀತಿನ ಯಾನ್ ||ಪ||

ಲೋಕೊದ ಭಕ್ತೆರೆ ರಕ್ಷಣೆ ಒಂಜೇ
ತನ ಧೈಯೊ ಪನ್ನಿನಾ ಓ ಗುರುವೆ || ||ಅ.ಪ.||

ನಾನಾ ಬಂಗೊಡು ನರಲುನ ಜನೊಕುಲೆ
ಮನಸ್‌ಗ್ ನೆಮ್ಮದಿ ತರ್ಪಾಯನೋ |
ಬಡತನ ಕಷ್ಟೊಡು ಕಣನೀರ್ ಪಾಡುನ
ಬಡವೆರೆಗ್ ಸುಕೊ ಕೊರ್ಪಾಯನೋ ||೧||

ವಿದ್ಯೆ ಇಚ್ಚಾಂದಿನ ಅಜ್ಞಾನಿಲೆನಾ
ಬುದ್ಧಿಗ್ ಬೊಲ್ಪು ತೋಜಾಯನೋ
ನಾನಾ ರೋಗೊಡು ನರಲುನ ರೋಗಿಲೆನ
ಕಣನೀರ್‌ನ್ ಈ ಆಜಾಯನೋ ||೨||

ನಿನ್ನ ಪಾದೊನೆ ಯೆಂಕ್ ಆಶ್ರಯೊ ಪಂಡ್‌ದ್
 ನಿನ್ನ ಸನ್ನಿಧಿನ್ ಸೇರೊಂಡೇ
 ಯೆನ ಬಾಳ್ವೆಗ್ ಈಯೆ ಸರ್ವಸ್ವೊ ಪಂಡ್‌ದ್
 ನಂಬ್‌ದೆ ಯಾನ್ ಶ್ರೀಗುರುವೆ

||೩||

5. ಕರುಣಾಮಯೇ

ಭಗವಂತೆ ಕರುಣಾಮಯೇ
 ಆ ಭಗವಂತೆ ಕರುಣಾಮಯೆ

||ಪ||

ನಡತ್‌ದ್ ಮುಗಿಯಂದಿ ಈ ಭೂಮಿನ್
 ಪರಿತ್‌ದ್ ಮುಗಿಯಂದಿ ಈ ನೀರ್‌ನ್
 ಕಣ್ಣು ಕೊಡಿ ಎತ್ತಂದಿ ಈ ಬಾನೊನ್
 ನಂಕಾತ್ರ ಉಂಡುಮಲ್ತ್ | ಕೊರಿನಂಚಿ ದೇವೆರ್ ಕರುಣಾಮಯೆ
 ಆ ಭಗವಂತೆ ಕರುಣಾಮಯೆ

||೦||

ಪಗೆಲ್ ಬೆಲಗುನಾ ಸೂರ್ಯನಾರಾಯಣೆ
 ಇರ್ಲ್ ಬೆಲಗುನಾ ಕೋಟಿದಾರಗೆ
 ಪೊತ್ತುನಾ ತೂನ್‌ಲಾ ಬೀಜುನಾ ಗಾಳಿಲ
 ನಂಕಾತ್ರ ಉಂಡುಮಲ್ತ್ | ಕೊರಿನಂಚಿ ದೇವೆರ್ ಕರುಣಾಮಯೆ
 ಆ ಭಗವಂತೆ ಕರುಣಾಮಯೆ

||೨||

ಕೊಡಿಲ ಕಡೆಲಾ ಇಚ್ಚಂದಿ ಕಡಲ್‌ನ್
 ನೆನೆಪಂತೆ ಬರ್ಪಿನಾ ತೆಡಿಲ್‌ನ್
 ಕೆಬಿ ಕಣ್ಣ್ ನಾಲಾಯಿ ಇತ್ತಿನಾ ಉಡಲ್‌ನ್
 ಕೊರಿನಂಚಿ ದೇವೆರ್ ಕರುಣಾಮಯೆ |
 ಆ ಭಗವಂತೆ ಕರುಣಾಮಯೆ

||೩||

6. ಒರಿಯನೇ ದೇವೆರ್

ಓಲೋಲು ತೂಂಡಲಾ ಒರಿಯನೇ ದೇವೆರ್
 ನಮೊನ ಲೋಕೊ-ಗೊರಿಯನೇ ದೇವೆರ್
 ಬೇತೆ ಬೇತೆ ಪುದರ್‌ದಾ
 ಬೇತೆ ಬೇತೆ ರೂಪೊದಾ
 ಮಲ್ಲ ದೇವೆರ್ | ಮಾ-ಮಲ್ಲ ದೇವೆರ್ ||

|| ವೃಂದ || ಶರಣು ಶರಣು ಶರಣಾಲೇ ಆರೆ ಪಾದೊಗ್
 ಆರೆನೊಂಜಿ ದಯೆನೆ ಯಾವು ನಮೊನ ಬಾಳ್ವೆಗ್ || ಓಲೋಲು ||

ತುದೆತ ಬರಿತ ಗುಡಿಟ್‌ಲಾ - ಮಲ್ಲಗುಡ್ಡೆ ಕೊಡಿಟ್‌ಲಾ
 ನಗರೊದಾ ನಡುಟುಲಾ - ಹಳ್ಳಿದಾ ಗುಡಿಟ್‌ಲಾ
 ಸಾರೊ ಸಾರೊ ಜನೊಕುಲು ಭಕ್ತಿ ಭಾವೊ ದಿಂಜಿದ್
 ಕೈ ಮುಗಿವನ ಮಾಮಲ್ಲ ದೇವೆರೊಯೆನೇ ||

|| ವೃಂದ || ಶರಣು ಶರಣು ಶರಣಾಲೇ - ಆರೆ ಪಾದೊಗ್
 ಆರೆನೊಂಜಿ ದಯೆನೆ ಯಾವು ನಮೊನ ಬಾಳ್ವೆಗ್ || ಓಲೋಲು ||

ಮೂಡಯಿ ಪಡ್ಡೆಯಿದಾ ಕಡಲ್‌ದಾಯರೆ
 ಬಡಕಾಯಿದ ಆ ಮಲ್ಲಾ ಗುಡ್ಡೆದಾಯರೆ
 ಲೋಕೊದಾ ಸುತ್ತಮುತ್ತ ಮಾತೋಲ್ಲಾ ಇಪ್ಪಿನಾ
 ಮಾತಜನೊಲ ನಂಬುನಾ ದೇವೆರೊರಿಯೆನೇ ||

|| ವೃಂದ || ಶರಣು ಶರಣು ಶರಣಾಲೇ ಆರೆ ಪಾದೊಗ್
 ಆರೆನೊಂಜಿ ದಯೆನೆ ಯಾವು ನಮೊನ ಬಾಳ್ವೆಗ್ || ಓಲೋಲು ||

ಬಾಸೆ ಬೇತೆ ಆದಿಪ್ಪು ರೂಪೊ ಬೇತೆನೇ ಇಪ್ಪು
 ಜಾತಿ ಮತೋ ನಂಬಿಕೆಲು ಮಾತ ಬೇತೆ ಇಪ್ಪು
 ಆಂಡಲಾ ದೇವೆರೆಡಾ ಇಚ್ಚಿ ಬೇಧ ಭಾವನೆ
 ಒಂಜೆ ಸೂರ್ಯ ಒಂಜೆ ಚಂದ್ರ ಪನ್ನಿಲೆಕ್ಕೊನೆ ||

|| ವೃಂದ || ಶರಣು ಶರಣು ಶರಣಾಲೇ - ಆರೆ ಪಾದೊಗ್
 ಆರೆನೊಂಜಿ ದಯೆನೆ ಯಾವು ನಮೊನ ಬಾಳ್ವೆಗ್ || ಓಲೋಲು ||

7. ಉಡುಪಿ ಕೃಷ್ಣ

ಉಡುಪಿ ಊರುಗು ಪೋಯೆರಾ

ಉಡುಪಿ ಕೃಷ್ಣನ್ ತೂಯೆರಾ

||ಪ||

ಎಡತ ಕಯಿಟೊಂಜಿ ಬಲ್ಲ ತುಂಡ್‌ನ್

ಬಲತ ಕಯಿಟೊಂಜಿ ಮಂತ್‌ನ್

ಪತ್‌ದ್ ಉಂತಿನ ತೆಲಿಕೆ ಮೋನೆದ

ಬಾಲೆ ಕೃಷ್ಣನ್ ತೂಯೆರಾ

||ಅ.ಪ.||

ಮದ್ದ ಮುನಿಕುಲು ತಪಸ್ ಮಲ್ತಿನ ಜಾಗೆ ಉಂದುಗೆ ಕೇಂಡೆರಾ

ಕೃಷ್ಣ ದೇವರೆನಾರ್ ತಾಪನೆ ಮಲ್ತಿ ಕತೆನ್ ಕೇಂಡೆರಾ

ಕನಕದಾಸೆರ್ ಭಜನೆ ಮಲ್ತಿನ ಕನಕಕಿಂಡಿನ್ ತೂಯೆರಾ

ಭಕ್ತಜನೊಕುಲು ಕೈಮುಗಿವುನಾ ಪೊರ್ಲಮೂರ್ತಿನ್ ತೂಯೆರಾ ||೧||

ಪಟ್ಟೆ ವಸ್ತ್ರೊನ್ ಕಚ್ಚೆ ಪಾಡ್‌ದ್ ನೆರಿನ್ ಸೊಂಟೊಗು ಕುತ್ತದ್

ಅಯಿತ ಮಿತ್ತ್‌ಗ್ ಪೊರ್ಲಕಂಟ್‌ದ ಡಾಬುನೆಡ್ಡೆನೊ ಬಿಗಿತ್‌ದ್

ಮುಗಲ್ ಬಣ್ಣೊದ ಮೆಯಿಕ್ ಮೆತ್ತದ್ ಪರಿಮಳೊದ ಹರಿಚಂದನೊ

ಅಗೆಲೊ ತೆಗೆಲೆಡ್ ಕೌಸ್ತುಭೋ ಮಣಿ ನೆಗಪಿ ಕೃಷ್ಣನ್ ತೂಯೆರಾ||೨||

ಕೆಬಿಟ್ ನೇಲುನ ಕುಂಡಲೊಂಕುಳು ತರೆಟ್ ದೀತಿನ ಸಿರಿಮುಡಿ

ಉರುಟು ಮೋನೆದ ಮುಂಡೊನಡುಟ್ ಕ|ಸ್ತೂರಿ ಬೊಟ್ಟಾದ ಐಸಿರಿ

ಪೇರ್‌ದಾ ನೊರೆಲೆಕ್ಕೊ ತೋಜಿಪಿ, ಕಾರಗೆಜ್ಜೆದ ಗಿಲಿಗಿಲಿ

ಅಂಚಿ ಪೊರ್ಲದ ಕೃಷ್ಣ ದೇವರೆ ಪೊರ್ಲನ್ ಒರೊ ತೂಯೆರಾ||೩||

6. ಕಳುವಾರು ವೆಂಕಟರಾಯೆರೆನ ತುಳು ಕೀರ್ತನೆಲು

ಅಡ್ಡ ಬೂರೋಂಡೆ ಉಲ್ಲಯಾ | ಬೂರೋಂಡೆ ದೇವೆರೇ

ಸರ್ಕಾರಿ ದೇವೆರೆ ಬೂರೊಂಡೇ

||ಪ||

ಮಂಗಳ ಗುತ್ತದ ಬೊಟ್ಟುದಯೆ | ಯ್ಯಾನ್

ವಿಟ್ಟು ಮುರಾರಿ ದೇವೆರೆ

||೧||

ಎನ್ನ ಉಳ್ಳೇಲ್ ಮಾಜಿ ಪಟ್ಟೇರ್
ಇಸ ಶಾಲ್ ಗಂಟಾನ್ ಕೊರ್ತೆರ್ ||೨||

ಪರತರ ಲೆಕ್ಕೊಗು ಕರ್ತಾದಾರ್
ರಸೀದಿ ಕೊಂಡು ಬರೆ ಪಣ್ಣೆರ್ ||೩||

7. ಜತ್ತಿ ಈಶ್ವರ ಭಾಗವತೆರ್ನ ತುಳು ಕೀರ್ತನೆಲು

1. ಗೋಪಿ-ಕೃಷ್ಣ ಸಂವಾದೊ

ದಾನೆಯಾ ಕ್ರಿಷ್ಣ ನಿನ್ನಾನ್ | ಜಾಣೆ ಪಣ್ಣೆರ್ ಮಾಂತ |
ನಾಣ ಬತ್ತಂಡ ದೂರು | ಬೇನೆ ಮಾಳ್ವಂತೆ ಬುಡಯೆ || ದಾನೆ.. || ಪಲ್ಲೊ||

ಅಪ್ಪೆ ಕೇಣೊಡುಯೀರೆ | ಒಪ್ಪಾನೆ ವುಳ್ಳೆ |
ವಣ್ಣಿ ಚಾಳಿಗ್ ಯೀರ್ | ಒಪ್ಪಾರೊ ಪಣ್ಣೆ || ಪಲ್ಲೊ||

ಬಾಡಿ ಕೇಣಾನೆ ಅತ್ತ | ಕೋಡೆಡ್ ಅಂಚಿಲಕ್ಕ |
ತೋಡೆಗ್ ಪೋತ ಪಿನಯೆ | ಕೇಡ್ ಲೇಸತ್ತ ನಂಕ್ || ದಾನೆ....||

ಮುನಿಕ್ಳ್ ಯನ್ನನ್ ಧನಿಪಣ್ಣೆರತ್ತೊ |
ದಿನೆ ದಿನೊ ಬುಡಯೆರಾ | ಜನೊ ಸೋಲ್ತೆ ಸತ್ತೊ ||ಅಪ್ಪೆ...||

ಗುರುಕ್ಕೊಳು ಇತ್ತೆ ಪಣ್ಣಿ | ಸರಿಯೆನ್ನ ಕಣ್ಣಿ ದುಂಬು |
ತಿರುಗ್ಯಾರ ಬಯಕ್ ಪೆನೆ | ಸೊರ್ಕ್ಕಾರ ಪೋಪ ಮುದ್ದು || ದಾನೆ..... ||

ಕಣ್ಣೆ ದುರುಪ್ಪುನೆಂಚ ಕೇಣ್ಣೆ ಯನ್ನಪ್ಪೆ |
ಕಣ್ಣಿ ಡಿ ದಾಸೆರೆ ಮನಸಾಟೇ ಇಪ್ಪೆ || ಅಪ್ಪೆ....||

ರಾಮಣ್ಣೆ ಪಂಡೆ ಕೋಡೆ | ಸೀಮೆತ ಮಣ್ಣಿಂದಗೆ |
ಅ ಮಗೆ ಬುದ್ಧಿವಂತೆ | ಈ ಮರ್ಳಾ ಕಟ್ಟುಪನೊ || ದಾನೆ...||

ಕಳುಪಂಡೆರಂಣೆಕೇಣಾಲೆ ಯೇನ್ ಮಂಣ್ |
ಗುಳು ತಿನ್ನವಿದ್ದಿ ಸೂ | ವೊಳಿ ಬುಡುತು ಕಂಣ್ ||ಅಪ್ಪೆ....||

ನ್ಯಾಯಾ ಮಾಂತಲ ಸೂಪೆ | ಸೂಪೆ ಬುಡುಲಗೆ ಕೃಷ್ಣ |
ರಾಯ ನೋಪುವೆ ನಿಕ್ಕ | ನ್ಯಾಯೊ ಇತ್ತಂಡ ಸರಿಯೊ ||ದಾನೆ...||

ಬಾಯಿ ಸೂಲೆಂದ್‌ತ್ | ಬಾಯಿ ಬುಡ್ಡಾಗ |
ಬಾಯಿಟ್ ಬ್ರಹ್ಮಾಂಡ ಸೂಯೆರಪ್ಪಾಗ || ಅಪ್ಪೆ... ||

ಮಗೆ ಪಂಡ್ ಪಣ್ಣೆ ನಿಕ್ಕ | ಮಗೆ ಬ್ರಹ್ಮೆ ಬಾಯಿ ಮುಚ್ಚಿ |
ಲಗೆ ವಿಶ್ವೇಶ್ವರಪಂಡ್ | ಮಗನ್ ಸೂಯೆರ್ ಗೋಪಿ || ದಾನೆ.... ||

ಸರಿ ಬಾಯಿ ಮಾಳ್ತೊಂದು | ಕೊರಿಯಪ್ಪೆ ಪೇರ್ |
ತಿರ್‌ಗಯೆ ಪಂಡ್ ವಿಶ್ವೇಶಸೆಳತ್ತೆರ್ || ಅಪ್ಪೆ.... ||

2. ಮಂಗಳೊ ಪದೊ

ಮಂಗಳೊ | ಜಯೊ | ಮಂಗಳೊ || ಪಲ್ಲ ||

ಮಂಗಳೊ ವಸುದೇವ ಬಾಲೆಗ್ | ಜಯೊ |
ಮಂಗಳೊ ಶ್ರೀಕೃಷ್ಣ ರಾಯಗ್ |
ಮಂಗಳೊ ಪಂಡ್ರಪುರತ್ತಾರೆಗ್ | ಎಡ್ಡೆ |
ಮಂಗಳೊ ವಿಠಲೆನಿ | ನಾರೆಗ್ || ಮಂಗಳೊ || ೧ ||

ಮಿರೆಕೊರ್ನಾಳೆನ್ ಕೆರ್ನಾರೆಗ್ ಯಳ್ಳ |
ಮಿರೆತಾಕ್‌ಳೆಟ ನಲಿತ್‌ನಾರೆಗ್ |
ಕರಕರಿಯಿದ್ಯಂತಿನಾರೆಗ್ | ನನ್ನ |
ಬೆರಿಪತ್ತಿ ದೇವೆರೆ ಪಾದೊಗು || ಮಂಗಳೊ || ೨ ||
ಮಂಗಳೊ ಗಣಪತಿ ಸ್ವಾಮಿಗ್ | ಲೇಸ್ |
ಮಂಗಳೊ ಭಕ್ತೆರೆ ಸಾಲ್‌ಗ್ |
ಮಂಗಳೊ ಪಾರ್ವತಿ ದೇವಿಗ್ | ಯೆಡ್ಡೆ |
ಮಂಗಳೊ ಸಿರಿವಿಶ್ವನಾಥಗ್ || ಮಂಗಳೊ || ೩ ||

8. ಶ್ರೀಶ ದಾಸೆರೆ ತುಳು ಕೀರ್ತನೆಲು

1. ರಾಗ ಹಿಂದೂಸ್ತಾನಿ ಕಾಪಿ

ಆದಿತಾಳ

ಗಣಪತಿ ಸ್ತುತಿ

ಸೊಂಡಿಲ್ ದಾಯೆಗ್ ತಿರ್ಗಾವಾ - ಎನ
ಮಂಡೆದ ಮಿತ್ತಡ್ ದೀಲಾವಾ

|| ಅ.ಪ. ||

ಸುರುಟ್ ಪೂಜೆ ನಿಕ್ಕ ಮಲ್ತಾದೆಂಕುಲು
ಉರುಟು ಸುಕುರುಂಡೆ ಸಂದಾವಾ

||೧||

ಮಲ್ಲೆ ಬಂಜಿ ಇತ್ತಂಡಲಾ ಭಕ್ತಿಡ್
ಮಲ್ಲೊ ಬಾಳೆದ ಕೈಲ್ ತಿನ್ನಾವಾ

||೨||

ಚೌತಿಡ್ ಮಲ್ಪಾವೆ ಪೂಜೆ ಶ್ರೀಶನಿ
ಪತ್ತುಣ್ಯೆಂಚಾಂದ್ ತೆರಿಪೋಲ

||೩||

ನೀತಿ ವಚನೊಲು

2. ರಾಗ ಸುರುಟಿ

ಆದಿತಾಳ

ಹಾಳ್ ಹರಟೆ ಬುಡ್ಲೆ ಮನಸಾಡ್
ನಾರಾಯಣ ಪಣ್ಣೇ

||ಪ||

ಕಾಲಾಕಾಲೊಡ್ ಬರ್ಪಿನೊ ದುರಿತ
ನಿವಾರಣೆ ಮಲ್ತಾದ್ ಕಾಪುವೆ ದೇವೆರ್

||ಅ.ಪ.||

ಅಂಚ ಇಂಚ ಪಂಡ್‌ದ್
ಬಾಯಿಡ್ ಪಂಚಾತಿಕೆ ಮಲ್ತ್
ಸಂಚಯ ಆಯಿನೊ ಪಾಪರಾಶಿನಿ
ಎಂಚಾಂಡಲ ಪರಿಹಾರ ಮಲ್ಲೊಣ್ಣೇ
ಕಾಮಕ್ರೋಧ ಲೋಭ ಮದ ಮತ್ಸರ
ದಾಲಾ ಇಚ್ಛೆ ಲಾಭಾ
ರಾಮ ರಾಮ ಶ್ರೀ ರಾಮನ ಮಂತ್ರ ನಿ-
ರಾಮಯೆ ಆಪಿನೊ ತಾದಿನಿ ಪತ್‌ದ್‌ತಾ

||೧||

||೨||

ಕೋಪ ತಾಪ ಬೊಡ್ಡೀ ದಿನದಿನಸಂ
ತಾಪ ದಾಲ ಇಚ್ಛೇ....
ಶ್ರೀಪತಿ ಶ್ರೀಶನೊ ನಾಮಸ್ಮರಣೆಡ್
ತಾಪತ್ರಯನೀ ದಕ್‌ದ್ ಬುಟ್ಟುಂಡ

||೩||

3. ರಾಗ ಸಾವೇರಿ

ಆದಿತಾಳ

ಬತ್ತಿನಿ ದಾಯೆಗ್‌ಂದ್ ತೆರಿದ್ ಬದ್‌ಕ್‌ಲಾ -
ಕತ್ತಿದ ಬಾಯಿಡ್ ಕಾರ್ಡ್

||ಪ||

ನೆತ್ತಿದ ಕಣ್ಣ್‌ಡ್ ಸರಿಯಾದ್ ತೂದು
ಕುತ್ತುನಿ ಕಂಟೆಲ್‌ಗ್ ಕೊಂಡತೊನಡಾ

||ಅ||

ಸರಿದಾಂತೆ ಪೋಂಡ್ ಕಾರ್‌ನಿ ದೀನಗ
ಏರ್ ತಗ್‌ನೀ ತೆರಿಯಂದೇ ||
ಕಾರ್ ಜಾರ್ಲ್ ಬೂರುಂಡ ಕುಸುಕುದ್
ದೂರದೂರು ನಿಕ್ಕಿ ತಿಕ್ಕಂದ್

||೧||

ಮಾಲೆ ಪಾಡ್ಲ್ ಸನ್ಮಾನ ಕೊರುಂಡ ಈ
ಶಾಲ್ ಪಾಡ್ಲೆರೆಂದ್ ಪಿರ ತೂಪ ||
ಶೂಲದ ಮಿತ್ತ್‌ಡ್ ಕುಲ್ಲು ದಿಲಕ್ಕ
ದಾಲಾ ತೆರಿಯಂದೆ ಪರಿತಾಪಾ

||೨||

ನಾನಾ ರೀತಿಡ್ ಪುಸ್ತಕ ತಿರ್‌ಗಾದ್
ಮಾನಾಭಿಮಾನನಿ ತೆರಿಯಂದೇ
ಗಾನಲೋಲೆ ಆದಿತ್ತಿನೊ ಶ್ರೀಶನಿ
ಜ್ಞಾನೊಡು ಭಕ್ತಿಡ್ ಕೈ ಮುಗಿಲಾ

|| ೩ ||

4. ರಾಗ ಕಾನಡ

ಆದಿತಾಳ

ದಾಯೆಗ್ಗಿನ ದೆವ್ವರ್ - ಸರಿ
ದಾಯೆಗ್ಗುಪ್ಪುಜ್ಜರ್ - ಕಣ್

||ಪ||

ದಾಯೆಗ್ಗುಡ್ಪುಜ್ಜರ್ - ಪಿರ
ದಾಯೆಗ್ಗೋಪೂವರ್

||ಅ||

ಬದುಕುನಿ ಎಂಚಾಂದ್ ತರೆ ಬೆಚ್ಚ ಮಲ್ತೊಂದ್
 ಬದುಕೆರೆಗಾತ್ರ ಮೋಸದ ತಾದಿಡ್ ||
 ಕಸರಸ ಯೆವ್ವೊಂದ್ ತೆರಿಯಂದೆ ಗುರಿದಾಂತೆ
 ಮುಸುಕುಡು ತೋಜಂದಿ ರೀತಿದ ತಾದಿಡೆ

||೧||

ನಾಯಿಗಾಯ್ಲಕ ವರ್ಸಾಂಡಲಾ ನಂಕ್
 ಬಾಯ್ ನಾರಾಯ್ಲ ನಾರಾಯ್ಲ ಪಣಂದೆ
 ಕಾಯ ಬೂರಿ ಆ ಸಮಯ ಬತ್ತಂಡಾ
 ಮಾಯೊಡ್ಲಿಕ್ ಬೂರ್ಡ್ ಲಕ್ಕರೆಗಾವಂದೆ

|| ೨ ||

ಸಂಸಾರಾನ್ನಿನೊ ಒಟ್ಟುಗ್ ಬರಂದ್
 ಹಿಂಸೆ ಮಲ್ತ್ ಅಪಕೀರ್ತಿ ಕೇಂಡ್ ದ್ ||
 ಹಂಸರೂಪಿ ಪರಮಾತ್ಮ ಶ್ರೀಶನ ಪದ -
 ಪಾಂಸುನಿ ತೂವಂದೆ ದುಡ್ಡು ದೊ ಮೋಹೊಡು

|| ೩ ||



5. ರಾಗ ಸಾವೇರಿ

ಖಂಡಭಾಷುತಾಳ

ದಾಯೆಗಿಂಚೇ ಬುದ್ಧಿ ಮಲ್ಪುವ ||
 ತರೆ ಮುದೆಲ್ ದಾಂತೆ

||ಪ||

ನಾಯಿದ ಬಾಳ್ವೆ ಮಲ್ತೊಂದು ಇಪ್ಪೊವ
 ಕಾಯಾ ವಾಚಾ ಮನಸ್ಸೋಪಗ್
 ಮಾಯ ಸಂಸಾರೆನಿಪಿ ಗುವೆಲ್ಡ್
 ಘಾಯ ಪಿಲಿತಲೆಕ್ಕ ಬೊಬ್ಬೆಡ್
 ನ್ಯಾಯಾನ್ಯಾಯ ಯೋಚನೆ ದಾಂತೆ

||ಅ.ಪ.||

ಕಣ್ಣ್ ಬುಡ್ಡ್ ತೂಪಿನೇಪಗ್ - ಇತ್ತೆ ಈ ಪ್ರಪಂಚದ
 ಮಣ್ಣ್ ದಾಸೆ ಪೋಪಿನೇಪಗ್ ||
 ಪೊಣ್ಣು ದಾಸೆಡ್ ರಾತ್ರಿ ಪಗೆಲ್
 ಬಣ್ಣ ಬಣ್ಣ ದ ಸ್ವಪ್ನಲೋಕೊಡ್

ಕಣ್ಣೊಡಾಂತಿನ ಕುರುಡಲಕ್ಕ
ಮಣ್ಣೊ ಮುಕ್ಕುದು ಪೋಪಿನತ್ತ

||೦||

ಸತ್ಯ ಮಾರ್ಗ ಬುಡ್ಡ - ಅಧರ್ಮದ
ಕೃತ್ಯ ಮಾತ ಮಲ್ತಾ ||
ಪತ್ತರೆಗಾವಂದಿ ತಾದಿ ಪತ್‌ದಾ
ಮೃತ್ಯು ಕೂಪೊಡು ಬೂರ್ಡ್ ತೈಪುನ
ಮಿತ್ತದ ಗತಿ ದಾದಾ ಪಣ್ಣಿನೊ
ಗೊತ್ತಾವಂದೆ ಬದುಕೊಂದುಲ್ಲಯ

||೨||

ಕಾಲ ಮೀರ್ಡ್ ಪೋಂಡ್ - ಜೀವನ
ದಾಲ ದಾಂತೆ ಉಂಡ್ ||
ಕಾಲ ಕಾಲೊಗ್ ಮಲ್ಪಿನ ಬೇಲೆದ
ಮೂಲ ತೆರಿಯಂದೆ - ಸ್ವಾರ್ಥದ ಬೇಲಿಡ್
ಬಾಳುವೆ ವಂಚಾಂದ್ ಮದತ್ ಪೋಯದೆ

||೩||

ಕಾಸಾಕಾಸಾ ಗಂಟಾ ಪಾಡ್ಡ - ಬಡ್ಡಿದ
ಆಸೆಡ್ ಏನ್ ಬೂರ್ಡ್ - ||
ಭಾಷೆ ತತ್ತಾದ್ ನಾಶದ ತಾದಿಡ್
ದೋಷ ಜಿಂಜಿದ್ ಪಾಪದ ಗಂಟಾನಿ
ಕ್ಷೀಶದ ರಾಶಿಡ್ ಶ್ರೀಶನಿ ಮದತ್‌ದ್

||೪||

6. ಮುತ್ಯೆದೆ - ಯಮ ಸಂವಾದೊ

ಮುತ್ಯೆದೆ

: ಗಂಜಿ ತೆಲಿ ಪರ್ಡ್ ಇಲ್ಲ್ ಬಾಕಿಲ್ ಮಲ್ತಾದ್
ನಾಲಾದಿನ ಇತ್ತಜ್ಜಿ||
ಎಂಚ ಬುಡ್ಡ ಬರ್ಪಿನಿ ಯಮರಾಯಾ
ಯಂಚ ಬುಡ್ಡ ಬರುವೆ ಯಮರಾಯ

- ಯಮು : ಗಂಜಿ ಪರ್ದ್ ಇಲ್ಲ ಬಾಕಿಲ್ ಮಲ್ತಂಡ
ನನ ಬತ್ನನಕ್ಲೆರ್ಪೆರ್
ಪಾತೆರಂದೆ ಪಿದಾಡ್ ಪೊಣ್ಣ್ ಜೀವ ಈ
ಪಾತೆರಂದೆ ಪಿದಾಡ್ ಪೊಣ್ಣ್ ಜೀವೇ ||೧||
- ಮುತ್ತೈದೆ : ರಾಮದೇವರೆ ಲೆಕ್ಕ ಆಣ್ ಜೋಕುಲು ಉಳ್ಳೆರ್ | ಎಂಚ ಬುಡ್ ಬರುವೆ
ಯಮರಾಯ
- ಯಮು : ರಾಮದೇವರೆಗ್ಗೆಕ್ಕ ಸೀತಾದೇವಿ ಬರ್ಪೆಲ್ | ಪಾತೆರಂದೆ ಪಿದಾಡ್
ಪೊಣ್ಣ್ ಜೀವೇ |
ಈ ಪಾತೆರಂದೆ ಪಿದಾಡ್ ಪೊಣ್ಣ್ ಜೀವಾ ||೨||
- ಮುತ್ತೈದೆ : ರುಕ್ಕುಮಿಣಿ ದೇವಿಲೆಕ್ಕ ಪೊಣ್ಣು ಜೋಕುಲು ಉಳ್ಳೆರ್! ಎಂಚ ಬುಡ್
ಬರುವೆ ಯಮರಾಯಾ | ಯಾನ್ ಎಂಚ ಬುಡ್ ಬರುವೆ ಯಮರಾಯಾ?"
- ಯಮು : ರುಕ್ಕುಮಿಣಿ ದೇವಿಗ್ಗೆಕ್ಕ ಕೃಷ್ಣ ದೇವೆರ್ ಬರ್ಪೆಲ್ | ಲಕ್ಕ ಪಿದಾಡ್ ಪೊಣ್ಣ್ ಜೀವೇ
| ಈ ಲಕ್ಕ ಪಿದಾಡ್ ಪೊಣ್ಣ್ ಜೀವೇ ||೩||
- ಮುತ್ತೈದೆ : ಬಂಜಿ ಬಾಯೀ ಕಟ್ ದ್ ಪದ್ದಾಯಿ ಮಲ್ತೆಂದ್ | ನಾಲ್ ದಿನ ದೀತಿಜ್ಜಿ
ಯಮರಾಯ | ಯಾನ್ ನಾಲ್ ದಿನ ದೀದ್ ಬರ್ಪೆ ಯಮರಾಯ ||
- ಯಮು : ಪದ್ದಾಯಿ ನಾಲ್ ದಿನ ದೀತಿಜ್ಜಿ ಪರವಾಯಿಜ್ಜಿ | ಕೈ ಪತ್ ದ್ ಬತ್ತಿನಾಲ್
ಪಾಡೊಣ್ಣೆಲು | ಪೋಡ್ಯಡ ರಡ್ ಬುಡೆದಿ ಪಾಡೊಣ್ಣೆಲ್ | ಲಕ್ಕ
ಪಿದಾಡ್ ಪೋಯಿ ದುಂಬುಗ್ ||೪||
- ಮುತ್ತೈದೆ : ಲಿಂಬೆ ಪುಳಿತಲಕ್ಕ ಜಬ್ಬೆರ್ ಇಪ್ಪುನಗ
ಎನೆನಿದಾಯೆಗ್ ಕೊಂಡು ಪೋಪ ಯಮರಾಯ |
ಈ ಎನೆನ್ನಾಯೆಗ್ ಪತ್ತೊಂದ್ ಪೋಪ ಯಮರಾಯಾ?
- ಯಮು : ಜಬ್ಬೆರ್ ಜವ್ವಣೆರ್ ಏರಾಂಡಲಾವಡ್ | ನಾಲ್ ದಿನ ಬುಡ್ ಬರ್ಪೆಲ್ |
ಲಕ್ಕ ಪೋಯಿ ಪೊಣ್ಣ್ ಜೀವೇ ||೫||
- ಮುತ್ತೈದೆ : ಕಣ್ಣ್ ಕೈಕಾರ್ ಗಟ್ಟಿ ಇಪ್ಪುನೊ ಎನೆನ್ನಾಯೆಗ್ ಪತ್ತೊಂದ್ ಪೋಪಾ
ಯಮರಾಯ | ಈ ಎನೆನ್ನಾಯೆಗ್ ಪತ್ ದಾ ಯಮರಾಯ? ||
- ಯಮು : ಕಣ್ಣ್ ಕೈ ಕಾರ್ ಗಟ್ಟಿ ಇತ್ತಂಡಲಾ ಬುಡ್ಬಜೀ
ಲಕ್ಕ ದುಂಬು ಪೋಯಿ ಪೊಣ್ಣ್ ಜೀವೇ
ಈ ಲಕ್ಕ ಪೋಯಿ ನಾವ್ ಪೋಣ್ಣ್ ಜೀವೇ ||೬||
- ಮುತ್ತೈದೆ : ಕಾಲಾಕೂಡ್ ಬನ್ನಗ ಮಾತೆರ್ಲ ಬರ್ಪೆರ್ಂದ್

ಬಾಯೀಡ್ವಣುವ | ಎಂಕ್ ಆಸೆ ತೀರುಜ್ಜೀ ಯಾನ್ ಎಂಚ ಬರುವೇ?
ಯಮರಾಯ

ಯಮ : ಕಾಯಾ, ವಾಚಾ, ಮನಸಾ ಶ್ರೀಶನ ಸ್ಮರಣೆಡ್ ಬಾಯೀಡ್ ಪಂಡ್‌ದೀ
ಉದ್ಧಾರಾಲಾ | ಈ ಬಾಯೀಡ್ ಪಂಡ್‌ದೀ ಉದ್ಧಾರಾಲಾ ||೨||

7. ರಾಗ-ಶುದ್ಧ ಸಾವೇರಿ

ಆದಿತಾಳ

ಗಾಳಿ ಬತ್ತಿ ಪೂರ್ತುಡೇ
ತೂತೊಂದು ಬುಡ್ಡೆಯೇ

||ಪ||

ಎಲ್ಲೆ ಎಲ್ಲೆಂದ್ ಪಂಡ್‌ದ್
ಹಾಳ್ ಮಲ್ಪಡೇ

|| ಅ.ಪ. ||

ಕಂಡ್‌ದ್ ಸುಳ್ಳು ಪಂಡ್‌ದ್ ಅಪರ
ಬುದ್ಧಿ ಮಲ್ತ್ ಕೆಟ್ಟಾದ್ ಪೋವಡೆ
ಬುದ್ಧಿ ವಂತೆರಾದ್ ಅನಿ
ರುದ್ಧ ದೇವನಿ ನೆನಪುಲೇ

||೦||

ಸತ್ಯ ದಾಂತೆ ನಿಯಮ ದಾಂತೆ
ನಿತ್ಯ ಶೌಚಾಚಾರ ದಾಂತೆ
ವ್ಯರ್ಥವಾದ್ ಕೆಟ್ಟಂದೆ ಪುರು
ಷೋತ್ತಮನಿ ನೆನಪುಲೇ

||೧||

ಭಕ್ತಿ ಕೊರ್ಪೆ ಮುಕ್ತಿ ಕೊರ್ಪೆ
ಬೊಕ್ಕ ಸಾಯುಜ್ಯನಿ ಕೊರ್ಪೆ ||
ಶಕ್ತಿ ಆಯಿನ ದೇವೆ ಶ್ರೀಶನಿ
ಯುಕ್ತಿಡತ್ತೇ ನೆನಪುಲೇ

||೨||

8. ರಾಗ ಅಭೇರಿ

ಆದಿತಾಳ

ಬಾಡಿಗೇದಿಲ್ಲೊಡು ಉಪ್ಪುನೊ ಯಾನ್
ಬಾಡಾಯಿ ನೆಲ್ಲಾವಂದೆ ಕುಲ್ಲರೆ ಗುಂಡಾ?

||ಪ||

ಯೆನ್ನೊ ಪಣ್ಣಿನೊ ಎಂಚಿನೊ ಉಂಡ್?

ಕಣ್ಣ್ ಮುಚ್ಚಿಂಡ ಯೇರೆಗ್ ಯೇರ್?

||೨||

ಬನ್ನಗ ದಾಲ ಪತೊಂದ್ ಬೌಜಿ
ಪೋನಗ ದಾಲಾಂಡ ನಂಕುಂಡ ? ||
ಕಣ್ಣೇರ್ ಜಪ್ಪಾದ್ ತೂಪೆರ್ ಮಾತ
ಕಣ್ಣೇರ್ ನಮಕೆಂಚಿನ ತಿಕ್ಕು?

||೧||

ಸಾಲ ಮಲ್ತದಿಲ್ಲ್ ಬಾಕಿಲ್ ಮಲ್ತ್
ಸಾಲಿಗೆ ಬತ್ತದ್ ಕೇಣ್ಣಿಗ ಬುಲಿತ್ ||
ಮೂಲೆಡ್ ದೆಂಗ್ ದ್ ಕುಲ್ಲುಡ್ ಮುರೆಡ್ಂಡ
ಮಾಲೆ ಪಾಡ್ ಸನ್ನಾನ ಮಲ್ಪುವೆನ?

||೨||

ಬುಡೆದಿ ಜೋಕುಲು ಬಂಧು ಬಾಂಧವೆರ್
ಕಡೆ ಮುಟ ಬರ್ಪುಜೆರ್ ಪಣ್ಣೆನೊ ತೆರಿಲಾ ||
ದೃಢ ಮನಸ್ಡ್ ಶ್ರೀಶನ ಪಾದನಿ ಗಟ್ಟಿ
ಬುಡಂದೆ ಪತ್ತದ್ ಸಂದಾಯ ಮಲ್ಪು

||೩||

9. ರಾಗ ಕಾಂಬೋದಿ

ಆದಿತಾಳ

ಪೆಲಕ್ಕಾದ ಮೇಣೊಡು ತಿಕ್ ಬೂರ್ನೊ ಕೆಲಂಜಿ
ಸುಲಭೊಡು ಪಾರ್ರೆಗ್ ಸಾಧ್ಯಾವಾ?

||ಪ||

ಛಲ ದಾಂತಿ ನರಮಾನೆ ಪರತಾಂಡಲಾ ದೇಹ
ಫಲ ದಾನೆ ಬದ್‌ಕದ್ ತೆರಿಯೊಣ್ಣಾ

||ಅ.ಪ.||

"ನ ಜಾತು ಕಾಮಃ ಕಾಮಾನಾಂ,
ಉಪಭೋಗೇನ ಶಾಮ್ಯತಿಂ"ದಾದ್ ||
ಯಯಾತಿ ರಾಜೆ ಪಣ್ಣೆನೊ ಪಾತೆರ ಸುಳ್ಳಾವಾ?
ಯಯಾತಿ ರಾಜೆ ಪಣ್ಣೆನೊ ಪಾತೆರ ಸುಳ್ಳಾವಾ?

||೧||

ಕಲ್ಲದ ದೇವೆರೆಗ್ ಕಾಂಡೆಡ್ ಬಯ್ಯ ಮುಟ
ಕುಲ್ಲಂದೆ ಸುತ್ತುಂಡ ಫಲ ಉಂಡಾ?
ಕಲ್ಲಡ್ ದೇವೆರ್ ವ್ಯಾಪೆ ಆದ್ ಉಲ್ಲೆಂದ್

ಪುಲ್ಲಾದಗ್ ತೋಜಿನೊ ಸುಳ್ಳಾಂಡಾ?

||೨||

ಪಂಚ ಭೂತೊಳೆಡ್ ತತ್ವಾಭಿಮಾನಿಳು
ಎಂಚ ಉಲ್ಲೆರಾಂದ್ ತೆರಿಯೊಣ್ಣಾ
ಅಚಿಂತ್ಯಾದ್ಭುತ ಶಕ್ತಿ ಇತ್ತಿನೊ ಹರಿ
ಕಂಚಿದೊ ಮೂರ್ತಿಡ್ ಪೂರ್ಣೆಂದ್ಲಾ

||೩||

ಅಣು ಮಹತ್ತ್ವಡ್ ಮಾತೆಡ್ಲಾ ಶ್ರೀಹರಿ
ಕಣ್ಣಾಗ್ ತೋಜಂದೆ ಉಳ್ಳೆಂದ್ಲಾ ||
ದಿನ ದಾಯೆಗ್ಗಪ್ಪುವ ಮನದೀದ್ ನಿತ್ಯ
ಮನಸಿಜನಯ್ಯನಿ ತೊವೊಣ್ಣಾ

||೪||

ಆಸೆಗ್ ಬೂರ್ಡ್ ಶ್ರೀಶನಿ ತೆರಿಯಂದೆ
ಕಾಸ್ದ ಬೆಲೆ ಇಜ್ಜಿ ಬದ್ಕದ್ಲಾ
ದೇಶವಿದೇಶೊಗ್ ಪೋದ್ ಬತ್ತಂಡಲಾ
ನಾಶಾವೊಡ ದುಂಬ್ ತೆರಿಯೊಣ್ಣಾ

||೫||

10. ರಾಗ ಸಾರಂಗ

ಜಂಪೆತಾಳ

ಮನುಷ್ಯಾದ್ ಪುಟೊದ್ ಮನುಷ್ಯೆ ಆದ್ ಬದ್ಕಂದೆ
ಧನಕನಕ ಸಂಗ್ರಹೊಡ್ ಕಾಲ ಪೋಂಡ್

||ಪ||

ನಿನ್ನ ಜೀವ ನಿನಕೈಟ್ ಇಜ್ಜಿಂದ್ ತೆರಿಯಂದೆ
ದಿನದೆಪ್ಪಿ ಅಹಮಹಿಕೆ ಒಯ್ಯ್ ಬತ್ತಂಡ್

||ಅ||

ಬುಡದಿ ಜೋಕುಲು ಬಳಗ ಇಲ್ಲ ಬಾಕಿಲ್ ಮಾತ ||
ಕಡೆ ಕಾಲೊಡ್ಡಿನ ಜತೆ ಬರಂದ್ಂದ್ ತೆರಲಾ ||
ಬುಡಂದೆ ಬವುಳಂಡ್ ಪಾಪ ಪುಣ್ಯ ಪಣ್ಣಿನೊ ತೆರಿದ್
ಮೃಡ ಸಖಿನಿ ನೆನೆತೊಂಡ ಸುಖ ಉಂಡ್ ತೂಲಾ

||೧||

ಸುಳ್ಳು ಪಂಣ್ಡ್ ಕಳ್ಳೆ ಲೆಕ್ಕ ತೋಜಾದ್ ಗಂಟೊಕಟ್ತಾದ್
ಗುಳ್ಳೆ ಕುದ್ಯನಲಕ್ಕ ಬದ್ಕದಿತ್ತ
ಮರ್ಳಾದ್ ಪೊಣ್ಣುಲೆಗ್ ರಾತ್ರ ಪಗೆಲೊಂದೆಣ್ಣಂದೆ
ಜೊಳ್ಳು ಸಂಸಾರದುಳಯಿ ಬೂರ್ಡ್ ಸೈತಾ
ಸಾಸಿರಾ ನಾಮದಾ ನಾರಾಯಣನ ಮಂತ್ರ

||೨||

ಕಣ್ಣ್ ಮುಚ್ಚಿಂಡ ಯೇರೆಗ್ ಯೇರ್?

||೮||

ಬನ್ನಗ ದಾಲ ಪತೊಂದ್ ಬೌಜಿ
ಪೋನಗ ದಾಲಾಂಡ ನಂಕುಂಡ ? ||
ಕಣ್ಣೇರ್ ಜಪ್ಪಾದ್ ತೂಪೆರ್ ಮಾತ
ಕಣ್ಣೇರ್ ನಮಕೆಂಚಿನ ತಿಕ್ಕು?

||೧||

ಸಾಲ ಮಲ್ದಿಲ್ಲ್ ಬಾಕಿಲ್ ಮಲ್ತ್
ಸಾಲಿಗೆ ಬತ್ತದ್ ಕೇಣ್ಣಿಗ ಬುಲಿತ್ ||
ಮೂಲೆಡ್ ದೆಂಗ್ ದ್ ಕುಲ್ಲು ದ್ ಮುರೆಡ್ಂಡ
ಮಾಲೆ ಪಾಡ್ ಸನ್ನಾನ ಮಲ್ಪುವೆನ?

||೨||

ಬುಡದಿ ಜೋಕುಲು ಬಂಧು ಬಾಂಧವೆರ್
ಕಡೆ ಮುಟ ಬರ್ಪುಜೆರ್ ಪಣ್ಣಿನೊ ತೆರಿಲಾ ||
ದೃಢ ಮನಸ್ಸಾಡ್ ಶ್ರೀಶನ ಪಾದನಿ ಗಟ್ಟಿ
ಬುಡಂದೆ ಪತ್ತದ್ ಸಂದಾಯ ಮಲ್ಪು

||೩||

9. ರಾಗ ಕಾಂಚೋದಿ

ಆದಿತಾಳ

ಪೆಲಕ್ಕಾದ ಮೇಣೊಡು ತಿಕ್ ಬೂರ್ನೊ ಕೆಲಂಜಿ
ಸುಲಭೊಡು ಪಾರೈಗ್ ಸಾಧ್ಯಾವಾ?

||ಪ||

ಛಲ ದಾಂತಿ ನರಮಾನೆ ಪರತಾಂಡಲಾ ದೇಹ
ಫಲ ದಾನೆ ಬದ್ಕಾದ್ ತೆರಿಯೊಣ್ಣಾ

||ಅ.ಪ.||

"ನ ಜಾತು ಕಾಮಃ ಕಾಮಾನಾಂ,
ಉಪಭೋಗೇನ ಶಾಮ್ಯತೀಂ"ದಾದ್ ||
ಯಯಾತಿ ರಾಜಿ ಪಣ್ಣಿನೊ ಪಾತೆರ ಸುಳ್ಳಾವಾ?
ಯಯಾತಿ ರಾಜಿ ಪಣ್ಣಿನೊ ಪಾತೆರ ಸುಳ್ಳಾವಾ?

||೧||

ಕಲ್ದ ದೇವೆರೆಗ್ ಕಾಂಡೆಡ್ ಬಯ್ಯ ಮುಟ
ಕುಲ್ಲಂದೆ ಸುತ್ತಂಡ ಫಲ ಉಂಡಾ?
ಕಲ್ಡ್ ದೇವೆರ್ ವ್ಯಾಪೆ ಆದ್ ಉಲ್ಲೆಂದ್

ಯಂತ್ರವಾಹಕೆ ಈಯೆ ಉಳಾಯ್ದಿತ್ತೆದೆನೆನಿ ಸ್ವ
ತಂತ್ರ ಪಣ್ಣೀ ಬ್ರೆಮನಿಕೊರ್ದ್ ಕೆರ್ಪನಿ ಅತ್ತಾ ||
ಮಂತ್ರ ಪ್ರತಿಪಾದ್ಯೆ ಲಕ್ಷ್ಮೀಶ ಶ್ರೀಶನಿನ ಪಾದ |
ಒಂತೆ ಪತ್‌ದಿತ್ತಂಡ ಜನುಮ ಜನುಮೊಗಲ್ ಉಂಡ್ ||೩||

14. ದಾಗ ಕಲ್ಯಾಣಿ

ಝಂಪೆ ತಾಳ

ದಾನೇಂದ್ ನಟ್ಟುವೇ ನಿನ್ನ ಕೈಟ್ ಏನ್ ಇಸೇ ||ಪ||
ಪ್ರಾಣದೇವರೆ ಸ್ವಾಮಿ ಭಕುತೆರೇ ಪ್ರೇಮಿ ||ಅ.ಪ.||

ಅಪ್ಪೇನೀ ಕೊರು ನಟ್ಟುಗನ ನಿನ್ನ ಕೈಟ್
ಅಪ್ಪೆ ದಾದ ಕೊರ್ಯಳ್ ಧ್ರುವರಾಜಗ್ ||
ಸುಪ್ಪತ್ತಿಗೆ ಕೊರು ಪಂಡ್ ನಟ್ಟುಗನ ನಿನ್ನ ಕೈಟ್
ಸರ್ಪಶೇಷನೆ ನಿಕ್ಕಾ ಹಾಸಿಗೆ ಆದ್ ಉಳ್ಳೆ ||೦||

ಅಮ್ಮೆರೆನಿ ಕೊರ್ಪನಾ ಪಣ್ಡ್ ನಟ್ಟುಗನಾ
ಅಮ್ಮೆ ದಾನೆ ಕೊರಿಯೆ ಆ ಪ್ರಹ್ಲಾದಗ್? ||
ಹೆಮ್ಮೆಡ್ ಮೆಗ್ಗೆ ಪಳಯನೀ ಕೇಣ್‌ಗನ?
ಹೆಮ್ಮೆಡಿತ್ತಿನ ರಾವ್ಣೆ - ವಿಭೀಷಣಗ್ಲಾದೊ ಕೊರಿಯೆ? ||೨||

ಜೋಕುಳೆನಿ ಕೊರ್ಲೊಯಾ ಪಣ್ಡ್ ನಟ್ಟುಗನ
ಜೋಕ್ಕು ದಾದೊ ಕೊರಿಯೋ ಧೃತರಾಷ್ಟ್ರಗ್ ||
ಸೋಕುದೋ ಬುಡೆದಿನೀ ಕೊರು ಪಣ್ಡ್ ಕೇಣ್‌ಗನ
ಸಾಕ್ಸಾಕ್ ಮಲ್ತೊಲು ಅಂಬೆ ಆ ಭೀಷ್ಮಗ್ ||೩||

ಬಂಧುಲೆನಿ ಕೊರು ಪಣ್ಡ್ ನಟ್ಟುಗನ? ನಿನ್ನಡ
ಬಂಧುಲೇರ್ಲ ಬತ್ತೆರಾ ಗಜರಾಜಗ್?
ಅಂದಣೇರ್ಲ್ ಮೆರೆವರಗ್ ನಿನ್ನಟ ಕೇಣ್‌ಗನ ?
ಅಂದಣೇರಿನ ನಹುಷನ ಗತಿ ದಾನೆ ಆಂಡ್ ||೪||

ನಟ್ಟುನಾಂಡ ನಿನ್ನ ಕೈಟ್‌ನಟ್ಟುವೇ ಏನಿಸೇ
ನಟ್ಟುನೇ ಬುದ್ಧಿ ಎಂಕ್ ಕೊರ್ಪಿನೇ ಬೊಡ್ಡಿ
ಮುಟ್ಟುದ್ ನಿನ್ನ ಪಾದ ಭಕ್ತಿ ಒಂಜೆನಿ ಕೊರ್ಲ ಶ್ರೀಶ
ವಿಠಲ ವಿಠಲಾಂದ್ ಬಾಯಿನಿಲಿಕೆ ಕೊರ್ಲ ||೫||

15. ಉಗಾಭೋಗ

ಭೂಮಿ ಮಲ್ಲೇ ಪಂಡ್‌ದ್ ಮಾತೆರ್ಲ ಪಣೈರ್
 ಭೂಮಿ ತುಂಬ್‌ದುಲ್ಲೆ ಶೇಷ ದೇವೆರ್ ||
 ಶೇಷ ಮಲ್ಲೆಂದ್ ಪನ್‌ಂಡ್? ಗಿರೀಶೆ ಕಂಟೆಲ್‌ಡ್
 ತಾನ್ ಸುತ್ತಾದ್ ಉಂತುದೆ ಅತ್ತ?
 ಈಸರೆನೆ ಮಲ್ಲೆಂದ್ ಪನ್‌ಂಡ್, ಕೈಲಾಸ
 ತುಂಬ್‌ದುಂಡ್ | ಕೈಲಾಸ ಮಲ್ಲಾದ್ ಪೋಂಡತ್ತ?
 ಕೈಲಾಸ ಮಲ್ಲಾಂಡ ರಾವಣೆ ದೆರ್ತದೇ
 ಕೈಲಾಸ ಮಲ್ಲಾದ್ ಎಂಚ ಇಪ್ಪು?
 ರಾವಣೆನೆ ಮಲ್ಲಾಂಡ ಮಂಗೆ ಒಂಜಿ ಗೆಲ್‌ದುದುಂಡ್
 ಮಂಗೆ ವಾಲೀ ತಾನ್ ಮಲ್ಲೇ ಆದ್ ಪೋಯೆ ||
 ಮಂಗಿನೇ ಮಲ್ಲೆ ಆದ್ ಪೋಯೇಂಡ
 ಬಾಣ ಒಂಜೇ ಮಾರ್ಪಾಂಡ್
 ಬಾಣನೆ ಮಲ್ಲೆ ಆದ್ ಪೋಂಡ್ ಕೇಣ್ಣೆ||
 ಬಾಣನೇ ಮಲ್ಲೆ ಆಂಡ ಬುಡ್ಡಾಯೆ ಬೋಡತ್ತ?
 ಶ್ರೀರಾಮೆ ಬುಡ್ಡಾಯೆ ರಾಮ ದೇವೆರ್
 ಶ್ರೀ ರಾಮೆ ಮಲ್ಲೆ ಆಂಡ? ಭಕ್ತಿ ಹನುಮನ
 ಹೃದಯ ಮಧ್ಯೊಡುಲ್ಲೆತ್ತೇ||
 ಭಕ್ತಿ ಹನುಮಂತನಾ ಹೃದಯನೇ
 ಮಲ್ಲೆ ಆದ್ ಪೋಂಡತ್ತ ಕೇಣ್ಣೆ
 ಹೃದಯನೇ ಮಲ್ಲೆ ಆಂಡ | ಹೃದಯ ಪುಣೊ
 ಟ್‌ಲಾ ಉಂಡ್ ಜೀವ ದಾಂತೆ ||
 ಜೀವನೇ ಮಲ್ಲೆನಾ ಪಣ್ಣಾ - ಜೀವರೊಳೆಯಿ
 ಜೀವೇಶೆ ಶ್ರೀಶೆ ಇತ್ತಂಡ ಇಪ್ಪುವೇ ||
 ಜೀವೇಶೆ ಶ್ರೀಶೆನೆ ಸರ್ವ ಜೀವೆರೆ ಉಳಾಯಿ
 ಜೀವೇಶೆ ಶ್ರೀಶೆನೇ ಸರ್ವವ್ಯಾಪೀ

16. ಉಗಾಚೋಗ

ಕಲ್ಲಾದ್ ಬೂರ್ದಿನ ಅಹಲೈನುದ್ದಾರ ಮಲ್ತ
 ಮಲ್ಲೆ ಬೇಡರೆ ಕುಲೋಟ್ ಬೌದಿನೋ ಗುಹನ
 ಕೈತೊಲು ಪೋದ್ ಗುಹನಿ ಉದ್ದಾರ ಮಲ್ತ ||
 ಕಾಡ್ ಮರೋಟ್ ಇತ್ತಿನ ಚಂಚಲ ಸ್ವಭಾವದ
 ಕಪಿ ಕರಡಿ ಸಿಂಗ್ಲೀಕ ಸಮೂಹನಿ ಉದ್ದಾರ ಮಲ್ತ ||
 ಈತ್ ದಿಕ್ಕಿಗ್ ಪೋದ್ ಮೊಕಲೆನ್ನುದ್ದಾರ
 ಮಲ್ಪಿನ ಬದಲ್ಗ್ ಎನಟನೇ ಒರ್ಯಡ
 ಉಂದ್ ಮೂಜಿಲಾ ಉಂಡತ್ತ? ಕೇಣ್ಣ ಈ
 ಕಲ್ಲದಾ ರೀತಿಡ್ ಎನ್ನ ಮನಸ್ಸುಂಡ್
 ಮರ್ಲೆರಾ ತೆರಟುಂಡು ಎನ ಚಂಚಲ ಬುದ್ಧಿ ||
 ಪೋರ್ಲ್ ದಾಂತಿನ ಕರ್ಮ ಚಾಂಡಾಲೆ ಯಾನಾದುಲ್ಲೆ ||
 ಯೆನೆನೋರ್ಯನೆ ಉದ್ದಾರ ಮಲ್ತಂಡ್ | ಮೂಜಿ ಪಂಗಡನಿ ಉದ್ದಾರ
 ಮಲ್ತಲಕ್ಕಾಪುಜ್ಜ? ಶ್ರೀರಾಮ ಶ್ರೀಶದೇವೇಶಾ? ||

ಅನುಬಂಧ 1

**ಹರಿದಾಸಿ ಶ್ರೀ ಗುರುಪ್ರಿಯವಿಠಲದಾಸಿನ
 ತುಳು ಕೀರ್ತನೆಲು**

1. ಗಣಪತಿ ಸ್ತುತಿ

ಯೇರ್ ಪೆದ್ದಿನ ಬಾಲೆಯೇ | ಉಂದು
 ಯೇರ್ ಪಂಡ್ ತೂಲೆಯೇ ||ಪ||
 ಊರಿಡೀ ಸುದ್ದಿ ಆನೆ ಮೋನೆದ |
 ಕೋರೆದಾಡೆದ ಗಣಪೆಯೇ || ಅ. ಪ. ||

ಗುಡ್ಡೆದೊಡೆಯನ ಒಡ್ಡೋಲಗೊಗು |
 ಗಿಡ್ಡೆ ಗಣಪತಿ ರಾಯೆಯೇ ||
 ಪಡ್ಡೆ ಭೂತೊಲು ಗಂಡಗಣೊಕುಲು |
 ಅಡ್ಡ ಬೂರಿಂಚಿ ಬಾಲೆಯೇ ||೧||

ಬಂಜಿ ಮಲ್ಲೆದ ಬಾಲೆಯೇ | ಅಂಗ್ |
 ದಿಂಜಿದ್ ಸಮ ದೇರೈಯೇ ||
 ಬಂಜಿ ಪುಡದ್ ಪೋವರಾನಗ |
 ಒಂಜಿ ಸರ್ಪೊನು ಸುತ್ತೈಯೇ

||೨||

ಉಂಡೆ ಚಕ್ಕುಲಿ ಮೂಡೆ ಮೋದಕ |
 ದೊಂಡೆ ನಿಲಿಕೆ ನಿಂಗೈಯೇ ||
 ಆಂಡ ಚೌತಿದ ಚಂದ್ರೆ ತೆಲ್ಲರೆ |
 ಪುಂಡಿ ಶಾಪೊ ಕೊರಿನ ಬಾಮೆಯೇ *

||೩||

ನಾಲ್ ಕೈತ ಬಾಲೆಯೇ | ಆಯಗ್ |
 ಎಲಿತ ಮಿತ್ತ್ ಸವಾರಿಯೇ ||
 ಓಲೋಲ್ಲಾಯನ್ ನೆನೆತಿನಕ್ಕೆಗ್ |
 ಒಲಿದ್ ಬರ್ಪಿ ಸ್ವಾಮಿಯೇ

||೪||

* ಬಾಮ ಕುಮಾರ = ಗಣಪತಿ

ರಕ್ಕಸೆರ್ ಸೋರ್ಕ ಮುತ್ತುದು | ತನ್ನ
 ಹಕ್ಕು ಸಾಪನೆ ಮಲ್ಲೆಯೇ ||
 ಉರ್ಕ ದಿಂಜಿ ಮೋಕೆದೊಡಲಾಡ್

||೫||

ದಿಕ್ಕ ದೇಶೊಳು ಪುಗರೊಯೇ
 ವ್ಯಾಸೆ ಪಂಡಿ ಪುರಾಣೊ ಬರೆಯಿನ |
 ತ್ರಾಸ ತೆರಿಯಂದಿ ನಿಪುಣೆಯೇ |
 ಮೋಸ ಪೋವಡೆ ನಿತ್ತೊನೆನೆಪುಲೆ |
 ವಾಸುದೇವನ ಮಿತ್ರೆಯೇ

||೬||

ಬಾರಿ ಬಾರಿಗ್ ಅಡ್ಡ ಬೂರುವೆ |
 ಯೇರ್ ಈ ಬಾಲೆ ಪಣ್ಣೆಯೇ ||
 ಶ್ರೀ ಗುರುಪ್ರಿಯ ವಿಠಲನ ಇಷ್ಟೆ |
 ಪಾರ್ವತಿ ಕುಮಾರೆಯೆ

||೭||

2. ಸಿರಿ ಪುರಂದರ ದಾಸೆರ್ (ಗುರುಸ್ತುತಿ)

ಸೊಂಟ ಮಿತ್ತ್ ಕೈನ್ ದೀದ್ ಉಂತಿನೇರ್ಯೇ | ಆಯೆ
ಬಂಟೆಯಾದ್ ಭಕುತೆರೇನ್ ಕಾಪುನಾಯೆಯೆ ||ಪ||

ಘಟ್ಟಮಿತ್ತ್ ದ ದಾಸೆರೇನ ದೇವೆರೈರ್ಯೇ | ಆಯೆ
ಇಟ್ಟಿಗೇದ ಮಿತ್ತ್ ಡುಂತಿನ ವಿಠಲಾಯೆಯೆ ||೧||

ಪುರಂದರಘಡೋಟುಪ್ಪಿ ಚಿನಿವಾರೆಯೇರ್ಯೇ | ಆಯೆ
ಬಾರಿ ಜಿಪುಣೆ ಶ್ರೀನಿವಾಸ ನಾಯಕೇಂದಾಯೆ ||೨||

ಸಂಸ್ವತಿ ಪಂಡ್ ನಾಯ್ಕುಗ್ ಬುಡೆದಿಯಿತ್ತಲ್ | ಆಲ್
ಉರಿಕಣ್ಣ್ ಕಂಡನ್ನೊಗ್ ಪೋಡ್ಕೊಂದಿತ್ತಲ್ ||೩||

ಬಡಬ್ರಾಣೊನ ರೂಪೊಡು ಹರಿ ಕಾಸಾನ್ಟಿಯೇ | ತನ್ನೊ
ಕಡೇಮಗನ ನೂಲಮದ್ದೆದ ಖರ್ಚಿಗಾದಾಯೆ ||೪||

ಕುಡಲ ಕುಡಲ ಬತ್ತಿ ಬ್ರಾಣೊಗು ಸುಡುಸುಡೋಂದೆ | ಪಂಡ್
ಕಡೆಕ್ಲಾ ನಾಯ್ಕೆ ಕೊರ್ಡು ಕಡಪೊಯೆ ಸವಕಲ್ ನಾಣ್ಕೊಡೇ ||೫||

ಬ್ರಾಣೆ ಬತ್ತೆ ನಾಯ್ಕೆ ಬುಡೆದಿಡ ಕಾಸಾ ಕೇಂಡೆಯೇ | ಇಜ್ಜಂಡ
ಮಾನ ಪೋವಂದಿಲೆಕ್ಕ ಮೋನೆದ ಮೂಂಕುತಿ ಕೊರ್ಲೆಯೆ ||೬||

ಬಾರಿ ವ್ಯಥೆಟೇ ಕೊರ್ಡು 'ಕೃಷ್ಣಾರ್ಪಣೆ' ಮಲ್ತಲ್ | ಆಲೆನ
ದಾರೆಗೊಂದ್ ಅಪ್ಪೆ ಪಾಡಿನೊ ಮೂಂಕು ಬೊಟ್ಟುನು ||೭||

ಬ್ರಾಣೆಪೋದು ನಾಯ್ಕನಂಗಡಿಡ್ ಒತ್ತೆ ದೀಯೆಯೇ | ಆಂಡ
ಜಾಣೆ ನಾಯ್ಕೆ ಸಂಶಯೊಡು ಬೇಗ ಇಲ್ಲಾ ಸೇರಿಯೆ ||೮||

ನರ್ಗ್ ಪೋಡಿನೊ ಬುಡೆದಿಡ ಕೇಂಡೆ ಮೂಂಕುತ್ಯೋಲುಂದು | ಆಲ್
ಬಗ್ಗಂದೇ ಮೋನೆ ದೆರ್ಪಂದೆ ವಿಷ ಪರ್ಪಂದೆಣ್ಣಲ್ ||೯||

ಕೈಟ್ ಪತ್ತಿ ವಿಷತೊ ಬಟ್ಟಲ್ ಮಿಣ್ಕೊಂದಿತ್ತಂಡ್ | ಒರನೆ
ಐಟೆ ಮೂಂಕುತಿ ಬೊಟ್ಟು ತೋಜ್ಯರೆ ಅಚ್ಚರ್ಯಾಂಡ್ ||೧೦||

ಕಣ್ಣ್ ಪಿಳಿ ಪಿಳಿ ಮಲ್ಲಿ ನಾಯ್ಕುಗ್ ತರೆಗಿರೀಂಡ್ ಆಯೊನ ಕಣ್ಣ್ ದೆದುರು ಉಂತಿ ಬ್ರಾಣೊನ ರೂಪೊ ಏರ್ಂದ್	೧೦
ಜಿಪುಣೆ ನಾಯ್ಕನ ತರೆತಿಂದೆ ಬ್ರಾಣರೂಪೊಡು ಹರಿ ಕಪಟ ನಾಟಕೊ ಗೊಪ್ಪುಡೇ ವೈರಾಗ್ಯ ಪುಟ್ಟೊಯೆ	೧೧
ವ್ಯಾಸತೀರ್ಥರಡೆಗ್ ಪೋದು 'ದಾಸೆ' ಆಯೆಯೇ ಆರೆನ ಶಿಷ್ಯೆ 'ಪುರಂದರ ವಿಠಲೆ' ಪಂಡ್ ಅಂಕಿತೊ ಪಡೆಯೆಯೇ	೧೨
ವಾಸುದೇವೊನ ಮೈಮೆಲೆನ್ ಲೋಕೊ ಸಾರಿಯೇ ಹರಿ - ದಾಸೆರೇನ ವಂಶೊದ ಬುಳೆಕ್ ಬೀಜ ಬಿತ್ತಿಯೆ	೧೩
ನಾರದೇರ್ ಅಂಶೊಡು ಭೂಮಿಗ್ ಬತ್ತಿನಾಯೆಯೇ ಸಿರಿ ಗುರುಪ್ರಿಯವಿಠಲನ ಪರಮಮಿತ್ರೆಯೇ	೧೪



ದೇವತಾ ಸ್ತುತಿ

3	ಮತಿ ಕೊರುಲಾ ವಿಠಲಾ ಎಂಕ್ ಸತ್ಪತಿಲೆನ್ ಮಲ್ಪುನ	ಪ
	ಕಣ್ಣುಲು ನಿನ್ನೊನೇ ಪೂರ್ಣುನು ತೂಪಿನ ಮರ್ಲ್‌ನ್ ಪುಟ್ಟಾಲಾ ಹೇ ವಿಠಲಾ	
	ಬಾಯಿಡ್ ನಿತ್ಯೊ ನಿನ್ನ ಸ್ಮರಣೆನೆ ಮಲ್ಲಿ ಉ- ಪಾಯೊನು ತೆರಿಪಾಲಾ ಓ ವಿಠಲಾ	
	ಕೆಬಿಕ್ ಹರಿಕಥೆ ಕೇಣುನ ಭಾಗ್ಯೊನು ಅನುಗ್ರಹಿಸೆಂಕ್‌ಲಾ ಒರ ವಿಠಲಾ	
	ಕೈಯೆರಡೆಟ್ ತಾಳ ಪಾಡೊಂದು ಭಜನೆಗ್ ಸೈಗುಟ್ಟಿ ಮನಸುನು ಕೊರು ವಿಠಲಾ	
	ಕಾರ್ಲೆರಡ್ ತೀರ್ಥಯಾತ್ರೇನ್ ಮಲ್ಪುರೆ ಪಾರೊಂದು ಪೋಪಿಲೆಕ ಮಲ್ಪುಲ ವಿಠಲಾ	
	ಪಂಚೇದ್ರಿಯೊಲು ಎಂಕ್ ವಂಚನೆ ಮಲ್ಪಂದೆ ಅಂಚೆನೇ ನಡಪೋಲಾ ಶ್ರೀಗುರುಪ್ರಿಯವಿಠಲ	

4

ಕಲ್ಲಾದ್ ಕುಲ್ಲ ದಾಯೆ | ಹೇ ಶಂಕರ
 ಈ ರೀತಿ ಮೌನ ದಾಯೆ ||
 ಕಲ್ ಮನಸ್ ಕೊರ್ನು
 ಮಲ್ ಕಟ್ಯಾಯ್ನಾಯೆ
 ಪೂರ್ಣಡೇ ಲೆಪ್ಪುವೆ
 ಒರ ಬಲಾ ಶಂಕರ

||೧||

ಕಡುಪಾಪಿಗೀಕಷ್ಟ | ಕೊರುಂಡ
 ತಡೆವರೆ ತೀರ್ವಾ ಎಂಕ್ ||
 ಕಡೆಕ್ಲಾ ಈಯೇ ತೂಲಾ
 ಮೃಡನೇ ಒರ ಕಣ್ಣುಡ್ಲಾ
 ಅಡೆಗಡೇ ಸರಿಮಲ್ಪು
 ಕಡು ಕಷ್ಟ ಕಳೆದ್

||೨||

ಕರಕರಿದ್ ಯಾನ್ | ಕೇಣ್ಣೆ
 ತರೆನೊರ ದೆರ್ಪುನಲ್ಕ ||
 ಗುರುಪ್ರಿಯವಿಠಲನ
 ಚರಣಕಮಲೊನು ನಿತ್ಯ
 ಸ್ಮರಣೆ ಮಲ್ಪುನಲ್ಕ
 ವರೊನು ಕೊರು ಶಂಕರ

||೩||

ಹರಿಸ್ತುತಿ

ಅಮ್ಮಾ ನಿಕ್ಕೆ ಇಲ್ಲಗ್ ಮಿನಿ | ಎಂಕ್ಲೆ ಬಾಲೆ ಬತ್ತನೇ || ಪ ||
 ಬಮ್ಮೊ ನಿಲಿಕೆ ಬೆಣ್ಣೆ ಮೆತ್ತಿನ | ಕರ್ಮಸಲೆದಾಣನು ತೂಯರೇ || ಅ.ಪ. ||

ಜುಟ್ಟುಗು ಮಯಿರ್ ಸುಯಿನ್ ಏರ್ಸದ್ | ಪಟ್ಟೆ ಪೈಜಣ ದಿರಸಾಡ್ |
 ದಿಟ್ಟೆ ಅಣ್ಣನೊಟ್ಟು ಸೇರೊಂದು | ಇಷ್ಟ ಬತ್ತಿಕಡೆ ಸುತ್ತುವೆ ||೧||

ಮದೆಟ್ ಬಕ್ತ್‌ದ್ ಪೆತ್ತಕಂಜಿದ | ಕಿದೆಟ್ ಬಲ್ಲ್‌ನ್ ಗಿರ್ಪುವೆ |
ಚದಿಟ್ ಪೊಣ್ಣಲೆಗ್ ಅಡ್ಡಕಟ್ಟೊಂದು | ಸುದೆಕ್ ಬಲೆ ಪಂಡ್ ಲೆಪ್ಪುವೆ ||೨||

ಬಾಲ ಲೀಲೆಡೇ ರಕ್ಕಸೆರ್ನ್ ಕೆರಿನ | ಬಾಲ ಗೋಪಾಲೆ ಸಿರಿ ಕೃಷ್ಣೆಯೇ |
ಬಾಲೆ ಗೋಪಿಯೆರೆನ್ ಪುರಲ್‌ಗಾನೊಡು | ನಲಿಪಾಯ್ ಗುರುಪ್ರಿಯ ವಿಠಲೆ ||೩||

ಲೋಕನೀತಿ

ಏಕಾಂತೊಡು ಶ್ರೀಕಾಂತೊನ ಭಜನೆಡ್ |
ಲೋಕಾಂತರ ಸುಖ ಪ್ರಾಪ್ತಿ ||
ಭೂಕಾಂತೊನು ಭಜಿಸಂದೆ ಮಾಕಾಂತೆ ಒಲಿವಯೆ |
ಲೋಕಾಯುತ ಗುಣಪ್ರಾಪ್ತಿ ||೧||

ಸಿರಿರಮಣೊನ ಪಾದ ಭಜನೆ ಮಲ್ತಂಡ |
ದೊರಿದು ಬರು ಮೋಕ್ಷ
ನರಜನೊಕುಲೆ ಗುಣ ಬಣ್ಣನೆ ಮಲ್ತಂಡ
ನರಕ ದುಃಖ ಪ್ರತ್ಯಕ್ಷ ||೨||

ನಿತ್ಯೊ ನೆನೆಪುಲೆ ನಿರ್ಮಲ ಮನಸ್ಸೆಡ್ |
ಭಕ್ತಿ ಭಾವೊದ ಧ್ಯಾನೊಡು ||
ಭಕ್ತ ವತ್ಸಲೆ ಶ್ರೀಗುರುಪ್ರಿಯವಿಠಲೆ |
ಮುಕ್ತಿ ಮಾರ್ಗೊನು ತೋಜವೆ ||೩||

ಆರತಿ ಪದ್ಯ

ಪತ್ರಾವತಾರೊನು ತಾಳಿನ ದೇವೆರ್ಗ್ |
ಮುತ್ತುದಾರತಿನ್ ಬೆಳಗೋಲೆ ||ಪ||
ಕುತ್ತು ಬರಂದಿಲೆಕ ನಿತ್ಯ ಭಕ್ತೆರೆನ್ |
ಪೂರ್ತು ಪೂರ್ತುಗು ರಕ್ಷಣೆ ಮಲ್ಪಿ ದೇವೆರ್ಗ್ ||ಅ.ಪ. ||

ದುರುಳ ದಾನವನ್ ಕೆರ್ಡ್ ವೇದೊನು ಕೊಣ್ಣತ್ತೆ |
ಗಿರಿನ್ ಬೆರಿತಮಿತ್ತ್ ದೀದ್ ನೀರ್ಡುಂತಿಯೆ||
ಧರಣೆನುದ್ಧರಿಸೋದು ಕಂಬೊಡ್ಡು ಬತ್ತೀನ|
ವೀರವಟು ವೇಷೊಡು ದಾನೊನಟ್ಟಿನಾಯಗ್ ||೧||

ಭೂಮಿದ ಕ್ಷತ್ರಿಯೆರೆ ಕುಲನಾಶ ಮಲ್ತಾದ್|
ಆ ಮಹಾ ಪರಾಕ್ರಮಿ ರಾವಣೊನು ಕೆರ್ಡ್||
ಕಮಲಾಕ್ಷಿಯೆರೆಡ ರಾಸಲೀಲೆಡ್ ನಲ್ಲೊಂದು|
ರಮಣೀಯೆರೆ ವ್ರತೊಭಂಗ ಮಲ್ತಿನಾಯಗ್ ||೨||

ಪುಂಡೆರ್ನ್ ಸದೆದ್ ಕೆಂಡೊನು ಕಾರೊಂದು |
ಚಂಡಪ್ರಚಂಡೆ ಆಯೆ ಕುದುರೇನು ಏರ್ಯೆ||
ಪಂಡರಿನಾಥೆ ಶ್ರೀಗುರುಪ್ರಿಯವಿಠಲಗ್ |
ಮಂಡೆ ಬಗ್ಗೊಂದ್ ಮಂಗಳಾರತಿ ಬೆಳಗೋಲೆ ||೩||

ಅನುಬಂಧ - 2

ಅವಲೋಕನ

ಹರಿದಾಸರೆಡ್ ಜಾತಿ ಬೇಧ, ಲಿಂಗಬೇಧ ಇಜ್ಜಂದೆ ಹರಿಸೇವೆ ಮಲ್ತಿ ಹರಿದಾಸರ್/ಹರಿದಾಸಿಯೆರ್ ನಮ್ಮ ಈ ತುಳುನಾಡುಡುಲ್ಲೆರ್. ಉದಾ: ಹರಿದಾಸರೆ ಪಟ್ಟಿಡ್ (ಪಟ್ಟಿ - ೧) - ಶ್ರೀ ವಾದಿರಾಚೆರ್, ಶ್ರೀ ವಿಶ್ವೇಂದ್ರೆರ್, ಶ್ರೀ ರಘುವರ್ಯೆರ್ - ಇಂಚ ಯತಿಕುಳು; ಹರಿದಾಸ ಪಂಥೊಡಿತ್ತಿ ಶ್ರೀ ನೆಕ್ಕಾರು ಕೃಷ್ಣದಾಸೆರ್, ತುಪಾಕಿ ವೆಂಕಟರಮಣಾಚಾರ್ಯೆರ್, ಪಾವಂಜೆ ಲಕ್ಷ್ಮೀನಾರ್ಣಪ್ಪಯ್ಯೆರ್, ಪಣಂಬೂರು ಗುರು ಸದಾನಂದೆರ್ - ಇಂಚ ಕೆಲವೆರ್ ಬ್ರಾಹ್ಮಣೆರಾಂಡ; ಒಡಿಪುದ ದೇವಿದಾಸೆ (ಮಧ್ವದಾಸೆ), ಪಾಣೆ ಮಂಗಳೂರ್ಡ್ (ಇರಾ) ಐತಪ್ಪ ದಾಸೆ - ಮೊಕ್ಕ ಬ್ರಾಹ್ಮಣೇತರ ಹರಿದಾಸೆರಾದ್ ಹರಿಸೇವೆ ಮಲ್ತಿನಕ್ಕು. ಅಂಚೆನೇ ಗೌಡಸಾರಸ್ವತ ಬ್ರಾಹ್ಮಣ ಸಮಾಜೊದ - ಮಟ್ಟಿ ವಾಸುದೇವ ಪ್ರಭು, ಶೇಷ ಪ್ರಭು, ರಾಮಕೃಷ್ಣ, ಬಂಗ್ಲೆ ನಾರಾಯಣ ಕಾಮತ್, ತಲಚೇರಿ ವಾಸುದೇವ ಶ್ಯಾನುಭಾಗ, ಸಂತ ಭದ್ರಗಿರಿ ಅಚ್ಯುತದಾಸೆರ್, ಕೇಶವ ದಾಸೆರ್; ಮೊಗವೀರ ಸಮಾಜೊದ - ಹರಿದಾಸ ದೇವಣ್ಣ ಬೊಕ್ಕ ಹರಿದಾಸ ನಾರಾಯಣ ಕರ್ಕೇರ (ಅಂಧ ಹರಿದಾಸ) - ಇಂಚ ಸುಮಾರು ಹರಿದಾಸೆರುಲ್ಲೆರ್. ಹರಿದಾಸರೆಡ್ ಕೆಲವೆರ್ ಕೀರ್ತನೆಕಾರೆರ್, ಬೊಕ್ಕ ಕೆಲವೆರ್ ಕೃತಿರಚನೆಕಾರೆರಾದುಲ್ಲೆರ್.

ನನ - ಮಹಿಳೆಯೆರೆಡ್ - ಹರಿದಾಸಿಯೆರಾಯ್ತು - ಮುಳಿಯ ಮೂಕಾಂಬಿಕಾ ಅಮ್ಮ, ಸರಸ್ವತಿ ರಾಜವಾಡೆ (ಗಿರಿಬಾಲೆ), ಉಡುಪಿ ಯಶೋದಮ್ಮ - ಇಂಚ ಹರಿದಾಸೆರಾದ್ ಹರಿಸೇವೆ ಮಲ್ಪರೆ ಜಾತಿಬೇಧ, ಲಿಂಗಬೇಧ, ಮಿತ್ತ ಮಟ್ಟಿ, ತಿರ್ತ ಮಟ್ಟಿ ಪಣ್ಣೆ ತಾರತಮ್ಯನೇ ಮೂಲಿಜ್ಜೆ.

ಮಿತ್ತ ಜಾತಿದ ಯತಿಕುಳಾಯ್ತು ಶ್ರೀ ವಾದಿರಾಚೆರೆನ ಭಕ್ತಿಗ್, ದೇವೆರ್ ಕುದುರೆದ ರೂಪೊಡು ಬತ್ತ್ಂದ್ ನೈವೇದ್ಯ ಸಮರ್ಪಣೆದ ಕಡಲೆ - ಮಡ್ಡಿನ ತಿಂದೆರ್ಗೆ! ಅಯ್ಡ್ ಬೊಕ್ಕ ಈ ಭಕ್ತೊಗು 'ಹಯಗ್ರೀವ ಮಡ್ಡಿ' ಪಣ್ಣೆ ಪುದರಾಂಡೆಗೆ!

ಒಡಿಪುದ ಶೂದ್ರ ಪೊಂಜೊವುಗು ಬ್ರಾಣೆರೆಡ್ಲೊರಿಯಡ್ ಪಟ್ಟಿ ಆಣ್ಣಾಲೆ - ದೇವಿದಾಸಗ್, ಒಡಿಪುದ ಶ್ರೀಕೃಷ್ಣ ಮಠತೊಲಾಯಿ ಪೊಗ್ಗೆರೆ ಆಯೊನ ಜಾತಿದ ಸವಾಲ್ ಅಡ್ಡ ಬತ್ತಂಡಲಾ, ದೇವಿದಾಸಗ್ ಕನೊಟೇ ಬ್ರಾಹ್ಮಣನ ರೂಪೊಡು ಶ್ರೀಮಧ್ವಾಚಾರ್ಯೆರ್ ಒಲಿದ್ ದರ್ಶನ ಕೊರ್ಪು, ದೇವೆರೆನ ಬಗ್ಗೆ ಬರೆವರೆ ಆದೇಶ ಕೊರ್ಪು ಅನುಗ್ರಹಿತೆರ್ಗೆ ! ಕುಂಜಾರುಗಿರಿತ ದುರ್ಗಾದೇವಿಲಾ ಸ್ವಪ್ನೊಡು ದೇವಿದಾಸಗೊಲಿದ್, ದರ್ಶನ ಕೊರ್ಪು, 'ದೇವೀ ಮಹಾತ್ಮೆ' ಬರೆವರೆಗ್ ಅನುಗ್ರಹ ಮಲ್ತೆರೆ!

ಇಂಚ ದೇವೆರ್ ಒಲಿಯೊಡುಂದಾಂಡ ಜಾತಿಯೇ ಮುಖ್ಯ ಅತ್ತ್. ದೇವೆರೆ ಮಿತ್ತುಪ್ಪಿ ಭಕ್ತಿಯೇ ಮುಖ್ಯ. ಪ್ರಾಕ್ ದ ಭಕ್ತಿ ಕನಕದಾಸೆರ್ ಒಂಜಿ ಉದಾರ್ಮ ಆದುಲ್ಲೆರ್.

ಕುತ್ತೆತ್ತೂರುದ ಭಕ್ತ ಗೋವಿಂದ ದಾಸೆರ್ ಕೃತಿರಚನೆ, ಹರಿಕಥೆ ಮಲ್ತಿನಾರತ್ತ. ಅಂಡ ಹರಿದಾಸ ಪಂಥೊದ ದೀಕ್ಷೆಡಿತ್ತಾದ್, ಹರಿದಾಸೆರಾದ್, ಸಂಸಾರೊಡಿತ್ತಾದ್ಲಾ ದೇವೆರೆ ಭಜನೆನ್ ನಿತ್ಯ ಮಲ್ತಿನಾರ್. ಅನೇಕ ಹಿರಿಯ ದಾಸೆರೆನ ಸುಮಾರು 3000 ಕೀರ್ತನೆಲೆನ್ ಸಂಗ್ರಹ ಮಲ್ತಾದ್, ಬೂಕುಲೆಡ್ ತನ್ನೊ ಕೈ ಬರವುಡೇ ಬರೆದ್ವೀತೆರ್. (ಈ ಬೂಕುಲೆನ್ ಯಾನ್ಲಾ ಕಣ್ಣಾರೆ ತೂಪಿ ಭಾಗ್ಯ, ಕುತ್ತೆತ್ತೂರುಗು ಪೋಯ್ತುಗ ಎಂಕೊದಗ್ಗಾದ್ ಬತ್ತಂಡ್!) ಇಂಚೀ ಹರಿದಾಸೆರ್, ಒಡಿಪುದ ಶ್ರೀಕೃಷ್ಣ ದೇವೆರೆನ್ ತನ್ನ ಭಜನೆಡೇ ಒಲಿಪಾಯ್ತು ಕಥೆ - ಇನಿಗ್ಲಾ ನಮ್ಮೂರ್ಲ ಜನೊಕ್ಲೆನ ಬಾಯಿಡ್ ನಲಿತೋಂದುಂಡು! ಐಡ್ಲಾವರ ಹರಿದಾಸೆ ಪಂಡ, ಕೃತಿ ರಚನೆ ಮಲ್ಪೊಡುಂದಿಜ್ಜಿ; ಹರಿಕಥೆ, ಪ್ರವಚನ ಪಣೊಡುಂದಿಜ್ಜಿ. ಕೇವಲ ನಿರ್ಮಲ ಮನಸ್ಸಾದ್, ನಿರ್ಮಲ ಭಕ್ತಿಡ್, ನಿತ್ಯೊಲಾ ದೇವೆರೆನ್ ತುದಿತಂಡ ಖಂಡಿತಾ ದೇವೆರ್ ಒಲಿಪೆ ಪಣ್ಣಿ ನಿರರ್ಶನೊಗು ಭಕ್ತ ಗೋವಿಂದ ದಾಸೆರೆ ಸಾಕ್ಷಿ.

ಇಂಚಿತ್ತೀ ಹರಿದಾಸೆರೆನ್ ಪಡೆಯಿನೊ ನಮ್ಮ ತುಳುವಪ್ಪೆನ ಪೆರ್ಮೆದ ಕಳಶ ನಾಲೂರುಗ್ಲಾ ರೈಸಾದ್, "ತುಳು ನೆಲೊಟು ಹರಿದಾಸೆರೆ ಸಂಖ್ಯೆ ಬಾರೀ ಕಡಿಮೆ; ದಾಸ ಸಾಹಿತ್ಯೊಗು ತುಳುನಾಡ್ಲ ಹರಿದಾಸೆರೆ ಕೊಡುಗೆ ಬಜೀ ಒಂತೆ." - ಪಣ್ಣಿ ವಿದ್ವಾಂಸೆರ್ಲ ಪಾತೆರೊನು ಸುಳ್ಳಾಪಿಲೆಕ ಮಲ್ತಾದ್ ತೋಜಾದೆರ್ ನಮ್ಮ ಈ ತುಳುನಾಡ್ಲ ಹರಿದಾಸೆರ್!

ಅನುಬಂಧ 3

ಕಡೇತ ರಡ್ಡ್ ಪಾತೆರ

ಸಮಾಜೊದ ಅಂಕುಡೊಂಕುಳೆನ್ ತಿದ್ದುವೆರ್ ಹರಿದಾಸೆರ್. ಜನೊಕ್ಕೆಗ್ ವಾ ನಮೂನೆಡ್ ಪಂಡ ತೆರಿಯೋಣ್ಯೆರೆ ಸಾಧ್ಯ ಪಂಡ್ ಆ ಸಾದಿಡ್ ಜನೊಕ್ಕೆಗ್ ತನಾಕ್ಕೆನ ಸಂದೇಶ ಮುಟ್ಟಾವೆರ್ ನಮ್ಮ ಹರಿದಾಸೆರ್. ಪುರಾಣ ಪ್ರವಚನ, ಹರಿಕಥೆ, ಕೀರ್ತನೆ, ನಾಟಕದೊ ಮೂಲಕ ಜನೊಕ್ಕೆಗ್ ಕೇಣ್ಯೆರೆಗಿಂಪಾದ್ ಸಂಗೀತನ್ ಅಳವಡಿಸೊಂಡೆರ್. ಕ್ರಮೇಣ ನಾಟ್ಯ, ಸಂಗೀತ ಕಲೆತೊಟ್ಟುಗು ಹಿಮ್ಮೇಳದ ಚೆಂಡೆ, ಮದ್ದಲೆನ್ನಾ ಸೇರಾವೊಂದು, ಯಕ್ಷಗಾನ ತಾಳಮದ್ದಳೆದ ಮೂಲಕ, ಪುರಾಣೊದ ಕಥೆಕ್ಲೆಗ್ ಪದ್ಯ ಕಲ್ಪಾದ್ ಭಾಗವತಿಕೆಡ್ ಪಂಡೆರ್. ಐಡ್ ಬೊಕ್ಕ ಜನಮನ ರಂಜನೆಗಾದ್ ಬಣ್ಣ ಪಾಡ್ ವೇಷ ಭೂಷಣೊಡು ರಂಗಸ್ಥಳೊಟು ಯಕ್ಷಗಾನ ಬಯಲಾಟದ ಮೂಲಕ ಹರಿದಾಸೆರ್ ಪುರಾಣ ಕಥಾಸಂದೇಶನ್ ಜನೊಕ್ಕೆಗ್ ಮುಟ್ಟಾಯೆರ್.

ಇಂಚ ನಮ್ಮ ಹರಿದಾಸೆರ್‌ನಕ್ಲ ಇನಿಗ್ ಮಾತಾ ರಂಗೊಡುಲಾ ಮೆರೆದೆರ್. ಮಾಧ್ಯಮ ಒವ್ವೇ ಆವಡ್; ಉದ್ದೇಶ ಅಕ್ಕಿಗ್ ಒಂಜೇ. ಹರಿಭಕ್ತರೆನ ಕಥೆನ್, ಹರಿನ ಮೈಮೆಲೆನ್ ಸಮಾಜೊಗು ತೆರಿಪಾವೊಡುಂದು ಪಣ್ಣಿ ಉದ್ದೇಶ. ಈ ಕಾರ್ಯ ಮಲ್ಪುನಕ್ಲೇ ಹರಿದಾಸೆರ್.

ಯಾನ್ ನಾಡ್ ಪೆಜ್ಜಿದ್ ದೈದಿನ ಪಟ್ಟಿಡುಪ್ಪಿ - 51 ಜನ ಹರಿದಾಸೆರೆಡ್ ಈ ದುಂಬು ಪಂಡಿನ ಮಾತಾ ವರ್ಗೊದ ಹರಿದಾಸೆರ್ಲಾ ಮುಲ್ಪ ತೋಚ್ಚೆರ್. ಹರಿಕೀರ್ತನೆ ಕೃತಿಕಾರೆರ್, ಹರಿಕಥಾ ಕೀರ್ತನೆಕಾರೆರ್, ಯಕ್ಷಗಾನ ಕಥಾಕರ್ತೆರ್, ಯಕ್ಷಗಾನ ಅರ್ಥಧಾರಿಳು, ಪಾತ್ರಧಾರಿಳು - ಇಂಚ ಅನೇಕ ಆಶುಕವಿಕುಲು ಆ ಕಾಲೊಡೆತ್ತೆರ್.

ನಾಡೊಂದು ಪೊಂಡ ನನ್ನಾತ್ ಜನ ಹರಿದಾಸೆರ್ ಈ ತುಳುನಾಡುಡು ನಮ್ಮ ಕಣ್ಣೊಗ್ ಗೋಚರಿಪೆರೆ ಯಾವು. ನನ ಮಿತ್ತಗಾಂಡಲಾ ಆ ಕೆಲಸೊನು ಮಲ್ಪರೆ ನಮ್ಮ ಜನೊಕ್ಕು ದುಂಬಾವೊಡೊಂದು ಪಣ್ಣಿನ ಎನ್ನ ಕೋರಿಕೆ.

ನನಾಂಡಲಾ ನಮ್ಮ ಜನೊಕ್ಕು 'ಹರಿಕಥೆ ಮಲ್ಪುನಕುಲು ಮಾತ್ರ ಹರಿದಾಸೆರ್' - ಪಣ್ಣಿ ಗೇನ ಬುಡ್ಡು, ಮಾತಾ ದೃಷ್ಟಿಕೋನೊಡ್ಲಾ, ಹರಿದಾಸೆರೆನ್ ತೂವರೆ ಕಲ್ಪೊಡು ಬೊಕ್ಕ ಆದರಿತ್‌ದ್ ಮನ್ನಿಪೊಡು. ಉಂದುವೇ ನಮ ಹರಿದಾಸೆರೆಗ್ ಕೊರ್ಪಿ ಭಕ್ತಿದ ಕಾಣಿಕೆ!

|| ಶ್ರೀ ಮಧ್ವೇಶಾರ್ಪಣಮಸ್ತು ||

ಅನುಬಂಧ - 4

ಆಕರ ಗ್ರಂಥೋಲು

1. ಹರಿದಾಸ ಪರಂಪರೆ
ಲೇ : ವರಾಹ ಹರಿ ವಿಠಲದಾಸರು, ಮಂಡ್ಯ
'ಹರಿದಾಸ ಸುಧಾ' ಸ್ಮರಣ ಸಂಚಿಕೆ
ಪ್ರ : ಅಖಿಲ ಭಾರತ ಹರಿದಾಸ ಸಮ್ಮೇಳನ ಟ್ರಸ್ಟ್, ಬೆಂಗಳೂರು - 2004.
2. ಭಾವೀ ಸಮೀರ ಶ್ರೀ ವಾದಿರಾಜ ಗುರು ಸಾರ್ವಭೌಮರು
ಸಂ: ಶ್ರೀ ನಾರಳಮಠ ಅನಂತ ಉಪಾಧ್ಯಾಯ
ಪ್ರ : ಶ್ರೀ ಗುರುವಾದಿರಾಜ ಪ್ರಕಾಶನ, ಪುನರೂರು, ದ.ಕ. - 1996
3. ಉಡುಪಿ ಅಷ್ಟಮಠಗಳ ಗುರು ಪರಂಪರೆ
ಲೇ: ಡಾ| ವ್ಯಾಸನಕೆರೆ ಪ್ರಭಂಜನಾಚಾರ್ಯ
ಪ್ರ : ಐತರೇಯ ಪ್ರಕಾಶನ, ಬೆಂಗಳೂರು - 2002
4. ಕೀರ್ತನ ಮಂಜರೀ
ಗ್ರಂಥಕರ್ತರು : ಶ್ರೀ ವಿಶ್ವೇಂದ್ರ ತೀರ್ಥರು
ಪ್ರ : ಶ್ರೀ ಸೋದಾ ವಾದಿರಾಜ ಮಠ, ಉಡುಪಿ - 1955.
5. ವಿಶ್ವೇಂದ್ರ ತೀರ್ಥ
ಲೇ: ಶ್ರೀ. ಹಾ.
ಹೊಂಬಿದಿರು
ಪ್ರಧಾನ ಸಂಪಾದಕರು: ಡಾ. ನಾ. ದಾಮೋದರ ಶೆಟ್ಟಿ
ಪ್ರ : ಸ್ವಾಗತ ಸಮಿತಿ, ಅಖಿಲ ಭಾರತ 71ನೇ ಸಾಹಿತ್ಯ ಸಮ್ಮೇಳನ,
ಮೂಡಬಿದಿರೆ - 2003.
6. ಶ್ರೀ ಹರಿದಾಸ ವಿಜಯ
ಸಂ: ಶ್ರೀ ಗುರುಪ್ರಿಯವಿಠಲದಾಸಿ
ಪ್ರ : ಗುರುಕೃಪಾ ಗ್ರಂಥಮಾಲೆ, ಮೈಸೂರು - 2005.

7. ಪಾವಂಜಿ ಹರಿದಾಸವಾಣಿ
ಪ್ರ : ಪಾವಂಜಿ ಸತ್ಸಂಗ ಸಮಿತಿ, 1978
8. ಹರಿದಾಸ ಕೀರ್ತನ
(ಪಾವಂಜಿ ಹರಿದಾಸರ ಕೃತಿ ಸಂಪುಟ)
ಸಂ: ಪ್ರೊ. ಹೆರಂಜಿ ಕೃಷ್ಣ ಭಟ್ಟ
ಡಾ. ಪಾದೇಕಲ್ಲು ವಿಷ್ಣು ಭಟ್ಟ
ಪ್ರ : ಹೆರಂಜಿ ಕೃಷ್ಣ ಭಟ್ಟ ಅಭಿನಂದನ ಸಮಿತಿ, ಉಡುಪಿ - 2005.
9. ವರಾಹತಿಮ್ಮಪ್ಪರ ಕೀರ್ತನ ಸಂಪದ ಮತ್ತು ಉಡುಪಿ ಶ್ರೀಕೃಷ್ಣ ಚರಿತ್ರೆ
ಸಂ. : ಡಾ. ಶ್ರೀನಿವಾಸ ಹಾವನೂರ
ಪ್ರ : ಹರಿದಾಸ ಶ್ರೀ ನೆಕ್ಕಾರು ಕೃಷ್ಣದಾಸ ಪ್ರತಿಷ್ಠಾನ, ಉಡುಪಿ - 2003.
10. ಕೀರ್ತನಾಮೃತ
ಪಣಂಬೂರು ಶ್ರೀ ಗುರು ಸದಾನಂದರ ತುಳು ಭಾಷೆಯ ಕೃತಿಗಳು (ಮೂರನೆಯ ಸಂಪುಟ)
ಸಂ: ಪಿ. ಪುರುಷೋತ್ತಮ ಭಟ್, ಚಿತ್ರಾಪುರ
ಪ್ರ : ಕೆ. ವೆಂಕಟರಾಯಾಚಾರ್ಯ, ಸುರತ್ಕಲ್.
11. ಸಂತ ಶ್ರೀ ಡಾ| ಭದ್ರಗಿರಿ ಅಚ್ಯುತದಾಸರ ಸಂಕ್ಷಿಪ್ತ ಪರಿಚಯ ಪತ್ರ
ಪ್ರ : ಶ್ರೀ ಸಂತರ ಶಿಷ್ಯವೃಂದ ಹಾಗೂ ಭಕ್ತಾದಿಗಳು
12. ಭಜನೆ ಯಶೋದಮ್ಮ
ಪ್ರ : ಸುಗುಣಮಾಲಾ, ಎಪ್ರಿಲ್ 2001.
13. ಶ್ರೀ ವಾದಿರಾಜರ ಗುಣಮಹಿಮೆ
ಮಣಿಮಾಲಾ ಸ್ತೋತ್ರ
ಲೇ: ಶ್ರೀಮತಿ ಯಶೋದಾ ದೇವಿ
ಪ್ರ : ಶ್ರೀ ರಾಜಹಂಸ ಪ್ರತಿಷ್ಠಾನ (ರಿ.), ಬೆಂಗಳೂರು - 2003 (6ನೇ ಮುದ್ರಣ)
14. ಶ್ರೀ ಧರ್ಮಸ್ಥಳ ಮಂಜುನಾಥ ಸ್ವಾಮಿಯ ಸ್ತೋತ್ರಗಳು ಹಾಗೂ ಭಕ್ತಿಗೀತೆಗಳು
ಲೇಖಕಿ ಮತ್ತು ಪ್ರಕಾಶಕಿ: ಹರಿಕಥಾ ಪ್ರವೀಣೆ ಶ್ರೀಮತಿ ಯಶೋದಮ್ಮ, ಉಡುಪಿ -
1999.

15. ಕಂಜಾಕ್ಷಿ ಪರಿಣಯ (ಯಕ್ಷಗಾನ)

ಪುಟ ಸಂಖ್ಯೆ 61 & 62

ಲೇ : ಹೆಬ್ರಿ - ಕಂಡಿಗ ಪದ್ಮನಾಭ ಜೆನ್ನಿ

16. ನಾರದ ಪ್ರತಾಪ (ಯಕ್ಷಗಾನ)

ಪುಟ ಸಂಖ್ಯೆ - 61 & 62

ಲೇ : ಹೆಬ್ರಿ - ಕಂಡಿಗ ಪದ್ಮನಾಭ ಜೆನ್ನಿ.

17. ತುಳು ಪ್ರಾಚೀನ ಕಾವ್ಯಗಳು

ಲೇ : ಡಾ. ವಾಮನ ನಂದಾವರ

'ಡಾ. ಪಾಲ್ವಾಡಿ ರಾಮಕೃಷ್ಣ ಆಚಾರ್ ಅಭಿನಂದನ ಗ್ರಂಥ'

ಸಂ : ಡಾ. ನರೇಂದ್ರ ರೈ ದೇರ್ದ

ಪ್ರ : ಡಾ. ಪಾಲ್ವಾಡಿ ಅಭಿನಂದನ ಸಮಿತಿ, ದ.ಕ. - 2005.

18. ಸಂಸ್ಕೃತ ಸಾಹಿತ್ಯಕ್ಕೆ ಶಿವಳ್ಳಿಯವರ ಕೊಡುಗೆ

ಲೇ : ಡಾ. ಕೃಷ್ಣ ಮೂರ್ತಿ ನಿಟಲಾಪುರ

ಶಿವಳ್ಳಿ ಬ್ರಾಹ್ಮಣರು

ಸಂ : ಎಚ್. ಬಿ. ಎಲ್. ರಾವ್, ಮುಂಬೈ

ಪ್ರ : ಶಿವಳ್ಳಿ ಪ್ರತಿಷ್ಠಾನ, ಮುಂಬೈ - 2001.

19. ಪೊಲಿ ಕೆನರಾ 200 (ಪುಟ ಸಂಖ್ಯೆ : 429-430)

'ಪ್ರಾಚೀನ ಕನ್ನಡ ಸಾಹಿತ್ಯ'

ಲೇ : ಪಾದೇಕಲ್ಲು ವಿಷ್ಣು ಭಟ್

ಪ್ರ : ಜಿಲ್ಲಾ ಧಿಕಾರಿ, ದ.ಕ. ಜಿಲ್ಲೆ, ಮಂಗಳೂರು - ದ್ವಿತೀಯ ಮುದ್ರಣ - 2002

20. ಬಂಗ್ಲೆ ನಾರಾಯಣ ಕಾಮತರು

ಲೇ : ವಾಮನ ನಂದಾವರ

ಹೊಂಬಿದಿರು

ಪ್ರಧಾನ ಸಂಪಾದಕರು : ಡಾ. ನಾ. ದಾಮೋದರ ಶೆಟ್ಟಿ

ಪ್ರ : ಸ್ವಾಗತ ಸಮಿತಿ, ಅಖಿಲ ಭಾರತ 71 ನೇ ಸಾಹಿತ್ಯ ಸಮ್ಮೇಳನ, ಮೂಡಬಿದಿರೆ - 2003.

21. ಪಾವಂಜಿ ಗುರುರಾಯರು

ಲೇ: ಬಾ. ನ. ಶಾಂತಪ್ರಿಯ

ಹೊಂಬಿದಿರು

ಪ್ರ. ಸಂ.: ಡಾ. ನಾ. ದಾವೋದರ ಶೆಟ್ಟಿ

ಪ್ರ.: ಸ್ವಾಗತ ಸಮಿತಿ, ಅಖಿಲ ಭಾರತ 71 ನೇ ಸಾಹಿತ್ಯ ಸಮ್ಮೇಳನ,
ಮೂಡಬಿದಿರೆ - 2003.

22. ಕವಯಿತ್ರಿ ಮುಳಿಯ ಮೂಕಾಂಬಿಕಾ ಅಮ್ಮ

ಲೇ: ಗಂಗಾ ಪಾದೇಕಲ್

ದಕ್ಷಿಣ ಕನ್ನಡ ಜಿಲ್ಲೆಯ ಮೊದಲ ಲೇಖಕಿಯರು

ಸಂ: ಮನೋರಮಾ ಎಂ. ಭಟ್

ಪ್ರ.: ಕರಾವಳಿ ಲೇಖಕಿಯರ-ವಾಚಕಿಯರ ಸಂಘ (ರಿ.) ದ. ಕ. ಮತ್ತು ಕಾಸರಗೋಡು -
1996.

23. ಗೋಪಿ - ಕೃಷ್ಣ ಸಂವಾದೊ (ಒಳಲೇಖನ)

ಲೇ: ಜತ್ತಿ ಈಶ್ವರ ಭಾಗವತರ್

ಗೀತೆ ಮಲ್ಲಿಗೆ ಅನ್ನೀತುಳು ಕಾವ್ಯ ಭಗವದ್ಗೀತೆ

ಲೇ: ಮೂಲ್ಕಿ ನರಸಿಂಗ ರಾವ್, ಬಿ. ಎ., ಎಮ್. ಎಲ್.

ಡಿಸ್ಟ್ರಿಕ್ಟ್ ಜಡ್ಜ್ (ನಿವೃತ್ತ)

ಪ್ರ.: ಶ್ರೀ ವಿಠಲ ಪುಸ್ತಕ ಭಂಡಾರ, ಮಂಗಳೂರು - 2003 (ದ್ವಿತೀಯ ಮುದ್ರಣ)

24. ದಿ|ಜತ್ತಿಯವರ ಯಕ್ಷಗಾನ ಕೃತಿಗಳು ಮತ್ತು ಕೀರ್ತನೆಗಳು (ಸಂಪುಟ - 1)

ಪ್ರ.: ಶ್ರೀಮತಿ ಶಾರದಾ ಮತ್ತು ಶ್ರೀ ಜತ್ತಿ ಕೃಷ್ಣ ಭಟ್, ಮಂಗಳೂರು - 2006

25. ಕೀರ್ತನ ತರಂಗಿಣಿ (ಚಿತ್ರಾಪುರ ರಾಮ ಐಗಳ ಕೃತಿಗಳು ಮತ್ತು ದೇವತಾ ಸ್ತುತಿಗಳು)

ಲೇ: ಚಿತ್ರಾಪುರ ರಾಮ ಐಗಳ್

ಪ್ರ.: ಕೆ. ವೆಂಕಟರಾಯಾಚಾರ್ಯ, ವಿಜಯಾ ಸಾಹಿತ್ಯ ಮಾಲೆ, ಸುರತ್ಕಲ್, 1978

26. ಶ್ರೀ ವೆಂಕಟಗಿರಿ ಮಹಾತ್ಮೆ (ಕನ್ನಡ ಪದ್ಯ ಕಾವ್ಯ)

ಕವಿ: ಮಯ್ಯವಟಿ ವೆಂಕಟರಮಣಯ್ಯ

ಪ್ರ.: ವಿಜಯಾ ಸಾಹಿತ್ಯ ಮಾಲೆ, ಸುರತ್ಕಲ್ - 1985.

೧೫೪

27. ಸಂಕ್ಷೇಪ ಉತ್ತರಕಾಂಡ ರಾಮಾಯಣ (ಭಾಮಿನಿಷಟ್ಪದಿ)
ಲೇ : ಮಯ್ಯವಟಿ ವೆಂಕಟರಮಣಯ್ಯ
ಪ್ರ : ಪಾವಂಜಿ ಗುರುರಾವ್, ಶ್ರೀ ಮನ್ಮಥ್ ಸಿದ್ಧಾಂತ ಗ್ರಂಥಾಲಯ, ಉಡುಪಿ -
1930
28. ಕಾವೇರಿ ಮಹಾತ್ಮೆ (ಭಾಮಿನಿ ಷಟ್ಪದಿ)
ಲೇ : ಮಯ್ಯವಟಿ ವೆಂಕಟರಮಣಯ್ಯ
ಪ್ರ : ಉಡುಪಿ ಶ್ರೀ ಮನ್ಮಥ್ ಸಿದ್ಧಾಂತ ಗ್ರಂಥಾಲಯ
29. 'ಯಾತರದ ಹೂವೇನು ನಾತರದು ಸಾಲದೆ' (ಒಳ ಲೇಖನ)
ಲೇ: ನಾರಾಯಣ ಎ. ಬಂಗೇರ, ಮಿತ್ರಪಟ್ಟಿ
ಪ್ರ : 'ಮೊಗವೀರ' ಕನ್ನಡ ಮಾಸಪತ್ರಿಕೆ, ಮುಂಬೈ,
ಸಂಚಿಕೆ - ಆಗಸ್ಟ್ 2007
30. 'ಸಂತ ಶ್ರೀ ಭದ್ರಗಿರಿ ಕೇಶವದಾಸರ ಕೀರ್ತನೆಗಳು'
ಪ್ರ : ವಿಶ್ವಶಾಂತಿ ಆಶ್ರಮ, ಬೆಂಗಳೂರು - 1987

ಅನುಬಂಧ - 5

ಕ್ಷೇತ್ರಕಾರ್ಯೋಡು ಬೆರಿಸಾಯೊ ಕೊರಿನಂಚಿ ಮಹನೀಯೆರ್ /
ಮಹಿಳೆಯೆರ್

ಶ್ರೀಯುತ ಪು. ಶ್ರೀನಿವಾಸ ಭಟ್, ಕಟೀಲು
ಡಾ| ನರಹರಿದಾಸ್, ಕುತ್ತತ್ತೂರು
ಶ್ರೀಯುತ ವಸಂತ ನಾಯಕ್ ಪಲಿಮಾರ್ಕ್, ಮೂಲ್ಕಿ
ಡಾ| ಶ್ರೀನಿವಾಸ ಹಾವನೂರ
ಡಾ| ಪಾಲ್ಕಾಡಿ ರಾಮಕೃಷ್ಣ ಆಚಾರ್
ಡಾ| ನಾ. ದಾಮೋದರ ಶೆಟ್ಟಿ, ಮಂಗಳೂರು
ಆಡಳಿತ ಮಂಡಳಿ, ಪಾವಂಜೆ ಶ್ರೀ ಸುಬ್ರಹ್ಮಣ್ಯ ದೇವಸ್ಥಾನ, ಪಾವಂಜೆ
ಶ್ರೀಯುತ ಪಿ. ಪುರುಷೋತ್ತಮ ಭಟ್, ಚಿತ್ರಾಪುರ
ಶ್ರೀಯುತ ಪದ್ಮನಾಭಯ್ಯ (ಸಂಜೀವರಾಯರು) ದಂಪತ್ಯೆರ್, ಅಗ್ಗಿದ ಕಳಿಯ
ಶ್ರೀಮತಿ ಇಂದಿರಮ್ಮ, ಸಸಿಹಿತ್ತು
ಶ್ರೀಮತಿ ಇಂದಿರಾ ಹಾಲಂಬಿ, ಉಡುಪಿ
ಶ್ರೀಮತಿ ಯಶೋದಾ ಜೆನ್ನಿ, ಹಿರಿಯಡ್ಕ
ಶ್ರೀಯುತ ಅನಂದ ಶೆಟ್ಟಿಗಾರ್, ಸುರತ್ಕಲ್
ಶ್ರೀಯುತ ದಿ| ಪೂವಪ್ಪ ಗುರಿಕಾರ್, ಸುರತ್ಕಲ್
ಶ್ರೀಮತಿ ಇಂದಿರಾ ನಾಗೇಶ್ ದಂಪತ್ಯೆರ್, ಉದ್ಯಾವರ
ಶ್ರೀಯುತ ವಿಷ್ಣು ಬಿ. ಶೆಟ್ಟಿಗಾರ್, ಸುರತ್ಕಲ್
ಶ್ರೀಯುತ ಕಳುವಾರು ರಾಮಚಂದ್ರರಾವ್ ದಂಪತ್ಯೆರ್, ಮಂಗಳೂರು
ಶ್ರೀಯುತ ಬಿ. ವರದರಾಜ ಬಾಳಿಗ, ಮಂಗಳೂರು
ಶ್ರೀಯುತ ಸಂತ ಭದ್ರಗಿರಿ ಅಚ್ಯುತ ದಾಸೆರ್, ಬೆಂಗಳೂರು
ಶ್ರೀಮತಿ ಗಂಗಾ ಪಾದೇಕಲ್, ಮಂಗಳೂರು
ಶ್ರೀಮತಿ ಬಿ. ಯಂ. ರೋಹಿಣಿ, ಮಂಗಳೂರು
ಚಿಟ್ಟಾಡಿ ಶ್ರೀ ಶಾರದಾಂಬಾ ದೇವಸ್ಥಾನದ ಅರ್ಚಕರು, ಚಿಟ್ಟಾಡಿ

ಹರಿದಾಸಿ ಉಡುಪಿ ಯಶೋದಮ್ಮ
 ಶ್ರೀಯುತ ಕೆರೆಮಠ ಹರಿದಾಸ ಉಪಾಧ್ಯಾಯ, ಮೂಡುಬೆಟ್ಟು
 ಶ್ರೀಯುತ ಯಜ್ಞೇಶ ಆಚಾರ್ಯ, ಹೊಸಬೆಟ್ಟು
 ಶ್ರೀಯುತ ವೆಂಕಟರಾಜ ಪುಣೆಚಿತ್ತಾಯ
 ಶ್ರೀಯುತ ಶ್ರೀಶದಾಸೆರ್, ಉಡುಪಿ
 ಶ್ರೀಮತಿ ವಸುಮತಿ ಭಟ್, ಉಡುಪಿ
 ಶ್ರೀಮತಿ ಶಾರದಮ್ಮ, ಕಂಕನಾಡಿ
 ಶ್ರೀಮತಿ ಕಸ್ತೂರಿ ಟೀಚರ್, ಕಟೀಲು
 ಶ್ರೀಯುತ ಶ್ರೀಧರ ಭಟ್, ಉಡುಪಿ ಶ್ರೀಕೃಷ್ಣ ಮಠ
 ಶ್ರೀಯುತ ಪ್ರಕಾಶ್ ಟಿ. ಯಸ್., ದಂಪತ್ಯೆರ್, ಶ್ರೀ ರಾಘವೇಂದ್ರ ಮಠ,
 ಮಂಗಳೂರು

ಶ್ರೀಮತಿ ಶಕುಂತಲ ಭಟ್, ಹಳೆಯಂಗಡಿ
 ಶ್ರೀಮತಿ ವಿಜಯಲಕ್ಷ್ಮಿ, ಮಜೂರು
 ಶ್ರೀಯುತ ಲಕ್ಷ್ಮೀಶ ದಂಪತ್ಯೆರ್, ಮಜೂರು
 ಶ್ರೀ ನಂದನೇಶ್ವರ ದೇವಸ್ಥಾನದ ಆಡಳಿತವರ್ಗ, ಪಣಂಬೂರು
 ಶ್ರೀಯುತ ಕೆ. ಬಾಲಕೃಷ್ಣ ಭಟ್, ಕಂಕನಾಡಿ
 ಶ್ರೀಯುತ ಯಶವಂತ ಬೋಳೂರು, ಉರ್ವ ಮಾರಿಗುಡಿ ಆಡಳಿತ ಮಂಡಳಿ

ಸದಸ್ಯೆರ್

ಮೊಕ್ತೇಸರೆರ್ ಬೊಕ್ಕ ಆಡಳಿತ ಮಂಡಳಿದ ಸದಸ್ಯೆರ್,

ಉರ್ವ ಶ್ರೀ ಮಾರಿಯಮ್ಮ ದೇವಸ್ಥಾನ

ಶ್ರೀಯುತ ರಾಮಚಂದ್ರ ಹೆಬ್ಬಾರ್, ಟ್ರಸ್ಟಿ,

ಶ್ರೀ ನಂದನೇಶ್ವರ ದೇವಸ್ಥಾನ, ಪಣಂಬೂರು

ಶ್ರೀಯುತ ಲಕ್ಷ್ಮೀಶ ಐಗಲ್, ಹೊಸಬೆಟ್ಟು, ಸುರತ್ಕಲ್

ಪುಷ್ಪಲತ ಶಿರ್ಲಾಲ್



ದಾಸೆರ್ನ್ ದಾಸಿಗೊಂಜಿ ಪುಗಾರ್ಮೆ

ಹರಿದಾಸ ಸಾಹಿತ್ಯ ನಂಕ್ ಪೊಸತತ್ತ್. ಪುರಂದರ ದಾಸೆರ್, ಕನಕ ದಾಸೆರ್, ವ್ಯಾಸ ತೀರ್ಥೆರ್, ವಿಜಯ ದಾಸೆರ್ ಇಂಚ ಕರ್ನಾಟಕೊಡು ಭಕ್ತಿಮಾರ್ಗೊಗು ಪೊಸಬಾಕಿಲ್ ತೋಜಾದ್ ಕೊರ್ಪು, ಉಡಲ ಮಂಟಮೆಡ್ ಕುಲ್ದಿನ ದೇವೆರೆಗ್ ಭಕ್ತಿದ ಸುಗಿಪು ಮಲ್ತಿನಕ್ಲ ಮಸ್ತ್ ಜನ. ಕನ್ನಡೊದ ಅನೇಕ ಕೀರ್ತನೆಲು ಪುಸ್ತಕದ ರೂಪೊಡು ನಂಕ್ ತಿಕ್ಕುವ. ಆಂಡ ತುಳುನಾಡ್ಡ್ ತುಳುಬಾಸೆಡ್ ಭಕ್ತಿ ಸುಗಿಪುದ ಪದೊ ಬರೆತಿನ ಹರಿದಾಸೆರ್ಕ್ಲೆನ ಗೆಣಿಪು ದಾಲಾ ಕಮ್ಮಿ ಅತ್ ಪನ್ನಿನವು ನಂಕ್ ತೆರಿಯಂದೆ ಪೋತಂಡ್. ಆ ಒಂಜಿ ಕುಂದೆಲ್ನ್ ಕರೆ ಒಂದಾದ್, ತನ್ನ ಕ್ಷೇತ್ರ ಕಾರ್ಯೊದ ಪುನೆಚ್ಚಿಲ್ಡ್ ಸುಮಾರ್ ಐವತ್ತೊಂಜಿ ಜನೊ ತುಳುನಾಡ್ಡ್ ಹರಿದಾಸೆರೆನ್ ಬೊಲ್ಕಿರಿಗ್ ಕನಪಿನ ಮಲ್ಲ ಬೇಲೆ ಬೆನ್ನಿನಾರ್ ಪೆರ್ಮೆದ ತುಳುವೆದಿ ಬಿ. ಕೆ. ಶ್ರೀಮತಿ ರಾವ್. ಆರ್ ಸ್ವತಃ ಹರಿದಾಸೆದಿ; ಹರಿದಾಸ ಪರಂಪರೆದ ಬಗೆಟ್ ಗೌರವ ದೀವೊಂದಿನಾರ್. ಮದೆಕ್ ಸೇರ್ದಿತ್ತಿನ ತುಳು ಕೀರ್ತನೆಲೆನ್ ಶೋಧನೆ ಮಲ್ತ್ ಬೂಕುದ ಒರುಟು ಕೋಪೆಕೋತುದು ಕೊರ್ನ್ ಆರೆಗ್ ಸರ್ವ ತುಳುವೆರ್ನ್ ಪುಗಾರ್ಮೆ ಸಂದೊಡೆ.

ಕುಡ್ಲದ ಸೈಂಟ್ ಆಗ್ನೇಸ್ ಕಾಲೇಜ್ಡ್ ಕಚೇರಿ ಮುತಾಲಿಕೆರಾದ್ ನಿವೃತ್ತರಾಯಿನ ಬಿ. ಕೆ. ಶ್ರೀಮತಿ ರಾವ್, ಆ ನಂತೊದ ತನ್ನ ಬದ್ಕನ್ ಬರವುದಪ್ಪೆನ ಚಾಕ್ರಿಗ್ ಮುಡಿಪು ದೀತೆರ್. ಮೈಸೂರ್ಡ್ ಶ್ರೀ ಗುರುಗೋವಿಂದ ವಿಠಲ ದಾಸೆರ್ನ್ ಶಿಷ್ಯರಾಯಿನ ಮಂಡ್ಯದ ವರಾಹ ಹರಿವಿಠಲ ದಾಸೆರೆಡ್ಡ್ ಬೊಕ್ಕ ಮೈಸೂರ್ಡ್ ಮುಕುಂದ ವಿಠಲ ದಾಸೆರೆಡ್ಡ್ (ಗುರುಗೋವಿಂದ ವಿಠಲ ದಾಸೆರ್ನ್ ಸುಪುತ್ರೆರ್) 'ದಾಸದೀಕ್ಷೆ' ಪಡೆತೊಂದು 'ಶ್ರೀ ಗುರುಪ್ರಿಯವಿಠಲದಾಸಿ' ಪನ್ನಿ ಪುದರ್ಡ್ ಹರಿಸೇವೆ ಮಲ್ಪುನೆತ್ತ ಒಟ್ಟುಗು ಕನ್ನಡ ಬೊಕ್ಕ ತುಳು ಬಾಸೆಡ್ ಸುಮಾರ್ ಇರ್ದತ್ತೊಂಜಿ ಬೂಕುಲೆನ್ ಪ್ರಕಟ ಮಲ್ತೆರ್.

'ಅಮೃತವರ್ಷಿಣಿ'ಡ್ಡ್ ಬತ್ತಿನ 'ಪಂಚಮುಖ್ಯಪ್ರಾಣ' ಮುಟ್ಟ ಕಬಿತೆ, ಭಜನೆ, ಭಕ್ತಿಗೀತೆ, ಶಿಶುಗೀತೆ, ಸಂಪ್ರದಾಯೊತ ಪದೊಕ್ಲ, ಪೌರಾಣಿಕ ಕಥೆಳ್ಳ ಗೊಂಚಿಲ್, ಹರಿದಾಸ ಸಾಹಿತ್ಯಗ್ರಂಥ, ದನಿಸುರುಳಿ ಸಾಹಿತ್ಯ- ಇಂಚ ನಾನಾ ಮರ್ಗಿಲ್ಡ್ ತನ್ನ ಸಾಹಿತ್ಯ ಚಾತುರ್ಪುನು ನೆಗಪಾವುನ ಬೂಕುಲೆನ್ ಆರ್ ಬೊಲ್ಪುಗು ಕನತ್ದೆರ್. 'ತುಳುನಾಡ್ಡ್ ಹರಿದಾಸೆರ್ ಬೊಕ್ಕ ತುಳು ಕೀರ್ತನೆಲು' ಪನ್ನಿನ ಈ ಕೃತಿತ ಮಲ್ಲಾದಿಗೇನೇ ಬೇತೆ. ಉಂದು ಸಂಶೋಧನೆತ ಮಾಮಲ್ಲ ಬೇಲೆ. ನೂದುಕಾಲ ದಾಕ್ಲೆ ಆದ್ ಒರಿಪುನವು. ಕರ್ನಾಟಕ ತುಳುಸಾಹಿತ್ಯ ಅಕಾಡೆಮಿ ನೆನ್ನ್ ಕೊಂಡಾಟೊಡು ಎದೊಂದಂಡ್.

ದಾಸ ಸಾಹಿತ್ಯದ ಮಲ್ಲ ಕಡಲ್ಡ್ ಪೂರ್ಲಮುತ್ತುಲೆನ್ ಪೆಜ್ಜಾದ್ ತುಳುವಪ್ಪೆ ಕಂಟಿಲ್ಗ್ ಸಿಂಗಾರೊದ ಮಾಲೆ ಪಾಡಿನ ಹರಿದಾಸಿ ಬಿ. ಕೆ. ಶ್ರೀಮತಿ ರಾವ್ ನನಲಾತ್ ಬರೆದ್ ತುಳುಸಾಹಿತ್ಯೊದ ಕರಜನ ದಿಂಜಾವಡ್.

ಭಾಸ್ಕರ ರೈ ಕುಕ್ಕುವಳ್ಳಿ
ಪ್ರಾಧ್ಯಾಪಕೆರ್, ಸರಕಾರಿ ಪ.ಸಾ.ಕಾಲೇಜು, ಜೇಳ್ಯಾರ್
ಕರ್ನಾಟಕ ತುಳುಸಾಹಿತ್ಯ ಅಕಾಡೆಮಿ ಸದಸ್ಯೆರ್.